



DUKE
UNIVERSITY



LIBRARY



1000
1000
[Fondencil]

Saint vol. 2ème

Barbier II - 759

Digitized by the Internet Archive
in 2016





11
HISTOIRE
DES
MOVVEMENS
DE BOVRDEAVX.

Premier Tome.


J. Fonteneau



A BOVRDEAVX,

Chez I. MONGIRON MILLANGES, Imprimeur
ordinaire du Roy. Rue S. Iamnes.

M. DC. LI.





944,71
F6834

HISTOIRE
DES MOUVEMENS
DE BOVRDEAUX,
DEDIEE A
MONSEIGNEVR
LE PRINCE
DE CONDE'



ONSEIGNEVR,

*Cet Ouvrage, qui tire sa naissance de l'amour
de sa liberté, attend son acheuement du desir de la
vostre. Il languissoit dans la poussiere, pendant*

à ij

627765

E P I S T R E.

qu'on retenoit *VOSTRE ALTESSE* en prison; Et si le iour ne vous eust esté rendu, il n'eust jamais voulu voir pour luy. On ne peut estre Bourdelois, sans estre fortement attaché à vos interests, puis que *V. A.* a prins la protection des nostres, dans le temps auquel ceux à qui nous les auions cōfiez, les auoient jettez dans le desespoir. La compassion que vous auez eue pour nos miseres a fait vostre crime: Il estoit juste que le ressentiment fit nostre peine, & que nostre reconnoissance, decouurant l'injustice de nostre malheur, condamnast la malice de vôtre accusatiō. *MONSEIGNEVR*, l'artere qui forme le poulx, quoy qu'esloignée du cœur, donne les premieres marques du venin qui l'attaque. Bourdeaux, vn des coins les plus reculez de la France, a fait entendre à tous la ruyne de l'Estat que trainoit avec luy vostre emprisonnement, & se seruant du remede que pratiquent les Medecins contre les Lethargiques, il a fallu qu'il ayt esmeu Paris, qui redonnant la liberté à *V. A.* rendist le repos à la France, & chassast la cause de son mal. Combien a perdu l'Estat de momens, dans lesquels vostre valeur pouvoit estendre ses conquestes & augmenter sa gloire? Combien a-t'il veu flestrir de *Lauriers* dont vous auez couronné sa teste? Com-

E P I S T R E.

bien a-t'il souffert de convulsions qui l'ont porté jusques dans l'agonie ? Il sembloit que le Genie qui veille pour sa garde, eust abandonné sa conduite, par l'injustice qu'on vous avoit rendu, & qu'il ne fust mécontêt que pource que vous estiez captif. Enfin, MONSEIGNEUR, la Justice a brisé vos fers, & la Calomnie a eschoüé au Havre, où elle croyoit trouver sa grace. Bourdeaux vous a voulu, Paris vous a demandé, & la France vous voit libre. Je n'ay plus rien à souhaitter, si non que V. A. ayt cette bonté d'agréer cette chetive avance, comme une exprefion des respects que ie luy dois ; & qu'elle me permette de prendre la qualité que j'affecte avec plus de passion, comme ie la reçois avec plus de gloire que toute autre, de,

MONSEIGNEUR,

Vostre tres-humble, tres-obeyssant
& tres-fidel Seruiteur,


FONTENEIL.

A V L E C T E U R.

AMY Lecteur, je voudrois te pouvoir donner la suite de cette Histoire au même temps que ie te presente son commencement. L'embarras des emplois qui m'occupent m'en oste le moyen, mais non pas l'esperance de te faire voir dans quelques iours, par vn second Volume, le couronnement de cet ouvrage. Si les Gouverneurs des Prouinces font des reflexions serieuses sur le progrez & la fin de tous ces mouuemens, ils apprendront combien il est important de sçauoir allier l'amour avec l'autorité, & combien il est dangereux de forcer vn peuple à faire par vn desespoir la discussion de ses forces, lesquelles sont tousiours foibles quand elles ne sont pas cōnuës. C'est vn prodige de voir qu'un fils se souleue contre son Pere qui le frappe, pour ce que l'amour qui les vnit, rend les coups moins sensibles pour si rudes qu'ils soient. Mais on voit bien souvent des Maistres estouffez par leurs seruiteurs, qui changeant leur respect en hayne par la persecution, cherchent à se venger de la brutalité qui les traite sans raison & sans amitié. Il est des peuples comme des Lions quel'on appruiuise. Ils obeyssent tout autant qu'on les flatte, ils craignent quand ils voyent vn baston leué, mais soudain qu'on appuye sur eux, se seruant du courage que la Nature leur donne, ils dechirent la main qui les outrage, & apprennent à celuy qui les commande qu'ils ne souffrent les fers que pour ce qu'ils les veulent. La tyrannie est le germe de la reuolte. L'amour est le Maistre des cœurs, & on ne void jamais cōspirer contre celuy qu'on ayme. C'est le malheur des Grands de se persuader que pour ce qu'ils sont esleuez, ils doiuent traiter de mespris tout ce qui est au dessous d'eux, sans considerer que leur Grandeur emprunte son esclat de la subsistâce qu'elle tire des choses basses: de mesme que le Cedre ne porte sa teste jusques aux nuës que par la nourriture que luy fournit la terre, qui embrasse sa racine & son pied.

Les Sujets doiuent obeyssance & fidelité à leur Prince, le Prince doit amour & justice à ses Suiets. C'est vn enchainement mutuel, dont le moindre manquemēt esbranle l'Estat: de même qu'aux ouvrages faits à la Mosaïque, le destachement fait de la moindre piece ruyne la beaurté de cette liaison. Les peuples sont obligez d'agréeer ceux que les Roys leur donnent pour les commander; mais aussi les Roys doiuent escouter la voix du peuple, qui gemit sous la rigueur de ces Gouverneurs, qui bien loin de porter l'image du

Prince, qui n'esclatte que par des rayons de bonté, se couvrét d'un faux visage, sur lequel on ne voit que seuerité & supplices, & font passer pour un Comte celuy que l'on adore cōme Pere. Bourdeaux est remarquē dans toutes les Histoires pour vne Ville des plus fideles au seruice des Roys. Il a tousiours eu grād respect & amour pour tous ses Gouverneurs. Il n'a jamais eschappē que quand on l'a voulu enchaîner ; & le vray moyen de le vaincre, c'est de ne le vouloir pas combattre. La douceur est un charme auquel il prend plaisir de se laisser piper. La violence l'aigrit, & rappelant l'image de la generosité de ses Ancestres, ils s'anime à monstrier qu'elle ne vieillit point par les années, & qu'elle conserue tousiours assez de forces pour se deffēdre de la persecution. Si le Duc d'Espernon eust marché sur les pas de tant d'Illustres Personnages qui l'auoient deuançē dans le Gouvernement de Guyenne, & que pratiquant la même Politique, il eust pensé à s'attacher aux Habitās par amour, Bourdeaux n'eust pas estē le Theatre de tant de desordres. On n'y eust pas veu representer tāt de personnages sous des visages si differēts. Le commandement & l'obeyssance, l'autorité & le respect eussent estē vnīs par vne parfaite intelligence, au lieu que par le contrepied on n'a veu que de fieres demarches par des mauvais Cōseils, des Habitās diuisez par lascheté des freres infidelles, & des esprits debauchez par la force de l'interest. Cette belle Ville eust serui d'exemple à la vengeance & à l'indignation, si Dieu flēchi par les prieres de tant de gens de bien qu'elle renferme, & touché de compassion de sa misere, qui poussoit ses souspirs jusques dans le Ciel, n'eust conserué par vne protection visible, assez de cōeur & de generosité dans vne partie deses Habitans, pour vaincre la malice de ses propres enfans, qui taschoient à dechirer ses entrailles, & les donner en proye aux Estrangers qu'ils appelloiēt à sa ruyne. L'Histoire apprendra le detail de ce que ie te dis en gros. J'ay fait ce que i'ay pen pour ne fascher personne. Je demande pardon à celuy qui se croyra piqué, & le supplie de vouloir imputer le blasme (si on en doit donner) à la Loy qu'impose la vérité à celuy qui redit les actions des autres. Cette même vérité, qui ne croit pas faire injure à la pudeur de son sexe quand elle paroist nuē, me sert d'excuse, si i'en ay pas dōné à cette Histoire tous les ornemēs qu'elle pouvoit auoir. Il est vray aussi que ie ne pouvois donner des tresors que ie n'ay pas. J'ay dit ce que i'ay sceu, i'ay fait ce que i'ay peu. C'est tout ce que l'on doit desirer. Ayme moy, Lecteur, & Adieu.





HISTOIRE DES MOUVEMENS DE BOVRDEAVX.

Liure Premier.

DE LA GUYENNE.

CHAPITRE PREMIER.



A naissance de la Guyenne, la verité de ses bornes, & la forme de son ancien Gouvernement, sont esgalement inconnus; & combien que l'on fouille les secrets des Histoires les plus reculées, on n'en peut tirer que des foibles conjectures. I'oseray neantmoins asseurer qu'elle n'est pas plus ancienne que Bourdeaux, puis que cette Ville, que les anciens Geographes ont appelé Aquita, & qui vray semblablement a tousiours

fait la teste de cette Prouince; luy a donné sans doute le nom d'Aquitaine, que les vns ont renfermée entre la Garonne & les Pyrenées, & les autres portant les confrontations plus auant, l'ont fait commencer dans la source du Loyre; & courant avec luy iusques au dessous de Nantes, où il s'abyfme dans la Mer, luy font reprendre l'Ocean, le long de la coste de Bayonne, pour suiure tout ce qu'embrassent les Pyrenées iusqu'à la Mer Mediteranée; si bien qu'elle enuelope par ce moyen vne partie de la Bretagne, tout le Poitou, le Berry, l'Auvergne, le Limosin, la Marche, Xaintonge, Perigord, Augoumois, Quercy, le Bourdellois, Bazadois, l'Agenois, Condomois, la Gascoigne, les Landes, la Biscaye, le Languedoc, la Bigorre, l'Albret, Armagnac, Comenge, la Conté de Foix & le Bearn. D'autres encore l'ont partagée en trois parties, dont la premiere enferme ce qui est entre le Loyre & la Garonne; à la deuiziesme ils baillent pour son lot ce qu'embrassent la Garonne, la Mer ou l'Ocean Aquitanique, & les Pyrenées. Ils nommoient la troisiemesme Nouempopulania, que l'on croit estre la ville d'Auchs, à cause des neuf peuples qui luy estoient sujets, & que quelques-vns ont estimé estre la veritable Gascoigne. Mais en la façon que l'on parle à present de la Guyenne, elle doit estre considérée d'une autre sorte; & tantost il faut estendre, puis retrancher ses bornes, car si l'on remonte iusqu'au temps qu'elle portoit le tiltre de Duché, & en la forme qu'Elconor la possedoit, quand elle la porta en mariage à Louys VII. Roy de France, & depuis à Henry II.

Roy d'Angleterre, elle ne comprenoit que le Bourdelois, Bazadois & les Landes. Comme ressort du Parlement de Bourdeaux, elle contient les Basques, Mauléon de Soule, Lixarre, les Landes, Acqs, Bayonne, S. Seuer, le mont de Marfan, Albret, Condom, le Bourdelois, Bazadois, Agenois, Limosin, Perigord & la Xaintonge. Le Gouvernement s'estend sur les mesmes Seneschaussées, sauf pour le Limosin & la Xaintonge, qui sont des Gouvernemens destachez, & va iusques aux portes de Tolose, & comprend encore en son destroict l'Armagnac & le Quercy. La Primace n'a pas d'autorité sur les Landes, Bazadois & Limosin, mais en revanche, Angoulesme, Poitiers, Maillezais & Luçon releuent d'elle, si bien qu'il est mal-aisé de luy prescrire des bornes certaines, dans la diuersité des puissances qui la commandent.

LA forme de sa premiere conduite est au delà de nostre connoissance, toutefois il est croyable que comme les peuples estoient auant les Roys, & que c'est de leur main qu'ils ont receu leurs Sceptres & leurs Couronnes (quoy que cette autorité qui n'estoit qu'electiue dans son commencement, ayt esté renduë hereditaire en France en la personne des masles par la force de la Loy Salique) que la Guyenne, suiuant l'exemple des autres Nations, se gouvernoit par elle-mesme, & par la conduite de ceux, qui receuoient du choix de ses peuples cette souueraineté temporelle. I'estime que la Iurisdiction des Escheuins, Iurats & Consuls des Villes, que nos Princes, quoy qu'absolus dans leur Royaume, ont conserué à leurs Sujets, est l'image, ou plustost le debris

de cette puissance populaire ; d'autant plus que les Jurats de Bourdeaux, aux iours de leurs ceremonies, font marcher au deuant d'eux vn Heraut, portant la toque de velours noir sur la teste, & reueſtu d'une caſaque de velours rouge, paſſemée de fleurs de Lys rehauffées d'or, comme vne marque bien ſenſible de leur ancienne Souueraineté. Mais l'ambition flattant les eſprits des plus releuez, leur inspira des penſées pour la Royauté. Les premiers qui ſe laiſſerent emporter à cette paſſion, furent Galateus & vn Grofarius Pictus, qui donna le nom à Poictiers, comme la capitale de ſon Eſtat : deſorte que la Guyenne, dont les armes, jointes avec celles du reſte des Gaules, auoient donné l'effroy au Capitole de Rome, ſe vid en peu de temps par ſa propre diuiſion, & par le partage que ces Roytelets firent de ſes terres, la matiere des trophées des Romains. Hannibal paſſant d'Eſpagne en Italie en conquit vne partie, Pompée s'eſtendit deuers les Pyrenées, Publius Craſſus Lieutenant de Ceſar, fit de grands progrez dans l'Armagnac, & ayant fait priſonnier le General Adcantuam, eſtant tout bouffy de la victoire qu'il auoit peu de iours auparauant remporté ſur C. Valerius & L. Manlius Proconſuls, il luy fit eſprouuer le ſort des armes & l'inegalité de la fortune. La Guyenne que nous habitons, fuſt la derniere qui plia ſous les armes de Rome, auſquelles elle euſt fait teſte, ſi laſſée des perſecutions de ceux qui la commandoient, elle n'eueſt eſté obligée, pour respirer l'air d'un Gouvernement plus doux, de ſe faire Prouince des Romains, ſous le Gouvernement d'Agrippa Lieutenant d'Auguſte,

auquel on substitua les Presidens de Prouince, entre lesquels nous trouuons qu'un Leocadius fut enuoyé dans la Guyenne, au temps du mesme Empereur, pour faire le dénombrement de ceux qui l'habitoient, en la façon qu'Herode le fit par le mesme ordre dans la Galilée. A Leocadius succeda Estienne, qui apres auoir esté instruit dans le Christianisme par S. Martial, mourut à Limoges, dont le monument & les reliques s'y voyent encore, dans l'Abaye consacrée à l'honneur de ce Saint. Germanicus commanda quelque temps dans la Guyenne sous Tybere en qualité de Censeur, & depuis il y fust enuoyé Gouverneur pour vn an sous Galba. Les Romains estoient exacts dans leur forme de Gouverner, & leurs Presidens de Prouince, ou les Gouverneurs qu'ils enuoyoient, estoient tousiours soumis dans vne obeysance au eugle: cela n'empescha pas pourtant que du temps de l'Empereur Galien fils de Valerian, en l'an 257. Tetricus, qui estoit President dans la Guyenne, ou suiuant le rapport d'autres Historiens, Aureolus ayant reconnu la force de la Prouince, & la generosité de ses habitans, qui ne cedit point à celle des Romains, apres auoir esté esleué dans le bouclier suiuant leur pratique, & s'estre fait proclamer Empereur, ne receut le mâteau Imperial à Bourdeaux, d'où les Romains piquez de cette reuolte, ayant porté leurs armes dans la Guyenne, & donné la frayeur à cet vsurpateur, le contraignirent de reconnoistre ses Maistres, & renoncer aux pretentions de l'Empire, entre les mains de Claude successeur de Galien.

Les Empires & les Estats, de mesme que les corps,

ont leur foiblesse & leur caducité. Les Gots estans venus dans l'Italie en l'an 403. au temps que l'Empire de Rome ne se soustenoit presque que par la reputation de sa premiere valeur, firent de grands progres sous la conduite d'Alaric & Rhadagese leurs Generaux, & deux ans apres s'estans ioints avec les Lionois & les Bourguignons, ils pousserent leurs conquestes iusques dedans la Guyenne, & ayant rauagé le Limosin, Perigord, Bourdeaux & beaucoup d'autres Prouinces voisines, ils y establirent leur tyrannie sous le tiltre majestueux de Royauté, qui fust longuement possedée par VValla, continuée en Theodoric, portée de sa main en celle de Thorismond son fils, & de là à Theodoric Second, puis à Erric ou Euarix, & successiuent continué iusqu'à ce que Clouis premier Roy de France Chrestien, ayant battu Alaric prez de la riuere du Claim, le poursuiuit iusqu'à Bourdeaux, où il le desfit entierement dans vn vilage proche de la Ville, qui depuis a tousiours porté dans son nom de Camparrian, l'histoire de la glorieuse defaite de la tyrannie de ces vsurpateurs, & de l'heresie d'Arrius qu'ils professoient: en sorte que la Guyenne, apres auoir demeuré 450. ans sous la domination des Romains, 92. sous celle des Gots, elle fut inseparablement attachée par ce coup heureux, à la Couronne de France.

CETTE Prouince fust deslors tellement considerée dans l'Estat, qu'elle fust iugée meriter de seruir d'appanage aux enfans de France, sous le tiltre de Royaume. Clodomir le dernier des enfans de Clouis, en print possession en qualité de Roy, mais ayant esté tué les

armes à la main, par Gondemar l'un des Roys de Bourgogne, il laissa ce Royaume à Clodoald son fils, qui ayant esté effrayé par la mort de Gontier & Todoald, ses aysnez massacrez par leurs oncles, se retira dans un Hermitage proche de la Seine, où il vescu si saintement, qu'aprez sa mort il fut appelé S. Cloud par les Parisiens. Si bien que Clotaire premier, qui pendant la vie de Clouis son pere, estoit Roy de Soissons, ayant esté fait Roy de France apres sa mort, & recüeillant comme plus proche, le Royaume de Clodoald son frere, il le bailla à Sigisbert son quatriesme fils, sous le tiltre de Roy de Bourdeaux & de la Guyenne, qui luy fust contesté par Clouis fils de Chilperic, lequel assiegea Bourdeaux avec si peu de succez, que les Bourdelois combatans vaillamment pour l'intrest de leur Prince, sous la conduite de Sinephe Lieutenant de Sigisbert, l'obligerent de leuer honteusement le siege. Ce tiltre auguste rayonna sur la teste de la Guyenne, à trauers les broüillards qui troublôient le serain de la France, iusques à ce qu'en l'an 516. & suiuant quelques vns 519. cette Monarchie presque dechirée se reünit en Clotaire II. qui pour obliger Sadregefile, à vn soin plus exact pour l'esleuation de son fils Dagobert, luy donna la Guyenne en tiltre de Duché. Mais cette gratification fust bien mal reconnuë, car cet esprit ambitieux ne se contentant pas d'estre Duc, il en voulut estre le Roy, par vne presumption de laquelle il receut bien-tost le chastiment, ayant eu la barbe rasée en signe d'ignominie, par le commandement de Clotaire, qui par la bonté naturelle à nos Roys, luy conserua depuis la

Guyenne pour sa vie. Il ne fut pas mort, que ses enfans successeurs & heritiers de son ressentiment, s'y voulurent maintenir par la force, mais il leur fut osté, & en estans desclarez indignes, comme felons, il fut reüny à la Couronne, d'où depuis il fut destaché par Dagobert estant fait Roy de France, qui le donna en appanagé à tiltre de Royaume à son frere Aubert ou Aribert, qui ne le posseda pas long-temps, parce qu'il mourut bien-tost, & Chilperic son fils ne luy ayant pas aussi beaucoup suruescu, il reuint à Dagobert, auquel succeda Clouis ou Louys II. qui fust proclamé Roy de Paris & de Guyenne, & le transporta par succession en cette qualité à Clotaire III. les successeurs duquel se rendirent tellement faineans, que preferans leurs plaisirs & la molesse de la vie à la conduite de cette Monarchie, ils se laisserent vsurper par les Maires du Palais, presque toutes les marques les plus illustres, & le plus haut pouuoir de la Royauté: ce qui donna de fort mauuaises impressions dans l'esprit des peuples, desquels Odon ou Eude tira de si grands aduantages, qu'il se fit eslire Duc de Guyenne sous Charles le simple, qui se contentant de passer le Loyre, pour rauager la Guyenne, reserua la defaite de ce nouueau Duc pour Charles Martel, qui le desfit dans le Limosin.

Les Sarrafins qui habitoient dans l'Espagne, ayant trauersé les Pyrenées, & descendu dans la Guyenne en l'an 730. prins Bourdeaux d'assaut, rauagé l'Esglise S. André, pillé la Ville, passé la Garonne, pour aller au pillage de Poictiers, preparerent vne nouuelle matiere de guerre à Charles Martel, qui ne se sentant pas assez fort

fort sans le secours d'Eude, qui auoit encore conserué beaucoup d'intelligences dans Bourdeaux & dans toute la Guyenne, s'accorda avec luy, & vnissant leurs forces, pourfuiuirent les Sarrazins sur leurs pas iusques à Tours, où suiuant quelques Historiens ils en tuerent iusques à trois cens quatre vingts cinq mil. Cet accord n'estoit pas asseuré, Eude conseruoit tousiours quelque piqueure dans le cœur, de laquelle Gayfer & Hunalde ses enfans ayant eu connoissance, pour en tirer raison firent des troupes dans la Guyenne, qui furent battues par Charles Martel, & les obligerent à quitter Bourdeaux & la Guyenne, qui fust bien tost conquise par Hunalde, & soudain reprins sur luy par Pepin & Carloman enfans de Charles, lesquels ne la conseruerent pas long temps, pource que ceux de Guyenne reueillant l'affection qu'ils auoient eu pour Eude en la personne de Gayfer son fils, le publierent pour leur Duc, & le maintindrent si puissamment dans ce poste, que quoy que Pepin y fit neuf voyages avec toutes les armes de France, il n'y peut rien gagner, & n'en fut pas venu à bout sans la trahison d'un des confidens de ce nouveau Duc, qui pour gagner l'amitié de Pepin, plongea vn poignard dans le sein de son Maistre. Cette haine se ralluma par ses cendres, car Hunaut Conte de Prouence, fils de Gayfer, print les armes contre Charle-magne pour rauoir ce Duché; mais ayant esté fait prisonnier dans le combat, il ne peut auoir sa liberté qu'à la faueur de la renonciation qu'il fit aux pretentiōs de la Guyenne, qui depuis fut donnée par Charle-magne à Ranulphe, ou Raoul Duc de Bourgongne, en con-

sideration de ce que Sanson son frere, soustenant la querelle de Charle-magne, auoit esté tué dans la grande journée de Roncevaux. Et parce que cette reconnoissance ne luy auoit esté faite, que pour certain temps & par commission, il la remit entre les mains de Charle-magne, qui la donna à Louys son fils à tiltre de Royaume, lequel il posseda bien paisiblement pendant la vie de son pere, & la laissa par aprez sous mesme tiltre à Pepin son fils, duquel les iours ayans esté coupez auant ceux de son pere, ce funeste retour luy donna le moyen d'en gratifier Charles le chauve son autre fils, auquel il demeura depuis sous le tiltre de Roy de France, pour partie de son lot, au partage qui fut fait entre luy, Lotaire & Louys ses freres, aprez la mort de Louys le Debonnaire leur pere.

COMME au Ciel il n'y a qu'un Soleil, la France ne peut souffrir qu'un Roy, & par ce sentiment Charles descheut la Guyenne à l'aduenir du tiltre de Royauté, pour en gratifier Guillaume, dit le deuot, (ainsi appellé à raison de la vie exemplaire qu'il menoit) lequel n'en jouyt pas longtemps. Et d'autant qu'elle ne luy auoit esté donnée qu'à tiltre de Duché, & pour sa vie, estant mort sans enfans, Charles en disposa en faueur d'Eble fils de Girard Conte de Poictiers, à condition qu'il accompliroit les fondations faites par Guillaume, qui auoit desia entre autres fondé l'ordre de Cluny, qu'il acheueroit les bastiments commencez, & acquitteroit toutes les volonteiz qu'il auoit declaré dans son testament. Eble conserua ce Duché pour sa posterité, car

ayant eu vn fils nommé Guillaume Hugues, il le fit Duc de Guyenne, & l'ayant marié avec Bonne, fille de Rolle Duc de Normandie, il en sortit vn autre Guillaume dit Teste d'estoupe, qui eust vn fils nommé Guillaume Conté de Poictiers, lequel fonda l'Abaye de Monterneuf à Poictiers, duquel descendit encore vn autre Guillaume, qui fut si auide du bien, qu'il ne craignit pas de porter sa conuoitise & ses mains auares sur les choses les plus sacrées, de quoy ayant esté repris bien aigrement par S. Bernard, il fut touché par des remors si sensibles, qu'aprez auoir fondé l'ordre des Guillemins, ou Blancs-manteaux, il passa le reste de ses iours dans vn hermitage, taschant de reparer les debordemens de sa vie, par vne haute penitence, mais auant partir il rendit Louys VI. Roy de France depositaire de ses filles Eleonor & Peronelle, qu'il auoit eu du mariage d'entre luy & Ieanne fille du Roy d'Escoffe.

CETTE aînée a esté la semence des desordres qui ont si souvent troublé la France & desolé la Guyenne. Ce Duché vny à la Couronne, par le mariage d'entre elle & Louys VII. fut bien-tost des-vny par la lascheté de cette femme, qui s'estant piquée d'amour pour Saladin Sultan de Babylone, dans le voyage d'outre mer, où elle auoit suiui Louys son mary, elle y vescu avec tant de prostitution, que Louys ne pouvant souffrir de si sales debordemens, fut contrainct de demander la dissolution de son mariage, qui luy fut accordée par vn Concile assemblé pour cet effet à Baugency. Il pouoit, la traictant non seulement en adultere, mais aussi comme parricide, pour auoir formé des desseins per-

nicieux contre la vie de son mary & son Roy tout ensemble, luy faire perdre l'honneur & la teste dessus vn eschauffaut. Neantmoins ce bon Prince, qui auoit encore conserué quelque estincelle de ce premier feu qui l'auoit fait brusler pour elle, non content d'auoir garanti son honneur, ayant fait rompre le mariage sur le pretexte de l'alliance reciproque, dissimulant la faleté de sa vie, qui estoit la blesseure qui luy perçoit le cœur, il luy rendit ses biens en luy rendant la Guyenne & le Conté de Poictou. L'vn & l'autre ayant la liberté de se marier Louys espousa Alix fille du Conte de Champagne, de laquelle il eut Philipès Dieu-donné, Eleonor se maria avec Henry II. Roy d'Angleterre, auquel elle porta la Guyenne & le Poictou, duquel mariage il y eut quatre enfans, dont Henry l'aisné mourut auant son pere, Richard son cadet qui fut le successeur, ne laissa point d'enfans; sibien que toute la succession fut portée à Artus fils de Geoffroy troisiésme fils, à l'exclusion de Iean sans terre qui estoit le quatriésme, ce qui luy donna vne telle ialousie, que par pretexte de prendre la tutelle & la Regence de son nepueu, il se rendit maistre de la Guyenne & de la Normandie, & s'estant fait Couronner Roy d'Angleterre, il fit precipiter son nepueu du haut du Chasteau de Chinon, ou comme d'autres disent, l'ayant tué sur la coste de Normandie, il le iet-ta dans la Mer. Cette action execrable esmeut les amés genereuses, & frapant Philipès d'vn iuste ressentiment, il le fit appeller comme vassal de France par le Duché de Guyenne en la Cour des Pairs, où le procez luy fut fait par deffaut, & aprez l'auoir déclaré conuaincu-

meurtre commis en la personne de son nepueu , & desobeyssant au Roy , pour ne s'estre pas présenté aux assignations, les Duchez de Guyenne & de Normandie, & autres Seigneuries qu'il possedoit en France furent confisquées & vnies à la Couronne. Il ne vescu pas long-temps aprez son crime & sa condamnation. Dieu voulant donner des marques de son indignation, le frapa d'une mort bien soudaine; & affin que son nom de Jean sans terre s'accordast avec son pronostique, il ne fut pas enseveli, qu'il le falut deterrer, pour arrester les cris espouventables que l'on oyoit autour de son tombeau. L'horreur de cette action passa iusques dans le cœur des Anglois, qui se reconnoissans obligez à la France du chastiment qu'elle en auoit tiré, esleurent pour leur Roy, Louys VIII. fils de Philippes, dit Auguste, lequel fut assez bon pour remettre bien-tost aprez cette Couronne estrangere à Henry III. fils de Jean sans terre, qui reconnut tres mal l'obligation qu'il auoit à la bonté de ce Prince, l'ayant longuement trauersé par les pretentions qu'il auoit sur la Guyenne. Et quoy que l'Anglois fust battu en toutes les rencontres, Louys eust cette generosité de donner en l'an 1255. au Roy d'Angleterre & aux siens de legitime mariage la Guyenne consistant en trois Seneschaussées, Bourdelois, Bazadois & les Landes, ausquelles furent adjoustées les Prouinces du Limosin, Perigord, Agenois, Quercy & Xainctonge, iusques à la Charente, pour estre possedées à foy & hommage lige des Roys de France, ce qui fut executé par ce mesme Henry III. Edoüard I. II. III. Richard dit de Bourdeaux: non-

obstant les guerres qu'ils firent par temps, & les troubles qu'ils causerent, fondez sur des pretentions imaginaires, qu'ils auoient non seulement sur la Guyenne, mais aussi sur la Couronne de France; pensée creuse & masquée? qui neantmoins frapa tellement l'esprit de Henry V. qui auoit usurpé le Royaume d'Angleterre sur Richard, que se preualant de la foiblesse de Charles VI. il se fit donner la France par contract que le Pape Martin V. ne voulut point ratifier, le luy ayant enuoyé pour l'homologation, reconnoissant qu'il n'estoit pas au pouvoir des Roys de disposer de leur Couronne. Neantmoins il s'y maintint si puissamment à la faueur des puissantes intelligences qui l'assistoyent, qu'il fit establir en France vne Chancellerie dont les Lettres s'expedioient sous son nom, en qualité de Roy de France. Et de vray il y fit de si grands progresz, que s'estant rendu le maistre du Royaume, il reduisit Charles VII. à estre dit le Roy de Bourges. Mais enfin Dieu qui protege la France benissant les armes de Charles, & frappant les Anglois de la main d'une pucelle, il leur fit honteusement quitter ce qu'ils auoient usurpé avec tant d'audace. Il ne restoit plus que la Guyenne, dans laquelle ils s'estoient cantonnez, contre lesquels Charles enuoya le Conte de Dunois, qui emporta sur eux Maugeon, Fronzac & Libourne. Ces progresz rendirent à Bourdeaux le cœur qu'il auoit eu pour la France, & se remettant sous son autorité, il fut fait vne composition le 12. Ianuier 1451. qui est bien soigneusement gardée dedans l'Hostel de ville, par laquelle outre les anciens priuileges qui furent confirmez, on luy en donna

de nouveaux, avec l'establissement du Parlement qui siege à present. Exemple qui traïsna aprez soy la reduction de Bayonne, & asscura la Guyenne pour iamais en l'obeyssance des Roys qui la commandent. Ce fut alors qu'on supprima les tiltres de Royaume & de Duché de Guyenne pour luy donner celuy de Gouvernement par forme de commission : mais qui depuis fut erigé en tiltre & pour la vie en faueur des Princes du sang, ou des Princes Estrangers, & estant tombé par aprez dans des mains moins illustres, est reduit par le mal-heur du temps, comme en Domaine par quelque suruiuance.





DE BOVRDEAVX.

CHAPITRE II.



ETTE Ville est vne des plus illustres du Royaume, & la Capitale de la Guyenne. La beauté de son assiette, le nom & la seureté de son Port, la majesté de son Parlement, la reputation de sa Litterature, les marques de son antiquité, la generosité de ses habitans, dont l'Histoire suiuançe en donnera des preuves tres-fidelles, & celles de la France en ont desia donné de celles de leurs peres, tesmoignent assez que toutes les graces qui rendent les autres Villes recommandables, pource qu'elles en ont quelque piece, sont recüeillies en elle. On a creu que ses premiers fondateurs estoient ceux de Bourges, à cause qu'on appelle les Bourdelois *Bituriges* aussi bien que ceux du Berry, dont Bourges est la Capitale : ce qui a donné sujet aux Geographes & aux Historiens ou Grecs ou Latins, voyant ces peuples separez par beaucoup d'autres Prouinces, & des grosses riuieres, de leur bailler diuers noms, pour ne les confondre point, appellant ceux qui sont vers le
Loire

Loire & dans le Berry κέβες ou Cubos, & les autres, que la Garonne arrouse, & qui habitent le Bourdelois οὐβισκός ou Viuiscos, ce qui ne peut pas estre contesté puis que l'on a trouué dans Bourdeaux des vieilles pierres qui se voyent encores dedans l'Hostel de ville, avec cette inscription fort ancienne, *Augusto sacrum & Genio Civitatis Bit. Vin.* qui veut dire *Biturigum Viuisorum*, & que le Poëte Aufone natif de Bourdeaux, a dit luy-même qu'il devoit sa naissance à la nation Vibisque. Les curieux se débattent assez pour rendre raison de l'ethimologie de son nom : mais j'estime que comme elle en a deux, sçavoir *Burdigala* pour les Latins, & Bourdeaux pour les François, que le premier descend du mot Grec βέρδιγαλα que l'on trouve dans Strabon, qui escriuoit du temps de la naissance de Iesus Christ, & duquel il se sert pour marquer & descrire bien courtement Bourdeaux, & l'autre du mot Latin *Burdeacum* qui se lit, quand il est parlé de cette Ville dans les Antiquitez de l'Eglise d'Angleterre, ne pouvant consentir qu'elle prenne son nom de ce qu'elle est bordée d'eaux, puis qu'il y a beaucoup de Villes qui ont cette mesme qualité sans en avoir le nom, ny pource qu'elle est assise entre la Bourde & la Ialle, deux petits ruisseaux qui ne meritent pas assez pour faire porter leur nom à vne Ville de cette importance. Elle est assise du costé du midy & du couchant sur terre ferme, du costé du Nord & du levant sur le bord de la Garonne, qui baise deux fois le iour le pied de ses murailles ; deux conditions qu'Aristote demande dans ses Politiques, pour recommander l'assiete d'une Ville au delà de l'eau. Il y a des costaux couverts de vignes

& des bois qui bornét sa veüe dans des enfoncemens, & la Garonne s'est mise s'il semble entre deux, pour former vne plus belle perspectiue. La Xainctonge & le haut pays sont deux puissantes mammelles, qui la nourrissent. La Mer comme le foye luy porte iusques au cœur le sang le plus pur, ce que les Nations estrangeres ont de plus exquis, non seulement pour la vie, mais aussi pour le luxe. Les Landes & les solitudes qui l'environnent du costé de la terre, & qui sembleroient deuoir rendre son abord effroyable, forment vn magasin de gibier, de bestiaux, de laines, de cire & de miel, si bien qu'en vn mot on peut dire qu'il ne faut point chercher ailleurs ce qu'on ne trouve point dans Bourdeaux. Son Port que l'on surnomme de la Lune, a ses agrémens qui n'ont pas leurs pareils, quand il fait voir à ceux qui l'abordent d'un mesme coup d'œil ses deux bouts comme ceux d'un croissant, & qu'il presente en sa facade tous les plus beaux edifices de la Ville, & i'estime que ce n'est pas seulement sa figure semblable à celle d'un croissant de la Lune, qui luy a donné ce nom, mais aussi qu'au temps de la vigueur du Paganisme, la Lune y estoit adorée comme vne Deité, puis qu'une Ville d'Etrurie fut appelée Lune pour ce mesme sujet, que trois croissans entre-lassez font les chiffres de son Hostel de Ville, qu'il ny a pas dix ans qu'on pratiquoit à Bazas la course des Taureaux, & que celui qui estoit le chef des piqueurs, s'appelloit le Prince de la Lune : marque tres-sensible que c'estoit vn reste des anciens ieux, ou courses des Taureaux, que les Payens faisoient à l'honneur de la Lune & des diuinitez noctur-

nes & infernalles, que la pieté des Euesques de cette Ville & celle du Parlement de Bourdeaux auoient aboli, & quel'impieté a restably. Ce qui peut estre authorisé par la conformité qui se rencontre entre le flot de la Garonne & le cours de la Lune, sur l'vn & sur l'autre horison, car la Lune s'approchant de son leuer, le flux commence à monter, & continuë cinq heures, dont le plus haut flot qu'on appelle plain Mer, finit au point que la Lune auoisine ou passe le Midy pour aller au couchant, laquelle le reflux suit pour descendre sept heures, & pendant que la Lune court la ligne de mynuict, le flux & le montant reprend, affin que descendant aprez,iusques à ce qu'elle s'approche de son second leuer, le flot se trouve en estat de reprendre son montant. Et comme la Lune retarde chaque iour d'une heure ou trois quarts d'heure à se leuer sur nous, le flux suit le mesme retardement, si bien que dans les mesmes vingt & quatre heures, que la Lune employe pour monter sur nous & descendre sous nous,pour reuenir à nous, le flux & reflux de cette riuiera monte & descend deux fois, pendant vn temps esgal.

I E. laisse à part les superbes bastimens de l'Eglise de S. André, qui est la Cathedrale & Metropolitaine, celle de S. Seuerin, Collegiale, celle de S. Michel, seruiue par vn nombre de Prestres & de Beneficiers, avec sa Pyramide d'une hauteur qui semble affronter le Ciel,& d'une structure la plus riche qui se puisse voir, & qui pourroit passer pour vne des merueilles du Monde, à meilleur tiltre que celle de Memphis, l'Abaye de Ste. Croix, bastie & fondée par le Duc Guillaume, le ri-

che bastiment de la Chartreuse, fondé par feu Monsieur le Cardinal de Sourdis, le Palais Archiepiscopal, le tombeau miraculeux de marbre blanc qui se voit dans le cimetiere de S. Seuerin, esleué de deux pieds, sur deux pilliers de pierre, dans lequel l'eau croist & décroist visiblement, suiuant les quartiers de la Lune. I'obmets tant de corps Saints, & des reliques precieuses, tant de Parroisses, de Monasteres & autres maisons Relligieuses, qui tesmoignent que Bourdeaux est esgalement ancien & deuot, & qu'il a sceu cultiuier les premieres instructions du Christianisme, qu'il receut par la bouche de S. Martial, duquel nous voyons encore vne de ses epistres escrites aux Bourdelois, rapportée dans la Biblioteque des Peres. Mais ie ne puis passer sous silence deux illustres monumens de la somptuosité de nos ancestres, qui paroissent encore dans les masses des pilliers de Tutelle, & du Palais Galiene, dont le premier est vn bastiment à angle quarré, de 87. pieds de long, & 63. de large, tout ouuert par le haud, vouuté par le bas d'une façon plate à l'antique, sur le bord de laquelle voute ont esté autrefois esleuées vingt & quatre colonnes ou pilliers, desquelles il y en a encore seize d'une espaisseur si grande, qu'il y a dequoy s'estonner comme on a peu mouler si haud vne si lourde masse, embellie de plusieurs statues dont on ne peut deuiner la representation, non plus que rendre raison à quel vsage ce bastiment estoit employé. Quelques vns ont creu que c'estoit l'ancien Pretoire ou Palais, dans lequel les Preteurs ou les Lieutenans de l'Empire tenoient leurs audiences, du temps que les Bourdelois

estoit sous la domination des Romains. Cela peut auoir quelque vray-séemblance, puis qu'anciennement à l'exemple du peuple Hebreu, la justice se rendoit proche la porte des Villes, pour la commodité de ceux du dehors, & que l'on voit que ce bastiment estoit en ce temps hors la Ville, & sur le bord des fosses, & non esloigné de la porte Medoque, ainsi appelée à cause que les habitans du Medoc y abordoient. D'autres plus curieux tirant vne coniecture de l'ethymologie de son nom, ont pensé que pour ce qu'il s'appelle Palais ou pilliers de Turelle, que se deuoit estre vn Temple consacré aux Dieux Tutelaires ou Gardiens de la Ville, & que sa somptuosité marque la veneration que l'on en auoit. Mais c'est par cette mesme raison que ie ne scaurois souscrire à cet aduis, d'autant que les bons liures apprennent que les Payens auoient tant d'inquietudes, & des soins si penibles pour conseruer leurs Dieux Tutelaires, qu'ils ne vouloient pas seulement les tenir renfermez dans l'enceinte de leurs murailles & sous terre, comme les Romains leur Dieu Confus: mais aussi qu'ils traictoient en criminel d'Estat celuy qui auoit reuelé le nom, de crainte que leurs ennemis quand ils les assiegeoient, ne les euoquassent à eux, par des charmes & des coniurations, qui forçant ces fausses Diuinitez d'aller à eux, ouvreroient aux assiegeans par leur abandonnement les portes des assiegez. Ce qui donna vne telle deffiance aux Tyriens, qui craignans qu'Hercule, qui estoit leur Gardien, ne leur iouïast la piece s'il estoit euoqué, ils encheisnerent sa statuë avec des chaines d'or. Il se pourroit faire aussi que ce fust vn temple.

dedié par ceux du dehors à Venus & à son Adonis, Diuinité Tutelaires des jardins & des vergers, ou possible à la Deesse Tutilina, dont parle S. Augustin dans la Cité de Dieu , que les Laboureurs adoroient avec de grands respects , pour faire que leurs grains fussent en assurance dans leurs greniers , & hors de l'atteinte de la main des larrons , & de la corruption des vers qui s'y engrendrent.

LE Palais Galienne est vne des marques aussi curieuses qu'il y en ayt dans la France : ses masures & ses ruynes ne rendent pas les rides de son antiquité moins venerables. Sa forme est en ouale , son parterre est renfermé à droict & à gauche de douze murailles, distinguées de deux pas d'interualle les vnes des autres , celles du dehors sont les plus esleuées & les plus espaisées , & à mesme quelles s'approchent du parterre, elles s'abaissent & s'afoblissent : ce qui fait coniecturer que c'estoient autant de Galleries ou de loges , desquelles les spectateurs pouvoient voir commodément les jeux ou les combats des Gladiateurs qui se faisoient au milieu. Il est ouvert par douze portaux , six du costé du leuant & autant du couchant , & à compter la longueur par la distance qu'il y a des vns aux autres , il s'y trouve 370. pieds , & pour sa largeur 230. estant croyable par les fondemens que l'on rencontre encore dans les vignes voisines , qu'il portoit sa longueur & sa largeur plus auant. Il y en a qui ont creu que Pompée l'auoit fait bastir, ou que ceux de la Guyenne l'auoiēt esleué à son honneur , pendant qu'il y demeura , faisant la guerre à Sertorius : mais cela n'a pas beaucoup d'apa-

rence, pource qu'il ne fit pas de grandes conquestes dans la Guyenne, l'effort de ses armes ayant esté porté vers les Pyrenées, & qu'en effet Bourdeaux ny le reste de la Guyenne, ne fut point entierement sousmis à l'Empire de Rome que sous Auguste. Quelques escriuains Espagnols ont dit, que Charle-magne reuenant d'Espagne, où il auoit esté relegué par Pepin son pere, auoit fait bastir cet Amphitheatre à l'honneur de Galienne fille du Roy d'Espagne Galastie, pour marquer sa gratitude, & la reconnoissance qu'il rendoit aux ciuilez qu'il auoit receu d'elle dans son bannissement. Mais i'estime que c'est vne fable, non seulement pour ce que sa forme est toute Romaine; mais aussi pour ce qu'on ne trouve pas chez nos Historiens, que Charle-magne ayt esté banny par son pere. Il est plus croyable que les Bourdelois, voulant tesmoigner quelque sentiment d'affection pour l'Empereur Galien qui tenoit l'Empire de Rome l'an 257. de la naissance de nostre Seigneur, qui auoit la reputation d'estre vn Prince liberal & debonnaire, dont la Guyenne estoit suiette, le firent bastir, & luy donnerent le nom de Palais Galienne, pour marquer le dessein qu'ils auoient de le luy consacrer.

LA Litterature est vne des marques les plus illustres, & qui donnent la plus haute reputation à vne Ville. Rome & la Sicile ont long-temps disputé qui auroit le plus grand aduantage pour les Lettres Latines. Athenes & Marseille pour les Grecques, & ie puis dire avec raison que Bourdeaux auoit droit de contester à toutes celles là, l'vn & l'autre honneur. Si l'on rappelle le

nom de quelques enfans de Bourdeaux qui enseignoiēt dans les escholles de leur Ville, desquels les bons li- ures ont conserué la memoire à la posterité, d'un Tibe- rius Victor, d'un Mineruius qui fut Precepteur de Sui- das, lequel fut appelé de la Rhetorique qu'il ensei- gnoit à Bourdeaux, pour la professer à Rome, suiuant le tesmoignage de S. Hierosme en l'an 358. & depuis à Constantinople: d'un Attius Patera ou Pater, suiuant le mesme S. Hierosme, qui quitta Bourdeaux pour te- nir escholle en l'an 339. à Constantinople sous l'Empire de Constantin: d'un Delphidius, estimé le plus elo- quent de son temps, qui fut esleu grand Maistre de l'Em- pire: d'un Alcimus, qui harangua si puissamment en l'an 362. contre Numerius Gouverneur de la Prouince Narbonnoise, accusé d'exaction & de vrollerie, en presence de l'Empereur Iulian, qui pour lors estoit dans les Gaules, qui le conuainquit par la confusion dont il couvrit sa face: d'un Ausone, qui apres auoir esté fait Precepteur de l'Empereur Theodose, merita d'estre fait Senateur & Consul à Rome: d'un Paulin, qui fust fait Euesque de Nole. La reputation de cette sursistance s'accrut tellement par la suite du temps, que le Pape Eugene III. erigea dans Bourdeaux en l'an 1441. vne Vniuersité, ou Academie de toutes les facul- tez, à la supplication des Maires & Iurats qui en sont les Patrons, & establit l'Archidiacre de Medoc, perpetuel Chancelier de l'Vniuersité; fondation qui fut confir- mée en l'an 1472. par Lettres patentes de Louys XI. qui luy octroya les mesmes priuileges qu'à l'Vniuersité de Tolose. Les sçauans Professeurs n'ont pas deffailli non- plus

plus dans le College de Guyenne, dans lequel Gouea, Cordier, Budée, Costa, Buchanan, Gruchée, Garentie, Teuius, Gelida, Muret, Viuet, & plusieurs autres estans principaux ou Regens, ont mis les Lettres dans le plus haut point d'estime qu'elles pouvoient estre. Bertrand la Vallée Conseiller au Parlement, pour contrequarrer l'heresie qui estoit dans sa naissance, y fonda en l'an 1539. vne leçon de Theologie à chaque premier Dimanche du mois. Et ce grand Euesque d'Aire François de Foix de Candale donna le 21. Iuillet 1591. 500. liures de rente annuelle, pour y establir des leçons de Mathematique, qui ont esté depuis enseignées avec beaucoup de reputation par le sçauant Robert Balfour Principal du College. L'aurois grand tort d'oublier cette illustre Academie des Peres Iesuistes, fondée en l'an 1574. où les Professeurs de Theologie, Philosophie, Rhetorique, Lettres humaines, Grecques & Latines, ont fort peu de gens qui les esgalent, où les enfans reçoient les instructions de la pieté & de la science d'un mesme ton de voix, & de laquelle on peut dire comme de l'eschole de Socrate, qu'on n'en voit gueres sortir que des Platons & des Xenophons, des personnes qui font honneur à la Pourpre, à la Chaire & au Barreau.

LE Parlement qui fut promis à Bourdeaux par la capitulation faite avec le Conte de Dunois, sous Charles VII. en l'an 1451. & qui ne commença sa seance que sous Louys XI. a tousiours esté rempli de tres-grands personnages, tefmoin le President Boyer, dont les

decisions passent pour des oracles dans la France, Guillaume Benoist, qui fut depuis Conseiller au Parlement de Tolose, Arnaud Ferron, qui à vingt & deux ans composa ses sçauans Commentaires sur la coustume de Bourdeaux: le President Rossinac, qui a si doctement escrit sur la Iurispudence Canonique. Ce Parlement a esgalement conserué la fidelité à son Prince, & la iustice à tous. Il a esté esleué sur les ruynes de cet ancien Senat, qui estoit dans Bourdeaux du temps des Romains, duquel Aufone parle auec tant d'auantage, & duquel S. Ambroise dit, que Paulin fut tiré pour remplir la Chaire de l'Euesque de Nole.

CETTE Ville a esté iugée si importante pour l'Estat, que pour la conseruer en sa franchise naturelle, on l'a tousiours exemptée des Tailles, demesme que pendant qu'elle estoit sous l'obeyssance des Romains, elle estoit presque la seule Ville qui ne payoit point de Tribut à l'Empire, au rapport de Strabon & de Pline. Ses Bourgeois encore que roturiers, peuvent tenir les terres noblemēt sans payer les frâcs-fiefs; & les Estrangers qui y habitent, soient-ils amis ou ennemis, sauf les Anglois, ne sont pas sujets à la rigueur du droict d'Aubayne, suivant les Lettres patentes de Louys XI. Les gens de guerre ne la peuuent point aborder à dix lieües pour y faire leurs logemens, sans enfreindre la volonté des Roys. Elle a droict de posseder en franc aleu. elle ne peut estre forcée à fournir au Roy dans la conuoocation du ban & arriere-ban, des soldats pour combattre hors la Seneschaussée. Elle à beaucoup d'autres

Priuileges, dont les Ducs de Guyenne & les Roys de France l'ont honorée comme à l'enuy les vns des autres, lesquels se lisent dans le liure des Bouillons, qui est dans les Archiues de son Hostel de ville, & desquels ie fairois vne relation plus particuliere, si l'Histoire ne appelloit ailleurs.





LA
 NAISSANCE
 ET
 LA SVITTE
 DES MOVVEMENS.

CHAPITRE III.



L n'est rien si naturel que de combattre pour conseruer la vie. Comme le pain est l'aliment le plus commun, plus de gens trauaillent à le posseder. Les pauvres craignent n'en auoir iamais assez, pource qu'ils ne sont pas toujours asseurez d'en auoir : cette apprehension fait passer dans leur esprit la cherté pour famine. Les riches, encore qu'ils en ayent suffisamment, apprehendent que les pauvres leur ostent, & s'ils s'interessent pour l'a-

bondance , c'est de crainte de souffrir en leurs familles par la disette des autres. C'est par là que les Bourdelois se trouverēt engagez dans vne querelle commune , lors qu'estant aduertis que le Duc d'Espernon , leur Gouverneur , auoit obtenu en faueur de quelques Banquiers de Bourdeaux , desquels il dispoſoit , vn congé pour charger des bleds , sur lesquels il auoit six vingt mil liures de Benefice , qu'il mettoit dans son espargne , & que tous les bleds vieux estans desia chargez & trāsportez , on estoit aux nouveaux. Le menu peuple , qui voyoit approcher la famine à grands pas , s'opposa à la continuation de cette cargaison , protestant hautement qu'il ne souffriroit pas qu'on leur oſtast le pain pour le porter ailleurs. Cette plainte frapa l'esprit des Jurats , qui pour estre des creatures attachées aux intereſts du Duc d'Espernon , voulurent essayer iusques où se pouvoit estendre l'autorité de leur liurée sur la colere d'un peuple , duquel ils se disent les peres. Mais ils reconnurent que c'est l'amour , non pas le commandement , qui oblige au respect ; & que bien loing de faire comme les enfans , qui baissent les verges qui les escorchent , on ne ſçauroit aymer les outils de la persecution. Ils se promenant dans les ruës pour arreſter le murmure qui commençoit à raisonner par tout : mais ils n'y ſont plus reconnus. Ils visitent le Quay , où ils ne receurent que des menaces , dont la frayeur leur ſaiſit tellement le cœur , que comme des mauuais Pilotes , abandonnant le gouvernail dans la tourmente , ils eurent recours au Duc d'Espernon , qui leur ſeruoit d'abry , pour les mettre à couuert de l'orage qui commençoit à gronder.

CETTE naissance de desordre, fut deslors vn pronostique infallible d'une plus grande fuite, dans l'esprit des plus intelligens en l'intrigue de cette affaire, & le Duc d'Espemon croyant l'estouffer par la crainte de ses armes & le nombre de sa fuite, composée de ses gardes, & de tout ce qu'il peut ramasser de Noblesse dans la Ville, alla sur le Port marchant en ordre, comme s'il eust deu enfoncer quelque bataillon. Mais tout fit iour à la nouvelle de son abord, & la foule de ce menu peuple s'estant dissipée, on luy osta la gloire d'auoir appaisé ce desordre. Il ne rencontra que quelques regratieres, qui attachées à la debite de leurs petites denrées, le voyant passer au deuant d'elles, le salüerent avec grand respect, qui ne peust empescher qu'elles ne messassent dans leurs acclamations des protestations de ne souffrir pas qu'on emportast le bled. Si bien que voyant qu'il n'auoit rien à faire, estimant que sa presence eust coniué la tempeste, il rentra dans la Ville par la porte du Chapeau-rouge, qui aboutit à la riuere, où Beauruche l'un de ses Escuyers, preferant l'interest de son Maistre à celui de sa Parrie, ayant tenu quelques discours assez arrogans, se vit à mesme temps inuesti de quelques personnes, qui l'eussent chargé, sans que la prudence, ou la crainte le firent eschapper à cette occasion.

LES Iurats estimerent qu'il estoit de ce petit desordre, comme des esmeutes ordinaires d'un peuple, desquelles on voit presque aussi-tost la fin que la naissance. Quelques vns d'entre eux allerent le lendemain sur la riuere, pour faire haster cette cargaison, & s'oppo-

fer aux empeschemens qu'on y pouvoit donner. Mais à mesme ils reconnurent dans le visage d'un chacun, que ce qu'ils auoient prins pour vne vapeur fort legere, seroit espaisi en vn gros nuage, qui eust fondu sur eux, s'ils n'eussent arresté cette traicte de bled. Le Duc fut à méme temps aduertý de ce qui se passoit, si bien que pour ne se trouver point enuélé dans ce brasier, qui commençoit à s'allumer, il se retira dans son Chasteau de Cadillac, à cinq lieues de Bourdeaux, pour pouoir consulter avec plus de loisir les moyens de se vanger de la blessure, que son autorité & son auarice souffroient esgalement. Le Parlement qui trauaille incessamment pour ajuster l'autorité du Roy à la tranquillité publique, aprez auoir donné Arrest, portant defences de transporter les bleds hors la Prouince, & de farmer par ce moyen l'esprit du peuple, qui s'échauffoit au bruit des desordres de Paris, en donna aduis à Sa Majesté, qui ayant considéré l'importance de cette affaire, non seulement par l'interest qu'a sa bonté que ses Sujets ne soient pas exposez à la faim, mais aussi par celui que l'Estat auoit, d'empescher que nostre despoüille ne profitast à ses ennemis estrangers, & leur fournist de nouveaux moyens de continuer vne guerre, qui sembloit estre aux abois par leur necessité, enuoya vne Declaration le 31. Aoust 1648. par laquelle elle reuouoit tous passeports, & Arrests du Conseil priué, qui portoient la permission de charger des bleds, deffendant le transport tres-estroitement & à peine de la vie, laquelle ayant esté adressée à l'Admirauté de Guyenne, en consequence de l'attache de la Reyne Regente, comme

exerçant la Charge de Grand-Maistre, Chef & Sur-Intendant General de la nauigation & commerce de France, elle y fut registrée.

Ce lenitif appaisa la douleur qui pinçoit les Bourgeois, mais par vn effet contraire il aigrit la colere du Duc, qui comme vn torrent ne peut souffrir de digue qui s'oppose à sa violence, sans faire effort pour la rompre. Il se promet de rendre cette Declaration sans effet, & pour donner quelque couleur à son dessein, il enuoya dans toutes les Villes du haut pays (qui sont à Bourdeaux ce qu'estoit la Sicile à Rome) & obligea les Consuls & les Iuges des lieux, de luy fournir des attestations, comme il y auoit beaucoup plus de bled qu'il n'en falloit pour la subsistance de la Prouince, & qu'elle ne souffriroit point d'incommodité dans le transport d'une partie. Toutefois le Parlement ayant sceu cette pratique, & que ces Declarations n'estoient que l'effet de son autorité, pour laquelle ces Communitez auoiēt du respect & de la crainte tout ensemble, escriuirent en Cour, de crainte que Sa Majesté ne fut surprinse par des pieces qui sembloient auoir en elles quelque chose d'authentique. Desorte que cet artifice n'ayant peu reüssir, il en fut si fort outré, qu'il tascha par tous les moyens de rendre suspecte dans l'esprit du Roy & des Ministres d'Estat la fidelité du Parlement, lequel se iustifioit assez par la connoissance de son procedé, & par la bouche de ses deputez qu'il tenoit prez du Roy, pour se plaindre de la distraction d'une partie de l'estenduë de son ressort, & de quelque creation de nouveaux Officiers, comme des Recepueurs & Controoleurs alternatifs

natifs, triennaux & quatriennaux, des consignations, Commissaires & Controolleurs des saisies reelles, qui ont esté depuis supprimez à leur poursuite, parvne Declaration du dernier de Iuillet 1648. Le pretexte duquel le Duc se seruit pour le decry de cette Compagnie, fust vn Arrest qu'elle rendit les Chambres assemblées, le 4. Septembre de la mesme année, en consequence de la Declaration susdite du mois de Iuillet, par lequel, aprez qu'il luy eust esté representé qu'en l'année 1647. le feu Roy d'heureuse memoire Louys XIII. ayant fait vn emprunt sur les principales Villes du Royaume, Bourdeaux pour satisfaire de sa part, consentit qu'outre les sept liures qu'on leuoit d'ordinaire par chasque tonneau de vin, qu'on augmentast cette leuée de six liures pendant deux ans: ce qui suffisoit pour acquiter cet emprunt, & au dela: de sorte que ce droict ayant esté prins non seulement pendant les deux ans, mais encore continué depuis, & le profit n'en reuenant point au Roy, mais bien aux Fermiers du Conuoy, qui se preualant de l'autorité de leurs Fermes, & de l'appuy qu'ils ont au Conseil, exigent des droicts extraordinaires à la foule de ses Sujets, laquelle Bourdeaux sentoit d'autant plus pesante, que cette Ville n'ayant pas moins merité de la bonté de sa Majesté, que les autres qui en auoient esté deschargées, se trouuoient foulées de la mesme imposition, sans qu'elle eust esté verifiée au Parlement, comme il estoit necessaire; que son principal reuenue consistant en vin, qui se consomme de luy-mesme, & que desduisant les charges qu'il porte, & les fraiz qu'il faut faire à le cul-

riuer, ne laisse rien de reste pour son Maistre. Il fut ordonné sur ces motifs, que tres-humbles remonstrances seroient faites au Roy, sur la reuocation de l'augmentation des six liures par tonneau de vin : cependant sous le bon plaisir de Sa Majesté, defences furent faites au Fermier du Conuoy & tous autres de faire cette leuée, sans prejudice d'estre deliberé au premier iour, sur les nouvelles augmentations qui n'auoient point esté verifiées au Parlement.

CET Arrest parut au Duc d'Espernon vne fort belle occasion, pour faire passer au Conseil les Officiers du Parlement pour des esprits reuoltez, & pour auoir entrepris de porter leurs mains dans les coffres de l'espargne du Roy, puis qu'ils auoient supprimé ses droits, desquels il y auoit desia quelques années qu'on n'auoit point contesté le payement. Comme cet interest, qui estoit particulier au Duc, à cause que ses appointemens estoient assignez sur cette leuée, auoit vn illustre pretexte, qui est celuy de la Royauté, il fut esgalement puissant sur les Partisans du Duc pour les faire agir, & efficace dans l'espri des Ministres d'Estat pour les esmouvoir contre cette entreprise, qui eust d'abord fait grand esclat, si les Ministres mieux informez du sujet de cet Arrest, n'eussent arresté leurs premiers mouuements, pour en consulter plus à loisir la justice, sur laquelle ne trouuant rien à redire que pour la forme, estimant qu'il n'appartenoit qu'au Roy de supprimer vne imposition qu'il auoit estably, ils dressèrent vne Declaration, dans laquelle sa Majesté reduisit les six liures à trois, pour faire aux Bourdelois la moitié de la grace,

l'effet de laquelle fut arresté par les puissantes sollicitations des agens du Duc, qui en empescherét l'expédition & le Sceau. Et pour ce que deslors il se parloit de quelques mouvemens dans Paris, le Duc d'Espernon, qui ne cherchoit que des moyens à venger sa passion sous de beaux semblans, surprenant la Reyne par les discours qu'il luy tenoit dans ses Lettres, & par les Courriers qu'il envoyoit vers Sa Maiesté, pour l'asseurer que Bourdeaux se joindroit aux interets de Paris, & qu'il estoit important de tenir les habitans ferrez, de crainte qu'ils n'eschapassent hors leur deuoir, il demanda vne permission de bastir vne Citadelle dans la ville de Libourne, qui luy fut accordée, pendant qu'à la faueur des troupes qui reuenoient de la Cataloigne dans la Guyenne, où il les auoit appelez pour s'en seruir à la faueur de leur quartier d'huyet, il se saisit de Marmande. Si bien qu'il estoit asseuré de faire tarir deux marmelles à Bourdeaux, la Garonne par Marmande, & la Dordogne par Libourne, deux puissantes riuieres, capables de nourrir vn Royaume. Les gens de guerre qu'il logea dans Marmande, dans Bazas & ailleurs, baillerent quelque ombrage aux Bourdelois, mais non pas au point de se pouoir persuader qu'il voulut leur faire souffrir les traictemens qu'ils ont receu depuis. Et de vray estant reuenu à Bourdeaux, il receut les complimens ordinaires de la Ville. Sa Cour estoit grossie de nombre d'habitans de toutes conditions, lesquels il receuoit à bras ouverts, & qu'il renuoyoit avec des protestations d'une amitié dissimulée. Cependant il agit, il cabale quelques Officiers du Parlement par de belles

esperances. Il estoit asseuré des Iurats comme des creatures inseparablement attachées à son service & à ses ordres. Gyac qu'il auoit tiré du Greffe de la Bource, pour le faire l'un des quatre Intendans de son Conseil & de sa maison, & qui par les habitudes qu'il auoit contractées pendant qu'il estoit Greffier, estoit capable de faire des intrigues parmy les Bourgeois de robe courte, trouuailant pour son Maistre, fute vne partie des plus ambitieux de la liurée de la Iurade, & l'autre de la robe du Consulat, & sous ce vain esclat en attira quelques vns au party du Duc, qui pour se rendre plus considerable print alors la qualité de Prince, ne pouvant pas souffrir qu'on le traitast que d'Altesse. Le Duc d'Espernon reconnoissant bien qu'il n'estoit pas le maistre absolu du cœur des habitans, & mesprisant les forces de l'amour, qui estoient seules capables de faire vne si genereuse conqueste, il employa celles de la terreur, & abandonnant Puypaulin il se ietta dans le Chateau Trompette, où il fit porter ses meubles, exposant la santé de Madame la Duchesse sa femme à vn air rude & incommode, dans la saison d'hyuer, par l'assiete de la place, qui est sur le bord de la ruiere, & entourée de marets, dans laquelle elle ne demeura pas long-temps, ayant esté contraincte de prendre vn air plus doux & plus salubre à Cadillac, pendant que le Duc son mary renforça la garnison de ce Chateau. Il y fit porter beaucoup de munitions de guerre & de bouche, fit garnir le bastion & quelques fauces brayes, de canons, qui furent pointez contre le Port & la Ville, ce qui surprit bien fort les habitans, qui pour n'auoir la

plus-part oüy le bruit du canon que dans les feux de joye, & dans les resiouyffances publiques, eurent de la peine à se persuader qu'il en fallut venir à cette extrémité, d'estre attaquez par celuy, duquel l'on deuoit attendre la protection.

C H A P I T R E IIII.



ES mouvemens de Paris auoient esté calmez par deux Declarations; l'une du dernier Iuillet, & l'autre du vingt & deuziesme d'Octobre 1648. lesquelles estant comme vn Reglement general pour la Police du Royaume, pource qu'elles rendoient à la justice sa premiere majesté, & soullageoient en partie les peuples du fardeau qui les accabloit, attendant vne meilleure occasion, pour pouruoir à vne plus grande descharge. On les croyoit comme deux ancrs sacrées, sur lesquelles reposoit la tranquillité de la France, & en consequence le Roy voulut qu'elles fussent registrées en chacun de ses Parlements. Si bien qu'ayant esté portées en celuy de Bourdeaux, il s'y employa grand nombre de sceances & d'assemblées de Chambres, pour proceder à leur verification, qui fut acheuée & publiée le 15. Fevrier 1649. avec certaines modifications mises au pied de l'Arrest. Ces deux Declarations qui reuoquoient la creation des Officiers nouveaux establis en consequence des Edicts non verifiez dans les Parlemens, four-

nirent matiere au Parlement de Bourdeaux, pour s'en prendre aux Officiers des Aydes, qui tenoient leur sceance dans la Ville, non seulement à raison de ce que l'Edict de leur establissement n'auoit point esté verifié en la Cour, mais aussi pource qu'en l'année 1553. la même Cour des Aydes ayant esté establie à Perigueux, par Edict verifié dans le Parlement de Bourdeaux & dans celuy de Paris, à cause qu'il y auoit quelques elections attribuées aux Aydes qui dependoient de son ressort, elle fut depuis supprimée par autre Edict verifié au Parlement de Bourdeaux, & incorporée en ce même Parlement, qui receut la creüe du nombre d'Officiers, dont les charges sont encore remplies par ceux qui les possèdent par tiltre successif. Si bien que ne pouvant souffrir ces nouveaux Officiers, qui les despoüillent de leur ancienne Iurisdiction, & dont l'establissement est ruyneux aux affaires du Roy & à celles du public, par les grandes attributions qui leur ont esté données, qui diminuent d'autant les finances de Sa Majesté, & espuisent le sang du peuple, il assembla les Chambres. Mais quoy qu'il fut mis enauant de deliberer sur cette proposition, l'on trouua à propos de differer la resolution. Neantmoins les Officiers des Aydes, qui apprehenderent la foudre au bruit de ce tonnerre, & que des Commissaires ne fussent deputez pour executer la deliberation qui n'estoit point encore, ils reclamerent la protection du Duc d'Espernon, qui les voyant reduits à telle extremité qu'ils estoient capables de faire toutes les bassesses, leur fit achepter son assistance, aux despens du rual de leur autorité, ne leur vou-

lant point faire part de son pouvoir, qu'avec condition que le harangant par deputez, ils le traicteroient de Monseigneur. Cette pillule estoit amere pour quelques vns d'entreux, il la falut pourtant aualer. Desorte que le Duc, qui se mescontant de mesme que les autres s'imaginoit que les Commissaires employeroient le pouvoir des Iurats, leurs liurées & leurs armes pour cette execution, ou qu'ils se seruiroient de l'Hostel de Ville, comme d'un lieu de depost, pour la conseruation des Registres des Aydes & de leurs prisonniers. Il appella les Iurats dans le Chasteau Trompette, où il les retint iusques au soir, & fit fermer les portes de l'Hostel de ville, ce qui fascha le peuple, de voir que l'on fermoit les portes d'une maison qui deuoit estre ouverte à toutes heures pour eux.

LE Duc d'Espernon cependant ne perdoit pas temps & auançoit les preparatifs de sa vengeance autant qu'il pouvoit. Il fait descendre ses troupes, il en loge les vnes dans Bazas, la Reolle & le Bourg de Barsac: les autres dans S. Emilion. Desaugeys, a qui il auoit mis quelque année auparauint la liurée de Iurat sur l'espaule, voulut reconnoistre cet honneur qu'il tenoit purement de son autorité, par le seruice qu'il luy rendit, se saisissant du Chasteau de Bourg sur la Dordogne, en y mettant garnison. Le Parlement s'assemble pour deliberer sur l'esloignement de ces gens de guerre, qui faisoient ialousie aux habitas. On prie le Duc de se vouloir trouver à la deliberation, il s'y rend: mais il rompit l'assemblée à la quatriesme voix, ne pouvant pas, disoit-il, permettre qu'en sa presence on opinast sur des

gens de guerre, dont il pretendoit que la connoissance & la disposition appartint à luy seul. Il voulut imposer silence: mais on luy fit entendre avec courage, que n'ayant place là dedans qu'en qualité de premier Conseiller, il deuoit demesme que les autres, receuoir les ordres de celuy qui estoit à la teste, & non pas les donner. Cette remonstrance le fascha & le fit retirer en sorte que le Parlement reprenant sa deliberation, pour ne rompre pas avec luy, trouua à propos que le President Lalane & le sieur de Geneste Conseiller, qui le voyoient particulièrement luy rendant visite, luy fissent entendre qu'on n'entreprendoit point sur son autorité, que leurs Registres estoient chargez, qu'en semblables rencontrés la Cour auoit pourueu à des pareils desordres, conioinctement avec les Gouverneurs ses deuan-
 ciers, mesmement avec Henry III. pendant qu'il estoit Roy de Nauarre & Gouverneur de Bourdeaux, & lequel vray-semblablement n'eust point voulu partager cet aduantage, s'il eust creu deuoire estre tout entier pour luy. L'aduis de cette deputation luy ayant esté donné par les Partisans qu'il auoit dans ce grand corps, & l'ayant instruit du nombre d'exemples qu'on auoit contre luy, comme autant de preiugez, le firent resoudre à quitter Bourdeaux soudainement, ayant mieux abandonner la Ville, que se rendre à ce raisonnement. Et comme deslors il fit ferme sur le dessein qu'il auoit de perdre cette Ville, il commanda à Filouze, Major dans le Chasteau Trompette, d'enleuer l'artillerie qui estoit dans le Chasteau du Ha: ce qui fut executé la même nuit de sa retraicte, & enuiron vne heure apres my-
 nuit

nuiſt, en laquelle les Bourdelois, non encore accouſtumez aux veilles & aux fatigues de la guerre, ne pouvoient leuer la teſte du cheuet, pour courir au bruit des roïes & des ſoldats qui les eſcortoient.

Ce depart du Duc ſi ſoudain, & l'enleuement des canons, firent aſſez connoiſtre à ceux qui eſtoient tant ſoit peu intelligens, qu'il ne falloit pas de meilleurs Herauts pour déclarer la guerre. Le Parlement combattu dans ce rencontre de deux intereſts differents; d'une compaſſion pour la liberté oppreſſée, & d'une deſerence pour celuy qui la violentoit, voulant donner ſaſtiſfaction aux vns & aux autres, pourtaſcher de remettre les affaires dans le calme, chargea les Jurats ſous la conduite de deux de ſes Commiſſaires, de la garde du Chasteau du Ha, que les habitans cheriſſoient comme leur maiſon propre, & enuoyerent à Cadillac, les ſieurs de Salomon & Duval Conſeillers, pour faire entendre au Duc, qu'ils auoient eſté contraincts, pour faire ceſſer les apprehenſions des habitans, & donner quelque complaiſance aux iuſtes plaintes des Villes oppreſſées, de deliberer vn Arreſt ſur leſloignement des troupes, qui fouloient les vnes, & obſédoient les autres. La publication & l'exécution duquel auoit eſté ſurſiſe, ſous l'eſperance qu'il preuiendroit cette deliberation, luy eſtant plus aduantageux, que l'on receuſt cette obligation de luy par vn eſprit de generoſité, que de la force & de l'autorité d'un Arreſt. Il paya cette condeſcendance par des complimens, qui portoient vne promeſſe ſolemnelle qu'il fit, de faire eſſoigner les gens de guerre ſous trois conditions; de ſupprimer l'Arreſt rendu

les Chambres assemblées sur l'esloignement des troupes, d'empescher les gardes des portes de la Ville, que les habitans demandoient par la deffiance qu'on auoit de quelque surprise, & de remettre le Chasteau du Ha en son premier estat. On estoit sur le point de resoudre ces trois propositions, mais le sieur de Farnoux Conseiller estant entré dans l'assemblée, representa qu'il luy auoit esté mis en main vn paquet par l'un de ses domestiques, dont l'adresse luy estoit faite, & duquel ayant fait ouverture, il y auoit trouvé vne Lettre pour luy, & l'autre pour le Parlement, laquelle il remetoit sur le Bureau, & laquelle il estimoit estre escrite de la part du Parlement de Paris, comme il iugeoit par la lecture de la sienne, de laquelle il demanda qu'il en fut fait lecture, ce qu'on fit, & la teneur estoit,

MONSIEVR,

L'aduis que nous auons eu, que le paquet que nous auons adressé au Procureur General, pour estre veu en plaine Compagnie, auoit esté porté en Cour par son ordre: nous auons prins cette voye pour en faire tenir vn duplicata, affin qu'il puisse estre plus asseurement rendu, & que l'on ne puisse nous imputer d'auoir rien obmis pour informer vostre Compagnie, à laquelle nous desirons estre parfaitement unis, pour la conseruation de la veritable authorité Royale, du bien de l'Estat &

de toutes les Compagnies Souveraines. Nous espérons que vous nous rendrez ce bon office, tant pour les considerations publiques, que pour les qualitez de vostre naissance & de vostre merite, duquel nous conseruerons le souvenir, comme estans,

MONSIEVR,

**Les Gens tenans la Cour
de Parlement de Paris,
vos freres.**

La connoissance que la lecture de cette Lettre donna du sujet que traitoit celle du Parlement de Paris, fut vne nouvelle matiere à rompre celle qui auoit fait l'assemblée. On voulut sçauoir l'aduis des Gens du Roy, sur l'ouverture de ce paquet, ils demandent du temps à concerter leurs cōclusions, mais enfin ne cherchant que des faux-fuyans. Le premier President ayant prins les aduis, en fit faire l'ouverture, & la responce à cette Lettre fut différée. Et pource que les Officiers des Aydes, appuyez du credit du Duc, qu'ils s'imaginoient deuoir reuenir dans Bourdeaux, pour les establir dans vne haute souveraineté, leuoient haut le caquet, le Parlement ne pouvant souffrir cette audace, delibera sur leur teste, & rendit son Arrest, par lequel il fut ordonné, que tres-humbles remonstrances seroient faites au Roy

pour la suppression de la Cour des Aydes : & cependant sous son bon plaisir, défenses furent faites à ces Officiers, de continuer l'exercice de leurs charges à peine de faux, & de répondre des dommages & intérêts de parties, & à tous Esleus & autres Officiers & sujets du Roy de les reconnoître, à toutes Chancelleries d'expédier les Lettres des appellations des Esleus, sous autres adresses que celles du Parlement. Il fut encore enjoint aux Greffiers de porter, ou enuoyer les procédures & Registres au Greffe de la Cour, & aux Geoliers de traduire les prisonniers en la Conciergerie, à quoy ils seroient contraincts par emprisonnement. Cet Arrest fut signifié à leur Procureur General, pour y faire obeyr son corps, & aux Jurats pour tenir la main à son execution. Les sieurs de Salomon & Duval, pressoient leur retour vers le Duc, & demandoient leur charge par escrit. Si bien que l'affaire mise en deliberation, de ces trois points que le Duc demandoit. Les deux premiers furent accordez sans balancer, pour le desir qu'on auoit de viure en paix, le troisieme suspendit les aduis, à cause que le Duc ne promettoit point de son costé de reestabli dans le Chasteau du Ha, les canons qu'il en auoit tiré. Neantmoins pour faire toutes les aduances necessaires au repos, ce Chasteau fut remis entre les mains du Concierge, qui le gardoit auparauant. Cette complaisance toutefois fut iugée trop lente par le Duc d'Espernon, qui reuoqua aux mesmes Commissaires, qui luy furent renuoyés, les promesses, qui leur auoit donné, prenant pour pretexte de son desdit, l'ouverture du paquet du Parlement de Paris, qu'il faisoit passer pour

vn crime d'Estat, & l'Arrest rendu contre la Cour des Aydes, comme choquant la protection, qu'il leur auoit promise, & du mesme pas faisant aduancer des gens de guerre, & entrer dans Libourne, où il se rendit luy-même, pour mettre en assurance la garnison qu'il y vouloit laisser. Il desarma les habitans, & contraignit la pluspart de quitter leurs maisons & leurs familles, pour ne seruir pas de matiere à l'insolence des soldats. Dequoy le Parlement estant aduertý, qui n'estoit point encore armé que de l'autorité de ses Arrests, enuoya vn Huissier pour y publier sa deliberatiõ, & le cõmandemēt qu'elle faisoit aux gens de guerre de vuidier & laisser iouyr les habitãs de leur premiere franchise. Mais cõme la voix des Huissiers n'est point entenduë dans le bruit des armes, que le Duc y estoit le plus fort, que le soldat maistrisoit le Bourgeois desarmé, & que l'Huissier mesme y fut emprisonné, ces commandemens furent fort inutiles, & le Duc se retirant à Cadillac, y laissa Roquette pour commander ses troupes, & ietter sur vne Esglise & sur vn Hospital les fondemens de cette Citadelle, qu'il auoit desseignée il y auoit long-temps. Ce n'estoit pas assez qu'il fit contribuer Dieu & les pauvres à vn si pernicieux dessein, il exigea beaucoup de sommes pour cet ouurage, & força les payfans des Parroisses voisines d'y trauailler en manœuvres.

Ce procedé ne choqua pas seulement le Parl. par le mépris de sõ autorité; Bourd. s'y trouua fortémēt interessé, par la cõpassiõ qu'il auoit pour l'aisnée de ses filles, qui estoit si mal-traictée, par le peu de respect qui étoit réduit au traitté que les Bourdel. auoiēt fait avec le

feu Roy, sur le rasement du Chasteau de Fronfac, pour lequel on auoit composé à trois cens mil francs sous condition qu'il ne seroit basti à l'aduenir aucun Chasteau, forteresse ou citadelle dans l'estenduë de la Seneschaussée de Guyenne, & par les apparences tres-euidentes, que ce seroit vne piece qui feroit le blocus. Ce qui donna sujet au Parlement de s'émouuoir au bruit de tant de plaintes, & de donner Arrest le 30. Mars 1649. par lequel il est porté que le Roy fera tres-humblement supplié de maintenir la Ville de Libourne dans sa liberté, & faire deffences d'y bastir aucune Citadelle, reduit ny fortification, & à tous les Consuls, Scindics & habitans des Villes & Communautéz voisines, de fournir hommes, argent ny materiaux, à tous les habitans des lieux d'y aller, quelque commandement qui leur fut fait, à peine d'estre procedé extraordinairement contre les contreuenans, & à mesmes peines deffences furent faites à tous Gentils-hommes & autres, de faire aucune leuée de gens de guerre sans commissions du Roy, lesquelles ils seroient tenus presenter au Parlement. Cet Arrest neantmoins quoy qu'il fut publié dans la Ville, enuoyé dans Libourne & en beaucoup d'autres endroicts, n'arresta point ce trauail: au contraire il sembla animer ceux qui en auoient la conduite, d'en aduancer l'acheuement, & le Duc d'Espernon de son costé taschoit à faire des progresz, pour mettre Bourdeaux à la faim. Il enuoya d'un costé quelque escadron de Caualerie se saisir du moulin de Ciron, duquel particulièrement les Boulangers de Bourdeaux se seruent pour auoir leurs farines, pour le seruice de la Ville. De

l'autre Beaur Roche, l'un de ses Escuyers, alla se mettre dans le Chasteau de Langoiran, qui est au President Daffis, sur le bord de la Garonne; conqueste qui ne fut pas difficile à faire, n'estant gardé que d'une vieille femme. Il fit encore d'une autre part, & proche de Libourne, piller la maison du sieur d'Espagnet Conseiller au Parlement, pource qu'il auoit esté l'un des Commissaires deputez à la garde du Chasteau du Ha. Apres ces actes d'hostilité, les approches des troupes, le blocus de la Ville, les deffences qu'il fit à ceux du haut pays de descendre vers Bourdeaux, pour apporter des bleds ny des farines, il falut songer à sa deffence. Le Parlement pratiquant sa prudence ordinaire, enuoya des Commissaires par les quartiers, pour tenir l'estat des provisions d'un chascun & du nombre des armes. Et d'autant que la liberté publique estoit esgalement outragée, & que chascun prenoit part à son oppression, il fut trouvé à propos de faire difference des fidelles & genereux habitans, d'avec les traistres & les lasches. On proposa l'vnion de toutes les Compagnies & de tous les mestiers, & le serment qui la deuoit authoriser comme la pierre de touche. Parmy tous les corps qui composent la Ville, le nombre des voix l'emporta pour l'vnion d'esprit, de biens & d'interests. Dans l'Hostel de ville; la Bourgeoisie de l'une & de l'autre condition, y ayant accouru en foule pour ce sujet, si porta avec telle vigueur, que nonobstant la brigade de quelques Partisans du Duc d'Espernon, qui estoient venus en haste de Cadillac, ou pour rompre l'assemblée, ou pour faire balancer les voix, il fut reconnu que la justice scauoit

trionpher de la tyrannie. Les Officiers du Parlement monstrent l'exemple du serment, les autres corps, les Bourgeois & les Artisans, suivirent à leur imitation, & iurerent hautement par deuant des Commissaires deputez en chasque Parroisse, de combattre ou mourir & consacrer leurs biens & leurs fortunes au seruice du Roy & du Parlement, & à la deffence de la cause publique.

C H A P I T R E V.



ETTE vnion iurée avec tant de solennité, sembloit n'auoir formé qu'un cœur, qui animast tous ces corps d'un mesme sentiment. Toutefois on remarqua peu de iours après, qu'elle auoit produit par des effets non attendus, des parjures à Dieu, des infideles à la cause commune, & des espions pour le Duc d'Espernon. Quelques vns des plus considerables raffinans sur les choses de Dieu, & pensans desguiser avec des equiuoques la fidelité qu'ils deuoient à la religion du serment, ne craignirent pas de se rendre faux freres, pour, dissimulant leur ieu & leurs pensées, donner aduis certain au Duc de tout ce qui se traictoit, ou rompre les deliberations qui le pouuoient choquer, ou preuoyant ne les pouoir pas empescher, se rendre necessaires, & par les commissions, auxquelles ils s'offroient, retarder ou aneantir l'execution des aduis le mieux concertez

certez. Les autres moins adroicts, pour éviter la rencontre de ces occasions, abandonnoient par leurs retraictes le salut de leur Ville, & l'honneur de leur compagnie, à la discretion de leur ennemy commun. Si bien que leur exemple attirant beaucoup d'autres personnes hors la Ville, & cela mesme donnant quelque defiance, & esbranlant la fermeté des autres, il fut trouvé à propos de bailler Arrest, par lequel il fut défendu à tous les Presidents, Conseillers & autres Officiers du Parlement; ensemble à tous Officiers du Roy, aux Jurats, Juge, Consuls, Bourgeois & principaux habitans, de sortir de la Ville sans congé, & permission expresse, à peine de dix mil liures, & d'estre procédé contr'eux extraordinairement. Il y avoit de l'apparence que l'autorité de cet Arrest, qui fut publié & affiché aux carrefours de la Ville, arresteroit les fuyards, & feroit reuenir ceux, qui auoient desia prins la clef des champs. Mais comme le propre de la crainte, est de trouver des inuentions pour fuyr, & que la commodité en estoit belle, puis que les portes n'estoient point gardées, & que d'ailleurs le Duc d'Espernon se fortifiant, & faisant desia rouler ses troupes, qui ne porteroient dans leur bouche que des paroles de feu & de flammes, il fut iugé necessaire de pouruoir à la seureté de la Ville, & pour cet effet, de remettre sur pied les compagnies Bourgeoises pour faire les gardes, afin d'empescher les surprinses qu'on apprehendoit, ou par les troupes ennemies du dehors, qui muguetoient Bourdeaux, ou par les intelligences & les trahisons qu'on pratiquoit au dedans.

IL fut estably vn Conseil de Police, qui se tenoit dedans l'Hostel de ville, composé de deux Presidents & six Conseillers au Parlement, d'un député de chacun des autres corps, tant Ecclesiastiques que seculiers, d'un Aduocat & d'un Marchand, qui representoient les Bourgeois de l'une & de l'autre robe. Cet establissement auoit vne tres-bonne fin, puis qu'il n'auoit pour visée, que la deffence de la liberté publique, & l'harmonie necessaire à conseruer les cœurs de tous les habitans dans vne parfaite intelligence, qui deuoit se recueillir du concert de ces esprits choisis. La pratique neantmoins & la façon d'agir de la plus-part de ces Commissaires, apprint assez au vulgaire, que leur ennemy auoit des amis parmi leurs plus confidens, & que ceux qui faisoient la teste, ne faisoient pas tousiours la plus saine partie; mal-heur assez ordinaire aux peuples, qui pour estre gouuernez par la pluralité, ne sont pas tousiours le plus fidellement conduits. La premiere démarche de ce Conseil fut, d'ordonner des gardes aux portes de la Ville. Et pource que la plus-part des anciens Capitaines n'estoient point agreables, à cause que les vns estoient faits de la main des Iurats, desquels la conduite estoit suspecte, & que les autres auoient baille de l'ombrage dans leurs deportemens, on en mit d'autres en leur place, en la fidelité desquels on s'asseuroit. Et combien que par l'ancien ordre, la Ville fust distribuée en six Iurades, dans chacune desquelles il y auoit deux Capitaines en chef, qui composoient en tout douze Compagnies, & à vray dire douze Regimens, desquels chacun des Iurats estoit le Maistre de

Camp, pour les Compagnies de sa Iurade ; neantmoins il fut trouvé important pour le bien de la Ville d'oster cette autorité, pour ce coup aux Iurats , & partageant en trois chacune de ces Compagnies , en faire trente-six en tout , qui faisoient prez de vingt mil hommes effectifs , à la teste desquels on mettoit des Conseillers du Parlement, qui portoient tiltre de Colonels, lesquels ne faisans qu'un vestement de la robe & de l'innocence, faisoient voir qu'ils sçauoient ajuster l'espée à la balance, & animant les Bourdelois par leur exemple, ils redoubloient leur courage & le zele au seruice du Roy, & à la deffence de leur liberté outragée. Nonobstant toutes ces precautions, la deffiance estant la mere de la seureté, on apprehendoit avec raison que l'ennemy, qui estoit dedans, c'est assauoir la garnison du Chasteau Trompette, commandée par le sieur du Haumont, qui estoit tres-affidé au Duc, ne se saisit du Chasteau du Ha, & ne fit des sorties dans la Ville, à rauager des quartiers, non seulement par les forces de sa garnison, mais aussi par des soldats estrangers, qu'il pouvoit aisement introduire de nuict par la porte de derriere, qui respond sur le Quay. On ordonna que le Chasteau du Ha seroit gardé par des Compagnies Bourgeoises, sous l'autorité des sieurs d'Espagnet & de Bordes Conseillers au Parlement, deputez pour la conseruation de cette place, & que l'on feroit des barricades en toutes les auenuës du Chasteau Trompette, au dedans de la Ville, à quoy on adjousta que les gardes des barricades du Chasteau du Ha, & des portes, desquelles on mura les plus inutiles, escher-

roiët au fort par des billets tirez däs le Chapeau du Major de la Ville, sur le point que ceux qui estoient de iour, monteroient leurs gardes à la place d'armes, pour aller prendre leurs postes.

LE Duc eust à mesme temps aduis de cette Police, & reconnoissant que cet ordre, qui ne marquoit pas que les Bourdelois fussent si fort nouices à la discipline des armes, comme il s'estoit imaginé, trauersoit ses desseins, il s'aduisa, pour leur faire tomber les armes des mains, de leur persuader par vne Lettre qu'il ennoya au Parlement, que conseruer vne Ville capitale au seruice du Roy, & vn peuple en sa liberté, estoit choquer l'obeyssance que l'on doit à sa Majesté, & qu'ils estoient coupables d'une reuolte. Senfuit la teneur de la Lettre.

MESSIEURS,

La consideration que j'ay pour le Parlement & pour la ville de Bourdeaux, & le desir de conseruer la tranquillité de cette Prouince, m'oblige (auant que de prendre autre resolution) à vous prier de m'esclaircir de vos intentions. Vous auez recherché des unions extraordinaires, & auez pris & fait prendre les armes à Bourdeaux. Si c'est pour le seruice du Roy & de la Reyne Regente, ces peines sont inutiles; vous n'auetz point d'ennemis, & il n'y a personne qui soit plus estroitement engagé dans ses interests que ie le suis, &

que ie desire y estre joint avec vous. Si sous pre-
 texte de bien public, on veut choquer l'authorité
 de la Reyne Regente, ces unions ne peuvent estre
 que prejudiciables au service du Roy & au bien de
 l'Estat. Je vous supplie, MESSIEURS,
 puis que l'affaire touche le repos de cette Prouin-
 ce, où vous n'ignorez pas l'authorité que le Roy
 m'a confiée, de me faire sçauoir par une claire ex-
 plication de vos sentimens, touchant le service de
 leurs Majestez, si ie me dois garder de vous,
 comme de gens armez contre la Reyne Regente,
 ou continuer à me dire, comme ie le desire pas-
 sionnement,

MESSIEURS,

Vostre bien humble Seruiteur
 le Duc d'Espernon.

De Cadillac, ce 31. Mars 1649.

Cette Lettre ayant esté portée dans l'assemblée
 des Chambres, eust sans doute surprins par son adresse
 toute autre Compagnie que celle-la, qui pour estre
 esclairée de beaucoup de lumieres, en descouvrit tout
 soudain l'artifice, & aprez l'auoir examinée, nomma
 des Commissaires pour dresser la response qui suit.

TRES-HONORE' Seigneur,

La Cour n'a jamais manqué à vous témoigner par tous les moyens qui luy ont esté possibles, la consideration qu'elle a pour vostre personne, & a tousiours fait voir combien elle desiroit entretenir avec vous une bonne correspondance, apres quoy, elle n'a peu que se trouver extremement surprise de voir par celle qu'il vous a pleu nous escrire, les doutes que vous semblez faire de nostre fidelité pour le service du Roy. C'est le plus sensible reproche qui puisse estre fait à une Compagnie, qui n'ayant d'autre authorité que celle qui luy est communiquée par Sa Majesté, à conserué jusques à present, & conseruera tousiours cette gloire inuiolable, de n'auoir jamais eu de mouuemens que pour le service de son Maistre. Et certes cet aduantage luy est si cher, qu'encores qu'il vous soit connu qu'elle ne doit rendre compte qu'au Roy de ses actiōs & de ses intentiōs, elle auroit beaucoup de regret, si elle auoit donné quelque raison ou même quelque pretexte, nō seulement à vous, mais au moindre des Sujets du Roy, de pouuoir soupçonner sa fidelité. Quand il vous plaira de faire reflection sur l'esclaircissement que vous nous demande par la vostre, de nos intentions pour le service du Roy,

Et la Reyne Regente sa Mere, nous vous promettons que vous iugerez qu'à cette demande, qui ne nous pouvoit estre faite sans nous blesser, vous eussiez trouvé la responce chez vous-mesme, qui ayant esté si souvent parmy nous, n'y auez jamais rien remarqué, qui ne respirast avec ardeur le service de leurs Majestez. Nous en auons tousiours fait & en faisons tousiours une profession si publique, que ce ne sera iamais une question douteuse. Et nous ne croyons pas aussi que le service du Roy, & celui de la Reyne sa Mere, qui sont deux choses aussi unies dant nos cœurs, qu'elles le sont dans elles-mesmes, puissent estre des interests separez, quoy qu'il semble que vostre Lettre y mette quelque distinction. Nous sommes encore plus estonnez, de ce que vous marquez desirer d'estre informé des raisons, qui ont obligé cette Ville, qui vous deuoit estre si chere, à se reünir pour songer à sa conseruation, dans l'extremité où vous l'auiez voulu reduire, par des impressions qui doivent estre bien fortes, puis qu'elles vous obligent d'agir contre vos inclinations & contre vos interests. C'est une union que nous n'auons pas recherchée; nous auons au contraire employé tous nos soins pour en oster la cause, qui n'est autre que le mal-heur commun dont elle se trouve environnée, par les troupes qui l'assiègent de toutes parts, & par

l'exemple qui la touche aussi iustement de compassion que de crainte, des Villes ses voisines & ses filleulles, dont elle voit les Bourgeois errans & desolez, trouver à peine une retraicte assuree dans son sein, comme de leur mere commune, & où elle entend tous les iours d'eux cette plainte, que c'est à sa consideration qu'ils ont receu de vous ce traictement. Cette veritable cause des justes efforts que fait cette Ville, pour se mettre en estat d'éviter de pareils mal-heurs vous est si connu, que nous ne croyons pas que vous soyiez tant soit peu persuadé, ny que vous ayez esperé de pouvoir persuader à personne, que la Cour, & non pas une si rude necessité, ayt mis les armes à la main de nos Bourgeois. Si vous en auiez quelque impresssion, nous vous prierions encore de vous ressouvenir, que sur diuers aduis qu'on donnoit à cette Ville, des desseins formez contre sa seureté & contre son repos, qui ne se sont trouvez que trop veritables, contre les sentimens que vous scauiez que nous en auions alors, nous creusmes qu'un des moyens les plus propres pour dissiper les apprehensions des peuples, quoy que nous les iugeassions assez vaines, estoit de faire jouyr cette Ville du priuilege que le feu Roy, de tres-glorieuse memoire, luy auoit accordé sur nos remonstrances, en bien moindre occasion, qui estoit, d'en esloigner à dix lieues les trou-

pes des gens de guerre. Ce moyen & quelques autres, ayans esté proposez, la Cour vous rendit cette deference de croire qu'elle ne devoit deliberer qu'avec vous. Vous fustes inuité d'entrer au Palais, & quoy que vous fussiez plainement informé de la matiere qui s'y devoit traicter, & que vous scachiez iusques au dernier point les droicts de vostre charge, vous y vintes, & rompistes à la quatrième voix, la deliberation qu'il vous eust esté facile de preuenir par une seule parole, en nous faisant esperer que vous feriez retirer les troupes. Nous vous en tesmoignâmes nostre douleur, & le desir d'une parfaite reünion, par l'enuoy de Messieurs les Presidents & Conseillers qui allerent traicter avec vous sur ce suiet, & qui furent chargés de vous faire entendre que nos Registres estoient plains de pareilles deliberations, en presence de Messieurs vos predecesseurs. Sur ce point vous partistes soudainement de la Ville, & la Cour vous tesmoigna que dans l'entiere confiance qu'elle a en vostre affection au service du Roy & au bien de cette Province, elle n'estoit pas capable de la soupçonner. Elle n'auoit prins aucun ombrage de ce qui auoit donné tant de crainte à nos habitans, des reparations & provisions extraordinaires, qui s'estoient faites au Chasteau Trompette, de l'habitation que vous y auiez prinse contre vostre coustume, du renforce-

ment de la garnison, & augmentation des munitions, de tant de canons remontés, & qui pis est pointés contre la Ville, du depart soudain de Madame la Duchesse d'Espéron, qui estoit encores malade, de tant d'autres ordres que vous auiez donnés de toutes parts, sans les communiquer à la Cour. Elle ne voulut pas encore entrer en defiance de ce depart inopiné, de voir peu apres dégarnir vos maisons, & emporter tous les meubles, comme si vous renonciés à reuenir jamais, non pas même d'apprendre que de nuit par vostre ordre on auoit soustraiçt les canons qui estoient au Chasteau du Ha, & qu'on auoit saisi la citadelle de Bourg. Mais les peuples s'en alarmerent à ce point, que nous ne peumes ny ne deümes leur refuser quelque satisfaction. Il falut enuoyer des Commissaires au Chasteau du Ha, que vous scauez estre cher à nos habitans, quoy que ce soit une place qui ne vous puisse donner de la jalousie, puis qu'elle est sans aucune deffence. Il fut encore necessaire de donner l'Arrest de l'éloignement des gens de guerre à dix lieues. Nous pouuons dire que ce fut à vous que nous le donnâmes, & non pas à eux, puis que nous le sursismes à vostre consideration, & même nous nous mismes en estat de le laisser sans effet, qui est le dernier point de condescendance où puisse aller une Cour Souveraine.

Nous fîmes plus, nous envoyâmes deux Conseillers pour traicter avec vous dans vostre maison de Cadillac, pour vous faire sçavoir cette resolution, & vous demãder que ce fut à vous que le peuple eut l'obligation de l'éloignement de vos troupes. Vous receustes nos Commissaires dans cet esprit d'union que vous nous auez si souvent promis, & que nous auõs si soigneusement cultiué. Vous leur accordastes cet estoignement de gens de guerre, & desirastes de la Cour que cet Arrest ne parust pas, qu'elle empeschast la garde des portes, que demandoient les habitãs, & en troisieme lieu, qu'elle fist remettre le Chasteau du Ha en son premier estat, sans proposer de vostre part le restablissement des canons enleuez. Aussitost apres leur retour, les deux premiers poinçts furent accordez, & pour ce que la seconde fois que les Commissaires allerent vous retrouver, vous marquâtes que cette garde du Chasteau du Ha, quoy que faite sous les ordres des Furats, vous faisoit peine, qu'on auoit trop differé à le rendre & à vous respondre. Là dessus, pour faire ceder toutes considerations au desir de la paix, & au bien du seruice du Roy, ce Chasteau fut remis incontinent. Ce qui s'est passé depuis a detrompé tous ceux qui auoient creu que ce méchant Chasteau, estoit la raison de la descente si precipitée de vos troupes. On a veu que ce n'estoit pas pour cela que vous auez esté à Bazas, où vous sçanez les

choses qui se sont passées, que vous estes depuis venu à Libourne, que vous y auez desarmé les habitãs, escarté les Bourgeois & jetté les fondemens des nouvelles fortifications, & d'une Citadelle qui s'esleue sur les ruynes d'une Esglise & d'un Hospital. Ce fut en ce lieu qu'un de nos Huissiers, estant allé signifier un Arrest, fut emprisonné par vostre ordre, & depuis vos troupes approchées de toutes parts, ont inuesti cette Ville. Nous aurions donc beaucoup de sujet de vouloir estre esclaircis de ces choses, si vous n'auiez trop ouvertement expliqué vostre intention. La maison de celuy des Conseillers, qui auoit commandé au Chasteau du Ha, a esté rauagée par un logement de soldats, qui a violé l'autorité des Ordonnances Royaux, qui exemptent nos maisons de la Ville & de la Campagne. Vous auez fait saisir le Chasteau de Langoiran, appartenant à celuy des Messieurs les Presidents, qui assista à l'Hostel de ville, à cette deliberation des ordres, que nous auons sceu ne vous auoir pas esté agreable. Vous auez saisi le moulin du Ciron, une des pieces les plus necessaires à la subsistance de cette Ville, arresté la descente des viures, changé les ordres & destourné les routes des Courriers ordinaires. Et enfin celuy qui commande sous vous dans le Chasteau Trompette, nous a fait connoistre tout ce que peut entreprendre une Citadelle sur la justice souveraine du Roy.

Il s'est formalisé de ce que la Cour enuoyoit des Commissaires dans un Faux-bourg; il les a menacés d'une volée de canon, & reduisant ses menaces à des effets encores plus criminels, il les a arrestez passans sous les murailles de la place: il leur a dit hautement qu'il feroit tirer sureux, & en effet il fut lasché grand nombre de mousquetades. Cette occasion, où les peuples ne peuvent souffrir de voir l'autorité du Roy si outrageusement violée en la personne des Conseillers de la Cour, mit toute cette Ville en trouble, & son salut en peril. Ce sont là les veritables causes de nos esmotions & de nos plaintes, causes si publiques, que personne n'a sujet d'en demander d'esclaircissement: & tous ceux qui iugeront (comme il ne se peut iuger autrement) que le service de leurs Majestez en l'estat present, consistoit à maintenir la Prouince en paix, & qui verront dans la suite de ce procedé, que nous auons fait tout ce qui nous estoit possible pour venir à bout de ce dessein, decideront aisement qui de nous a troublé le repos des peuples, & qui se faisant a eu plus de consideration pour le service du Roy. Nous souhaittons pourtant dans la passion que nous auons pour le salut de cette Ville, & pour le repos de ce ressort, si necessaire au bien de l'Estat, que la chose passe encore pour incertaine, & ne desirons rien tant au monde sinon que vous veüillés prendre le dessein de resoudre

plainement cette difficulté, par ce prompt & efficace moyen, qui ne depend que de vous & de vostre affection pour cette Province. Quand vous rendrez à Bourdeaux sa premiere paix, en esloignant les gens de guerre; quand vous luy remettrez la liberté de sa subsistance, en remettant le moulin du Ciron, la Citadele de Bourg, & tout le reste au premier estat, faisant cesser les fortifications de Libourne, & demolir ce qui est basti iusques à present, les armes tomberont des mains de cette Ville avec grand plaisir, & vous verreZ clairement qu'elle ne les a prinses qu'avec peine pour se deffendre, & par mesme moyen vous remettreZ en liberté les inclinations que nous conseruerons tousiours à demeurer,

Tres-honoré Seigneur,

Vos bien humbles Seruiteurs
 Les Gens tenans la Cour de
 Parlement de Bourdeaux.
 Signé, De Laroche.

Escrit à Bourdeaux en Parl.
 les Chambres assemblées,
 le 2. d'Avril 1649.

C H A P I T R E VI.



A plus-part des personnes creut que l'en-
uoy de ces Lettres de part & d'autre,
estoit capable de produire quelque bon
effet, toutefois il reussit autrement, car
le Duc d'Espéron prenait ses aduan-
tages de ces amusemens, qui sembloient endormir tous
les bien intentionnez, faisoit defiler ses troupes,
tantost d'un costé & tantost de l'autre, tantost sur les
passages des riuieres, & tantost sur la terre ferme, se
faisissant peu à peu des postes les plus aduantageux &
les plus necessaires pour la subsistance de Bourdeaux.
Si bien que le Parlement reconnut que le principal de la
deffence, ne consistoit pas à tenir les armes renfermées
dans l'enceinte des murailles, mais qu'il les falloit por-
ter plus auant, & que pour cet effet il ne suffisoit pas
d'auoir des soldats qui voulussent obeyr, mais bien
principalement des Chefs qui sceussent commander,
lesquels on ne pouuoit mieux choisir que parmy la No-
blesse du ressort, qui sembloit deuoir prendre part en
cette querelle, non seulement par l'affection qu'ils de-
uoient auoir pour leurs parens & amis, qui s'y trou-
uoient enuolopez, & par le respect qu'ils doiuent
à des Iuges, desquels ils reclament tous les iours
la justice : mais aussi par la compassion qui de-
uoit esmouuoir leur generosité, à ne souffrir pas qu'une

Ville Capitale, dont l'oppression faisoit consequence pour toute la Prouince, fust si injustement persecutée. Ce fut pour cela que le Parlement exhorta par son Arrest tous les Seigneurs & Gétils-hommes de son ressort, de se rendre au plustost qu'il leur seroit possible dans Bourdeaux, pour le seruice du Roy, & conseruation de la Ville & de la Prouince, & que passant plus auant, il declara tous les Chefs, Generaux & autres, qui prendroient part dans les actes d'hostilité qui se fairoient contre Bourdeaux & autres Villes du ressort, & qui s'assembleroient, leueroient ou fairoient leuer des troupes pour ce sujet, responsables de leur teste envers le Roy de tous les euenemens, & solidairement enuers les particuliers, de tous les pillages, degasts & autres dommages qu'ils pourroient souffrir pour raison de ce. Il ne s'arresta point encores là, il escriuit des Lettres particulieres aux plus considerables de la Prouince, & les traicta avec toutes les ciuilitéz qu'une Compagnie souveraine peut pratiquer. Mais tout cela fut inutile, ou pource que quelques vns des plus grâds disputoient de l'aduantage des Commandemens, ou que les autres pretendoient aduancer leurs fortunes aux despens d'une Ville abandonnée, ou à cause que quelques autres estoient desia engagez dans le party du Duc, ou pour ce qu'enfin il s'en trouuoit d'assez lasches, pour aimer mieux conseruer leurs maisons par la neutralité, que les exposer à la cholere du Duc d'Espernon, pour courir aprez les occasions de la gloire, & rehausser l'éclat de leur profession.

LE Parlement, qui sçauoit tres-bien que l'autorité Royale

té Royale est si delicate, qu'elle ne peut estre blessée, que le coup ne soit mortel pour celuy qui le donne, de crainte de l'offencer, & d'encourir son indignation, pressoit ses deputez par tous les ordinaires, de faire voir à leurs Majestez le tableau de leur misere, & de reclaimer leur bonté & leur justice, pour leur accorder la fin de ces maux, & le chastiment de ces persecutions. Mais le Duc estoit assisté avec tant de fidelité auprez du Conseil d'enhaut, qu'il ne trouvoit pas seulement le moyen de bailler des faux visages à ses violences; mais aussi de descouvrir les plus secretes negociations des deputez, & quand elles eschapoient à la veüe de ceux qui le seruoient, il enuoyoit, pour ne les manquer point, arrester sur les chemins les Courriers, qui portoient les aduis & les expeditions, lesquels il faisoit conduire à main armée à Cadillac, où faisant ouvrir leurs malles, il fouilloit tous les paquets, qu'il rendoit quelquefois ouverts, & d'autrefois les retenoit. Or comme en cela le Parlement n'estoit pas seul interessé par la descouverte de leurs secrets, mais aussi le public, par le retardement des Lettres des negocians, qui rompoit le commerce, il fit deffences par vn Arrest rendu les Chambres assemblées, à toutes personnes, de quelque qualité & condition qu'ils fussent, de détourner les Courriers & Messagers, & enjoignit aux Maistres des Postes & des Bureaux de les faire acheminer en droicte route & avec seureté en la Ville de Bourdeaux, à peine de la vie, leur permettant à cet effet de se saisir de tous ceux qui les voudroient empescher, leur enjoignant, ensemble à tous Officiers, Consuls &

66 DES MOUVEMENTS,
Syndics des Parroisses, à peine de priuation de leurs charges, de retenir ces personages prisonniers, & les faire conduire en la Conciergerie de la Cour; & à cet effet employer toutes les voyes raisonnables, mesme d'assembler, si besoin estoit, les Communes, pour prester main forte à l'execution de cet Arrest, lequel, quoy que tres-juste, estoit tres-inutile, pour ce que ce n'estoit que du parchemin qui fulminoit contre vn ennemy, qui ayant les armes à la main, mesprisant ces deffences, estoit plus exactement obey.

LE Duc d'Espéron, qui n'auoit point pour lors de plus forte passion que de voir la Citadelle de Libourne acheuée, comme estant vn poste tres-adantageux non seulement pour empescher que Bourdeaux ne receust pas le secours ordinaire des viures, que les deux riuieres Lisle & Dordogne luy fournissoient, mais aussi pour arrester la fougue de trois Prouinces, la Xaintonge, Perigord & le Limosin, impatientes de traualler au soulagement de la Capitale dont elles releuent, choisit Creon, vne petite Ville à trois lieuës de Bourdeaux pour sa place d'armes, en laquelle toutes ses troupes ayant eu leur rendez-vous, il en destacha les vnës pour Libourne, à fortifier la garnison qu'il y auoit laissée, pour fauoriser le traual de la Citadelle, & employa les autres à ruyner les campagnes voisines, & y exercer tous les actes d'hostilité les plus execrables, desquels il sembloit que les incendies & les violemens, fussent les moindres. Et combien que le Parlement eust enjoint aux Maire & Iurats, & Consuls des Villes, & aux Seigneurs particuliers de fortifier leurs Villes &

Chasteaux, pour faire teste & arrester la violence des troupes ennemies, neantmoins ils auoient tellement effrayé la campagne & les petites Villes, que ces habitans aymoient mieux abandonner leurs vies, leurs biens & leur honneur, à la discretion de la brutalité, que de songer de se mettre en estat de les deffendre. Si bien que le Duc voyant que tout faisoit iour à ses armes, quoy que le Parlement donnast des Arrests, par lesquels tantost il deffendoit à toutes sortes de manœuvres de continuer l'esleuation de cette Citadelle, & aux Parroisses & Villes voisines de fournir ny hommes ny argent, tantost aux Cottisateurs & Collecteurs des Parroisses, de se dessaisir des Tailles des années 1647. & 48. qu'il eust ordonné que Fochier-Lieutenant General au Presidial de Libourne, Darlis Procureur Syndic de la mesme Ville, Commissaires, Nozay leur Grefier, Tauzin Iuge de Barsac, Deymené Iuge de S. Emilion, & Beau-roche Escuyer du Duc, seroient prins au corps pour auoir desliuré des attaches, & serui d'instrument à contraindre les Parroissiens & habitans des Communautéz de Vayres, Arueyres, Guytres, Puynormand, Preuosté d'entre deux Mers, Barsac & autres, de contribuer à cet ouvrage, & fournir pour son aduancement argent, viures, materiaux & manœuvres; qu'il eut encore enjoint à tous les Consuls, habitans & Communautéz des pays d'Agenois, Condomois, Perigord & de la Xainctonge, de faire descendre & porter incessamment dans Bourdeaux toutes sortes de bleds & autres grains, & prouisions de bouche, pour les y vendre & debiter librement, & qu'à cet effet il leur permit de som-

mer les gens de guerre qui s'estoient saisis des ports & passages des riuieres de Garonne, Dordogne & Gironde, de laisser passer librement les batteaux, & qu'en cas de refus ou resistance, il leur permit de les forcer & contraindre, & d'assembler pour cela le peuple au son du tocsin, pour faire en sorte que la force en demeurast au Roy & à sa justice souveraine. Tout cela neantmoins demeuroid sans effet. La force faisoit sa Loy. Le Duc bailloit des Ordonnances contraires, qui n'estoient pas seulement publiées, mais aussi executées. Les Jurats & Consuls des Villes, les Collecteurs des Parroisses & Communautéz, portoient, quoy que malgré eux, les subsistances à ses agens, lesquelles, encore qu'il les destinast à ce trauail, & au payement des gens de guerre, ne s'employoient à rien moins, & ne seruoient qu'à remplir ses coffres, payant ses troupes par la licence du pillage, auquel il auoit sacrifié dans tout le plat pays, le sang de la vefue aussi-bien que de l'orphelin, la misere du pauvre comme le mal-heur du riche.

CHAPITRE VII.



Il y auoit loin de Libourne à Cadillac, où le Duc demeuroid avec assiduité. Et combien que Creon, qu'il auoit choisi pour son lieu d'assemblée, semblast faire le milieu, & partager esgalement cette ligne de communication, neantmoins comme on com-

mençoit à Bourdeaux de mettre des gens sur pied, & qu'on expedioit des Commissions pour deux Regimens d'Infanterie, l'un qui portoit le tiltre de Parlement, sous la conduite du sieur de la Roche Conseiller en la Cour, qui en estoit le Maistre de Camp, & l'autre celui de la Bourgeoisie, qu'on se preparoit encore à dresser vne armée nauale, ayant pour cet effet apresté quelques chaloupes, attendant que les gros vaisseaux fussent en estat, & que le Duc craignoit que l'on ne fit dans le passage quelque surprinse sur ses troupes. Il desseigna de se saisir du Chasteau de Vaires, qui appartient à la premiere Presidente de Gournes, & au President Gournes son Nepueu, dans lequel il n'y auoit pour lors que le Capitaine Gournes, Frere du President, lequel s'en estoit rendu maistre quelque temps auparauant, ayant chassé le fermier. A mesmes qu'il eut connoissance de ce dessein, il porta l'aduis au Parlement & au Conseil de Police, qui luy fit expedier vne Commission pour leuer des gens dans les Parroisses voisines, & se fortifier. Et pource qu'il auoit assez de prouisions de bouche, ayant grand nombre de bled, & le moulin au pied du Chasteau pour faire de la farine, on luy enuoya des munitions de guerre, & deux cens volontaires de Bourdeaux, qui furent conduits par les sieurs de Blanc de Polignac, la Roque de S. Macaire (duquel l'Histoire reparlera en son lieu) Lalande de Bayonne Ayde Major de la Ville, Richon & Dupuy, lesquels, apres auoir mené avec seureté ce conuoy de nuict & par eau, reuindrent dans Bourdeaux, laissant ces Soldats pour la

deffence du Chasteau, sous la conduite des sieurs Gourgues & Dupuy.

IL fut question de se mettre en estat pour deffendre cette place. On trouva à propos de fortifier le Bourg. Le Capitaine Gourgues fit valoir l'autorité de sa Commission, mande les habitans du lieu & du voisinage, pour venir trauailler aux fortifications qu'on jugea necessaires. Ce Bourg pouvoit estre attaqué par quatre endroicts ; l'un du costé du pont, qui respond au chemin qui va de Vayres à Bourdeaux, lequel fut bien-tost mis en deffence, tres difficile à prendre, à la faueur d'une tres-forte barricade faite au deça du pont, & au derriere de deux grands fossez qui se deffendoient l'un à l'autre, dont l'un ayant esté ouvert, regorgeoit l'eau en abondance dans le chemin & dans des preries qui sont au deuant, par le moyen de laquelle l'abord estoit fait inaccessible. De l'autre costé on fit vn grand retranchement qui bouchoit trois chemins, dont celuy qui est à droit va à Arueyres, l'autre à gauche respond au Port, & celuy du milieu à la plaine de Saugrauslan. On fit aussi vne demi-lune à costé de la porte du Chasteau. Mais comme la principale force d'une place assiegée ne consiste pas toute dans la bonté du terrain, ou dans la regularité des fortifications, mais bien dans la force du sang & des hommes qui la deffendent, le courage & l'experience de ceux qui les commandent; & qu'il est vray que rien ne peut vaincre les hommes que les hommes mesmes, il falloit vn Commandant pour donner les ordres à ceux qui estoient postez dans ces retranchemens.

Le Capitaine Gourgues se contentant de commander la garnison du Chasteau, le choix fut porté sur le nommé le Rousseau habitant de Vayres, en la conduite duquel les habitans auoient quelque confiance, pource qu'il auoit assez long-temps porté les armes, pour auoir acquis quelque pratique. Il auoit accepté cette Commission, mais ayant esté maltraicté par des paroles aigres, que luy dit le Capitaine Gourgues, il abandonna la place & la Commission, & se depitant de la sorte, il traïsna avec luy la pluspart des habitans, qui sur la nouvelle des approches de l'ennemy, ne cherchoient qu'un pretexte à pouoir faire retraicte. Ce ne fut pas la seule imprudence que Gourgues fit, qui a fait soupçonner sa fidelité au party de Bourdeaux, car pendant qu'on trauailloit aux fortifications, il receuoit souvent des visites de Pontac d'Anglade son voisin & son amy intime, & lequel il sçauoit tres-bien estre du party contraire, qu'il conduisoit dans ses trauaux, & souffroit qu'il harangast les soldats, & leur imprimast l'abandonnement de la place, par la crainte de la cholere d'un Gouverneur: ce qui ne fit pas peu d'effet, car soudain que l'on vit l'ennemy en marche du haut du Chasteau, à un quart de lieue du Bourg, la pluspart des habitans eschaperent. Gourgues se renferma dans le Chasteau. Si bien qu'ils n'estoient pas quarante personnes à soutenir les retranchemens, & possible n'eussent-ils point esté soutenus du tout, si trente des Bourdelois les plus hardis n'eussent sorti du Chasteau, sous la conduite de Martin, Boucher de Bourdeaux, qui leur ser-

uoit de Sergent, qui retindrent & animerent par leur exemple les autres qui restoient.

LES Espernonistes auant faire leurs approches, enuoyerent reconnoistre le Bourg du costé du pont, mais ils trouverent qu'il y auoit de quoy receuoir de la honte, au lieu d'y acquerir de la gloire: ce qui fut rapporté au sieur de Marin, qui commandoit les troupes composées des Regimens d'Anjou, de Guyenne & de la Marine, & de quelque corps de Cauallerie, qui s'en remettant à ce qui luy fut dit par les Coueurs, fit rebrousser chemin, & prenant sa marche plus haut, il fut conduit par Pôtac d'Anglade dás la plaine de Saugrausfan, où il mit son aamée en bataille, qu'il partagea en trois bataillons, soustenus d'un escadron de Cauallerie chascun, & aprez auoir enuoyé reconnoistre ce second retranchement par d'autres Coueurs, qui ne l'ayant pas ozé aborder de fort prez, monterent sur vne petite eminence, de laquelle ils voyoient aisément au dedans de la barricade le petit nombre des soustenans, ce qui l'obligea, sur le rapport qui luy en fut fait, de les enuoyer sommer par vn trompette de se rendre, auquel ils firent responce, aprez auoir consulté l'aduis du Capitaine Gourgues, qui vit ses gens tous resolus à bien faire, qu'il falloit perir ou vaincre. Sur quoy le sieur de Marin disposa ses trois bataillons sur les trois chemins qui conduisoient au retranchement: cependant qu'une partie des assiegez les attendoient pied ferme, & que les autres prenant de la poudre dans vn bassin en la Cour du Chasteau, y mirent le feu par mesgarde, qui tua vn soldat

dat & brulla quelques autres , parmy lesquels estoit le sieur de Lalane fils du Conseiller. Cette fumée espaisse qui fut apperceuë par le sieur de Marin , luy donnant l'apprehension de quelque secours , fit suspendre l'attaque , iusques à ce que luy ayant esté asseuré qu'il ne parroit rien du costé du Port, il commanda de faire aduancer les enfans perdus sur le chemin du milieu, qui ayans abordé prez du retranchement, furent portez par terre par vne salue de fusiliers , & firent ouverture à ceux qui les soustenoient, lesquels n'en eurent pas gueres meilleur marché, en telle sorte que dans ce rencontre il y en eust vne vingtaine d'Espéronnistes tuez. Les assiegez voyans approcher le gros , & qu'ils alloiênt estre inuestis par tout, estans en trop petit nombre pour soustenir le choc, firent retraicte dans le Chasteau. Les Espéronnistes n'eurent pas si tost apperceu que les retranchemens estoient abandonnez , qu'ils donnerent dedans , & y estans entrez ils gagnerent le cimetiere , dans lequel il n'y auoit que six à sept Parlementaires , qui aprez auoir fait leur descharge coururent au Chasteau. Le sieur Iunca, Vicaire du lieu, personnage d'une vie fort exemplaire, à l'imitation de Moyse, leuoit les mains au Ciel au pied de l'Autel, pendant que ses Parroissiens combatoient, mais à mesmes qu'il entendit le bruit dans le cimetiere, pensant garantir le Sanctuaire du libertinage du soldat, il courut à la porte pour la fermer , & ne fut pas au milieu de la nef, qu'un Espéronniste le couche en joue, & luy perçant le cœur d'une mousquetade, le renuersa mort sur le paué, & luy fit rendre l'ame au lieu où il l'auoit si souvent offerte à

Dieu. Ce coup fit planche à beaucoup d'autres, qui furent si sacrileges que de piller la custode, le calice; la lampe, & despoüiller Dieu avec vne insolence incroyable, de tous les ornemens qu'on luy auoit consacrez, & portant l'abomination iusqu'au dernier point, ils firent vne escurie dans l'Eglise, & attacherent avec mépris leurs cheuaux au pied des Autels, que les Demons mêmes n'ozent aborder sans crainte & sans respect.

CE n'estoit pas assez d'auoir gagné le Bourg & l'Eglise, il falloit auoir le Chasteau. Les Espernonistes ne trouuant plus de resistance, s'allèrent loger assez proche à la faueur d'une fuye, mais ils n'y demeurèrent pas long-temps, car les fauconneaux secondez des fusillades qui faisoient grand feu, les en deslogerēt bien-tost, & aprez y auoir perdu quelques vns des plus apparens, ils se saisirent d'une grange, dans laquelle ayant trouvé nombre de tonneaux, ils firent des barricades, à l'abry desquelles ils gagnerent à la faueur de la nuit qui suruint, la contrescarpe du fossé, sur laquelle ils perdirent grand nombre de soldats & quelques chefs, qui s'y traïsnoient sur le ventre, & que l'on descouvroit par la lumiere des feux que l'on jettoit en bas. Les Parlementaires qui s'animoient dans le peril, ayant espuisé leurs munitions, recoururent à Gourgues pour en auoir de nouvelles, lequel ils trouverent assoupi sur vn lit par des pensées creuses, qui leur persuaderent la defiance, laquelle fut augmentée par le refus qu'il fit de leur bailler de la poudre, & par la proposition qu'il aduança pour capituler, qui fut tres-mal receuë par les soldats qui tascherent de luy bailler le cœur qu'ils deuoient re-

cevoir de luy , mais inutilement , car dès le lendemain à la pointe du jour, il enuoya le nômé Prieur du lieu de S. Germain pour traicter de la capitulation, mais ils furent si nouices , que sans la mettre par escrit , & la faire avec honneur , ils la sousmirent à la discretion de leurs ennemis , qui trouuans le pont abbatu & le portail ouvert, entrèrent dans le Chasteau l'espée à la main, menassant d'oster la vie à ceux qui l'auoient si genereusement defenduë , & laquelle ces vainqueurs insolens leur eussent fait perdre par la corde , ne les menassant pas de moins , si le sieur de Marin , qui traicte les armes avec honneur , ne les eust fait eschaper à cette fureur , ne pouvant pas pourtant empescher que les Parlementaires ne fussent despoüillez de leurs armes & de leurs habits , pendant que le secours d'une recreuë arriuant de Bourdeaux , conduit par les sieurs de Blanc & Pontcastel , & ayant mis pied à terre du costé de l'eau , se glissoit le long du jardin pour entrer dans le Chasteau , où ils se fussent trouvez prins , si une partie des Espernonistes , qui estoient sur les murailles , & auoient desia arboré le drapeau , faisant une descharge sur eux , ne leur eussent fait connoistre que la lascheté d'un Chef est une puissante mine à ruyner une place , & que les Lions sont grandement desarmez sous la conduite d'un cerf, en sorte qu'ils furent contraincts de reprendre leur route : mais ce ne fut pas sans marquer qu'ils auoient enuie d'y faire , car auant desmarer , ils les saluèrent de quelque petite piece d'artillerie montée sur leurs chaloupes , qui en tuerent quelqu'un. Si bien que dans ce rencontre , les Espernonistes perdirent cent hommes des meilleurs , &

76 DES MOUVEMENTS,
eurent grand nombre de bleſſez, ſans qu'ils euſſent eu
leur reuanche par la moindre bleſſure ſur les Parle-
mentaires.

C H A P I T R E VIII.



N ſçait bien toſt les mauuiſes nouvelles. Les plaintes de cette laſcheté reſonnerent ſoudain à Bourdeaux. Mais les Politiques craignant que cette ſurprinſe ne deſarmaſt le cœur des Bourdelois, qui comme tout autre vulgaire, ne pouvant ſe perſuader que les armes ſont journalieres, ne peuuent gouſter que des ſuccez heureux, en eſtouferent la voix par vn bruit tout contraire, de la flaterie duquel ils furent deſtrompez par le retour des chaloupes, & du ſecours qu'on y auoit enuoyé, & par les ſalues ſuiuies de grandes acclamations que fit la garniſon du Chateau Trompette, laquelle quoy que renfermée dans l'eſpaiſſeur de ſes murailles, fut à meſme temps aſſeurée de la verité de cetre redu-
ction, tant il eſt vray que le Duc auoit de fidelles parti-
ſans par tout, & des echos qui rediſoient bien fidelle-
ment aux ſiens les aduantages qu'il auoit. Cette place
qui gourmandoit la Dordoigne du coſté de Bourdeaux,
de meſme que Bourg & Libourne, la maiſtriſoit de
l'autre part, rendoit le Duc abſolu ſur cette riuere en
l'vn & l'autre bord. Et ce poſte luy eſtoit d'autant plus
aduantageux, qu'il fauoriſoit le travail de Libourne, &

seruoit de retraicte aux coureurs pour battre le plat pays & piller le payfan, voler les Messagers & les maisons Bourgeoises, sous la conduite de Pontac d'Anglade & de Quirac, lesquels le Parlement ordonna qu'ils seroiēt prins au corps & qu'à deffaut de le pouuoir estre, leurs biens seroient saisis, & condamnez de respondre des dommages & interests, & des pertes des particuliers, en consequence de quoy le procez leur fut fait par contumace, & furent enfin condamnez à mort, & publiquement executez en figure, ce qui sert de monument d'un eternal reproche à leur posterité, sur l'infidelité qu'ils ont eu pour leur Patrie.

LES sources de la vie commençoient à tarir. Le haut pays ne fournissoit que fort peu de farines. Les Espernonistes auoient ruyné tous les moulins esloignez, il n'en restoit que quelques vns des plus proches. Le Parlement esueilla sa preuoyance, & bailla Arrest par lequel il fut ordonné qu'il seroit fait vn magasin de farines dans Bourdeaux, & pour ce qu'il falloit pouruoir à l'indemnité de ceux qui auroient le soin d'en faire les aduances, il fut dit que ce seroit sous cette condition, que la farine qui se trouueroit rester au magasin, au temps que la descente seroit libre, se vendroit par preference à celle qui seroit portée dans la Ville. La precaution de cet Arrest excita le zele de beaucoup de Bourgeois, qui se seruirent avec ardeur de leurs correspondances, pour en faire voicturer grand nombre. En sorte que par la reconnoissance qui fut faite des chays ou des greniers publics & de ceux des particuliers, on trouua que les habitans auoient des prouisions pour vn an, combien que

le Duc fit entendre au Conseil qu'il auoit reduit les Bourdelois à la faim, & les tenoit dans ces lacets. Cette ressource estoit bien agreable à Bourdeaux, mais l'arriuée du Marquis de Chambaret, qui vint offrir son espée & sa vie à la deffence de sa cause, le toucha d'un plaisir plus sensible. Les habitans couroient en foule pour luy rendre leurs respects. Les aages, les sexes & les conditions, se trouuoient empressez à le complimenter. Et soudain que ce bruit de Ville eust porté la nouvelle au Palais, le Parlement qui estoit assemblé, ordonna qu'il seroit logé au Chasteau du Ha, commit le sieur d'Espagnet pour luy aller au deuant & le recevoir, & sur ce qu'il fut depuis représenté que ce Chasteau estoit fort incommode à recevoir vne personne de cette condition, à cause qu'il n'y auoit point de meubles, on le logea dans vne maison Bourgeoise aux despens de la Ville. Le Conseil de Police desiroit l'auoir parmy eux, mais ils estoient en peine de sçauoir quelle place ils luy assigneroient. Ils envoyerent le sieur de Muscadet au Parlement pour le consulter sur ce point, qui le voulant traicter avec deffERENCE, chargea le President Dasis & le sieur de Maran de le voir, & apprendre de luy qu'elle place il vouloit, sur quoy toutefois il ne les resolut point, leur ayant fait entendre que s'estant venu sacrifier au seruice de la Cour, il n'auoit de pensée que pour se sousmettre à ses ordres, & qu'il ne prétendoit auoir ny place ny employ que celui qu'elle luy donneroit. Cette ciuilité ayant esté rapportée au Parlement, il fut delibéré qu'on le manderoit d'y venir, qu'on le prieroit de vouloir commander les armes

dans la Ville, attendant qu'on fust en estat de luy donner quelque plus grand employ, & qu'il auroit seance au Bureau. En consequence dequoy ayant esté mandé, Monsieur du Bernet premier Président apres luy auoir marqué la place, & attendu qu'il fut assis, luy dit que la Cour l'auoit enuoyé prier de venir au Palais, pour y recevoir les sentimens & les tesmoignages des obligations qu'elle croyoit luy auoir, puis qu'il s'offroit de si bonne grace au seruice du Roy & de la Cour, & pour la seureté de la Ville & de la Prouince, le priant de vouloir commander les armes dans la Ville, attendant des emplois qui fussent dignes de luy, & d'auoir agreable la formalité qui se pratique en ces rencontres, de prêter le serment de fidelité. Surquoy le Marquis estant debout, & le chapeau à la main, repartit qu'il se sentoît esgalement confus, & par la connoissance qu'il auoit du peu de merite de sa personne, & de la ciuilité & de l'honneur qu'il receuoit de la Cour, laquelle pouvoit auoir choisi quelque autre plus capable, mais non pas plus fidelle à son seruice, que le serment qu'il estoit prest de faire, n'estoit que le sceau de son inclination naturelle. Si bien qu'ayant leué la main, & iuré de bien & fidellement seruir le Roy, & deffendre la Ville, il fut prié de se rendre au Conseil de Police pour y donner les ordres, & le sieur d'Espagnet fut commis pour l'y accompagner, où dans les opinions, il bailla des marques bien sensibles de sa prudence, & de la fermeté de son iugement, & fit connoistre que sa teste conseruoit sa vigueur parmy les infirmitéz & les foiblesses de son corps. Soudain qu'on luy eust fait entendre l'estat des

affaires, le sujet de la persecution, & la justice de la deffence, il representa avec tant de force d'esprit, de politesse de langage & de netteté de raisonnement, les ordres & les choses necessaires pour la guerre, que chacun creut deslors qu'il ne restoit plus à Bourdeaux que des lauriers pour le couronner. Le Parlement luy ordonna douze gardes, fit expedier vne commission en faueur de Lalande Ayde Major de la Ville, pour vne Compagnie de soixante fusiliers à cheual. Et d'autant que l'argent est le nerf de la guerre, on eut recours à la banque pour faire les auances. Les Officiers du Parlement consacrent vn quartier de leurs gages à cette necessité, exhortent les Bourgeois & tous les habitans, à contribuer par leur exemple, chascun tesmoigne se disposer à ouvrir sa bourse. Pendant que tout cela se mettoit en estat, le Duc d'Espernon faisoit rouler ses troupes à la campagne, & dans l'entre deux mers, où les volleries, les incendies & les sacrileges se pratiquoient avec des impietez execrables. Les payfans qui ne pouvoient souffrir des actions si violentes sans marquer leur ressentiment, demanderent des Chefs & des armes, pour repousser cette oppression. On commit le sieur Maleret pour S. Loubez & les Parroisses voisines, le sieur le Breton pour Floirac & Cenon, & le sieur Bordes Aduocat pour Bouliac, & par forme de Police generale, il fut permis par Arrest aux Comptes & Cottisateurs des Parroisses, qui sont aux enuirs de Bourdeaux, d'achepter des armes, poudres, mesches & balles pour leur deffence & seureté seulement, iusques à la concurrence de dix mousquets, vint liures de poudre, dix
liures

liures de meche & vingt liures de plomb, pour chascune des Parroisses, à la charge d'imposer & esgaler le prix de l'achapt de ces armes & munitions, sur les habitans & biens-tenans de chacune de ces Parroisses au fur de la Taille, non sur les deniers d'icelle, auxquels il leur fut deffendu de toucher, & ce pour leur deffence seulement, & sans tirer à consequence. Et à cet effet il fut ordonné que l'achapt des armes & munitions, se feroit par les Cottifateurs, en presence de deux des principaux habitans des Parroisses, qui seroient responsables de la perte des armes les troubles estans finis, & qu'à l'imposition & esgalement du prix de l'achapt, les Officiers des lieux, & quatre des principaux habitans & biens-tenans, seroient appelez. Cela se faisoit à double fin, l'une pour aguerrir le paysan, afin que dans le besoin il seruit à la milice, & l'autre pour leur donner du cœur à contester les logemens aux Espernonistes, & affoiblir leurs troupes par des embuscades, auxquelles ils estoient plus propres que les autres, par la connoissance qu'ils ont des sentiers & des fauces routes.

LE Marquis de Chambaret impatient de combattre, sçachant que la gloire ne se trouve que parmy le peril, hastoit l'acheuement du Regiment du Parlement, & de la Compagnie des fusiliers & des autres troupes, qui auoient esté ordonnées, à quoy on trauailloit avec assez de lenteur; cela n'empeschoit pas pourtant qu'il ne proposast à toute heure dans le Conseil de Police, des desseins pour sortir sur leur ennemy: mais comme il ne connoissoit point encores la trempe de la plus-part

de ces esprits, & qu'il agissoit trop franchement pour s'imaginer qu'on le traittast de ruse, à peine ses desseins estoient formez qu'ils estoient estoufez; & si quelque-fois ils preualoient dans la resolution, on les publioit si hautement, que l'ennemy auoit dequoy s'y preparer.

CHAPITRE IX.



L est des puissans ennemis, comme d'une violente Gangrene, qui ne s'attache aux parties esloignées, que pour porter plus insensiblement son venin dans le cœur.

Les armes du Duc d'Espéron rouloient par tout l'entre deux mers, & y laissoient des marques si estranges de leur brutalité, que frappant les cœurs des Bourdelois de compassion pour ceux de la campagne, elle leur imprimoit du mesme coup la hayne contre luy. Le Parlement cherchant le remede dans sa source, deputa le President Dasis, les sieurs de Mirat Conseiller, & Lauie Aduocat General, pour faire de tres-humbles remonstrances au Roy, sur l'estat des affaires de la Prouince de Guyenne, & luy représenter le tableau de la misere quil l'accabloit. Et d'autant que les deputez ne pouvoient pas estre si tost prêts, & que les accez redou-bleient, il fut trouvé à propos que le sieur de Lauie par-riroit promptement, pour en faire le premier crayon, & obtenir quelque soulagement. Le Marquis de Cham-bare estoit desia puissant sur l'affection du peuple. Le

Duc d'Espéron commença à redouter son crédit, lequel il fit sourdement trauffer le seruant des Iurats, qui par pretexte de jalousie de leur Charge, luy contesterent l'aduantage de donner le mot. Ce differend porté dans le Parlement, fut jugé par la deliberation qu'il fit, que le premier Iurat fairoit quatre billets, desquels celuy des Presidens, qui faisoit la teste au Conseil de Police, en tireroit vn qui seroit le mot, lequel il fairoit voir au Marquis de Chambarét & au premier Iurat ensemble, à suite de quoy, le Marquis de Chambarét le donneroit au Major de la Ville. Cette affaire n'en demeura pas là, car les Iurats ne pouuans souffrir qu'on fit breche à leur autorité, & qui portans le tiltre de Gouverneurs de Bourdeaux, font en possession de bailler l'ordre priuatiuement à tout autre, en l'absence du Gouverneur de la Prouince, ou du Lieutenant du Roy, protestoient de quitter la liurée, si l'on les despoüilloit de cet aduantage, qu'ils deuoient conseruer à l'honneur de leur Charge. Mais enfin le Marquis de Chambarét protestant qu'il n'estoit point venu pour rompre l'vnion de la Ville avec le Parlement, ceda de bonne grace au premier Iurat cet honneur, que la Cour auoit desia jugé en sa faueur.

Les ames genereuses, comme le feu, veulent toujours agir. Les approches que faisoient les troupes Espéronnistes, prouoquoient son ardeur à les combattre. Il n'eust pas receu l'aduis que le Regiment de Crequy, que le Duc auoit appelé de sa route de Catalogne pour en grossir ses troupes, composé de deux cens cinquante Maistres, s'estoit logé en diuerses Parroisses,

sçauoir six vingts dans le Bourg de Camblanes, cinquante ou soixante dans celuy de Quinsac, & les autres dans des villages voisins, esloignez de Bourdeaux de deux lieues, qu'il se resolut de les aller surprendre. Il ne communiqua son dessein qu'à Camarsac & Pontcastel, qu'il iugea les plus secrets & les plus confidens. Il composa vn petit Camp volant de trente cinq cheuaux legers, commandez par S. Martin de Barez, trente fusiliers à cheual, & vne vingtaine de Caualliers volontaires, conduits par Lalande Ayde-Major de la Ville, cent cinquante fantasins commandez par Iules Duerger & Touty, Capitaines au Regiment du Parlement. Apres auoir fait passer l'eau à la Cauallerie du costé de la Bastide, il ordonna à l'Infanterie d'aller dans des chaloupes prendre port au lieu de Bernichon, pour y faire alte, à la faueur de la maison du President Latrenne, attendant que la Caualerie les eust joints. Il ne succeda pas pourtant de la sorte, pource que l'Infanterie ayant eschoüé sur les sables, fut contraincte d'attendre le flot qui ne vint que fort tard, en sorte que la Caualerie la deuança au rendez-vous. Ce retardement surprit le Marquis de Chambaret, qui estant esgalemēt passionné de combattre & de n'hazarder pas la gloire de cette premiere rencontre, assembla vn Conseil de guerre, d'as lequel apres auoir representé d'vn costé le mauvais estat de la Caualerie, le desaduantage du lieu, & la reputation de ceux qu'ils auoient à combattre, & de l'autre, la faueur du point du iour, auquel des Caualliers fatiguez par les veilles de la nuit, croyent dormir en asseurance, l'aduantage qu'il y a de surprendre des

gens que la desbauche assoupit, l'esperance de recevoir du secours des payfans qui estoient aduertis, & la frayeur que donnent ceux qui attaquent & frappent les premiers, il trouva des cœurs & des esprits qui suivirent les mouvemens de son inclination. La Roque seul Marschal de Bataille, fut de l'advis contraire, ne pouvant pas dissimuler le dessein de la trahison qu'il meditoit deslors.

CETTE resolution ne fut pas arrestée, que le Marquis de Chambaret, se mettant à la teste, alla droict à la maison du sieur de Raymond Conseiller, pensant y rencontrer des Caualliers qui s'y estoient logez; mais on trouva qu'ils s'estoient retirez le soir auparauant, & s'estoient joints au gros. Le bruit qu'on fit à forcer la maison, bailla l'alarme au Bourg, si bien que le Marquis de Chambaret, pour ne donner pas le loisir à l'ennemy de s'atrouper, s'aduança à grands pas le long d'un défilé, au bout du quel ayant rencontré huit Caualliers qui luy firent teste, il poussa sur eux si vigoureusement, qu'il les renuersa, & donnant la terreur à ceux qui les soustenoiēt, il les fit reculer iusqu'au derriere du Bourg, où ils se joignirēt à vn escadron cōposé de soixāte Maistres, qui firent contenance de se vouloir deffendre, mais qui plierent au cœur de ce Lion, lequel n'eust pas forcé les premiers rangs, & abbatu les plus hardis, qu'il les mit tous en déroute, & les ayant poursuiuis iusques au pres de Quinsac, tuant ce qu'il trouua sur son chemin, il fit vne glorieuse retraitē dans le Bourg de Câblanes, où il trouua que les payfans, qui s'estoient assemblez au bassroy, assommoient dans le liēt ou dedans

les maisons, ceux qui auoient resté. Cependant ces fuyards s'estans ralliez à la faueur d'un autre escadron, logé dans le Bourg de Quinsac, prindrent resolution de reuenir sur les Parlementaires, mais ayans apperceu l'Infanterie qui se hastoit au bruit de cette camifade, ils changerent de dessein, & prindrent leur chemin vers Creon, place d'armes des Espernonistes, & ne penserent à rien moins qu'à donner la sepulture à quarante de leurs camarades qui furent tuez sur la place, sans compter beaucoup d'autres que les paysans assommerent, les trouuant cachez dans les buissons, ou languissans dans les vignes. Cette victoire fut remarquable par la conduite du Chef, le succez de ses armes, les Parlementaires n'ayans eu que trois blesez, & Gaucher; l'un des fusiliers tué, & par la valeur du butin des armes, des habits, de l'argent & des cheuaux, qui fut estimé vingt-cinq ou trente mil liures.

BORDEAUX fut bien surpris de voir son Chef, qu'il croyoit dans les draps, reuenir du combat, couronné de Lauriers, & l'on ne sceut trouver assez d'eloges dans le Conseil de Police, où il fut à mesme temps rendre compte de cette attaque, pour luy faire des remerciemens dignes d'une action si glorieuse. Cela mesme l'obligea d'entrer le lendemain dans le Parlement, non pas tant pour y receuoir des acclamations, comme pour luy représenter que l'honneur qu'il luy auoit fait de luy donner la conduite & le commandement des armes de la Ville, estoit rendu inutile, si l'on ne pouuoit à luy donner des troupes, tant de Caualerie que d'Infanterie, l'aduantage de son commandement

ne consistant pas à demeurer renfermé dans la Ville & attendre pied ferme l'ennemy dans l'enceinte des murailles, mais bien d'aller audeuant de luy, & rompre ses desseins dans la campagne. Surquoy le Parlement ayant deliberé, ordonna que l'on donneroit vingt mil liures au Marquis de Chambaret, pour la leuée de deux Compagnies de Caualerie, & renuoya le soin du reste au Conseil de Police. Et pour ce qu'il falloit estre asseuré d'un fonds, autant pour la leuée des gens de guerre, comme pour leur subsistance, & qu'il n'estoit pas au pouuoir du Parlement, ny du Conseil de Police, de fournir à l'embaras de tant d'affaires qui se presentoient en foule, il fut resolu qu'il seroit estably vn Conseil de finances, composé de deux Presidents, quatre Conseillers, vn député de chasque corps & deux Bourgeois, pour trouver des moyens à faire promptement de l'argent. Cela eust reussi avec diligence, si tous ceux qui y furent commis, eussent esgalement eu les intentions bonnes. Le mal pressoit. Le Duc d'Espéron respandoit ses troupes dans tout l'entre deux mers. On n'entendoit parler que de pillages, de sacrileges, d'incendies & de violemens. On attendoit le soulagement de ces miseres, del'effet d'une deputation generale. Le Parlement auoit nommé ses deputez, il ne restoit qu'au Clergé & à la Bourgeoisie à y pouruoir de leur part. On bailla la charge au sieur Dufault Aduocat General, de voir le Doyen de S. André, Vicaire de l'Archeuesque, pour l'exhorter de la part de la Cour d'assembler le Clergé, afin de deputer quelqu'un d'entre eux vers sa Majesté. Il s'en deffendit, sur ce qu'il disoit que les

deputez ordinaires du Clergé n'estoit point en Ville; qu'il ne pourroit assembler que les deux Chapitres & les Curez, ce qui fut prins pour vne deffaitte, qui ne satisfist pas tout le monde, & qui rendit sa responce suspecte d'autant plus, qu'on sçauoit assez que sa famille estoit attachée au seruice du Duc. Les Iurats furent aussi mandez par la Cour, suiuant la forme qui se pratique, pour leur faire entendre le dessein que la Bourgeoisie publioit par toute la Ville, & iusques à la porte des Chambres, de deputer avec les autres corps. Et comme cela ne se pouuoit faire que par vne assemblée generale des cent & des trente, Lestrilles l'un des Iurats de robe courte, s'en excusa, sur ce qu'il n'appartenoit qu'aux Aduocats Iurats, de porter la parole, & faire les propositions dans ces assemblées; en consequence de quoy, il luy fut enjoint de se rendre l'apresdinée chez le President Dasis, avec vn de ses collegues Aduocat, pour aprendre de luy la deliberation de la Cour, à quoy ils obeyrent, mais sans effet; pour ce qu'ils tesmoignerent par les eschapatoires, dont ils se seruirent, que ce n'estoit pas leur resolution: ce qui donna sujet au Parlement de deliberer sur le rapport du President Dasis, que l'assemblée se feroit ce mesme iour de releuée. Et affin de rompre les pratiques qui se faisoient pour empescher cette deputation, & remettre la liberté des suffrages, il fut arresté que le President Gourgues l'aîné, les sieurs de Blanc sieur de Mauvesin & Lescure Conseillers, & le Procureur General y assisteroient, & que l'assemblée seroit conuoquée par leur ordre, & la proposition faite par le President: ce qui s'executa

s'executa avec grand applaudissement des Compagnies de la Ville, qui se confioient beaucoup dans le choix qui auoit esté fait des personnes des sieurs de Constant Aduocat, & Richard Fouques Marchand pour deputez, ausquels il fut ordonné de se joindre à ceux du Parlement, pour demander au Roy la reparation de tant d'outrages que Bourdeaux souffroit, la suppression des deux escus par tonneau de vin, & le restablissement des Priuileges de la Ville.

PENDANT que l'on donnoit ces ordres dans la Ville, le Duc d'Espéron piqué de la disgrâce que sa Caualerie auoit receu à Camblanes, semblable à ces chiens qui mordent la terre où s'arreste la pierre que l'on leur a ruée, ne pouvant en tirer raison contre le Marquis de Chambaret, fit aduancer des troupes tant de Caualerie que d'infanterie, vers le Bourg de Camblanes, dequoy les habitans ne furent pas si tost aduertis, qu'ils se ietterent avec leurs femmes, leurs enfans & leurs meubles dans l'Eglise, qui leur seruoit de reduict, n'ayant point d'autres fortifications. Quelques payfans des Parroisses voisines se joignirent à leur secours, & s'estas renfermez tous ensemble, ils coururent vne mesme fortune. Le sieur de Marin qui commandoit les troupes Espéronistes, fit faire les approches, les fit sommer de se rendre, les menassant de la corde s'ils ne posoient les armes, & rendoient obeysance aux commandemens du Duc d'Espéron; mais resolu de perir plustost que de se soumettre à la discretion d'un ennemy irrité, qui ne pardonne point, ils marquerent par vne decharge qu'ils firent sur ceux, qui comme les plus hardis, s'a-

uancerent les premiers, & demeurerēt morts sur la place, par des coups ajustez, qu'ils estoient resolu de se bien deffendre, & comme si le nombre des morts augmentoit la gloire des Chefs, le sieur de Marin en hazarda d'autres, qui n'en eurent pas meilleur marché que les premiers; si bien que craignant de preparer trop de maniere à la gloire des paysans, il attendit la nuit, à la faveur de laquelle il fit rouler des tonneaux qui couvroiēt ses soldats, lesquels porterent le feu à la porte de l'Eglise, qui s'allumant s'attacha au clocher, où il consumma les hommes, les femmes & les enfans qui y estoient renfermez. Cet embrasement effraya tout le reste, en sorte que les vns se jettoient dans les flammes, & les autres se tordoient le col en se precipitant. Je ne sçauois loier d'un style assez reconnoissant la vertu d'un Capitaine du Regiment de Guyenne, duquel ie n'ay peu apprendre le nom, pour le faire sçauoir par l'histoire à la posterité, qui voyant qu'une ieune fille, fort agreable, auoit mieux aimé par un desespoir genereux & Chrestien, abandonner sa vie à la rigueur des flammes, qu'à la brutalité des soldats; s'auança dans le milieu du feu pour l'en retirer, & non content de luy auoir redonné la vie, il conserua son honneur l'espée à la main, contre l'audace d'un soldat qui luy vouloit ravir. Ces troupes ne trouvant plus de resistance se jetterent dans l'Eglise, emportent tous les meubles qui y estoient cachez, pillent les ornemens, despoüillent les Autels & le Tabernacle des choses les plus sacrées, & de là ils coururent à la Trenne & à Carignan, deux Parroisses voisines, où ils commirent tous les sacrile-

leges imaginables. Ils muguerent Bouliac, mais sçachant que le sieur de Bordes Aduocat y commandoit, & qu'estant munitionné, il estoit en estat de bien retrancher de leur nombre, ils prindrent leur route vers Tresses, où ils camperent quelques iours, y pratiquant des actes inhumains, & des sacrileges si horribles, qu'à peine les Demons eussent esté assez malins pour les commettre.

C H A P I T R E X.



ES defordres qui se faisoient aux portes de Bourdeaux, esueilloient la diligence de ceux qui auoient esté commis à faire les preparatifs pour la deffence. On auoit mis en estat trois gros vaisseaux, quatre pataches & douze chaloupes; mais elles n'estoient pas bien appareillées, puisqu'elles n'estoient point armées de soldats. Desorte que pour acheuer cet armement, on expedia vne commission au Cheualier Pichon en qualité de Commandant, avec pouvoir de l'esquiper du nombre de soldats qu'il iugeroit necessaire, à quoy il trauailla avec assiduité. Le Marquis de Chambaret d'ailleurs impatient d'affronter l'ennemy & de le voir dās la plaine, demandoit des troupes pour sortir. On ne pouuoit pas le satisfaire, pour ce que n'ayant pas suffisamment argent, on auoit de la peine à trouver des soldats, ayant esté representé à la Cour par des Com-

missaires du Conseil de Police, que toutes les Parroisses d'entre deux mers estoient couvertes de gens de guerre, qui brusloient les maisons, tuoient les habitans, profanoient les Eglises, & faisoient tous actes d'hostilité, & qu'en attendant qu'on y eut autrement pourueu, il seroit à propos qu'on sceut le nom de ceux qui vouloient seruir volontairemēt à pied ou à cheual, il fut rendu Arrest, aprez auoir ouïy le Procureur General, par lequel il fut ordonné que tous les volontaires qui voudroient seruir, donneroient leurs noms au Marquis de Chambaret, & suiuroient ses ordres, & qu'afin que cela fut connu à tous, que l'Arrest seroit publié dans les carrefours. Cette publication anima beaucoup de personnes, & les piqua d'une genereuse ambition.

MAIS comme ce n'estoit qu'un Arrest par prouision, & qu'il estoit à craindre que cette impetuosité Gasconne ne fust bien-tost arrestée par la fatigue, chascun appliquoit son esprit à trouver des inuentions les plus soulageantes pour trouver de l'argent. On auoit desia eu quinze mil liures du Greffe des consignations; toutefois ce n'estoit rien à l'esgal d'une si grande despence qui se faisoit. On remit encore cette proposition sur le Bureau, laquelle donna sujet au sieur de Pommiers, President en la premiere Chambre des Enquestes, de représenter à la Cour en qualité de pere, & administrateur de ses enfans propriétaires de ce Greffe, qu'il croyoit qu'elle deust se contenter de l'auance des quinze mil liures qu'il auoit desia fait, qu'il la supplioit de faire reflection sur l'intérêt d'un nombre des particuliers

qui auoient tout leur bien dans ses coffres, des confusions & des inconueniens qui arriueroyent dans la distribution de ces deniers, lesquels pour estre la pluspart décriez ou legers, il falloit remettre au billon; que le Conseil auoit donné Arrest sur l'ouverture des coffres de cette recepte, qui auoient esté scelez par son autorité; qu'il s'opposoit à l'exécution de l'Arrest que la Cour pourroit donner, & qu'en cas qu'elle y voulust deliberer, demandoit que les gens du Roy prissent leurs conclusions, & que ceux qui ne luy estoient point affectionnez, desquels il en nomma quelques vns, s'abstinsent de bailler leur aduis. Desorte que cette affaire mise en deliberation sur les recusations, aprez auoir considéré que le sieur de Pommiers, n'estant prins que comme vn depositaire, ne pouuoit point recuser, il fut trouvé à propos que ceux qui estoient sortis rentre-royent, & deliberant sur le fonds de l'affaire, il fut rendu Arrest, par lequel il fut resolu, que sans auoir esgard à l'opposition du sieur de Pommiers, l'Arrest du neuuesme dudit mois seroit executé, & que conformemēt à iceluy, Messieurs Dufault & Duduc Conseillers, procederoient à l'ouverture des cachets apposez aux coffres & cabinets de l'ancienne recepte des consignations de feu Maistre Bernard de Cheualier Receueur desdites consignations, & feroient conter & peser toutes les especes qui se trouueroient dans lesdits coffres & cabinets, tant courtes que de poids, & d'icelles en feroiēt mettre à part iusques à la concurrence de la somme de soixante mil liures, pour estre mise entre les mains de celuy, qui par la Cour seroit ordonné, & employée

aux necessitez pressantes, suiuant l'ordre de la Cour, & que pour cet effet, lesd. Commissaires pourroient choisir tel nombre d'Orpheures & autres personnes entendues pour examiner la valeur & poix desdites especes, le tout suiuant les consignations qui auroient esté faites par les particuliers, & sur le liure de la recepte de ladite consignation, dont il seroit fait estat par le procez verbal desdits Commissaires, & ce en presence du Procureur General du Roy, ledit de Pommiers, & heritiers dudit feu Cheualier presens, ou deuëment appelez; à l'exécution duquel Arrest lesdits Commissaires procederoient incessamment, nonobstant oppositions ou appellations quelconques, & sans prejudice d'icelles, neantmoins que pour l'assurance de ladite somme de soixante mil liures, il seroit pourueu par la Cour d'un fonds suffisant pour icelle remplasser quand besoin sera, en faueur des creanciers, à qui les sommes consignées appartiennent, & iusques à ce, que les gages des Presidents & Conseillers, tant de la grande Chambre, Enquestes, Requestes, Gens du Roy, & Greffier en chef de la Cour, tant absens que presens, demeureroient affectez & hypothéquez pour ledit remboursement, & ce par esgales parts & portions, à raison de cent vingt-cinq liures par quartier, pour chascun de tous lesdits Officiers, lesquels dits gages, pour les causes susdites, seroient payez par priuilege & preference à tous creanciers & hypothèques, & remis dans vn coffre du Palais en presence desdits Commissaires qui en garderoient la clef. Enjoint ladite Cour aux Officiers de signer leurs debenturs à chaque quartier, autrement seroient tenus

pour signez. Fait deffences aux Receueurs des gages d'en vuidier leurs mains, à peine de payer deux fois, qu'en faueur desdits Commissaires, desquels le recepissé tiendra lieu de quittance. Et attendu que les gages de plusieurs Officiers excèdent ladite somme de cent vingt-cinq liures par quartier, ladite Cour Ordonne que le surplus leur sera remis, & que sur les deniers restans de ladite recepte, il sera prins par ledit de Pommiers la somme de quinze mil liures par luy aduancée, par l'Arrest de la Cour du dixiesme du present mois, à l'asseurance de laquelle il sera pourueu par les mesmes voyes, sans que pour raison de ladite somme de soixante mil liures d'un costé, & quinze mil liures d'autre, aucun desdits Officiers puisse estre solidairement obligé au payement d'icelle, ains qu'il sera permis à vn chascun de se liberer de ladite obligation en par luy, payant sa cotte-part desdites sommes; & en ce qui regarde les sommes de ladite recepte des consignations, liures, papiers & promesses qui les concernent, ladite Cour ordonne que le tout sera remis dans lesdits coffres & cabinets, en presence dudit de Pommiers, & iceux scelez & cachetez, dont ledit de Pommiers demeurera chargé, & moyennant ce & ladite remise faite, tant desdites sommes de soixante mil liures, es mains de celui que par la Cour sera ordonné, que du restant lesdits Commissaires demeureront deschargez de ladite Commission, sans que pour raison d'icelle, ils puissent estre tenus à aucune restitution, ny representation desdites sommes, sauf de leur procez verbal, qui leur tiendra lieu de plaine & entiere descharge.

LA persécution du Duc prenoit de nouvelles forces dans le temps. Les gens de guerre s'auançoient dans la banlieuë, & faisoient des courses iusques aux portes de la Ville. Il ne se contenta pas de la tenir bouclée de bië prez, il bailla des Ordonnances, portant deffences de donner des viures à Bourdeaux. Les paysans ne manquoient pas d'affection à vouloir secourir leur mere, mais ils estoient tellement effrayez par les violences que les Espernonistes exerçoient sur eux, & la campagne estoit si fort desolée, à faute d'auoir des Commandans & des gens de cœur qui les peussent rassurer, que le Parlement fut contrainct de donner Arrest, par lequel il fut enjoint aux habitans des Parroisses d'entre deux mers d'obeyr aux ordres qui leur seroient donnez par le Marquis de Chambarer, garder les postes qui leur seroient ordonnez, & executer les commandemens qu'ils receuroient de sa part, pour le seruice du Roy & le bien de la Ville. Cet Arrest demeura sans execution par la terreur que ces troupes auoient mis dans la campagne, où elles pratiquoient toutes les brutalitez possibles, n'espargnant ny le sang des hommes, ny l'honneur des femmes. On n'entendoit parler que de Prestres massacrez, & d'Eglises ou bruslées ou pillées. L'Eglise ayant ses bras engourdis pour fraper d'Anatheme ces impies & ces sacrileges, le Parlement portant sa justice aussi auant qu'il pouoit dans cette confusion, prononça son Arrest, par lequel, apres auoir ouï le Procureur General du Roy, il declara le Duc d'Espernon, & ceux qui l'auoient assisté, ou assisteroient cy-apres dans les violences exercées contre la Prouince & la Ville de

Bordeaux

Bourdeaux, responsables solidairement de tous les maux & dommages que le public & les particuliers auoient souffert, & souffriroient à l'aduenir. Et à cet effet ordonna que les informations faites par les Commissaires cy-deuant deputez, seroient continuées & rapportées pour y estre deliberé ainsi qu'il appartiendroît. Et attendu l'injure & l'oppression faite à la justice souveraine du Roy, il fut dit que le Duc d'Espernon demeureroit priué du droit d'entrée, seance & voix deliberatiue en la Cour, & de tous autres honneurs, droicts & prerogatiues, dont il auoit accoustumé de jouyr en qualité de Conseiller d'icelle, la Cour luy enjoignant de faire cesser incontinent toutes les violences, cas execrables & autres actes d'hostilité, & faire retirer à cet effet les troupes dans vingt & quatre heures aprez la publication qui seroit faite de l'Arrest, audeuant l'Hostel de Puypaulin, & autres lieux accoustumez de la Ville, & afin que la Prouince & la Ville capitale ne retombassent pas dans des mal-heurs pareils, il fut ordonné que le Roy seroit tres-humblement supplié de luy donner vn autre Gouverneur. La connoissance de cet Arrest effraya la pluspart des Espernonistes, qui ne se croyans plus en assurance, penserent à se faire garder pendant la nuit dans leurs maisons: ce que le peuple interpreta d'une autre sorte, & se persuada qu'ils cacheroient pendant le iour dans leurs caues des soldats, à dessein de faire quelque coupe-gorge dans la brune. Si bien que le Parlement en ayant receu diuerses plaintes & mesmes contre quelques vns de leurs Officiers, qu'on croyoit estre mal intentionnez, il fallut auoir

cette complaisance pour ce murmure, que d'enuoyer des Commissaires, pour visiter les maisons qui auoient esté marquées, dans lesquelles pourtant il ne fut rien trouvé aprez vne exacte recherche; & combien que cette defiance fut establie sur de faux fondemens, il estoit à propos de luy donner quelque credulité, soit pour effrayer l'esprit des partisans du Duc, ou pour apprendre à luy-mesme, que les Bourdelois n'estoient pas aisez à surprendre, puis qu'ils veilloient sur les ruses qu'il pouvoit pratiquer.

LE Parlement auoit donné aduis au Roy de ce qui se passoit par vn Courrier exprez, mais il fut renuoyé sans responce, pource que le premier President n'auoit pas accompagné d'une de ses lettres, celle du Parlement: ce qui ne contribua pas peu à faire germer les semences du soupçon que l'on auoit de la fidelité de cette teste. On apprint toutefois par des lettres particulieres que le Roy enuoyoit le sieur d'Argenson en cette Prouince pour moyenner la paix; cela fut confirmé par le retour du Courrier, qui assura l'auoir rencontré sur la route qui le pouuoit conduire à Cadillac, où il fut en effet pour communiquer ses ordres au Duc. Pendant qu'il traittoit avec luy, & qu'il ne luy declaroit pas tant les intentions du Roy, comme il receuoit les siennes, on eut aduis que les troupes Espéronistes, commandées par le sieur de Marin, s'auançoient du costé de la Bastide, où le Marquis de Chambaret auoit fait faire des retranchemens à l'entrée d'une petite coline, vulgairement appellée le Cypressa, à cause qu'elle est couverte de cypres venerables par leur antiquité, qui

font vne forest laquelle est au Roy , & pour laquelle on leue vn certain droit en la Contablie sur les Nauires estrangers, afin de conseruer la memoire de celuy qui se payoit anciennement à la Ville par ceux de dehors , qui chascun sur son retour en prenoit vne branche pour porter en son pays. Cette nouvelle mit la puce à l'oreille à tous les habitans , qui desirant voir l'ennemy de prez , se joignirent aux troupes que le Marquis y auoit laissé pour la garde de ces retranchemens : mais comme on sceut que les Espernonistes auoient campé à Tresses & à Melac , deux Parroisses voisines , on creut que la partie estoit remise au lendemain ; ce qui donna temps au Marquis à garnir tous les postes , se saisir des principales auenuës à droit & à gauche , aduertir les Communes de se tenir prestes au son du bafroy , & disposer toutes les affaires pour vne genereuse deffence. Le point du iour estant venu , le Marquis tousiours esueillé , mit ses gens en bataille , & apres auoir donné tous ses ordres, s'estant mis à la teste du gros , il fit ferme attendant l'ennemy. Le Parlement qui estoit assemblé , trauailloit de son costé à rendre la justice. On luy menoit des tesmoins pour deposer sur les incendies, les violemens, les meurtres & les sacrileges que commettoient les Espernonistes ; desorte qu'apres que les Commissaires qui auoient esté nommez , pour receuoir la deposition des tesmoins, eurent fait leur rapport , le Parlement deliberant sur cette affaire , estimant qu'il estoit important de rendre justice à Dieu & au public , donna son Arrest , par lequel , apres auoir veu par les informations faites par les Commissaires , & auditions renduës en la Chambre

du Conseil, sur les sacrileges & le meurtre commis en la personne du Vicaire de Vayres dans l'Eglise, par les gens de guerre enuoyez par le Duc d'Espernon dans cette Parroisse & dans l'entre deux mers, les volleries & pillages des calices, patenes, quatre lampes, chandeliers d'argent, du S. Ciboire, qui conseruoit le sacré corps de nostre Seigneur, dans l'Eglise de Camblanes, la profanation des saintes Hosties, deschirées & repandues dans le cimetiere de cette Eglise, laquelle fut brûlée avec nombre de personnes, tant hommes que femmes & petits enfans; ayant ouï sur ce & requerant le Procureur General du Roy, il fut deliberé que ces procédures seroient communiquées au Procureur General & aux deputez, & Promoteur du Clergé du Diocèse, afin de proceder contre ces impies, & les auteurs de ces cas execrables, & se seruir des forces dont Dieu a armé les bras de son Eglise, à quoy le Parlement ordonna qu'ils seroient exhortez. Le Conseil de Police commanda de sa part aux habitans de se mettre sous les armes, leur assigna pour leur place d'armes la grande rue des fossez de l'Hostel de ville, & c'estoit là qu'on voyoit vn riche magasin de la jeunesse genereuse, qui n'attendoit que le commandemēt pour aller aux coups, de crainte que des troupes souldoyées cueillissent des Lauriers dans vn champ de gloire, auquel elle pretendoit auoir aussi bonne part qu'eux.

CHAPITRE XI.



LOVS ces preparatifs formoient de belles esperances dans les esprits des Bourdelois : toutefois ceux qui s'interessoit le plus dans les affaires publiques, estans bien informez que le sieur d'Argenson auoit ordre du Roy de proclamer la paix, & de faire poser les armes à l'un & à l'autre party, & sçachant qu'il y auoit trois à quatre iours qu'il estoit en conferce avec le Duc d'Espemon, creurent sur les approches des troupes, qui se mirent en veüe des Bourdelois, qu'il y auoit quelque chose de suspect dans la negociation de cet entremeteur, ou que le Duc estoit assez fier, pour ne deferer pas aux ordres de sa Majesté. On apprint neantmoins à mesme temps dans la Ville qu'un Trompette du Duc auoit abordé les retranchemens, proclamé la paix, & fait commandement de la part du Roy de poser les armes, & asseuré que le sieur d'Argenson estoit là qui venoit, & à peine eut-on receu cet aduis, que l'on le vid arriuer sur le Port, & prendre son logement dans vne maison Bourgeoise pour se delasser. Cependant les troupes qui estoient en presence les vnes des autres, se morgoient reciproquement, & fussent venües aux mains par des desis particuliers, si les Commandans n'eussent arresté la fougue de leurs gens. Le Parlement ayant sceu son arriuée, enuoya au deuant de luy les sieurs de

Sabourin l'aîné & Cursol Conseillers, pour le recevoir à la porte de la Ville, & luy tesmoigner de la part de la Cour, avec quel respect & quelles soumissions elle sçait recevoir ceux qui viennent de la part de leur Maistre, & le prier de vouloir renvoyer le Trompette du Duc d'Espernon, qui ne pouvoit que former des soupçons, & causer des ombrages dans l'esprit des habitans. Apres toutes les civilités réduës de part & d'autre, les Commissaires l'accompagnèrent dans l'Archevesché, qu'il print pour son logement, & rapporterent à la Cour qu'il desiroit entrer l'aprèsdinée au Parlemēt, pour luy faire entendre la volonté du Roy : ce qui leur fit résoudre de se rendre de relevée au Palais, où le sieur d'Argenson ne manqua pas de se trouver, à l'heure qu'il jugea que les Chambres pouvoient estre assemblées.

ESTANT entré en la Chambre du Conseil, il salua la Cour, & print sa place au dessus du Doyen, & representa à ces Messieurs, qu'il avoit esté commandé par leurs Majestez de leur rendre vne depesche, dans laquelle ils pourroient apprendre qu'elles estoient leurs intentions ; qu'il estoit à propos de la faire lire, pource qu'il se reseruoit d'en faire aprez la lecture, vne expression plus formelle, suivant les ordres, desquels leurs Majestez l'auoient honoré, & d'autant plus, qu'il estimoit qu'elles mandoient au Parlement, de prendre creance en ce qu'il leur diroit de leur part. Voicy la teneur de la Lettre.

DE PAR LE ROY.

N O S Amez & Feaux , voyant avec des-
plaisir la continuation des mouvemens qui
sont suruenus en nostre ville de Bourdeaux,
eⁿ environs d'icelle , & considerant qu'ils
pourroient produire des suites prejudiciables à no-
stre seruice , & au repos & tranquillité de ladite
Ville , & de nostre Prouince de Guyenne , voulant
les faire entierement cesser, afin que la paix soit aus-
si bien establie en vos quartiers, qu'elle est à present
dans nostre ville de Paris , & en toutes nos autres
Prouinces , nous enuoyons à cet effet par delà no-
stre Amé & Feal Conseiller ordinaire en nostre
Conseil d'Estat le sieur d'Argenson , pour vous fai-
re entendre nos intentions , & travailler à restablir
la bonne intelligence qui est necessaire pour le bien de
nostre seruice , entre vous & nostre Oncle le Duc
d'Espernon , Pair & Colonel General de l'Infan-
terie de France , Gouverneur & nostre Lieutenant
General en Guyenne , dequoy nous vous auons bien
voulu informer par cette Lettre que nous vous fai-
sons de l'aduis de la Reyne Regente , nostre tres-
honorée Dame & Mere , & vous dire que
vous ayez à adjouster entiere creance à ce que

104 DES MOUVEMENTS,
le sieur d'Argenson vous fera entendre de nostre part ; & prendre assurance au surplus de la bonne volonté que nous conservons en vostre endroit. Donné à S. Germain en Laye, le 10. iour d'April 1649.

A mesmes que la lecture de cette Lettre fut acheuée, en ayant recueilly la substance, il representa par vn discours assez long, la grande disproportion qui estoit entre les desolations de la guerre, & la felicité de la paix, le grand desir que leurs Majestez auoient que la Ville de Bourdeaux, & toute la Prouince de Guyenne, jouyssent du plaisir & du calme, protestant qu'il auoit trouvé l'esprit du Duc d'Espemon fort disposé à y prendre part. A quoy le premier President repartit, que la Cour auoit employé toute son autorité pour establir la tranquillité publique dans cette Ville, & que combien que la raison d'une deffence legitime, eust armé les habitans, qu'elle ne se lasseroit pas de trauailler à son reestablissement, & faire rendre toute l'obeyssance possible aux intentions de leurs Majestez, pour laquelle la Cour l'asseuroit qu'il trouueroit en elle des dispositions fort acheuées. Aprez quoy le sieur d'Argenson s'estant retiré, il fut enjoint aux Iurats de l'aller visiter, & fut aussi deliberé que l'on deputeroit deux Commissaires du Parlement, vn du Clergé, vn Tresorier, vn Iurat & deux Bourgeois, pour entrer en conference avec luy, & l'informer du suiet de leurs plaintes, & que cependant les sieurs de Suduiraud & de Cursol, iroient prier de faire retirer les troupes

Espemo-

Espernonistes, & empêcher que les gens de guerre de part & d'autre, qui estoient en presence, ne se choquassent point, & ne commissent aucun acte d'hostilité: ce qui leur fut accordé, ayant pour cet effet enuoyé le Trompette au sieur de Marin, Marechal de Camp des troupes du Duc. Cette deffence toutefois n'eust deffet que pour ce iour, car dès le lendemain on porta des plaintes au Parlement, que leurs ennemis faisoient plus de mal qu'auparavant, qu'ils desoloient la campagne qui estoit sur leur route, ne faisant que se promener d'une Parroisse en l'autre, à dessein de ruyner l'enceinte de la Ville, ce que le Marquis de Chambaret souffroit avec de grandes inquietudes, & que les habitans ne pouvoient ouyr dire sans murmure, accusant de trop grande complaisance le sieur d'Argenson, qui pendant qu'il tenoit leurs armes croisées, laissoit agir leurs ennemis avec impunité. Desorte que le Parlement respectueux pour les ordres du Roy, & pour celui qui estoit le porteur de ses intentions, ne trouva point d'expedient plus prompt que celui de la deference, enuoyant des Commissaires au sieur d'Argenson, pour luy faire entendre ces plaintes, & y apporter le remede, & d'en escrire au sieur de Lauie qui estoit en Cour, pour en informer sa Majesté.

MAIS il arriua par cette condescendance, demesme qu'aux playes quel'on flate, auxquelles les lenitifs irritent le mal, au lieu del'appaiser, que le sieur d'Argenson escriuant aux sieurs de Marin & Lasserre Marechaux de Camp, exposoit ses Lettres à la censure des Commissaires de la Cour, qui reconnoissoient fort bien

qu'elles estoient conceuës dans des termes exprez à faire des deffences : mais comme la fourberie se trauestit aisement , & que son discours est tousiours aussi double que son visage , elles commandoient sans doute par vn contre sens intelligible aux seuls Espernonistes , tous les desordres imaginables , qu'elles sembloient deffendre en faueur des Parlementaires ; car on sceut bien-tost aprez que cette mesme nuit ils auoient logé les Cheuaux dans l'Eglise de Bassens , qu'ils auoient mis le feu dans celle d'Ambarez , qu'ils n'auoient pas seulement enleué les bestiaux & les meubles des payfans , mais aussi qu'ils les auoient despoüillez iusques à leur chemise. Le Marquis de Chambaret qui ne pouuoit cacher le ressentiment qu'il auoit de tant d'outrages , & reconnoissant que la douleur des habitans estoit iuste , de se voir duppez à la faueur d'une treve artificieuse , par l'adresse d'un entremeteur , qui , au lieu de se tenir dans l'égalité pour l'un & pour l'autre party , balançoit tousiours du costé du Duc d'Espéron , ne peut pas s'empescher d'entrer dans le Parlement , pour y faire esclarer le dessein qu'il auoit d'en tirer raison ; mais il n'en peut jamais obtenir la liberté , & à peine luy permit-on d'escire aux sieurs de Marin & Laferre , des reproches sur l'infidelité de leur parole , & sur le peu de respect qu'ils rendoient à celle de l'homme du Roy , qui auoit ordonné vne sursoiance d'armes pour trois iours.

DIEU mesme , pour tesmoigner qu'il prenoit part à ces injures , suscita Maistre Iean du Bousquet , Vicaire de Pompignac , pour parler pour luy , & former sa plainte deuant l'image visible de sa justice , qui demandant

d'estre oüy dans les Chambres assemblées, remit sur le Bureau vn sac, dans lequel estoient quatre lampes, vne burette, le lambeau d'un chandelier, vn soleil & vne custode, & beaucoup d'autres meubles sacrez qu'il auoit arraché aux despens de sa bourse, des mains sacrileges des soldats Espernonistes, de la remise desquels il demanda sa descharge, qui luy fut accordée, apres qu'il en eust esté fait inuentaie, & pource que le S. Ciboire estant ouvert, du Bousquet y remarqua des parcelles des Hosties consacrées, qu'il n'auoit pas reconnu auparauant; Messieurs se prosternant à genoux, & abaissant leur autorité pour se rendre adorateurs de la Majesté de leur souverain Iuge, ils ordonnerent que le sieur du Bousquet se reuestiroit d'un surplis, pour le porter dans la Chapelle du Palais, où ils l'accompagnerent teste nuë & des cierges en main, apres quoy ils manderent le Curé de S. Pierre, pour le venir chercher afin de consommer le lendemain ce sacré corps, qui animant vn chascun à la vengeance d'un outrage si sensible, obligea le Parlement à deliberer, que puis que les Vicaires Generaux du sieur Archeuesque, ne s'estoient point seruis du pouuoir de l'Eglise, pour punir tant d'impietez execrables, combien qu'ils y eussent esté assez souvent exhortez, que cette affaire seroit renuoyée pardenant le plus prochain Euesque. Cette treve de laquelle les Espernonistes auoient violé toutes les conditions, n'estoit pas encore finie, quand le sieur de Marin, faisant remonter ses troupes vers Cadillac, leur fit prendre la marche proche du Chasteau de Lormon, qui fait vne partie du domaine de l'Archeuesché

de Bourdeaux, dont il n'est esloigné que d'une demi-lieuë, duquel les Bourdelois s'estoient saisis, comme d'un poste qui les pouvoit incommoder, estant au pouvoir de leurs ennemis. Le suiet de ces approches auoit vn fondement bien leger, car le sieur de Marin se piquoit de ce que la garnison de Lormon, composée du Regiment du Parlement, commandé par le sieur de la Roche Conseiller, qui en estoit le Maistre de Camp, auoit prins trois de ses soldats qui estoient allez piller sous la giroüete du Chasteau, lesquels le sieur de la Roche fit mettre en liberté, soudain que le Trompette du sieur de Marin les demanda de sa part. Il deuoit estre satisfait de cette ciuilité, qui auoit esté faite bien soudainement & de bonne grace; neantmoins comme il ne cherchoit que des pretextes, pour si foibles qu'ils fussent, affin de satisfaire à la mauuaise humeur de son General, il fit aduancer le Regiment de Crequy, & quelques autres troupes de Cauallerie, qui faisoient environ quatre cens cheuaux, & sept à huit cens hommes de pied, lesquels le sieur de la Roche enuoya reconnoistre par les sieurs la Mothe Guionnet & Labroüe Lieutenant, qui se mirent à la teste de cinquante soldats, mais ils ne furent pas dehors, que se trouuans proches de leurs ennemis, le courage emportant le sieur de Guionnet à leur faire vne embuscade, & les attendre sur vn defilé, où la Cauallerie ennemie se rencontra presque à mesme temps, sur laquelle Guionnet fit faire vne descharge, qui en fit demeurer environ vne vingtaine sur la place, mais ayant esté prins par le flanc & par derriere, les Parlementaires ne pouuans soustenir le

choc d'une si grosse troupe, & n'ayans pas eu le loisir de recharger, furent contraincts de faire retraicte à la faueur des vignes. Cela n'empescha pas qu'une partie ne fit ferme l'espée à la main, & que Guionnet combattant en Lion, n'aymast mieux perdre la vie qu'abandonner sa place: mais voyant quatorze ou quinze des siens couchés morts à ses pieds, & se reconnoissant abandonné du reste, il fut contrainct de prendre quartier avec Labroüe son Lieutenant, qui estans faits prisonniers furent menés à Cadillac.

Le Marquis de Chambaret aduerty de ce desordre, escriuit au sieur de Marin pour luy faire ses plaintes sur l'infraction de la treve; mais il fut preuenü de ce mesme reproche: ce qui luy fit connoistre qu'il auoit affaire avec des personnes qui ne vouloient qu'incidenter; en sorte qu'il entra au Parlement, pour remonstrer que la reparation de cette infidelité consistoit dans la force, & que par conséquent il estoit necessaire de haster la leuée des gens de guerre, & d'autant plus qu'il auoit eu aduis que le Duc d'Espéron alloit coucher ce soir au Chasteau de la Brede, à trois lieües de Bourdeaux, où il faisoit aduancer le gros de ses troupes, pour de là les ietter dans le pays de Graües, afin de ruyner les vignes & les maisons Bourgeoises. La resolution de cette proposition fut interrompuë, par l'aduis que l'on vint donner au Parlement que le sieur d'Argenson estoit reuenü de Cadillac, où il estoit allé pendant la treve, pour cōcorter avec le Duc quelques articles qui auoient esté proposez dans la premiere conference sur la paix, sur quoy ils ordonnerent que les Commissaires l'iroient

trouver à l'Archeuesché, pour acheuer le traicté: ce qu'ils firent, & ayant en compagnie des deputez des autres corps, conseré avec luy, on ne peut pas entierement resoudre cette affaire, il fallut qu'il retournast encore à Cadillac, de crainte qu'il n'auançast quelque proposition, ou qu'il ne fit quelque engagement qui fut desagreable au Duc, tant il auoit enuie de le seruir avec fidelité & à sa mode. Les gens d'esprit auoient de la peine à conceuoir des esperances solides sur cette façon d'agir, ne pouuans pas se persuader que si le sieur d'Argenson auoit eu le pouvoir absolu qu'il disoit, & que le Roy l'eust rendu le souverain arbitre de ces desordres, qu'aprez l'obeyssance que le Parl. & toute la Ville rendoient si aueuglement à ce qu'il ordonnoit, il n'eust traicté par la mesme autorité avec le Duc d'Espernõ, ce qui rédoit sa negociatiõ suspecte, & faisoit conclure qu'il falloit, ou qu'il fust intelligent avec luy, ou que ses ordres fussent limitez, & de fait pour couvrir son jeu avec plus d'adresse, sçachant que pas vn Bourdelois n'eust osé se presenter deuant le Duc, il fit instance aux Commissaires, à ce qu'on luy baillast quelque Bourgeois, pour estre tesmoin, disoit-il, de l'ardeur avec laquelle il traittoit à l'aduantage de la Ville.

C'EST vne maxime qu'il faut faire la paix les armes à la main, & qu'ordinairement le plus fort impose la loy au plus foible. Le Parlement bailla par ce principe deux Arrests, à la sollicitation du Marquis de Chambaret pour se fortifier; par l'un desquels il estoit enjoint à tous les habitans de la Ville, de quelle qualité & condition qu'ils fussent, de fournir vn soldat ou plusieurs,

ou argent , fuiuant leurs facultez , declarant qu'autrement ou à faute de ce faire volontairement , ils seroient taxez par le conseil de Police ; & par l'autre il fut ordonné que tous les cheuaux qui estoient en Ville & dedans les Faux-bourgs , seroient deliurez par l'ordre du Marquis de Chambaret , par les proprietaires d'iceux , pour s'opposer aux ennemis , estimation prealablement faite des cheuaux par deux Mareschaux en leur presence , & en cas que les cheuaux fussent tuez , gastez ou perdus , que le prix & estimation de ceux des Officiers du Parlemét , seroient esgalés sur toute la Compagnie , & de ceux des autres Bourgeois & habitans , sur toute la Bourgeoisie . On nomma des Commissaires pour l'exécution de ces Arrests , qui s'en acquiterent avec toute la diligence possible . Le sieur d'Argenson ne sejourna pas aussi long-temps en son voyage , car ayant rencontré le Duc au Bourg de Castres , à demy chemin de Bourdeaux à Cadillac , il fut de retour dès le lendemain , & à mesme s'estant présenté à la Cour de releuée , il luy fit entendre que la paix qu'il portoit , n'estoit pas seulement necessaire pour le seruice du Roy , mais aussi tres-aduantageuse au repos & à la tranquillité de la Ville & de la Prouince , que comme il estoit asseuré par la connoissance qu'il auoit des bonnes intentions de sa Majesté , qu'elle en seroit satisfaite , il estimoit aussi qu'il ne falloit que le recit des conditions , pour en persuader l'aduantage pour le public .

C H A P I T R E XII.



PRES auoir ouïy la relation des articles, & les auoir digerez autant que le loisir le pouuoit permettre, le Parlement tesmoigna qu'il les acceptoit, & resolut, que pendant qu'on s'employeroit à les mettre par escrit, ils seroient communiquez dès le lendemain à toutes les compagnies de la Ville, qui seroient pour cet effet conuocquées au Palais par deputez, lesquels ne manquerent point de s'y trouver, & ausquels la Cour representa par la bouche du Premier President; que comme tous ces corps s'estoient vnis à elle de cœur & d'affection, pour les interets de la cause commune, & la deffence de la liberté publique, qui auoit esté outragée iusques dans l'extreme, qu'elle croyoit ne pouuoir mettre le dernier sceau aux propositions de paix, qui luy auoient esté faites par le sieur d'Argenson, suivant les ordres du Roy, sans les leur communiquer, pour ne bleffer pas cette agreable harmonie, qui conseruoit tous les ordres de la Ville dans vne parfaite intelligence: que la Cour estoit disposée d'obeyr auement à la volonté du Roy, & de quitter les armes, à condition que le Duc d'Espernon les quittast de sa part, & esloignast ses troupes, entendant que la garde de la Ville fust continuée, iusques à ce qu'il eust executé de son costé, & qu'elle esperoit de cette mesme vnion

vnion qui les tenoit attachez dans vn mesme interest, que l'on se porteroit dans les sentimens d'une parfaite obeysance, à quoy les deputez tesmoignerent des soumissions absoluës pour l'exécution de ces ordres. Ces propositions furent aussi prononcées à la Noblesse, laquelle auoit esté conuoquée par Messieurs Dasis President, Moneins, Ieune & Dufault Conseillers. Il estoit bien iuste que le Marquis de Chambaret y print part. Il fut ordonné pour cet effet qu'il seroit mandé tout à l'heure, & s'estant rendu dans l'assemblée des Chambres, le premier President luy dit, que puis qu'il auoit obligé la Cour de si bonne grace, & que sa generosité & les seruices qu'il luy auoit rendu, auoient si fortement engagé ses affections pour luy, elle auoit estimé qu'il estoit raisonnable qu'elle luy communiquast la resolution qu'elle auoit prise, sur le commandement qui luy auoit esté fait de la part du Roy par le sieur d'Argenson de desarmer, auquel elle desiroit obeyr ponctuellement, protestant que la Cour, ne pouvant pas oublier l'importance des seruices qu'elle & le public auoient receu de luy, qu'elle ne laisseroit pas eschaper les occasions à luy rendre ses reconnoissances, & luy faire connoistre que ses interests luy seroient tousiours aussi chers que les siens, le priant toutesfois de ne l'abandonner point encore. Le Marquis de Chambaret respondit à cela, que la Cour se deuoit souvenir que le mesme serment qui l'auoit attaché à son seruice, l'auoit engagé à l'obeysance de ses ordres, & qu'il conserueroit soigneusement cette espée, qu'il ne portoit & n'auoit tiré que pour sa deffence.

Ces auances estoient belles, & la pluspart s'imaginoient desia goustier à plain, la douceur de ce calme: mais comme les intelligens se desioient de l'humeur du Duc d'Espéron, & qu'ils craignoient que ce ne fust vn leurre pour surprendre les Bourdelois, qui commençoient à dormir au doux murmure de cette paix, ils firent ferme à ce que le Duc esloignast ses troupes par auance, ce que les Commissaires firent entendre au sieur d'Argenson, qui n'osant le promettre sans en auoir eu la parole du Duc, luy enuoya son fils, pour en apprendre la dernière resolution. Il ne fut pas toutefois de retour qu'on reconnust qu'il falloit traiter cette paix avec precaution, & que bien loin de remarquer de la generosité dedans ce procédé, on deuoit craindre pour l'infidelité des paroles données. Le sieur d'Argenson voulant informer la Cour de ce que son fils auoit négocié, entra dans le Palais, & la trouvant assemblée, il luy remonstra qu'estant extrêmement satisfait de la resolution qu'il auoit remarqué dans l'esprit du Parlement d'obeyr aux volontez du Roy, pour le desarmement il auoit enuoyé son fils à Monsieur d'Espéron, pour l'obliger, esloignant ses troupes, à rendre vne pareille obeyssance à celle de la Cour, lequel luy auoit rapporté, qu'il auoit trouvé Monsieur d'Espéron dans la pensée de n'en rien faire, à cause qu'il ne voyoit point reuenir le sieur de S. Meard Intendant du Conseil, & Gyacson agét, (lesquels ne se croyans pas asseurez dans la Ville pendant ces desordres, s'estoient mis dans le Chasteau Trompette) & qu'il n'auoit non plus receu aucune nouvelle du sieur du Haumon, Capitaine dans

le mesme Chasteau, sur vne Lettre qu'il luy auoit escrite, & en consequence, il supplia la Cour de luy accorder deux choses; l'une d'aller au Chasteau Trompette, avec toutes les precautions necessaires pour parler à du Haumon; & l'autre, d'en pouoir retirer S. Meard & Giac, pour les ramener à Monsieur d'Espernon, afin de pouoir procurer le repos à tout le monde, promettant de laisser son fils en la Ville, pour receuoir les despches qu'il luy enuoyeroit, & les presenter à quelqu'un des Messieurs. Le premier President prenant la parole, luy respondit qu'il y auoit de quoy se defier de cette procedure, d'autant que depuis que la Cour auoit tesmoigné estre entierement soumise à la volonté du Roy, & qu'elle auoit donné les ordres necessaires pour le desarmement, esperant que le Duc d'Espernon seroit esgalement obeyssant, on auoit veu neantmoins que les troupes ennemies auoient approché la Ville de plus prez qu'auparauant, qu'elles la tenoient comme inuestie, & qu'il n'y auoit point d'acte d'hostilité, qui n'eust esté commis pendant que l'on traitoit pour les faire cesser. Que la Cour le prioit de trouver bon que le Registre fut chargé de l'obeyssance qu'elle & toute la Ville auoit rendu aux ordres de sa Maiesté, d'en vouloir charger son procez verbal, & en laisser vne copie. Ce fut là le coup le plus sensible de la pierre de touche, qui espreuua la complaisance que le sieur d'Argenson auoit pour les interets du Duc, au delà de celle que le seruice du Roy, & la misere d'un peuple oppressé demandoit de la justice de sa Majesté; car il respondit que jusques à ce que tout fust acheué, il n'estoit pas necessai-

re de dresser de verbal, qu'il asseuroit hautement qu'il auoit sujet d'estre bien satisfait du respect que la Cour auoit eu pour les commandemens qui luy auoient esté faits de la part du Roy, & qu'il en diroit tousiours la verité. Apres quoy il sortit, pour donner la liberté à la deliberation de la Cour, qui ayant ouï le Procureur General, & recueilly les voix, resolut de luy faire dire qu'il ne deuoit point douter apres les tesmoignages d'une obeyssance aueugle que le Parlement & la Ville auoient rendu, avec combien de respect on receuoit les ordres du Roy, & qu'encore que ces propositions bien examinées, ne regardant que la liberté des deux creatures du Duc d'Espernon, ne puissent toucher que sa seule satisfaction, lesquelles on auroit grand sujet de renvoyer, par l'aersion qu'imprimoit dans l'esprit d'un chascun, la continuation des actes d'hostilité qu'il pratiquoit au mespris des paroles données, que neantmoins la Cour les luy accordoit, les considerant comme un moyen à contribuer à l'auancement de la paix, & par consequent au seruice du Roy, estimant que le sieur d'Argenson en vseroit avec prudence, le priant de trouver bon que cette deliberation fust prononcée en sa presence aux deputez des Compagnies qui auoient traité avec luy, auxquels de sa part il repeteroit les mesmes choses qu'il auoit dit à la Cour: ce qui fut executé de part & d'autre.

LA Cour n'estoit point encore leuée, & le sieur d'Argenson estoit avec elle, quand on vint rapporter avec esmotion, que la garnison du Chasteau auoit fait vne descharge sur vn soldat de la Bourgeoisie, qui estoit

en faction du costé des Chartreux, que la Ville en estoit en alarme, & qu'elle ne pouvoit plus souffrir tant d'infractions sans ressentiment. Cette nouvelle rencontre fit surseoir l'exécution de la deliberation precedente, & le sieur d'Argenson fut prié d'escrire au sieur du Haumon vn commandement exprez de faire cesser ces violences, luy promettant qu'aprez que ce trouble seroit appaisé, que S. Meard & Gyac auroient la liberté & l'assurance d'aller où ils voudroient. Le sieur d'Argenson tesmoigna en estre satisfait: mais neantmoins comme il se resolut d'aller trouver le Duc d'Espernon, & qu'il partit soudainement, cela surprint beaucoup de personnes, qui prindrent ce voyage pour vne retraite. Ensorte que le Parlement deliberant la dessus, arresta qu'il seroit fait Registre de ce qui s'estoit passé depuis son arriuée dans la Prouince, & donna charge à Messieurs du Bernet premier President, de Maluin sieur de Primet, Sabourin l'aîné & Boucaut le ieune Conseillers, de le dresser. L'on en estoit encore en ces termes, que les sieurs Dalesme & Andraut Conseillers, estans entrez dans les Chambres, rapporterent qu'ils venoiēt d'accompagner le sieur d'Argenson iusques à Cadaujac, à deux lieuës de Bourdeaux, qui les auoit priez de faire entendre à la Cour qu'il ne s'estoit pas souvenu de leur représenter que le Chasteau d'Oliuier donnoit de la jalousie au Duc d'Espernon, & qu'il trouuoit à propos d'enuoyer vn ordre au Cheualier de la Serre qui le gardoit, de quitter la place, licentier la garnison lors qu'il le luy commanderoit, protestant qu'il ne luy enjoindroit pas, que plustost les troupes du Duc n'eus-

sent commancé à defiler. Si bien que le Parlement ayāt trouvé cela juste, chargea le premier President d'en escrire au Cheualier de la Serre, ce qu'il executa sur l'heure. Cependant on pressoit les deputez en Cour pour partir. Le President Dasis, touché de quelque consideration, s'en excusa, & suplia la Cour de l'en vouloir descharger, qui substitua en sa place le President Gourgues l'aîné, qui, comme l'on verra dans la suite, s'en acquita avec tout l'honneur & fidelité qu'une si auguste Compagnie & le public deuoient attendre d'un personnage plein de vertu & de mérite.

LE Duc d'Espèrnon auoit sans doute prez de luy quelque Conseil qui entendoit à instruire des procez & former des incidens. La paix proposée estoit s'il sembloit conclüe, quand le sieur d'Argenson estant reuenue de son voyage, rapporta que le Duc ne vouloit point faire esloigner ses troupes, que le Chasteau Trompette ne fut auitaillé, de crainte que quand elles ne seroiēt pas si proches, on ne voulust pas souffrir qu'on fournist à la garnison ce qui seroit nécessaire. Le Parlement ne refusa pas cet auitaillement; mais ce fut avec cette condition, qu'il ne se feroit qu'après l'esloignement des troupes, pour l'assurance duquel, il se porta à cette condescendance, ou pour vray dire, à cet abaîssement, que de fournir des ostages de son corps, sçauoir les sieurs Duverdier, Tarneau President en la premiere Chambre des Enquestes, & Dubourg Conseillers, lesquels il enuoya en la Citadelle de Blaye, avec vne Lettre adressante au Duc de S. Simon, pour le prier de les y receüoir. Toutefois comme cette affaire n'estoit pas

dans la seule disposition du Parlement, & qu'il estoit juste que les autres Compagnies, qui estoient vnies avec luy, en disent leur aduis, il fut trouvé à propos de les assembler dedans l'Hostel de Ville, & d'y enuoyer Messieurs de Latrene President, Sabourin l'aîné, Boucaud le Jeune, Conseillers, & Pontac Procureur General, avec ordre au President de faire la proposition, laquelle ayant esté concertée dans cette troupe fort nombreuse, composée de beaucoup de personnes de sens, & qui ont beaucoup de lumieres, elle ne fut pas seulement jugée vn pretexte specieux pour esloigner la conclusion de la paix, mais aussi vne auance tres-ruyneuse à la Ville, qui attendoit de la deffillance du pain, la reduction de cette place ennemie, à laquelle elle auoit desia coupé les canaux de l'eau qui l'abreuioient. Et quoy que cette sorte d'assemblée ayt d'ordinaire de grandes defferences pour les aduis du Parlement, elle ne peut neantmoins s'empescher pour ce coup de desapprouver l'enuoy des ostages qu'il auoit desia fait. Et de vray, la feinte de cette proposition fut descouverte par la response que fit du Haumon à la Lettre que le President Dasis, qui presidoit pour lors au Conseil de Police, luy escriuit, par laquelle du Haumon ne l'asseuroit pas seulement qu'il n'auoit besoin d'aucune chose, mais aussi bailla par rodомontade au porteur de la Lettre, du pain blanc fraichement fait.

UN des principaux artifices que le Duc pratiquoit pour acquerir du credit dans la Ville, & conseruer des intelligences parmy la Bourgeoisie, estoit de faire des creatures, faisant eslire des Iuges & Consuls dans la

bource , qui tinrent cet honneur de son autorité. On parloit desjà d'y porter des Marchands qui ne dependissent que de luy. Le terme de l'eslection approchoit , & par conséquent il estoit important de rompre ce dessein , de crainte qu'il ne trainast des suites dangereuses. Le Procureur General en fit la plainte à la Cour , & particulierement sur ce que ceux qu'on pretendoit eslire , n'auoient pas les qualitez , que les Reglemens rendus sur ces nominations desiroient ; surquoy ayant esté delibéré , deffences furent faites tant aux Iuge & Consuls qu'aux Eslecteurs , de contreuenir à l'Edict de leur établissement , Arrests du Conseil & Reglement de la Cour concernant leurs eslections : ce faisant , d'eslire & nommer en ces charges d'autres personnes que des notables Bourgeois , qui eussent passé par les charges de Tresorier de l'Hospital , ou qui auroient esté Iurats , & de nommer aussi des personnes qui fussent parens ou aliez de ceux qui en deuoient sortir , ou qui fussent decretez par justice, donnez & recommandez par des Lettres particulieres, à peine de trois mil liures d'amende, nullité & cassation des Eslections , & de respondre en leur propre des despens, dommages & interests des parties. Il fut encore ordonné que les Eslecteurs fairoient le serment , & iureroient de ne nommer aucun de ceux, pour lesquels ils auroient esté priez & sollicitez. Cet Arrest ne fut pas delibéré , que l'on fournit matiere pour vn autre, par vn aduis qui fut donné de la part du Conseil de Police , qui assura que le Duc d'Espernon ne se contentoit pas de faire auancer ses troupes vers la Ville ; mais aussi qu'il auoit fait entrer plusieurs Vais-

seaux

seaux dans la Garonne , afin de tenir Bourdeaux bloqué & par terre & par eau , à quoy on ne trouva point de remede plus present , que d'ordonner qu'il seroit escrit de la part de la Cour , à toutes les Villes & Communautéz de son ressort , pour s'assembler & donner le plus prompt secours à la Ville qu'il se pourroit , contre les gens de guerre commandez par le Duc d'Espéron , qui opprimoient la justice souveraine du Roy , assiegeoiét la Ville capitale de la Prouince , & rauageoient le plat pays aux enuirs d'icelle , exerçans tous actes d'hostilité , voleries , violemens , & de tres-grandes impietez . Cette deliberation eust eu vn grand effet si elle eust esté executée : mais comme Dieu reseruoit cette Ville pour estre l'objet de sa bonté , apres qu'elle auroit esté celuy de la fureur du Duc , il permit qu'elle fust abandonnée par toutes ses voisines , & en estat de ne receuoir de secours que du Ciel , tant il est vray que Dieu se plaist à ne faire esclater sa puissance , que dans la foiblesse des hommes , & rehausser sa gloire par leur ruyne . La diuision qui commençoit à jetter des racines dans l'esprit de la pluspart des habitans , faisoit tirer des pronostiques infaillibles de leur perte , & à moins que de guarir ce mal par vn remede contraire , qui estoit l'vnion & l'aliance des cœurs , Bourdeaux estoit perdu . Cette pensée fut suggerée par les Bourgeois dās leur derniere assemblée en l'Hostel de cette Ville , & le Parlement trouua cela si necessaire pour le salut public , que s'estās assemblez extraordinairement le premier iour de May , il ordonna que ce mesme jour les Bourgeois & habitans de la Ville chefs de maison , jureroient , deuant les Cō-

missaires qui seroient deputez, aprez la Messe en l'Eglise Metropolitaine, de bien & fidèlement servir le Roy en l'occasion lors presente, & d'employer leurs vies & leurs biens pour la deffence de la Ville, & que ceux qui ne pourroient faire le serment ce jour la, le feroient chascun en sa Parroisse dans trois iours, à dix heures du matin, & à trois de releuée, pardeuant vn Commissaire qui seroit nommé à cet effet. Que pour les habitans de la religion pretenduë reformée, ils jureroient dans l'Hostel de Ville, pardeuant vn Commissaire aussi de la Cour dans le mesme delay & aux mesmes heures. Il fut encore ordonné que les Commissaires chargeroiēt leurs verbaux des noms des Bourgeois; Que les Presidens, Conseillers, Gens du Roy & Greffiers de la Cour, presteroient le mesme serment dans la Chapelle du Palais, & que les Presidens, Conseillers, & Gens du Roy de la Religion pretenduë reformée, le feroient dans la Chambre de l'Edict, pour l'exécution duquel Arrest, furent nommez pour l'Eglise Cathedrale, les sieurs de Lescure & Guionnet, Cieutat pour S. Eloy, Lalane pour Ste. Colombe, Nesmond President aux Requestes pour Ste. Eulalie, Lachese pour S. Michel, Lescure pour S. Projet, Geneste President aux Requestes pour S. Simeon, Farnoux pour S. Pierre, Sabourin pour S. Mexens, Dufault pour S. Christoly, Martin pour Puy-paulin, & Blac le jeune pour S. Remy. Et pour le regard de Messieurs du Parlement, le premier President jura entre les mains du second, & tant le second que les autres Officiers, entre celles du premier. Cette deliberation fut accompagnée d'une tres-eloquēte predication,

& plaine de zele, prononcée par le Pere Bonnet, Curé de Ste. Eulalie, personnage d'un rare sçauoir & d'une vertu eminente.

C H A P I T R E XIII.



LE sieur d'Argenson jugeant que cette vnion si estroicte, jurée avec tant de ceremonies, estoit ruyneuse au party du Duc qu'il soustenoit, joüa vn tour de son mestier, & se seruant de l'adresse que l'on pratique à la Cour, à la faueur du premier President, qui ne sçauoit luy rien refuser, fit aduertir le Parlement qu'il entreroit ce mesme jour de releuée, & à suite Messieurs s'estans rendus au Palais, il les seruit d'une harâgue preparée, & leur représenta; Qu'il falloit auoüer que la paix estoit vn ouurage du Ciel; qu'il n'appartenoit qu'à Dieu de la donner aux hommes; que Bourdeaux & toute la Prouince se pouvoit vanter de la posseder au temps qu'il croyoit qu'elle en fust esloignée; que les raisons dont il auoit battu l'esprit de Monsieur d'Espernon, luy auoient persuadé de differer l'execution del'auitaillement promis pour le Chasteau, jusques à ce que ses troupes eussent defilé; qu'il auoit desia donné les ordres pour leur esloignement, & qu'en effet elles auoient commencé à prendre leur marche; pour le retour, que Monsieur d'Espernon deuoit coucher le lendemain à Castres, qu'il auoit desia expédié ses or-

dres pour l'ouverture du passage des viures, & la retraite des Nauires de guerre qui bouchoient la riuere, si bien qu'il ne restoit plus, sinon que les Bourdelois quittassent les armes de leur part, fissent cesser leurs gardes, & abbatissent leurs barricades. Sur quoy le premier President repartit, que la Cour estoit tres satisfaite de voir vne paix, à l'establissement de laquelle elle auoit contribué toute son autorité, luy rendant graces de la peine & du soin qu'il auoit prins en cette negociation; qu'il estoit neantmoins à propos qu'elle deliberast sur la responce qu'elle luy deuoit faire pour ses propositions. Aprez quoy le sieur d'Argenson ayant passé dans la Chambre de l'Audience, la Cour delibera, & resolut de luy dire estant rappelé, qu'elle estoit si fort passionnée pour le repos de la Prouince, qu'elle n'auoit pas balancé pour l'acceptation de ses propositions, l'exécution desquelles elle remettoit à la prudence des Commissaires qui auoient esté desia deputez, qui s'estas assemblez, trouverent à propos d'enuoyer des Bourgeois, ausquels on eust creance, avec des Ordonnances du sieur d'Argenson, pour faire ouvrir les passages, pendant que le Marquis de Chambaret & des Bourgeois, iroient avec luy, pour voir si les troupes de Monsieur d'Espernon se retiroient. L'on estoit sur le temps d'exécuter cette deliberation pour le dernier point, quand les Bourgeois, qui se desioient de la procedure du sieur d'Argenson, & apprehendoient que tenant à l'escart le sieur de Chambaret, il ne le fit tomber en quelque embuscade, se mirent la pluspart sous les armes pour l'accompagner : ce qui augmenta de l'au-

tre costé le soupçon qu'auoit le sieur d'Argenson de la Bourgeoisie, qu'il reconnoissoit bien fort detrompée de l'adresse de son procedé; en sorte que le voyage qu'ils auoient desia commencé fut diferé.

LE sieur d'Argenson vouloit qu'on mit en liberté S. Meard & Gyac, pour donner au Duc d'Espéron la satisfaction qu'il attendoit de luy. Il n'esperoit pas cette grace du peuple, ny de la pluspart du Parlement, qui jugeoiēt à propos de les faire demeurer dās le Chasteau Trompette, comme par forme d'ostage, iusques à ce que la paix que l'on propoisoit fut executée. Il conféra avec le premier President (adroit & fait à son humeur) sur des expediens propres pour en venir à bout, & n'en trouverent point de meilleur, que de les faire sortir à la fourdine, par le petit pont du Chasteau Trompette, qui aboutit à la riuere: ce qu'ils firent, s'estans mis dans vn batteau pour aller à Cadillac. Mais ils furent surprins par quelques chaloupes Parlementaires, qui les menerent dans le Nauire de guerre. Cependant le bruit de cette sortie ayant esté porté au Parlement, plusieurs en furent piquez, & avec raison, d'autant qu'on jugeoit que le premier President l'auoit fait de son autorité, & sans ordre de la Cour. Et de vray il ne sceut s'en deffendre, se contentant de deguiser cette entreprise par quelque pretexte specieux; & pour trouver moyen de changer de discours, il rappela le sujet des articles de paix, lesquels suiuant la deliberation precedente, auoient esté mis par escrit, aprez auoir esté resolu & concertez entre le sieur d'Argenson & les Commissaires, & deputez de toutes les Compagnies, desquels, aprez les auoir

126 DES MOUVEMENTS;
representez, il fit faire lecture, & ordonner qu'ils se-
roient mis dans le Registre, pour y auoir recours a be-
soin, & les faire executer selon leur forme & teneur.

ORDRE POVR FAIRE CESSER les troubles de la Prouince de Guyen- ne, & Ville de Bourdeaux,

I

LE desarmement & l'esloignement des troupes
tant par eau que par terre, sera fait au plus tost
& au mesme iour.

II.

Les troupes seront retirées à la distance de dix
lieuës, ordonnée par le feu Roy, pour ne don-
ner ombrage à la ville de Bourdeaux, & suivront
la route qui leur sera ordonnée par sa Majesté.

III.

L'ouverture des passages & le commerce sera
libre, tant par terre que par les deux riuieres.

III.

Le Chasteau de Langoiran avec les meubles qui
y estoient, ensemble celuy de Vayres & autres, se-
ront rendus aux proprietaires.

V.

Les gens de guerre qui sont à Libourne seront
au nombre necessaire pour la garde du reduit, en

l'estat qu'il est à present, iusques à l'ordre du Roy, sans qu'on puisse cependant continuer le travail dudit reduit.

VI.

Ceux qui font l'auance de la subsistance des soldats dudit reduit de Libourne en seront rembourcés sous le bon plaisir du Roy, par deduction, sur les deniers de la Taille, subsistance ou autrement.

VII.

Tous les prisonniers de guerre seront rendus de part & d'autre.

VIII.

Il y aura seureté entiere pour les personnes & les biens des particuliers, tant du Parlement que de la Ville de Bourdeaux & autres qui les ont assistez, & à ces fins sa Majesté sera suppliée de donner la Declaration necessaire.

IX.

Il sera mis dans le Chasteau Trompette iusques à sept vingts sacs de farine au plustost qu'il se pourra, & sur l'aduis qui sera donné au Parlement, du temps conuenable à cet effet.

X.

Et pour la seureté de la remise desdites farines, ont esté données trois cautions, qui demeureront deschargez, deslors que cela sera effectué.

XI.

On pourra continuer la garde de la Ville tout autant qu'il sera jugé nécessaire.

XII.

Le Chasteau du Ha sera remis es mains du sieur Marquis de Roquelaure, ou ceux qui auront charge de luy. Fait à Bourdeaux le premier iour de May mil six cens quarante-neuf.

Ainsi signez, Argenson. Dubernet. de Soudiraut. Cursol. Dufault. Dufault. Richon. Caluimont. Constant. Fouques.

LA conclusion de ces articles n'empescha pas que les troupes Espernonistes ne fissent mil degats, & que le Duc ne taschast de porter au Consulat de la bource par des pratiques sourdes, certains Bourgeois qui luy estoient affidez. Le Procureur General fut esueillé pour y former son opposition. On le rendit sçauant des monopoles qui se faisoient pour cet effer, & du nom de ceux qu'on vouloit appeller à ces charges, lesquels estoient par vne notorieté connue à tous, estimez partisans du Duc d'Espéron. Ces circonstances si expresse, & l'honneur de la charge qui l'obligeoit à la conseruation de la liberté pour les suffrages, le firent conclure contre la corruption des Eslecteurs, & la lascheté de ceux qui estoient desia designez. Ensorte que par Arrest, tres-expresse deffences furent faites à ceux qui deuoient proceder à la nomination des Iuge & Consuls, d'eslire

d'élire aucun des nommez Pissebeuf, Lafon, Paul, Lestrilles & Iuge, à peine de trois milliures contré chacun des contreuenans, nullité & cassation de l'ellection en leur propre & priué nom, & de tous despens, dommages & interests.

CET Arrest ne fut pas presque conceu, que le Duc d'Espernon en fut aduerty par les confidens, qu'il auoit aussi-bien dans le Parlement, qu'ailleurs, & jugeant que ce coup luy auoit rompu les chiens, il porta sa vengeance sur des simples Bourgeois & des pauvres payfans, & s'amusa à gresser sur le persil d'une terrible sorte; car faisant semblant d'auoir quelque condescendance pour la paix, & d'esloigner ses troupes, il les distribua dans la campagne, de façon qu'on n'entendoit chaque iour que des nouvelles des desordres nouveaux que ses troupes faisoient dans les Parroisses voisines de la Ville. Ce n'estoit pas assez de fracasser les meubles, enfoncer les portes & les fenestres des maisons, emmener les bestiaux, brusler les barriques & les vaisseaux à vin, s'ils n'eussent rauagé les vignes & les blés, tué iusques aux enfans, violé les femmes, & pratiqué tous les sacrileges imaginables. Le Duc d'Espernon fut en personne avec sa Caualerie, dans la Parroisse de Gradignan, & ayant appris que quelques payfans s'estoient retirez dans l'Eglise du Prieuré de Cayac, qui appartient aux Peres Chartreux, dans la mesme Parroisse, avec resolution de se deffendre, il les enuoya sommer: mais ils tesmoignerent tant de cœur, que le

Trompette n'en eut que le refus, dequoy le Duc, d'Espéron fut si fort outré, qu'ayant fait mettre pied à terre à ses Caualliers, quelques vns d'entreux les attaquèrent, qui pour faire trop les braues, furent portez les premiers par terre, & marquerent à ceux, qui les soustenoient, qu'un fusil entre les mains d'un payfan adroit, sçait abatre vn Gentil-homme pour si vaillant qu'il soit. Le Duc s'estant auancé dans la troupe, fut miré par deux fois, & possible y eust-il demeuré, sans ce que le frere du Vicaire de cette Parroisse, lequel ces villageois auoient esleu pour chef, pource qu'il estoit entendu dans les armes, rabbatit autant de fois le fusil, qui l'auoit prins en mire. Neantmoins ces Caualliers ayans gagné le fossé, effrayerent si fort ces payfans, qui ne penserent plus qu'à trouver leur salut dans la fuite, sauf quelques vns, qui demeurèrent resolu de périr avec leur Commendant. Et en effet ils soustindrent tout autant qu'ils eurent de munition; mais enfin se sentans foibles, ils acceptèrent la capitulation qui leur fut présentée, de leur sauuer la vie. En consequence dequoy, les Espéronnistes estans entrez dans le Prieuré, ils enfermerent les payfans, & se saisirent de celuy qui les commandoit, contre lequel le Duc d'Espéron prononça l'Arrest de mort, le faisant pendre & estrangler par vn payfan, nonobstant qu'il luy eust conserué la vie, & que la Noblesse qui l'escortoit, touchée de compassion pour vn si vaillant soldat, se piquast de generosité pour vn homme de

cœur, & de fidelité pour l'entretien de sa parole
donnée dans la capitulation ; ce qui frapa si sensi-
blement le sieur de la Roche, son Capitaine des
gardes, que deslors il luy remit sa Charge, estimant
ne pouvoir pas trouver d'assurance à seruir vn Mai-
stre si infidele.

LIVRE

FIN du Premier Liure.

CHAPITRE PREMIER.





L I V R E

S E C O N D

C H A P I T R E P R E M I E R



DE T T E sursoiance d'armes qui n'auoit que le nom de la paix, seruit de germe & de preparatif à de plus grands desordres. Il estoit inutil d'auoir signé des articles, puisque le Duc d'Espernon n'auoit point dessein de les executer. Les interests du particulier & ceux du public, se joignoient à cette execution. Le President Dasis demandoit le reestablissemēt de son Chasteau de Langoiran. Le President Gourgues vouloit celuy de Vayres. Tout le monde crioit pour l'esloignement des troupes Espernonistes. Et le sieur d'Argenson, qui soustenoit les interests du Duc, s'opiniastroit au rautaillement du Chasteau; il entra pour cet effet au Parlement, & estant allé dans la Chambre de la Tournelle, il fit dire à la Cour par vn Huissier, qu'il desiroit parler aux Commissaires, lesquels l'alle-

rent trouver pour sçauoir ce qu'il desiroit; estans reuenus, ils rapportèrent par l'organe du premier President, que le sieur d'Argenson leur auoit tesmoigné qu'il desiroit avec passion faire entrer cinquante sacs de farine dans le Chasteau Trompette, promettant de faire remettre Langoiran aprez cet auitaillement, que la Bourgeoisie & le menu peuple estoient portez à bailleur leur consentement, ainsi qu'il auoit apprins par Cōstant, Fouques & Lacrompe Bourgeois de Bourdeaux, qui s'estaus promenez dans tous les quartiers de la Ville, pour sonder les esprits, n'auoient point trouvé de cōtradiction. Le Parl. toutefois qui n'estoit pas si peu esclairé, qu'il ne reconnust que cettoit vne fourberie, & quoy qu'en disent Constant & les autres, cet auitaillement estoit capable de faire du desordre, si plustost le Duc d'Espemon ne satisfaisoit de sa part, & ne rappeloit ses troupes, qui continuoient de viure dans leurs premieres insolences, delibera que l'on enuoyeroit quelque personne de creance, qui rapportast fidellement, si les gens de guerre du Duc auoient encores defilé; & qu'en ce cas on laisseroit entrer dans le Chasteau Trompette les farines, que le sieur d'Argenson demandoit.

Les Commissaires qui auoient esté deputez pour arrester cette paix, se trouuoient bien en peine à fournir des moyens pour la faire executer. Ceux du Parlement & de la Bourgeoisie estans asseurez des bonnes intentions de ceux qui leur auoient donné le pouvoir, promettoient de la faire entretenir. Le sieur d'Argenson faisoit les mesmes auances pour le Duc, mais toujours avec des equiuoques, & des paroles desguisées.

Ils estoient tous en conference sur ce sujet, quand des blesez vindrent de Langoiran, Lestiac, Cadaujac, Gradignan, & de beaucoup d'autres endroits, asseurer par des tesmoignages sensibles, que les troupes du Duc estoient plus brutales dans leur retraite, qu'elles n'auoient esté dans les approches. On fit encores sçauoir que le Duc d'Espéron, qui se retiroit vers Castres, & qui ne faisoit pas tant cette demarche pour son retour, par obeyssance pour l'exécution de la paix, comme par la crainte qu'il auoit que ses troupes ne l'abandonnassent, ne trouvant pas dequoy viure dans les Graues, auoit fait attaquer en sa presence, ceux qui gardoient l'Isle S. Georges pour les Parlementaires, & qu'on y faisoit grand feu de part & d'autre. Si bien que ne pouvant venir à bout de ces Insulaires, qui se deffendans vigoureusement, en auoient tué quelques vns des siens, & des meilleurs qu'il eust, & qu'enfin luy ayant fait perdre l'enuie de continuer son attaque, il faisoit assommer & tuer les payfans qu'il trouuoit à l'escart, que le peuple animé de cette brutalité, murmuroit de ce que le Parlement donnoit les mains pour le raitaillement du Chasteau, en faueur d'une personne, qui au lieu d'exécuter la paix, la violoit, la poursuite que faisoit le sieur d'Argenson, pour mettre des farines dans le Chasteau, fust ralentie. Il s'aduifa neantmoins, à la faueur des pratiques qu'il auoit desia fait dans la Ville, & des esprits qu'il auoit attiré à son party, de demander au Parlement vne assemblée dans l'Hostel de Ville sur ce mesme sujet: ce qui luy fut accordé, sous condition qu'il n'y assisteroit pas. Le President Dasis fut nommé pour

faire la proposition, & les sieurs Sabourin l'aîné & Boucaud le jeune Conseillers, & Dufault Aduocat General du Roy (personnage d'une probité tres-entiere & incorruptible) pour y assister, & en consequence on manda les Jurats, auxquels il fut enjoint de conuoquer l'assemblée par billets, & au son de la cloche, suivant la forme accoustumée.

CETTE proposition ne passa pas si aisément dedans cette assemblée. L'apprehension d'estre duppé, le peu de creance qu'on auoit aux paroles du sieur d'Argenson, & la coniecture certaine que l'on tiroit de la chaleur de cette demande, que ce deuoit estre la matiere & la semence d'une nouvelle guerre, faisoit balancer les opinions. Mais enfin le desir qu'on auoit pour la paix, & le dessein de se mettre à couvert du reproche qu'on eust peu faire à la Bourgeoisie de l'auoir rompuë par une primeur, l'emporterent sur toutes les raisons contraires. Ensorte qu'il fut arresté, qu'on laisseroit entrer ces farines dans le Chasteau, sous condition que le sieur d'Argenson procureroit l'execution des articles arrestez avec luy, & deux Bourgeois furent deputez afin de le prier de faire visiter les farines, qui auoient esté desia portées sur le Port, non seulement pour en sçauoir la quantité, mais aussi pour voir s'il y auoit des balles, de la meche ou des poudres meslées dans ces sacs, & pour le prier encore de vouloir partir promptement, pour arrester le bastiment de la Citadelle de Libourne. Ce premier point fut executé dès le lendemain. Et à la veüe de tous, les farines furent receuës par du Haumon, Capitaine du Chasteau, qui fournit

son recepissé. Le sieur d'Argenson bailla aussi de son costé vne Lettre adressée au Duc de S. Simon, pour certifier qu'il estoit satisfait, & rappeler les Officiers du Parlement, qui estoient en ostage, pour l'assurance du rautaillement, laquelle fut mise entre les mains du sieur de Raymond Conseiller, qui fut chargé par l'ordre de la Cour de les aller chercher à Blaye, & remercier le Duc de S. Simon du bon traitement qu'il leur auoit fait: ce qu'il executa avec honneur & diligence, dont il receut aussi les remerciemens de la Cour apres son retour. Il falloit pour satisfaire au plus important de ces articles, arrester le bastiment de cette Citadelle, que le Duc d'Espernon faisoit continuer contre la foy des paroles données; pour cela le sieur d'Argenson fut pressé d'acheuer l'ouvrage qu'il auoit commencé. Le premier President assura que le sieur d'Argenson se dispoisoit à partir, pour aller trouuer le Duc à Cadillac, l'obliger à continuer l'esloignement des troupes, & prendre ses ordres pour faire cesser ce bastiment, promettant d'y aller en personne, pour l'arrester par l'autorité que le Roy luy auoit donnée. Ces belles paroles calmerent la fougue de ceux qui ne pouvoient souffrir d'estre fourbez. On proposa cependant de nommer des Commissaires pour trauailler à l'acheuement de la paix, & à l'execution des articles. Le premier President, le President Dasis, & les sieurs de Pomiers, sieur de Francon & Martin Conseillers, furent fais Commissaires. L'auidité que chascun auoit pour la douceur de ce repos, fit reprendre à chascun le train de sa premiere profession. L'Hostel de Ville fut dechargé de
l'emba-

l'embaras du Conseil de Police. Les Jurats reprindrent avec leur premiere autorité l'exercice de leurs charges. Le sieur de la Roche congédiant ses soldats, abandonna la Charge de Maître de Camp, pour se remettre en celle de Conseiller. Les sieurs d'Espagnet & de Bordas se deschargerent aussi de la garde du Chasteau du Ha. Et pour ce que le Duc d'Espernon, qui auoit l'oreille des Ministres fauorable, prenoit ses aduantages en Cour, il fut resolu que ceux qui auoient esté deputez vers le Roy, pour justifier les actions de Bourdeaux, demander vn autre Gouverneur, & que la Citadelle fut razée, partiroyent promptement, auxquels fut joint le sieur de Monjon, dans le choix duquel on ne se trompa point, ayant depuis tesmoigné avec quelle vigueur il sçauoit soustenir vne si juste cause.

Les principaux points qui furent traittez dans la conference, qui fut tenuë sur l'exécution des articles, furent, que le sieur d'Argenson vouloit que les Bourgeois quittassent entierement les armes, que les gardes de la Ville & du Chasteau du Ha prinsent fin, & qu'on abbatit les barricades. Les Commissaires au contraire representoient qu'il n'estoit pas iuste que l'on desarmast ceux, qui n'estoient que sur la deffence, pendant que leur ennemy, nauoit pas seulement les armes à la main; mais encore qu'il les tenoit enuironnez de gens de guerre; qu'il auoit aitaillé contr'eux vne garnison dans la Ville, & esleuoit à Libourne vne Citadele à leur ruyne, & à l'oppression de tout le plat pays, dont le traual deuoit estre arresté depuis la paix concludë, iusques à ce qu'il eust pleu au Roy de pouruoir sur son entiere de-

molition. Ces contestations furent enfin résolues avec ce temperament; qu'il fut arresté que les gardes de la Ville seroient continuées iusques aprez l'entiere execution de la paix, que les barricades, qui estoient au deuant du Chasteau Trompette du costé de la Ville, seroient ouvertes, pour donner passage à ceux de la garnison, afin d'aller dans la Ville achepter avec liberté les choses qui leur seroient necessaires. Et pour ce que le sieur d'Argenson ne pouvoit point aller à Libourne donner les ordres, sans auoir prins ceux de Monsieur d'Espèrnon, il fut trouvé bon qu'il iroit à Cadillac, conférer avec le Duc sur la promesse qu'on fit, que sur le point qu'on receuroit assurance de son depart de Cadillac pour Libourne, le Chasteau du Ha seroit remis entre les mains du Concierge, que le Marquis de Roquelau-re y tient. Bien tost apres que le sieur d'Argenson fust parti de Bourdeaux, on receut nouvelles que le Duc d'Espèrnon auoit fait porter par eau des canons à Libourne: cela excita de la rumeur, qui fut arrestée par vn exprez qu'on enuoya au sieur d'Argenson pour luy faire cette plainte, & l'obliger d'aller promptement à Libourne, à quoy il fit responce par vne Lettre, qui réduë au premier President, luy donna sujet d'assembler les Chambres extraordinairement, où il fut deliberé que le sieur de Cursol Conseiller, accompagné du sieur Constant Aduocat, député de la Bourgeoisie, iroiēt le lendemain à Libourne, faire procez verbal de l'Estat de la Citadelle, & moyenner avec le sieur d'Argenson l'entiere execution du traité; deliberation qui demeura sans effet, par l'opposition que formerent les Bourgeois

au depart de ses deputez, sur l'aduis certain que l'on auoit receu, que tout se preparoit par l'ordre du Duc d'Espernon à leur faire piece, à laquelle ils ne vouloiēt pas hazarder ny leurs personnes, qu'ils auoient en consideration, ny l'honneur de leur Commission, dans lequel ils estoient interessez.

CEPENDANT. que le Parlement & la Bourgeoisie estudioient des moyens pour affermir cette paix, qu'on voyoit desia chancelante, le sieur d'Argenson, intelligent avec le Duc, pratiquoit au contraire par dessous main, tous les moyens possibles à la ruiner. Il s'estoit obligé par les articles, d'arrester le trauail de cette Citadele; le Duc d'Espernon le vouloit acheuer, & le sieur d'Argenson ne luy vouloit pas deplaire. Il persuada pour cet effet aux habitans de Libourne, que leur repos consistoit en l'acheuement de ce reduit, pource que s'il estoit vne fois parfait, il logeroit les soldats qui estoient espars dans leurs maisons, & se deschargeroiēt des insolences que cōmettoient ces libertins dans leurs familles. En sorte que les ayant obligez de presenter Requête pardeuant luy, pour demander la mesme chose, & l'ayant faite appuyer par vne autre, qui fut présentée par les fermiers du Conuoy, par laquelle ils exposoiēt que ce grand nombre de soldats, qui occupoient toute vne Ville, ostoient la liberté du commerce, les Marchands n'osant l'aborder pour y porter des Marchandises, d'où les droits du Roy estoient diminuez, il bailla son Ordonnance, par laquelle il estoit enjoint d'acheuer le reduit, & le couvrir afin d'y loger les soldats, pour le soulagement des habitans, & pour le bien des affai-

res du Roy, & taxa par mesme moyen les habitans de Libourne, & ceux des Parroisses voisines, pour le payement de leur subsistance, à la faueur de laquelle Ordonnance, les soldats de cette garnison couroient à main armée iusques aux portes de Bourdeaux, pour la leuée des deniers imposez, & desoloient sous ce pretexte les campagnes voisines. Il ne falloit point estre fort fin pour demesler cette intrigue. L'Aduocat General Dufault, homme entier, & qui ne veut point qu'on traite avec deguifement, ne peut pas dissimuler le mal de cœur qu'il auoit contre cette procedure, estant en conference avec le sieur d'Argenson, & les autres Commissaires, aprez son retour de Libourne, il luy reprocha hautement que cette façon d'agir choquoit le serui-ce du Roy, que ce n'estoit point seruir la commission de laquelle sa Majesté l'auoit honoré, puis que bien estoigné de faire cesser le trauail de la Citadelle, suiuant les articles du traité fait avec luy, il en auoit ordonné la continuation; qu'il auoit souffert qu'on y eust apporté du canon, des mortiers & des bombes, pour la fortifier, & qu'il permettoit qu'on leuast sans commission du Roy, deuëment registrée, contre les termes des anciennes Ordonnances, & de la derniere Declaration du mois d'Octobre, des deniers sur Libourne, & d'autres Parroisses voisines, pour la subsistance de certains gens de guerre, qui au lieu d'estre nourris, deuoient estre congедiez aux termes du traité. Ces raisons puissantes & veritables poussées avec la vigueur naturelle à ce grand personnage, mirent la confusion dans le raisonnement de ce fin entremeteur, qui ne trouua de deffen-

ce que dans les injures contre l'Aduocat General, lequel se contenta, fuiuant la pratique des ames genereuses, de les mespriser, & demander au Parlement d'estre deschargé d'assister à l'aduenir à ces assemblées. Les Commissaires tascherent pour radoucir cela, d'obtenir du sieur d'Argenson la reuocation de cette Ordonnance, il la refuse; on le presse de l'accorder; il demande du temps pour y penser jusques au lendemain: ce qu'on ne voulut luy refuser, mais inutilement, pource qu'on n'en eust qu'une responce fiere; que si cette Ordonnance n'estoit point dans l'ordre, & pour le seruice du Roy, que c'estoit au Parlement à la faire casser, & à luy d'en respondre; qu'il demandoit en outre qu'on luy respondit precisement sur la cessation de la garde de la Ville, l'abbatement des barricades, & le rautaillement du Chasteau du Ha, pour ce qu'il vouloit dresser son verbal; qu'il auoit de plus receu vn paquet du Roy par lequel on blasmoit sa negociation, d'auoir detaché des autres propositions, la reünion du Parlement avec le Duc d'Espéron; qu'il pretendoit reprendre cet article, & y faire deliberer, & qu'on n'obtiendroît jamais la demolition de cette Citadelle, si les Bourgeois ne l'alloient demander au Duc, de la grace duquel seulement on l'a deuoit esperer. Ces discours furent rapportez aux Chambres assemblées par le premier President, qui estoit l'un des Commissaires, sur lesquels la Cour ayant fait reflection, & particulierement sur le respect que l'on doit au caractere & au sceau, qui donnoit l'audace au sieur d'Argenson de parler de la sorte, elle delibera, apres auoir ouï le Procureur General, qu'il se-

roit fait vne assemblée dans l'Hostel de ville, à laquelle on communiqueroit les sentimens du Parlement, qui estoient portez à obeir à toutce qui venoit de la part du Roy. Le President Latrenne, les sieurs Pommiers, sieur de Francon & Sabourin l'aîné Conseillers, & Dufault Aduocat General, furent faits Commissaires pour y assister, & les Jurats mandez pour la conuoquer.

CHAPITRE II.



ES propositions auancées par le sieur d'Argenson, baillerent sujet d'entretien au Parlement aussi-bien qu'à la Bourgeoisie. Pendant qu'on traictoit cette matiere dedans l'Hostel de ville, le Procureur General representoit aux Chambres, qui auoient esté assemblées extraordinairement, Qu'encore que la Cour eust essayé tous les moyens pour coniurer la tempeste, & dissiper les orages que le Duc d'Espéron auoit esleuez dans la Ville & dans la Prouince, tous les efforts auoiēt esté jusqu'à lors inutiles, puisque la Citadele, dont le trauail deuoit estre arresté puis le iour que la paix fut concludë, estoit sur le point d'estre acheuée; que le Duc d'Espéron ne la fortifioit pas seulement par le nombre des soldats qu'il auoit augmenté, mais aussi par des canons, mortiers, bombes & autres munitions de guerre qu'il y auoit enuoyé, contre la disposition du traitté; & adjoustant vne infidelité sur l'autre, & portant le

dernier coup de la desolation sur la campagne, il leuoit à main armée & avec impunité, la subsistance pour l'entretien de cette garnison : ce qui l'obligeoit pour l'interest de sa Charge de reclamer l'autorité de la Cour, pour arrester l'oppression que souffroient iniustement les sujets de sa Majesté. Surquoy la Cour, apres vne meure deliberation, arresta que tres-humbles remonstrances seroient faites au Roy par les deputez, & ceux des autres corps de la Ville, sur les infractions des paroles données, & des articles signez ; ensemble sur l'entiere demolition de la Citadele. Cependant deffences furent faites à toute sorte de personnes d'en continuer le trauail, à toutes les Communautéz d'y enuoyer des hommes, materiaux ou argent, à peine d'estre procedé extraordinairement contre le Scindic & autres, qui agiroient au nom des Communautéz, & à toutes personnes de decerner ou executer aucunes contrainctes pour raison de ce. Et en ce qui regarde les impositions & leuées ordonnées, & faites del'autorité du sieur Duc d'Espernon à main armée, au prejudice de la Declaration du mois d'Octobre dernier, la Cour declara qu'il auoit encouru les peines portées par l'ordonnance de Blois, article 275. luy faisant deffences, & à toutes sortes de personnes de faire aucunes impositions, que conformement audit article, ny de leuées à main armée, aux peines portées par les Ordonnances.

L'ASSEMBLEE qui auoit esté resoluë pour l'Hostel de ville, fut remise à vn autre iour, non seulement, pour ce que le nombre des principaux Bourgeois estoit defectueux, & que ceux qui s'y estoient trouvez, auoient

jugé à propos d'appeller les autres Compagnies, mais aussi pour ce que beaucoup d'artisans s'y estoient rendus, qui demandoiét d'estre receus à dire leur aduis, sur cette affaire si importante & publique: ce qui donna sujet aux Commissaires de consulter le premier President sur cette nouvelle forme, lequel ayant esté rencontré en sa maison avec beaucoup d'autres Messieurs du Parlement, fut d'avis de remettre cette assemblée non pas au lendemain, à cause qu'estât vn jour de feste, auquel les artisans ne trauaillent pas, la confusion dans leur aduis estoit à craindre; mais bien l'autre iour aprez, & que cependant des Commissaires seroient deputez dans les Parroisses de S. Remy & de S. Michel, où ils conuoqueroient les artisans, pour leur faire entendre le sujet de la deliberation; que l'on ne pretendoit pas les exclure des opinions. Mais pource que la foule de ceux qui s'y trouueroient, pourroit troubler l'ordre d'une assemblée reguliere, il falloit, pour aller au deuant de ces inconueniens, que chascun mestier enuoyast son aduis par deux de ses Bayles. Le menu peuple, qui ne s'attache point aux formes d'une deliberation reglée, se porta par vne façon d'agir, qui part d'une abondance de cœur sans faste & sans feintise, à esleuer sa voix dans l'assemblée, qui fut faite dans l'une & l'autre Eglise, & prononcer hautement & avec tumulte, qu'il n'entendoit point qu'on remit le Chasteau du Ha, qu'il prenoit comme le seul bouclier de sa liberté dans la Ville, ny qu'on fit cesser les gardes, ou que les barricades fussent abbatuës, qu'on n'eust entierement executé le traité de la paix, & en consequence, desmoly ce qui auoit esté

esté adjousté à la Citadele , depuis que les articles auoient esté arrestez , desirant pour cet effet que le sieur d'Argenson baillast vne Ordonnance, qui reuoquast la premiere , & qui enjoignist le retablissement de ce reduit , à l'estat qu'il estoit le quatriesme de ce mesme mois de May, auquel iour tous les ordres de la Ville auoient souscrit d'un consentement general , à l'exécution des articles , protestant qu'en cas que le Commâdant de Libourne ne voulust point defferer à cette Ordonnance , qu'il presteroit main forte , & sous la permission de la Cour, iroit en personne la faire executer.

CETTE genereuse resolution , plustost inspirée que concertée , auoit beaucoup de justice. Le premier President & les autres Commissaires, qui en apprehendoient la suite , allerent chez le sieur d'Argenson , pour le disposer à donner vne Ordonnance contraire à celle qu'il auoit desia rendu , & qui estoit la cause de ce bruit. Le sieur Archeuesque de Bourdeaux , qui n'oublioit pas sans doute d'offrir à Dieu son troupeau dans ses sacrifices , joignit ses prieres aux leurs , & tesmoigna d'auoir du zele pour l'accomplissement de cette paix. Mais le sieur d'Argenson , qui le iour auparauant , effrayé de ce tumulte , & des discours que luy auoit tenu vne persône zelée , auoit quitté le logis qu'il auoit prins , depuis la venuë de l'Archeuesque , pour se retirer dans le Chasteau du Ha , qui estoit gardé par des troupes Bourgeoises , n'osant tesmoigner en public ny la mauuaise volonté qu'il auoit pour les habitans, ny la frayeur qui l'auoit saisi , cherchoit vn pretexte pour eschaper ; & pour cet effet , il representa à tous ces Messieurs , que

l'Ordonnance qu'il donneroit seroit inutile, s'il n'alloit sur les lieux la faire executer. On adjousta les supplications aux prieres. On tascha de luy faire comprendre l'importance de ce coup critique, pour le repos de la Guienne & le seruice du Roy. Le Parlement & la Bourgeoisie se rendent garands de sa vie & de sa personne. Toutes ces remonstrances furent sans effet, persistant à vouloir aller à Libourne, pour faire abbatre ce qui esleuoit vn si gros nuage. On jugeoit bien que ce n'estoit qu'vne deffaite; mais comme il falloit voir la fin de cette affaire, il fallut acheuer l'assemblée, qui auoit esté commencée dans l'Hostel de ville, où les corps & les Bayles des mestiers s'estoient rendus avec le reste de la Bourgeoisie, qui resolurent d'vne commune voix, d'exécuter entierement le traité de la paix, de quitter les armes, rendre le Chasteau du Ha, & rompre les barricades, pourueu qu'on demolist ce qui auoit esté basti en la Citadelle; depuis le quatriesme de ce mois, au prejudice de la foy des articles; en conséquence de quoy le sieur d'Argenson seroit prié de bailler vne Ordonnance, qui reuoquast celle qui auoit permis ce trauail. Le Parlement ayant esté assuré de cette deliberation, par le rapport de ses Commissaires, ordonna que les mesmes Commissaires iroient trouver le sieur d'Argenson, pour l'obliger à bailler cette Ordonnance, & que le President Latrenne iroit prier le sieur Archeuesque de se joindre à eux, & faire effort à l'obtenir, par le pouuoir qu'on croioit qu'il eust sur son esprit.

La jalousie que donnoit l'esleuement de cette Citadelle au peuple de Bourdeaux; la passion qu'il auoit

de la voir abbatuë , & le refus que faisoit le sieur d'Argenson d'en fournir l'Ordonnance , aigrissoit tellement les esprits , qu'il les resolut à prendre les armës , pour les porter au delà de leurs murailles , & de persecuter le Marquis de Chambaret de se mettre à leur teste , lequel pour ne passer pas pour vn Tribun du peuple , & ne s'exposer point au reproche qu'on luy eust possible fait , d'auoir esté trop complaisant au caprice d'vne foule tumultueuse , voyant d'ailleurs que dans la chaleur de ces esprits , il y auoit de quoy craindre pour la seureté de beaucoup de personnes , qui auoient donné sujet à la pluspart de la Ville , d'auoir quelque deffiance pour leur procedé , que dès le soir auparauant le premier President , contre lequel on auoit du soupçon , auoit esté menacé l'espée & le pistolet à la main , sortant des Chambres assemblées , aprez auoir monté en carrosse , entra au Parlement , & ayant prins sa place accoustumée , il representa qu'il y estoit venu pour asseurer la Cour du sensible desplaisir qu'il auoit , de n'auoir peu respondre à la dignité de l'employ qu'elle luy auoit donné ; qu'il voyoit les affections de la Ville grandemēt partagées , vn peuple extremement irrité & qui s'emportoit ; & enfin sujet d'apprehension par tout ; qu'il estoit bien asseuré , qu'encore qu'il eust esté aussi esgalement porté d'inclination pour la paix , qu'il l'auoit esté pour la guerre , il n'y auoit point pourtant de seureté pour luy dans la France , si bien qu'il estoit contraint de l'aller chercher hors du Royaume , & de s'y retirer , demandant pour cet effet la permission de la Cour. Ce discours la surprit ; toutefois le President Latrenne ,

toufiours efgal , luy respondit , que la Cour eftant tres fatisfaite des foins qu'il auoit prins pour fa deffence & celle de la Ville , ne pouuoit que le remercier avec de tres grands sentimens de gratitude & de reconnoiffance, quil l'obligeoient à chercher , non feulement des moyès de pouruoir à fa feureté particuliere ; mais auffi à ne fe deftacher point de fes intereffs , qu'il alloit de fon honneur , & du feruice qu'il auoit promis au public , de n'abandonner pas vn trauail qu'il deuoit acheuer ; qu'il falloit qu'il joignift fa prudence avec celle de la Cour , pour l'accompliffement de cette affaire , eftant priué pour cet effet de donner fon aduis fur les rencôtres prefentes. Surquoy le Marquis de Chambaret repartit , qu'il reconnoiffoit que l'on auoit à manier vn peuple qui ne prenoit pas plaifir d'eftre duppé ; qu'il apprehendoit , que fçachant au vray que le reduit de Libourne eftoit acheué ; qu'il auoit esté fortifié de quelque peu d'artillerie , & fa garnifon renforcée du double des foldats , qu'il ne s'eschauffaft , tant il eftoit choqué par l'inexecution de la paix en ce point ; que pour aller au deuant des defordres , il trouuoit à propos de remettre le Conseil de Police , avec vne plus grande authorité qu'il n'auoit auparauant , & d'affembler les Capitaines des Compagnies Bourgeoifes , & les faire mettre fous les armes , afin d'arrefter par ce moyen la fougue de ce peuple , faignant de donner quelque fatisfaction à fon humeur. Cet aduis fut fuiui de la deliberatiõ de la Cour , qui portoit que le Conseil de Police feroit reftably , auquel les derniers Commiffaires feruiroient ; que les Capitaines feroient assemblez , & les Bourgeois comman-

dez de se mettre sous les armes. Et de crainte que le sieur d'Argenson ne s'effrayast au bruit de cette deliberation, il fut dit que le Procureur General luy fairoit entendre, que celan'auoit esté fait que par precaution, & pour empescher de plus grands desordres.

LE fondement de toutes ces rumeurs estoit, & à vray dire, du desespoir auquel les Bourdelois estoient portez; de ce que depuis que ce reduit auoit esté acheué, on ne voyoit que volleries & bringandages, commis par les soldats de cette garnison; les Messagers volez, les biens des Bourgeois rauagez, les paysans massacrez, les passages de l'Isle & Dordogne fermez. Toutes ces violences pratiquées aprez le traité de la paix, animoient tellement les habitans, qu'ils ne peurent se persuader que l'on peust arrester ces desolations, qu'en arrestant la source, & destruisant le reduit d'où elles sortoient en foule & avec impetuosité. Le sieur d'Argenson, fleschi plustost par la sollicitation de ses amis, que par l'interest du repos de la Prouince, ou par la compassion de ces miseres, bailla vne Ordonnance de cette teneur.

IL est ordonné par de bonnes & fortes considerations, que le traual de la Citadele & reduit de Libourne cessera entierement, mesmes celuy du costé de la Ville, que nous auions seulement permis, pour mettre & retirer dans ledit reduit, les soldats, & descharger les habitans de Libourne du logement d'iceux, suivant nostre Ordonnance du 10. du pre-

sent mois, que nous auons reuoqué, & sera demoly incontinent & sans delay, ce qui a esté fait depuis le 4. dudit mois. Fait à Bourdeaux le 14. iour du mois de May 1649.

Signé, ARGENSON.

CETTE Ordonnance quoy que portée à Libourne, & monstrée par le fils du sieur d'Argenson à Martinet, qui y commandoit, fut sans effet, luy ayant respondu, qu'il ne reconnoissoit d'autres ordres que ceux qui luy venoient de la part de Monsieur d'Espéron, Il fait sçauoir ce refus au premier President, qui enuoya sa Lettre au Parlement par le sieur de Maran Conseiller. Le peuple n'en fut pas aduertí, qu'il anima sa premiere resolution, de faire executer l'Ordonnance du sieur d'Argenson, estimant qu'il y auoit justice, puis que c'estoit l'Ordonnance du Commissaire qu'il auoit enuoyé. Cette affaire estoit de poids, & meritoit vn grand concert. Les Chambres delibererent de s'assembler. On resolut de mander le premier President qui deffailloit. Le sieur de Montesquieux Conseiller, son gendre, l'excusa sur quelque infirmité. Le Parlement enuoya les sieurs de Bordes, Alesme & Andraut Conseillers, pour le prier d'entrer, & luy faire entendre l'importance de la deliberation; on le trouua dans le lit, & s'excusa sur le danger qu'il y auoit de s'exposer au vent, ayant prins vn remede pour se purger. Le peuple pressoit le Marquis de Chambaret pour les mener à Libourne, le Marquis

ny vouloit point aller sans Arrest; le peuple le va demander; le Parlement deliberoit s'il le falloit donner; les vns vouloient remettre l'assemblée au lendemain, pour appeller en part le premier President; les autres, & la pluspart jugerent ce retardement prejudiciable au salut public. Et enfin il fut rendu l'Arrest qui suit.

SUR ce qui a esté representé à la Cour; Que le sieur d'Argenson ayant esté enuoyé par le Roy en cette Ville & Prouince, pour pacifier les mouvemens qui y estoient; & que pour y paruenir il auoit esté dressé des articles, qui ont esté accordez & signez par le sieur d'Argenson, en qualité de Commissaire du Roy, par les Commissaires de la Cour, & les deputez des ordres de la Ville, sous la foy desquels ladite Cour auroit de sa part executé les ordres, qui luy ont esté portez de la part de sa Majesté, & neantmoins le sieur Duc d'Esperron a enfraint ledit traicté en plusieurs points, & mesmes en ce, qu'au prejudice d'un desdits articles, qui regarde la Citadele de Libourne, & qui porte que le trauail cessera du iour dudit traicté, & que ladite Citadele demeurera en l'estat qu'elle estoit lors, il a fait porter dans icelle des canons, mortiers, bombes & autres munitions de guerre, & fait continuer incessamment les bastimens d'icelle, avec telle diligence, qu'il a aug-

menté les manœuvres qui y traouillent, mesmes les jours des festes solempnelles, iusques au nombre de trois ou quatre cens, fait en suite des impositions dans la pluspart de l'estendue du ressort de la Cour, & aux environs de la presente Ville, lesquelles il fait leuer à main armée, pour la subsistance des gens de guerre, qui sont dans la Citadele, dont il a accreu le nombre depuis ledit traicté: ce qui cause grand trouble dans la Ville & dans la Prouince, au prejudice du bien du seruice du Roy & de l'Estat, pour lequel esuiter, la Cour par sa prudence, auroit enuoyé ses Commissaires vers le sieur d'Argenson, par ce que le fondement de ladite infraction, se prend d'une Ordonnance qu'il a donnée depuis ledit traicté, portant permission de continuer ledit bastiment de ladite Citadele, luy requerir qu'il luy pleust y pouruoir, & reparer ladite infraction, selon le pouuoir qu'il en a du Roy. Surquoy ledit sieur d'Argenson, le 14. de ce mois, auroit donné son Ordonnance, par laquelle, en consequence dudit traicté, il auroit ordonné que ledit travail cesseroit, & que ladite Citadele seroit remise au mesme estat qu'elle estoit le 4. de ce mois. A ces fins que ce qui auoit esté basti depuis seroit demoly; pour l'exécution de laquelle Ordonnance, le sieur d'Argenson auroit enuoyé son fils en ladite ville de Libourne, lequel ayant fait voir ladite Ordonnance au nommé Martinet, qui y commande, & en vertu d'elle

celle, luy ayant commandé d'obeyr aux ordres du Roy, ledit Martinet en auroit fait refus, & respondu qu'il ne reconnoissoit aucun ordre, que ceux de Monsieur d'Espernon, ainsi qu'il appert par la Lettre escrete par ledit sieur d'Argenson fils, du 15. du present mois; en sorte que ledit travail continue encore à present, & que d'ailleurs les garnisons des maisons particulieres, occupées par ledit sieur d'Espernon, & environs de cette Ville, sont redoublées, & les troupes sont encore dans la distance accordée. Ouy sur ce le Procureur General du Roy, LA COVR, les Chambres assemblées, a ordonné & ordonne, que conformement à la volonté du Roy, ledit traicté sera executé suivant sa forme & teneur. A ces fins, que sous le bon plaisir de sa Majesté, les forces qui seront jugées necessaires par le sieur Marquis de Chambaret, seront par luy employées pour l'execution d'iceluy, pour le bien du service du Roy. Enjoint à tous Capitaines & Officiers de le suivre, & obeyr aux ordres qu'ils recevront de sa part.

A mesmes que cet Arrest fut resolu de la sorte, il fut aussi arresté qu'il seroit mis en forme, entre les mains du Marquis de Chambaret, pour en estre non seulement l'executeur, mais aussi le depositaire, qui se sentant obligé par la confiance de ce gage, & par le choix qu'on avoit fait de luy, pour estre le Ministre de son

execution, entra le lendemain à la Cour, & s'estant assis en sa place ordinaire, la remercia de l'honneur qu'elle luy auoit fait, de luy auoir enuoyé cet Arrest par le Greffier, que reconnoissant qu'il estoit obligé de prendre congé d'elle, il protestoit qu'il n'auoit goutte de sang, qu'il ne desirast avec passion sacrifier à son seruice, & à l'execution de ses Arrests; qu'il n'auoit qu'un fils, lequel estoit à la porte de la Chambre, qu'il desauoüoit pour sien, s'il n'estoit entierement à la Cour, declarant qu'il le luy consacroit, par le pouvoir que la nature luy donnoit sur luy; que ce n'estoit pas assez de faire vne entreprise de cette importance, si l'on ne pouruoyoit à tout ce qui estoit necessaire pour la faire reussir, suppliant la Cour de vouloir donner les ordres qu'elle jugeroit à propos. Il fut remercié par le President Dasis de la part de la Cour, des soins qu'il prenoit pour ses interets & pour ceux du public, & assuré qu'elle delibereroit sur le reste.

CHAPITRE III.



N dispoit tous les preparatifs necessaires pour cette expedition. Le Marquis de Châbaret donnoit ses ordres. Il s'y trouuoit plus de volontaires que de soldoyez; chacun inuitoit son compagnon à cette occasion d'honneur; il ne restoit autre chose, sinon que le Parlement mist la derniere main, & interposast son au-

thorité à cette disposition. Le Marquis de Chambaret alla au Palais, pour dire à la Cour qu'il ne croyoit pas auoir l'honneur de l'entretenir de ce iour, pour ce qu'il auoit pensé à sortir dès le iour precedent; mais qu'ayât fait la reueuë de son armée, il auoit trouvé qu'il n'auoit que quelque Infanterie qu'il estimoit fort bonne, vne seule compagnie de Caualerie, & grand nombre de volontaires; mais qu'il apprehendoit que ces volontaires estans presque tous Bourgeois, non encore aguerris, & esleuez dans la mollesse d'une Ville delicieuse, ne fussent dans peu de temps lassez par la fatigue, & qu'ainsi il falloit penser à faire vn fonds pour leuer des troupes en cas de besoin; qu'on luy auoit fait pressentir, que le sieur d'Argenson vouloit sortir de la Ville, & qu'il demandoit sa protection, craignant ne pouoir pas s'en aller en assurance, surquoy il attendoit les ordres de la Cour. Elle se trouua en peine de deliberer; pas vn des Presidens n'estoit entré; ils furent tous mandez, mais demesme que les maux de la teste se font sentir à tous les membres, la maladie du premier President, communiquée aux autres, les retint dans leurs chambres par de pareilles infirmités. Cependant le sieur de Suduiraut Conseiller, rapporta en absence des autres Commissaires, qu'il auoit esté le iour auparauant sur le soir avec eux dans le Chasteau du Ha, pour conferer avec le sieur d'Argenson sur l'estat des affaires, duquel ils auoient appris, qu'il auoit escrit en Cour la verité des choses; qu'il auoit assuré les Ministres, qu'il auoit prins son logement dans le Chasteau du Ha; que comme vn lieu d'assurance, à laquelle le Parlement auoit trauaillé

auec soin, pour le seruice du Roy; qu'il auoit receu des ordres nouveaux de sa Majesté, pour obliger Monsieur d'Espernon à l'obeyssance, pour la demolition de la Citadelle de Libourne; mais qu'estant enfermé, il ne pouvoit seruir le Roy ny le public comme il desireroit; que combien que son fils fust proche de la personne de Monsieur d'Espernon, il n'auoit ny le pouuoir ny l'autorité en main, pour le porter à l'obeyssance; qu'il estoit à craindre que quelque personne mal intentionnée n'escriuist en Cour qu'il estoit retenu prisonnier, encore qu'il sceust le contraire, & qu'il se sentist obligé aux soins que la Cour auoit prins pour sa conseruation. Surquoy le sieur de Suduiraut croyoit estre important, que la Cour voulust deliberer. On manda tous Messieurs sur l'heure pour entrer. Les moins intelligens connoissoient la ruse du sieur d'Argenson, & voyans que l'aduaçe qu'il faisoit de ses ordres nouveaux, n'estoit qu'un pretexte pour eschapper à l'exécution du traicté; neantmoins comme c'estoit l'homme du Roy, on dissimuloit toutes ces connoissances, & le peuple aussi-bien que le Parlement, adoroit à trauers tous ces artifices, ce tres-auguste nom du Roy, dont il estoit l'image. Si bien que pour ne luy refuser pas la sortie qu'il demandoit, les Commissaires furent chargez de l'asseurer qu'il pouvoit s'en aller à l'heure qu'il voudroit. Le sieur de Chambaret fut mandé de luy bailler toutes les assurances, les Capitaines de la Ville commandez de s'aller offrir à luy, pour luy rendre sa sortie autant aisée qu'il l'a pouvoit souhaiter. Des Galioles furent apprestées pour le porter à Cadillac; on les garnist de soldats, pour empes-

pescher que les paysans ne luy fissent du mal sur les bords de la Garonne. Enfin on se mit en estat de luy donner la satisfaction aussi aduantageuse qu'il la pouvoit attendre, Et pour ce qu'il iugeoit qu'on lisoit sa pensée, & que sa retraitte ne passoit que pour vn faux-fuyât, il bailla vne Declaration pour tromper le monde, pensant le detromper, de laquelle c'est la teneur.

NOUS Rene de Voyer sieur d'Argenson, Conseiller du Roy ordinaire en son Conseil d'Estat, Commissaire deputé par sa Majeste pour faire cesser les troubles de Guyenne, & de la Ville de Bourdeaux, ayant esté aduerti, que nostre ordre, donné pour la sursoiance du travail du redut de Libourne, & de la demolition de ce qui a esté fait depuis le 4. du present mois n'a point esté executé, nous parlons presentement de la Ville de Bourdeaux, pour procurer l'execution d'iceluy, suivant les volonteZ du Roy, que nous auons receu depuis peu de iours plus particulieres. & pour faire executer toutes les autres clauses de nostre premier ordre, fait pour pacifier lesdits troubles de ladite Ville & Prouince, attendu que les habitans de ladite ville de Bourdeaux, nous ont tesmoigné qu'ils estoient prêts d'obeyr de leur part aux volôteZ de leurs Majestez, & protesté n'auoir autre intention que leur seruice. Fait a Bourdeaux ce 18. iour du mois de May 1649.

Signé, A R G E N S O N.

LE lendemain du depart du sieur d'Argenson, la Cour s'estant assemblée, le premier President remonstra, que quel visage qu'eussent les affaires dans leur succez, il estoit important de recourir au Roy, & qu'il falloit presser le voyage des deputez, d'où quelques vns de ses amis, bien informez de sa pensée, prenans occasion de représenter, qu'il auoit esté proposé de mettre le premier President à la teste de cette deputation, remirent sur le Bureau cette proposition, & demanderent qu'il y fust delibéré. Les autres soupçonnerent que ce fut vne adresse pour faire vne retraite honorable, & d'autres estimerent qu'il eust plus d'affection pour les affaires d'en haut, que pour celles de son pays & de sa Compagnie. Mais presque tous se porterent d'une voix dans le sentiment general, qu'il seroit député. Pour ne donner pas connoissance qu'il affectast cette Commission, il s'excusa sur ce, qu'estant vne personne necessaire au seruice du Roy, il ne pouoit quitter son poste, sans vne expresse permission de sa Majesté. Il fut neantmoins nommé pour aller au Roy, avec les deputez desia nommez, faire les remonstrances de la Cour, & luy fut ordonné qu'il enuoyeroit demander son congé, & que cependant le President Gourgues partiroit avec les autres. Les troupes commençoient à sortir de Bourdeaux. On prenoit de chasque Compagnie Bourgeoise tel nombre de soldats qu'on iugeoit necessaire pour fortifier l'armée. La plupart des Bourgeois fournissoit des hommes ou argent pour la subsistance. L'armée nauale se dispoisoit aussi d'aller fauoriser du costé de Dordogne l'attaque de la terre. Les vns en esperoient beaucoup,

les autres preuoyoit dans cette confusion vn sinistre succez, & les plus clairs-voyans, bien instruits du grád nombre de traistres, qui estoient dans la Ville, & de ceux qui tenoient des premieres places dans l'armée, marquez de ce mesme soupçon, apprehendoient que ce réduit, que les Bourdelois consideroient comme le Theatre de la gloire, ne fust celuy de la honte de leurs armes. La terreur dont la brutalité de la garnison de Libourne auoit frappé l'esprit des Parroisses voisines, empeschoit la jonction de leurs armes à celles des Parlementaires. Mais la qualité de Prince que le Duc d'Espernon prenoit dans ses Ordonnances, dont il se faisoit chatoüiller par les Requestes que l'on luy presentoit, seruoit de deffences aux vns de choquer son party, & de commandemens aux autres pour le suiure. Le Parlement ne pouuoit plus souffrir ce nouveau tiltre, qui faisoit tant d'esclat. L'Aduocat General Dufault, porté de zele pour la dignité de l'Estat, & la conseruation de l'autorité du Parlement, requit la radiation de cette qualité, avec vn discours sçauant & vigoureux au dessus de son aage, sur lequel fut rendu l'Arrest qui suit.

L O V T S par la grace de Dieu Roy de France & de Nauarre, à tous presens & à venir. Sçauoir faisons, que sur ce qui a esté representé à nostre Cour de Parlement de Bourdeaux, par Dufault, pour nostre Procu-

reur General en nostredite Cour, present, Qu'ils ont esté aduertis depuis peu de deux Ordonnances, faites & données à Cadillac, les huittiesme & dix-neufiesme d'Auril dernier, par le sieur Duc d'Espéron, Imprimées audit lieu de Cadillac, par la premiere desquelles il a cassé l'Arrest de nostre Cour, du cinquiesme Auril dernier; & par la seconde du dix-neufiesme dudit mois d'Auril, il passe plus avant, & casse les Arrests de decrets donnez par nostredite Cour, contre certains particuliers, qui ont mené & conduit les troupes des gens de guerre dans les Parroisses d'entre deux mers, & de Vayres, pour les faire piller, voller & razer les maisons desdites Parroisses, & des habitans d'icelles, & brusler les Eglises; & defend à tous Huisiers, Sergens & Archers, Imprimeurs, Courriers, Messagers & autres, de signifier, debiter, publier & exposer en vente, ny Imprimer lesdits Arrests & decrets, ny defferer à iceux, à peine d'estre pendus & estranglez, leurs maisons bruslées & leurs biens confisqueZ, & vze de plusieurs diffamations injurieuses contre nostre Parlement; & pour cuider rendre les exactions & impositions qu'il fait induement sur nos Sujets, habitans de cette Prouince, plus autorisées parmy le peuple, & plus formidables aux Officiers de nostre justice, il a prins & usurpé depuis quelque temps, la qualité de tres-haut & tres-puissant

Prince

Prince & d'Altesse, dans les Requestes qu'il a fait presenter deuant luy, par les Scindics des Villes & Communautēz, & par quelques particuliers, & dans les procurations & contractz qu'il fait, & par autres actes de justice, mesmes par celuy de la conuoquation de la Noblesse aux Estats generaux de France, qui fut faite en Fevrier dernier, par le Lieutenant general au Siege de Guyenne, qui sont des qualitez qu'il usurpe & s'attribue sans aucun droit, & sans qu'aucun de ses predecesseurs les ayt voulu prēdre par leurs contractz de mariage, enregistrez au Greffe du Parl. telles qualitez estans deües aux seuls Princes du sang & de la maison Royale, & non à ceux, auxquels le sort & droit de leur naissāce, ny la possession d'aucune terre en justice, ne peut attribuer cette qualite de tres-haut & tres-puissāt Prince; ce qui est peu ou point suportable en la personne d'un Gouverneur, qui par les Ordōnances du Roy, & particulierement par celles de Blois art. 274. n'a droit ny pouvoir de s'entremettre aucunemēt du fait de la justice, & n'a pouvoir que de prester ayde & secours de force militaire, pour l'execution des Arrests & iugemēs dōnēs par nos Parl. & de tenir le pays à luy cōmis en seurete, & le garder de pillerie. Ce sōt les mots de lad. Ordonnance: ce que tant s'en faut qu'il ayt pratiqué; qu'aucōtraire il a fait ravager & ruynier tout ce pais, en telle sorte, que de dix ans il ne sçauroit payer les

tailles deüies au Roy, & apres toutes ces Usurpatiōs
& ètreprises, led. sieur d'Espernōne s'est pas arresté
là, car il a fait forger & fabriquer de la monoye d'ar-
gent, sous le coin de son effigie d'un costé, & de ses ar-
mes d'autre costé, avec les lettres de son nom & de ses
qualitez, & de celle de Prince de Buch, dans le cor-
don de lad. monoye faite au moulinet, avec le diferāt
du Maistre de la monoye de la presente Ville, & de
l'aloy des quarts des Louys d'argent, qui est un crime
de leze M. au secōd chef; lequel ne peut estre excu-
sé ny pallié sous aucū specieux pretexte quel qu'il soit
que l'on puisse alleguer; d'autant qu'il n'y a que nous
seuls priuatiuement à nos Barons, qui ayons droit de
faire mettre nostre effigie & escusson de nos armes, a-
vec nostre nom dans le cordon, au tour de nostre mo-
noye: cela estant prohibé à tous autres Seigneurs &
Gentils-hōmes de nostre Royaume, à peine de confis-
cation de corps & de biēs, par les art. 1. 2. 3. & 4. de
l'Ord. ancienne de Philippes III. de l'an 1273. &
toute monoye qui est autrement fabriquée, sous le
coing d'autre Seigneur que de nous, est falsifiée, &
cōme telle doit estre cisailée & mise au billon, & les
Mes. de nostre monoye Royale qui les fabriquent,
doiuent estre punis cōme faux monoyeurs. A ces cau-
ses nostred. Pr. G. a requis, qu'il plaise à nostredite
Cour casser lesd. deux Ordonnāces dud. S. d'Esper-
nō, faites & Imprimées à Cadillac led. iour 8. & 19.
Auril dernier, cōme faites sans pouoir, & par pur

attentat & entreprise sur nostre autorité, & sur nostre justice souveraine, & luy estre inhibé de faire desormais telles & semblables Ordonnances. Et neantmoins estre ordonné, que les qualitez de tres-haut & tres-puissant Prince & d'Alieffe, seront rayées & biffées desdites Requestes, actes, proceß verbaux & procurations, & inhibé à tous Scindics des Villes & Communautez, & à tous Officiers & Juges, Greffiers, Nottaires & Sergens de la luy bail-ler, & à luy de la prendre & accepter, le tout à peine de trente mil liures d'amende, & contre lesdits Officiers, Notaires, Sergens & Scindics desdites Villes & Communautex, à peine de suspension de leurs Charges. Et en ce qui concerne la fabrication de ladite monoye, estre ordonné des Commissaires par nostredite Cour, pour visiter l'Hostel de la monoye de cette Ville, & les coings de celle qui a esté fabriquée sous son effigie & armes, avec ledit nom & qualitez, s'il s'en trouve aucuns, estre saisis, pour estre rompus & brisez, & estre decreté prinse de corps contre ledit Maistre de la monoye, pour respondre aux fins & conclusions que nostredit Procureur General entend contre luy prendre, & que nous serons tres-humblement suppliez d'agréer & confirmer l'Arrest qui interviendra, pour le bien de nostre service. Et ven par nostredite Cour lesdites deux pretendues Ordonnances, lesdits iours huictiesme & dix-neufiesme dudit mois d'Auril,

imprimées à Cadillac, & signées de Simony, & deux Requestes présentées audit Duc d'Espernon, l'une par le Scindic de la Ville & Viconté de Marsan, contenant son Ordonnance au pied desdites requestes, dattées à Cadillac, le septiesme du present mois de May, & signifiée au Juge de S. Martin, designant le dix-neufiesme dudit mois, par de Larriere-Huissier; l'autre presentee par les Maire & Jurats de la Ville de Libourne, contenant aussi son Ordonnance au pied d'icelle, dattée audit lieu de Cadillac, le vingt & uniesme d'Auril dernier, & autres Ordonnances du vingt-neufiesme Mars aussi dernier, avec l'attache du pretendu Lieutenant General de Libourne y jointe, des vingt-neufiesme & trente & uniesme de Mars, contenant enjoinction aux Parroisses de Marenzin & Born & à celles de Montravel, Saintesfoy & autres Parroisses, de contribuer au payement des taxes qui seront faites sur eux par les Lieutenans Generaux du mōt de Marsan & de Libourne, qu'il a commis pour ce faire; & qu'ils seront contraincts au payement desdites taxes, par logement effectif de gens de guerre, & le procez verbal dudit Lieutenant General au Siege de Guyenne du 26. de Fevrier dernier, contenant la conuoquation de la Noblesse de ladite Senéchaussée ausdits Estats generaux, & lesdites qualitez de tres-haut & puissant Prince, conformement à sa procuration, dattée dans ledit Procez verbal,

du dit iour 26. Fevrier dernier, rapportée estre signée Bernard de Foix de la Valette, & Saubut Nottaire Royal, ledit Procez verbal signé Poulard Gref- fier. Surquoy nostred. Cour, les Chābres d'icelle as- semblées, a Ordonné & Ordōne que nous serons tres- humblement suppliez par les deputeZ d'icelle, de re- primer les ètreprises faites sur nôtre autorité Roya- le, & de nostre justice souveraine, par lesd. Ord. dō- nées par le Duc d'Espernon sans pouvoir, contre nos Edicts & Ord. Royaux, & avec des termes qui n'ap- partiennēt qu'à nôtre M. R. Et neantmoins nôtre d. Cour a cassé & annulé, casse & annule les susd. Or- donnances; desd. iours 8. & 19. Avril dernier; Or- donne qu'elles seront tirées des Registres des Senesc. & Iurisdiccions où elles auront esté enregistrées, & qu'au lieu d'icelles sera mis le presēt Arrest. Enjoint aux Offic. d'y tenir la main, à peine de suspension de leurs Charges, & aux Substituts de nostred. Pr. Ge- neral, d'en faire les diligences, & en certifier nostred. Cour au mois; comme aussi nostredite Cour a cassé & casse les Ordonnāces desdits iours 29. Mars 21. Avril derniers, & 7. du présent mois de May. Fait comme autrefois deffences audit Duc d'Esper- non & tous autres, d'imposer aucunes sommes dans le ressort de nostred. Cour, sans Commission de nous, deüement enregistrée; & à tous nos Sergēs & Sujets, d'exécuter lesd. Ord. ny defférer à icelles. Et faisant

droict des conclusions de nostre Procureur General susdit, nostredite Cour fait inhibitions & deffences à toutes sortes de personnes de quelque cōdition qu'ils soient, de qualifier ledit Duc d'Espernon, dans les Requestes & actes, de tres-haut & tres-puissant Prince, ne luy donner la qualité d'Altesse, & audit Duc d'Espernon de les recevoir, ny de se les attribuer dans les Ordonnances ou autres actes. Et en consequence, ordonne que lesdites qualitez seront biffées & rayées dudit procez verbal, fait sur la cōvoquation des Estats; & qu'à la requeste de nostredit Procureur General, & deuant les Commissaires, qui par nostre Cour seront deputez, il sera informé de l'exposition desdites especes d'argent, & du lieu où elles ont esté fabriquées, pour l'information faite & deuers nostre Cour rapportée, y estre pourueu ainsi que de raison. Et sera le present Arrest publié & affiché par tout où il appartiendra, affin que personne n'en pretende cause d'ignorance. Si donnons en mandement au premier de nos Conseillers en nostredite Cour, trouvé sur les lieux, ou en leur absence, à tous nos Seneschaux du ressort de nostredite Cour, leurs Lieutenans Generaux, ou particuliers, ou premier des Corseillers desdits Sieges, ou de nos Inges Royaux sur ce requis, faire à la diligence du Substitut de nostre Procureur General, publier & enregistrer ledit Arrest, & iceluy ramener à deuë & entiere execution, selon sa forme & teneur. Et enjoignons

aux Substituts de nostredit Procureur General esdits Sieges & Jurisdiccions, de faire pour raison de ce, toutes les diligences & requisitions necessaires, selon le deub de leurs Charges, à peine de suspension d'icelles, & d'en aduertir nostredite Cour au mois; & à nos Huisriers & Sergens de faire sur ce, tous exploits requis & necessaires, sans y faire faute, à mêmes peines de suspension de leurs Charges. Donné à Bourdeaux en nostredit Parlement, les Chambres d'iceluy assemblées, le vingt & uniemes May, l'an de grace mil six cens quarante-neuf, & de nostre regne le septième.

Par Arrest de la Cour,

Signé, DE LAROCHE.

CET Arrest auoit esté conclu & dressé de la sorte, mais le premier President faisoit difficulté de le signer, s'excusant sur ce, qu'ayant esté rendu sur beaucoup de pièces qui auoient esté rapportées par le sieur de Suduiraut, il ne le pouvoit signer, si le Rapporteur ne le signoit aussi. En sorte que cette affaire mise en deliberation, il fut arresté qu'il seroit signé sur l'heure, tant par le premier President, que par le sieur de Suduiraut, cōme Rapporteur, à la place du sieur de Moneins Doyen de la Cour, & qu'il seroit expédié en forme de Commission: ce qui fust executé.

CHAPITRE III.



LES troupes Parlementaires auoient desia passé la riuere, & s'estoient renduës au faux-bourg de la Bastide, lieu de leur assemblée, quand le premier President fit porter au Parlement par le sieur de Primer, quelques despeschés qu'il auoit receu de la part du sieur d'Argenson, par l'une desquelles, il mandoit qu'on ne se deuoit point alarmer pour la marche des troupes Espernonistes; que le Duc ne les auoit fait auancer que par la jalousie que luy auoit donné la nouvelle du passage de celles de Bourdeaux, apprehendant qu'elles ne prissent leur route vers sa maison de Cadillac. Ce n'estoit qu'un effet de sa ruse, pour persuader que le Duc d'Espérnon ne vouloit point s'opposer à la demolition de cette Citadelle, qui faisoit tout le bruit. Il mandoit par l'autre Lettre, qu'il desapprouuoit les Ordonnances qu'il auoit donné, pendant qu'il estoit à Bourdeaux; que ce n'estoit que des expressions de la crainte qu'il y auoit, pendant qu'on le retenoit comme prisonnier dans le Chasteau du Ha, d'où l'on peut iuger qu'elle confiance on deuoit auoir avec une personne qui se dementoit si aisement, & laquelle estoit bien plus puissamment possédée dans Cadillac, qu'elle n'estoit obsédée dans Bourdeaux. Si bien que le Parlement iugeant qu'après toutes ces fourberies, il ne falloit point esperer de

de receuoir des hommes , cette paix , que le monde ne peut pas donner , portans leur pensée dans le Ciel pour la demander à Dieu , il fut arresté qu'il seroit dit chaque année vne Messe haute dans l'Eglise de Camblandes, à laquelle assisteroient fix Commissaires de la Cour. Et cependant , pour faire entendre à tous les peuples , & au reste de la Prouince , qu'on n'auoit pas pensé de choquer l'autorité ny le seruice du Roy , par l'enuoy des troupes à Libourne , que les deputez partiroyent au plustost , pour informer sa Majesté de la justice des motifs ; & qu'à cet effet les Commissaires trauailleroiēt incessamment à dresser les cayers. Il falloit de l'argent , non seulement pour les frais de ce voyage ; mais aussi pour la subsistance de l'armée. Les Cōmissaires auoiēt représenté qu'on voyoit le fonds de leur bourse : il fut donc ordonné qu'on emprunteroit cent mil francs , & que pour cela , Messieurs du Parlement s'obligeroient conjointement avec deux Bourgeois pour la somme de mil liures chascun. Cet Arrest fit peur à beaucoup de Messieurs du Parlement , qui vouloient bien qu'on fit la guerre , mais ne vouloient point bailler d'argent. Ceux qui estoient à la campagne ne songeoient pas au retour ; d'autres qui estoient dans la Ville , pensoient à eschaper. Desorte que pour faire qu'ils fussent tous esgaux , les Chambres assemblées rendirent vn Arrest , par lequel il fut ordonné que les Cōseillers , qui estoient en Ville , seroient mandez par les Huissiers d'entrer chaque iour au Palais ; & qu'il seroit escrit de la part de la Cour à ceux qui estoient absens , de reuenir dans trois iours , pour seruir leurs Charges.

LIBOURNE estant assis de deux costez sur deux rivières, Dordogne & l'Isle, qui se joignent en presence de ses murailles, & regardant la plaine d'une autre part, il fut trouvé à propos de partager les forces Parlementaires, & de faire une armée navale, & une autre par terre. La navale estoit composée de cinq gros Vaisseaux, dont l'Admiral, commandé par le Chevalier Pechon, estoit du port de 350. tonneaux, monté de 22. deux pieces de canon de fer. Le vis-Admiral, que commandoit le sieur de Cazenac de 250. de port, avoit 14. pieces d'artillerie. Lamard, Bourgeois de Bourdeaux, commandoit la fregate nommée la Marie, du port de 140. & montée de 10. pieces. La Marguerite, du port de 120. montée de 6. pieces, estoit commandée par Mouty l'aîné. La Fluste d'Ouelin, du port de 300. monté de 14. pieces, estoit commandée par Mouty le jeune, & ses deux freres, estans Bourgeois. Ces Vaisseaux estoient suivis de trois brulots, & de nombre de Galiottes, destinées pour leur service. Celle de terre consistoit en cent cinquante Chevaux, composez de quelques chevaux legers, commandez par les sieurs de S. Martin de Barez & Lacouture, de dragons, dont Lalande, ayde-Major de la Ville, estoit le Chef, quelques volontaires de Bourdeaux, & les gardes du Marquis de Chambaret. L'Infanterie faisoit quinze cens hommes, dans laquelle estoit le Regiment du Parlement soldoyé, duquel le sieur de la Roche Conseiller, estoit Commandant, ceux de Muscadet, Thibaut, Andraut & Polignat, tous volontaires, commandez par les sieurs de Pichon, Muscadet, Thibaut & Andraut Conseillers au.

Parlement , & Blanc fleur de Polignac , qui laissant son frere la Charge de Procureur Syndic de la Ville ; qu'il auoit long-temps exerceé avec hõneur, voulut témoigner qu'il ne s'estoit pas despoüillé des genereux sentimens qu'il auoit pour sa patrie , & à eux se joignirent dans la marche, quelques soixante volontaires, qui faisoient bande à part , sous la conduite de Lauau , Procureur au Presidial de Guyenne, & des milices de Courtras , qui roulerent sous les ordres du Marquis de Châbaret General de toutes ces troupes.

A P R E S que les Vaisseaux eurent leué leurs ancres , ils allerent passer au deuant & fort proche du Chasteau Trompette , pour le morguer , & mouïllerent au dessus de la ville de Bourg , à cinq lieües de Bourdeaux , où ils firent alte , pour donner loisir à l'armée de terre de s'auancer , & y demeurerent iusques au lendemain matin , que la Marguerite fut commandée de faire l'auantgarde au deuant du Chasteau de Pontac d'Anglade , & de mettre à terre vingt mousquetaires , pour faire autât de peur à Pontac , comme il auoit fait de mal aux environs de Bourdeaux , qui voyant cette troupe venir droit à luy , se renferma dans son Chasteau , d'où il n'osa sortir , pour s'opposer à quelque desordre leger que les soldats luy firent dans vne de ses granges. L'armée de terre cependant partit de la Bastide , & marchant en bataille, arriua sur les quatre heures du soir dans le Bourg de Creon (qui autrefois a porté le nom de Ville) assis à trois lieües de Bourdeaux , où elle campa toute la nuit , aprez s'estre retranchée , & auoir barricadé les ruës , à cause du voisinage des troupes ennemies que

172 D E S M O V V E M E N S ,
le Duc d'Espèrnon tenoit à Cadillac. Le matin auant
descamper, le Marquis de Chambaret fit vn corps pour
seruir d'auant-garde, composé de six vingts mousque-
taires destachez de tous les corps, commandez par les
sieurs de Chenaud Capitaine, Ducornet Lieutenant
Colonel du Regiment de Muscadet, & Dubourdieu,
Major du Regiment du Parlement, & vne compagnie
de Cauallerie du sieur de la Cousture, lesquels ayant
fait rencontre sur leur route de trois Caualiers, qui pas-
soient à l'escart, on en destacha quatre pour aller au de-
uant & les reconnoistre, qui ayans couru sur eux le pi-
stolet à la main, trouverent que c'estoit le fils de Pontac
& deux autres, qui alloient joindre les troupes Esper-
nonistes, lesquels ils menerent au gros de l'auant-gar-
de. Le sieur de Lacouture son parent, Dubourdieu fil-
leul de Pontac le pere, taschoient de le faire sauuer;
mais Chenaud & Ducornet ayant fait auancer leur In-
fanterie, & ouvrant leurs corps à droit & à gauche, en-
fermerent la Caualerie, & rompirent ce dessein, &
fut resolu qu'il seroit conduit au Marquis de Chamba-
ret pour en ordonner, lequel eut beaucoup de peine de
faire trouver bon qu'il fust traitté en prisonnier de guer-
re, & enuoyé dans la Conciergerie du Parlement, tant
le nom & les lasches actions du pere, animoient la cole-
re des soldats, contre la personne du fils.

C E S troupes estans arriuées au Port de Brane, il
fallut du temps pour passer la riuiera. La nuit suruint
auant que tout fust fait; si bien qu'elles demurerent
dans les preries qui sont sur son bord, iusques au iour
suiuant, que la reueuë estant faite, elles prindrent leur

marche droit à Libourne, où elles arriuerent sur les cinq heures du soir. Le Marquis de Châbaret print son quartier dans la maison de Cruseau, sieur de Tirepeau. Les Regimens du Parlement & de Polignac, furent logez au deuant de la Citadelle. Ceux de Muscadet, Thibaut & Andraut, au faux-bourg des fontaines, sur le bord de la riuiera de l'Isle. La nuit s'employa à se retrancher chascun dans son quartier, à dessein d'empescher le secours qu'on y pouuoit ietter. Soudain que le iour parut, le Regiment de Muscadet ouvrit la tranchée du costé des fontaines, avec tant de diligence & d'ardeur, qu'il la poussa jusques à la portée du pistolet des murailles de la Ville, d'où il fut releué par le Regiment de Thibaut, qui y trauilla vigoureusement pendant sa garde. Le Cheualier Pichon ayant eu aduis que ceux de Libourne fortifioient le dehors de la porte de Beguignon, & y faisoient vn trauail avec des barricades, qui pouuoient empescher les approches du costé de l'eau, s'il estoit acheué, commanda Iamard & Mouty l'aîné, d'aller mouïller l'ancre au deuant, & le rompre à coups de canon. Iamard demeura sur les sables à la portée du fauconneau; Mouty, qui auoit mieux prins ses mesures, mouïlla au deuant du trauail à la portée du pistolet; & quoy qu'on le couvrist du feu des mousquetades & des fauconneaux, que l'on tiroit du trauail, de la porte, des tours & de deux courtines, auxquelles il estoit exposé, il s'y comporta avec tant de generosité, qu'aprez trois heures du iour d'un combat opiniastré, & quelque autre heure du lendemain, il les força de quitter le trauail, & se ren-

174 DES MOUVEMENTS,
fermer dans la Ville, sans avoir perdu que six personnes
de son equipage.

CE petit succez donna de grandes esperances. L'Admiral, qui auoit mouillé au deuant la tour Grenouillere, faisoit assiduellement sa descharge. Mais le Cheualier Pichon, qui ne se fioit pas à l'adresse de ses canoniers, pointoit si mal, que ses coups passoient au dessus de la Ville : ce qui forma du soupçon contre luy. Le sieur Cazenac au contraire, n'enuoyoit point de boulets à faux, & estoit si fort ajusté, que tous ses coups estoient connoissables, par la breche qu'ils faisoient. Toutefois on jugea que ce siege seroit de longue haleine, si on n'employoit point d'autre batterie que celle des Vaisseaux ; desforre qu'il fut resolu d'enuoyer chercher trois pieces de fonte à Bourdeaux, que le Marquis de Chambaret auoit voulu faire rouler dans ses troupes quand il partit, lesquelles il ne laissa que par la credulité qu'il eut ; pour les paroles de quelques personnes mal intentionnées, pour lesquelles il auoit du respect, qui luy persuaderent que ce n'estoit qu'un embarras & vne despenche inutile. D'as l'attête de ces canons l'armée s'egayoit, & viuoit dans les libertez ordinaires aux troupes volontaires. Le Marquis de Chambaret ayant peine à se croire le General de quelques vns, qui en d'autres rencontres pouvoient auoir autorité sur luy, se seruoit mollement de son pouvoir. Les Chefs auoient de la retenuë pour les commandemens, & les soldats grande difficulté pour l'obeyssance. Tous songeoient à passer le temps, & fort peu à se garder. Les tentes des Maistres

de Camp , & les huttes des viuandiers , estoient les retranchemens les plus forts ; & la trahison couverte qui estoit dans l'armée , ne demandoit pas vn plus beau jeu à faire son personnage. On a beau auoir du cœur , s'il n'est accompagné de prudence.

LE manquement de preuoyance ne se recomust pas en cela seulement, mais aussi dans la deffillance des munitions de guerre pour les Vaisseaux , lesquels semblent n'auoir esté munitionnez que pour abbatre des murailles de carte. Ils n'eurent pas tiré pendant cinq à six iours , que les boulets manquerent. Ils depescherēt des Galiottes pour en porter de Bourdeaux. Mais ceux qui auoient cette intendance , estoient lents à les enuoyer. Cela donna sujet au Cheualier Pichon & au sieur de Cazenac , d'inuiter leurs matelots pour aller amasser ceux qu'ils auoient tiré contre les murailles de Libourne au prix de cinq sols par piece. Ces gens , qui pour auoir quelquefois gourmandé la mer , croyoient ne deuoir rien plus craindre , s'hazarderent volontiers, n'ayās que leurs espées au costé ; neantmoins ils furent si heureux , qu'ils en amasserent bon nombre sans danger. Mais estans apperceus par quelques Officiers d'Infanterie , & quelques volontaires , qui estoient allez se ressiouer au bord des Vaisseaux , entre lesquels estoient le sieur André Marechal de bataille , la Roche , Camarzac Commandant , & Capitaine du Regiment du Parlement , Pontac , la Salle , Lesparre & Lourtaut , Procureurs au Parlement , & quelques autres volontaires , ils se firent porter à terre , & allant droit à la porte Beguignon , ils pousserent avec vne telle vigueur , l'espée &

le pistolet à la main, qu'ils forcerent la barricade qui estoit au deuant, laquelle fut d'abord abandonnée par ceux de Libourne, ne la pouvans soustenir contre l'effort de ces Lions, & pour auoir esté percée en force endroits par le vis-Admiral. Les Parlementaires croyoient auoir tout fait, gagnant la barricade; ils s'amusoient à renuerser les barricades par terre, quand les sieurs André, la Roche & Camarsac, ayans prins garde qu'il y auoit vne breche qui perçoit dans la Ville, au costé de la porte, que les canons de Cazenac auoient ouverte, voulurent donner dedans l'espée à la main, de laquelle ils furent repoussez, par la foule de ceux de Libourne, qui ayans prins cœur, de ce qu'ils n'auoient pas esté poursuiuis aprez l'abandonnement de la barricade, de laquelle ils s'estoient retirez avec desordre & frayeur, s'estoient ralliez & réforcez, en sorte que ces genereux Officiers eussent perdu la vie dans cette occasion, si Mouty l'aîné n'eust fait promptement débarquer trente mousquetaires pour les soustenir, qui ne vindrent pas assez tost afin de les ayder, pour l'entrée dans la breche, mais qui se trouverent assez à temps pour fauoriser vne retraite honorable, combattant tousiours, & disputant le grauier iusques au bord des Chaloupes, dans lesquelles ils se mirent, pour regagner les Vaisseaux, à trauers le feu dont ils estoient couverts, & la gresle des pierres que les habitans leur ruoient du haut des murailles. Coüor, Lieutenant de Mouty, qui commandoit le secours mourut deux iours aprez, percé d'un coup de mousquet. Roques eust la jambe cassée, Verneüil fut blessé de trois

de trois coups dans le corps , deux soldats , deux matelots & vn Caporal moururent sur la place.

V O I C Y venir les canons de Bourdeaux, qui auoiẽt esté portez par eau dans vn bateau plat. La Roque Marechal de Camp , natif de S. Macaire , eut ordre de les faire monter ; & quoy qu'il semblaſt que la reconnoiſſance que le Parlement luy auoit faite quelques iours auparavant de quatre mil liures , pour le deſdommagement d'une meſchante petite maiſon , qu'il diſoit que le Duc d'Eſpernon luy auoit fait bruſler , le deũt obliger d'y faire trauailler avec affection & aſſiduité , il s'en acquita avec tant de lenteur , qu'il fallut trois iours pour les mettre en eſtat , ce qu'il faiſoit (diſoit-on) à deſſein de donner loĩſir aux troupes Eſpernoniſtes d'auancer leur marche vers Libourne. En eſſet l'euenement le cõuainquit de cette perfidie ; car le vingt-cinquiẽſme de May , ces canons ayans eſté mis en batterie à la pointe du iour , & ayans continuellement fait feu iuſques ſur les neuf heures , que la breche fut reconnuë & iugée raĩſonnable. Sibien que le rapport en ayant eſté fait au Conſeil de guerre , il fut delibéré qu'on prepareroit toutes choſes pour l'aſſaut à vne heure de là. Le Marquis de Chambaret apprit que les Eſpernoniſtes eſtoient dans la terre de Branes , deſquels ils n'eſtoient ſeparez que par la riuĩere ; il en fit donner aduis au Cheualier Pichon , qui commanda Iamard & Mouty l'aiſné , de monter avec leurs fregates , & s'oppoſer au paſſage , leſquels ſe mettans en deuoir d'executer cet ordre , eſchoĩerent ſur des ſables. Le Marquis de Chambaret de ſa part , auoit fait commandement au ſieur André , Marechal de ba-

taille , d'aller au mesme endroit de Branes , pour reconnoistre leur contenance; mais il fut si facile, qu'ayant rencontré sur son chemin le sieur de Mornac son amy, & luy ayant demandé l'estat des ennemis , il creut sur sa parole qu'ils estoient esloignez de trois lieues : ce qui l'obligea de retourner au Camp, piqué de l'ardeur qu'il auoit de prendre part à la gloire que les Parlementaires, se promettoient de moissonner sur la breche.

IL n'eust pas fait son rapport, que la Roque informé du contraire , pour desguiser son dessein, commanda le Regiment de Muscadet de s'auācer au passage des ennemis , & sur le mesme temps rappelāt son ordre, cōme si c'eust esté vne fauce nouvelle, il luy fit quitter les tranchées , pour, se joignant au Regiment de Thibaut & Andraut, aller au quartier du General , receuoir l'ordre pour l'assaut : & tout d'un coup deuantant ses troupes, il courut dire au Marquis de Chambaret, qu'il croyoit qu'il estoit important qu'il allast en personne avec sa Caualerie aux ennemis, qui auoient passé à Branes en si petit nombre, qu'il estoit capable de les deffaire avec fort peu de gens. Le Marquis creut cet imposteur, & s'estant mis à la teste de la Caualerie, & des Officiers Majors de son armée, qui le suivirent dans le peril, il rencōtra les ennemis plus prez qu'il ne croyoit, qui estoient quinze cens cheuaux, & deux mil fantassins. Le nombre ne l'effraya point; il poussa droit à eux, & les ayant percez, il retourna sur eux, suiuy de fort peu des siens, pendant que la Roque, qui le croyoit perdu, aprez l'auoir liuré par cet artifice, alloit criant par tous les rangs, qu'on se sauuaist qui pourroit, que n'ayant

plus de General , on ne pouvoit resister aux ennemis, qui faisoient six mil hommes. Cela donna à la verité l'épouvante à plusieurs ; mais cela n'empescha pas que les Regiments du Parlement , de Muscadet & d'Andraut, & les milices de Coutras ne courussent à eux , pour dégager leur General ; mais avec tant de presse & de confusion , qu'à mesme qu'ils furent en leur presence , ils furent sans haleine. Ils ne laisserent pas pourtant , quoy que sans Officiers Majors , de se rallier comme ils peurent, & firent vne si violente & si longue descharge, que tous les premiers rangs des Espernonistes furēt couchez par terre, & obligerent le reste de plier. La victoire sembloit alors pancher du costé des Parlementaires. La nouvelle en fut portée au Duc d'Espernon, qui faisant mettre pied à terre à ses gardes , fit donner vne nouvelle charge. Sa caualeries'anima par cet exemple , & par le secours qu'elle receut de quelques bataillons , qui se presenterent tous frais dans le combat. Les Parlementaires se rallierent de nouveau , & faisans ferme , ils en abbatirent beaucoup par vne autre descharge. Mais enfin opprimez par la foule & le nōbre des Espernonistes , & ne voyans paroistre leur General , qui auoit esté porté mort par terre , de trois coups de pistolet , ils furent contrains de lâcher. Leur déroute dōna tant de frayeur à ceux qui gardoient le canon, que la plupart l'abandonnant, chercherent leur salut dans la fuite. André qui auoit suiuy son General dans le danger, le suiuit au liēt de la gloire. Polignac , la Feuriere , Duribaut, Lauaut Procureur en Guyēne, & plusieurs autres gens de cœur, eurent le mesme sort. Le sieur d'Andraut Conseiller ,

aussi ferme à combattre, cōme à rendre justice, fut prins les armes à la main , sans auoir quitté la teste de son Regiment. Camarsac , Pontcastel , Rasens , la Nouaille , Bonnet , Gaxie , Lauau Huissier en la Cour , & beaucoup d'autres , marquerent leur generosité , par les playes qu'ils emporterent. Les Parlementaires perdirēt enuiron cent hommes , & le Duc d'Espéron plus de trois cens , parmy lesquels estoit le Baron de Pujols , & beaucoup d'autres personnes de marque.

LES Espéronistes ne trouuans plus de resistance , se saisirent du canon , qu'ils pointerent contre les Vaisseaux , mesmement contre le vis-Admiral , sur lequel ils deschargerent huit volées sans le fraper. L'Admiral & les autres Vaisseaux auoient leué l'ancre. Le vis-Admiral touchoit , & ne pouuoit partir iusques à ce que le flot fut venu , il essuya pendant deux heures le feu de l'artillerie , & celuy des mousquets , qu'on faisoit de dessus les murs. Cazenac leur respondit aussi vigoureusement qu'il estoit possible , mais inutilement , à cause que l'eau estant basse , il n'auoit pas de prise sur l'artillerie de terre. Enfin vn vent fauorable l'ayant enleué du sable qui le retenoit , il mit ses voiles pour joindre l'Admiral & les autres Vaisseaux , qui auoient desia mouillé au deuant de Vayres. Les fregates de Iamard & Mouty estans engagées dans des sables dés auant le combat , & ayans esté abandonnées , pour n'auoir peu estre secouruës , à cause du bas de l'eau , demurerent aux Espéronistes. La cause de ce mauvais succez se rapporte à deux points dont on impute l'un à la mollesse du General , qui ayant trop de consideration pour ceux qu'il commandoit , ne donna pas les ordres necessaires à l'assurance du cam-

pement de son armée, & à l'opposition qu'il falloit faire contre ses ennemis, qu'il pouvoit aisément arrester, & empescher leur passage, saisissant les batteaux de tous les ports voisins, & bordant de son costé la riuere de soldats. On donne l'autre à la trahison de la Roque, qui pour gagner mil pistoles, que le Duc d'Espéron luy auoit fait promettre, connoissant l'ardeur du General, qui vouloit estre de part à toutes les actions de gloire, le fit precipiter avec 150. cheuaux assez mal en ordre, dās la foule de quinze cens cheuaux ennemis, luy ayant rapporté qu'ils n'estoient pas deux cens, pendant qu'il retenoit l'Infanterie Parlementaire, par la diuersité des ordres qu'il donnoit; qu'il publioit la mort du General, auant qu'il ne fut presque dans la meslée; qu'il conseilloit la fuite à ceux qui s'auançoient, & qu'il imprimoit à tous la frayeur, par le nombre des ennemis. Cōbien que cette deffaite, à la bien considerer, ne fut pas aduantageuse pour le Duc d'Espéron, puis que ses troupes estoient doublemēt plus nombreuses que celles du Parlement; que le nombre des morts & des blesez estoit plus grand de son costé que de l'autre; qu'il n'auoit receu la victoire que par la main de la desloyauté & contre son attente, estant sorty deux fois de son carrosse pour mōter à cheual, & se tenir plus prest à faire vne volte face. Il traitta neantmoins les prisonniers avec vn faste insuportable, & fit faire vne relation qu'il jugea necessaire au bien de ses affaires, par laquelle il se vantoit auoir tué beaucoup plus de gens qu'il n'en auoit vaincu.

CHAPITRE V.



ES coups sont plus sensibles quand ils sont surprenans. Bourdeaux, qui auoit fceu les preparatifs pour l'assaut, attendoit vn exprez, qui luy vint rapporter la prise de Libourne. Mais comme Dieu se plaist bien souvent à tromper les esperances des hommes, pour leur faire connoistre le foible de leurs raisonnemens, & leur faire comprendre que le succez des combats n'est pas dans leur courage, mais bien dans les ordres secrets du grand Dieu des armées, on vit en ce momēt reuenir des visages, qui portans la frayeur peinte en gros caractere, causerēt vn si grād abbatement de cœur dans tout le reste de la Ville, que les plus fermes ne peurent se rauoir de trois iours. Les partisans du Duc d'Espèrnon estoient les seuls qui triomphoient du malheur des battus, & qui se seruirēt de cette occasion pour faire leurs pratiques, & surprenās la pluspart des esprits, leur persuader toutes les bassesses possibles. Ils leur representoient cette attaque dans le trouble de la déroute, avec les couleurs les plus noires d'un crime de leze-Majesté, & leur imprimoient la crainte du suplice dās la consternation. Le Parlement, qui dans sa Compagnie a des courages resolués, ayant esté instruit par les Commissaires du Conseil de Police, du destail de ce qui s'estoit passé au deuant de Libourne, jugeant qu'il estoit necessaire de pouruoir à la seureté de la Ville, or-

donna que le Regiment , qui portoit son nom seroit refait ; que les Capitaines feroient recréu de cent hommes chacun , & qu'il en seroit leué vn nouveau , composé de mil hommes. Ce n'estoit pas assez ; le premier Chef manquant , il en falloit vn autre. Le Marquis de Lusignan ayant fait offre à la Cour & à la Ville des services , ils furent acceptez , & ordonné que par provision il donneroit les ordres ; & que pour cet effet il feroit le serment de fidelité au Conseil de Police.

Cette playe sembloit estre fermée , quand le jeune Marquis de Chambaret se presentant à Bourdeaux , & esueillant la memoire de la mort de son pere , renouvela la douleur. Ses larmes en arrachotent d'autres des yeux des plus constans. Le Conseil de Police obligea les sieurs d'Espagnet & Duduc Conseillers , de le voir de leur part pour le consoler de sa perte , & luy tesmoigner l'interest qu'ils prenoient dans son desplaisir. Ce jeune Gentil-homme n'omit pas vn compliment pour répondre à cette civilité , qu'il accompagna des protestations de vouloir marcher sur les pas de son pere , & sacrifier sa vie au service du Parlement & de la Ville. Il adjousta des supplications à Messieurs les Commissaires , pour obtenir de la Cour qu'elle employast son autorité , afin qu'il peust rauoir le corps du feu Marquis son pere. Ces Messieurs rapporterent cela à la Cour , qui voulant témoigner sa gratitude , les chargea de le reuoir , pour l'asseurer qu'elle seroit bien aise de trouver les occasions pour reconnoistre en la personne du fils , les obligations qu'elle auoit aux services du pere ; qu'elle pouruiroit à ce qu'il fut payé du reste de ses appointemens ; & que

s'il auoit vne forte passion pour recouurer le corps de son pere, qu'elle s'employeroit à l'obtenir par le moyē de Monsieur l'Archeuesque, & que la paix faite, la Ville fairoit à ses despens des hōneurs & oraisons funebres, pour marquer le respect qu'elle conseruoit pour la memoire du feu sieur Marquis de Chambaret. Surquoy le Procureur General asseura que le Duc d'Espernon, persuadé par la Noblesse qui estoit à sa suite, auoit fait deterrer le corps de ce genereux Seigneur, ensevely dans vn gueret, pour le faire porter dans l'Eglise de S. Iean de Libourne: cette Noblesse estimant qu'il n'estoit pas iuste, que celuy qui estoit mort entre les bras de la gloire, fut la proye des chiēs & des oyseaux. La Cour pourueut aussi par mesme moyen, à procurer la liberté du sieur d'Andraut Conseiller, que le Duc d'Espernon retenant prisonnier à Libourne, pretendoit faire traiter en rebelle, & criminel de leze-Majesté. Elle enuoya pour ce suiet vn exprez au sieur de Lauie Aduocat General, qui estoit en Cour, pour en parler à leurs Majestez.

Le succez de cette déroute auoit tellement enflé le cœur du Duc d'Espernon, qu'il s'imaginoit qu'il ne restoit pour l'acheuement de son triomphe, que de voir les Conseillers & les habitans de Bourdeaux prosternez pour demander sa grace. Les partisans qu'il auoit dans la Ville, menaçoient les autres de cet euenement. La crainte partageoit les esprits; les vns vouloient la paix, les autres cherchoient les armes cōme le seul salut. Cette foiblesse estoit montée iusques au Parlement, où l'on mit l'affaire en deliberation; & apres vne longue contestation

testation, fut resolu qu'il seroit fait vn Conseil, composé des Commissaires de la Cour, prins de toutes les Chambres, & des deputez de tous les corps de la Ville, avec vn plainpouvoir pour concerter les moyens de la paix ou de la guerre, auquel assisteroient huit Bourgeois, qui seroient nommez par la Bourgeoisie. Cet expedient plaisoit à tous, mais la pluspart des deputez estoient extremement suspects, par le soupçon de la lacheté de quelques vns, ou par la reconciliation secrette des autres avec le Duc. A peine ce Conseil fut resolu qu'il fut assemblé, & la plus forte voix l'emportant, ils conclurent la paix. On pria le sieur Archeuesque d'en vouloir estre l'entremeteur; il accepta volontiers cette negociation, & escriuit vne Lettre au Duc d'Esperson, pour iuger par sa responce, l'effet de ce premier appareil. Le porteur fut tres-mal traité d'abord, & receu avec des paroles bien aigres; mais enfin il eut pour conclusion, que si le sieur Archeuesque y alloit avec des Bourgeois, il les receuroit, & feroit la moitié du chemin. Le premier President, qui vouloit engager le Parlement, pour le moins par son consentement, pour cette conference, demanda que la Cour eust à deliberer si elle trouvoit à propos que le sieur de Sabourin l'aîné Conseiller, fit entendre au sieur Archeuesque de la part du Conseil, qu'il le prioit de se mesler de faire cette paix. L'adresse de cette proposition, qui tendoit à vn engagement pour la Cour, fut reconnuë. En sorte que par deliberation cela fut renuoyé à juger à ce Conseil de paix, ce qu'il auroit à faire. La peur saisissoit force gens. On eschapoit de toutes parts; & sous pretexte de faire

les moissons, on desfertoit la Ville, & emportoit les meubles. Le Conseil de Police ayant estimé qu'il alloit de sa prudence de pourvoir à ces inconueniens, bailla son Ordonnance, par laquelle deffences tres-expresses furent faites à tous Capitaines & Lieutenans, qui gardoient les portes de la Ville, de laisser sortir quelle personne que ce fust, ny les meubles sans passe-port, à peine de confiscation, & d'en respondre en leur propre & priué nom; que cette Ordonnance seroit publiée & affichée à toutes les portes de la Ville, afin qu'aucun n'en pretendist cause d'ignorance; & qu'à deffaut de ce, les Capitaines, qui laisseroient sortir qui que ce fust, ou meubles sans Ordonnance, seroient condamnez en 500 liures en leur propre.

ON peut juger si la fierté du Duc d'Espèrnon estoit en estat de relascher, aprez vn si heureux succez, & s'il ne falloit pas se resoudre, pour receuoir la paix de sa main, de passer par des conditions tres desaduantageuses. La prosperité a ses desmarches orgueilleuses, elle preserit tousiours & ne reçoit jamais la loy de ceux qu'un reuers de fortune plongedans le mal-heur. L'Archeuesque alloit à Cadillac pour traiter avec luy. Le Duc d'Espèrnon s'aduançoit jusqu'à Castres, non pas pour espargner les pas de l'Archeuesque; mais bien pour racourcir son chemin, & se trouver plus prest pour en venir dans Bourdeaux. L'Archeuesque pretendoit reprendre les articles de la premiere paix; & le Duc d'Espèrnon vouloit qu'on tint la sursoiance de sa persecution, comme vn effet de sa grace. Ils se rendirent l'un & l'autre des ciuillitez reciproques, & delà apres que le

sieur d'Argenson fut arriué, ils passerent au sujet de leur conference, pour lequel le sieur Archeuesque ayant remonstré que la continuation du trauail de cette Citadelle de Libourne, estant le leuain de toutes ces reprises, il estimoit à propos qu'il confirmast la parole que le sieur d'Argenson auoit donnée pour luy, d'en arrester la continuation, s'assurant que tout le reste seroit accommodable. Le Duc d'Espernon desauoia nettemēt qu'il eust donné cette parole ny au sieur d'Argenson, ny à quel autre que ce fust; surquoy le sieur d'Argenson n'eust point de repartie, ou par respect, ou par la confusion de voir sa fourberie descouverte. Et le Duc poursuivant de respondre aux autres points du traité, dit qu'il ne pretendoit accorder rien de sa part, que la Ville & les vaisseaux ne fussent desarmez, les barricades abbatuës, le Chasteau du Harestably, que la garde ne cessast, que la Bourgeoisie ne luy baillast assurance qu'on ne reprendroit plus les armes; qu'il n'estoit pas de condition à s'exposer dans vne Ville, pour y receuoir vn affront, & que c'estoit aux Bourgeois à voir qu'elles assurances ils pouuoient luy donner. Le sieur Archeuesque fit ce qu'il peut pour tascher à le faire demordre de la rigueur de ces propositions; mais n'en pouvant venir à bout, il reuint à Bourdeaux, pour communiquer au Conseil de paix ce qu'il auoit negocié, dans lequel la pluspart des Commissaires estans de ceux, ou qui craignoient le Duc d'Espernon, ou qui seruoient secrettement ses interêts, il fut aisé de faire resoudre, que ces Commissaires mesmes deputeroient de leur corps, pour assurer le Duc d'Espernon qu'on exe-

cutoit ce qu'il auoit ordonné, & qu'ils ne reprendroient point les armes, dont quelques vns des Bourgeois de cette cabale, furent assez hardis pour dire que le Duc d'Espernon demandoit de pareilles assurances du Parlement, ce qui fut rapporté à la Cour par le premier President, & tellemēt trouvé hors de propos, qu'il n'y fut pas deliberé.

IL tardoit à ces deputez qu'ils n'eussent baisé la verge dont ils auoient esté si souvent menacez. Les froids embrassemens qu'ils receurent du Duc à Leugnan, où ils allerēt pour se soumettre aux cōditions qu'il voulut imposer, les charmerēt si fort, qu'ils ne furēt pas de retour aux portes de la Ville, qu'ils protesterēt publiquemēt de la part de leur Maistre, vne paix éternelle, & vne amitié sans rupture. Toutefois le Conseil de Police, qui sçauoit qu'il n'y auoit rien de si dangereux que de se fier aux paroles de son ennemy, & s'endormir à ses approches, rendit vne Ordonnance qui fut publiée, par laquelle deffences furent faites aux Capitaines & Officiers de quitter les armes, ny la garde de la Ville, sous quel pretexte que ce fust, sans ordre & permission expresse du Conseil de Ville à peine de la vie; enjoignit aux Bourgeois & habitans de quelque qualité & condition qu'ils fussent, d'aller à la garde. Et en effet tout le monde n'approuuoit pas cette composition. Et pource qu'on apprehendoit que les partisans du Duc, qui commençoient à lever les cornes, ne le fissent entrer la nuict dās la Ville, par la porte de S. Iulien, les habitans de ce quartier ne furent point satisfaits, qu'aprez qu'ils eurent visité la porte, & trouvant qu'elle estoit fidelemēt

fermée, fait porter les clefs comme en depost, chez le President Pichon, en qui le peuple auoit confiance. Mais le lendemain (pource que c'estoit par là que le Duc d'Espernon vouloit entrer dans la Ville) les habitans de cet endroit s'opposerent à ce que la porte fut ouverte, firent des barricades pour empescher la pompe de cette entrée, & obligerent le Capitaine Lauau, qui estoit pour lors en garde, a renvoyer les clefs que le President Pichon luy auoit enuoyé. Desorte qu'elles furent portées sur le Bureau de la Cour, & depuis remises entre les mains de la Barriere, l'un des Jurats, qui les porta dedans l'Hostel de Ville, d'où le sieur de Niac son collegue, les print, pour aller en personne faire ouvrir cette porte, accompagné du Cheualier du Guet & de ses Archers, qui voyant qu'il ne pouvoit rien gagner par ses remonstrances sur l'obstination d'un peuple, qui n'auoit pas de confiance en luy, & qui le tenoit pour suspect, se retira.

Ce petit desordre se respâdit par toute la Ville. Ceux qui estoient zelez dissimuloient l'adueu de cette action. Les partisans du Duc cherchoient du remede à ce mal. Les Jurats, ses creatures, couroient par les carrefours cabaler tous ceux qu'ils rencontroient, pour leur prester main forte. Mais ils ne trouuoient que des paralitiques ou des bras engourdis. Ils employerent l'autorité de Monsieur l'Archeuesque, qui par un zele ardent & plain de charité, alla prescher la paix dans les places publiques, & se rendit hautement garand des paroles que le Duc luy auoit donné. Cela fit impression sur beaucoup d'esprits, qui creurent cette paix plain de

benedictions, & presque inuiolable, puis qu'elle estoit prosnée par la bouche du Vicaire de Dieu. Mais d'autres plus incredules demurerent dans leurs premieres pensées, estimant que puis que le Duc d'Espernon auoit hautement desmenty en sa presence le sieur d'Argenson, enuoyé par le Roy, sous le nom duquel il disoit tout faire & tout oser; qu'il n'auroit pas plus de consideration pour le sieur Archeuesque, qui n'agissoit que comme le Ministre d'un Dieu, pour lequel le Duc n'auoit point eu de respect dans tous ces mouvemens. Pendant que le sieur Archeuesque estoit au deuant du Palais, & qu'il taschoit à calmer la fougue du peuple, & arrester les desordres, il enuoya vn Ecclesiastique au Parlement, pour aduertir la Cour qu'il estoit à pied dans la Ville, preschant la paix, & taschant de radoucir les esprits animez, à quoy elle respondit, qu'elle luy sçauoit bon gré des soins qu'il prenoit à calmer ces orages; que s'il vouloit prendre la peine d'entrer au Parlement, il seroit bien receu. (Il n'y auoit point encore esté depuis sa promotiō.) Cela luy ayant esté rapporté par son enuoyé, il creut estre obligé à ne refuser pas cette occasion, pour conferer avec le Parlement, & y estant entré bien tost après ayant prins la place ordinaire aux Archeuesques, il dit qu'il estimoit cette conjoncture heureuse, qui luy auoit aduancé le iour de son entrée au Parlement, pour asseurer tous les Messieurs de ses tres-humbles seruices, de l'estime qu'il faisoit d'un chacun d'eux, & les remercier de celle qu'ils auoient resmoigné faire de sa personne; qu'il protestoit qu'il s'estoit employé à traiter la paix de la Ville, à mesme qu'il a iugé que le temps estoit

propre pour l'entreprendre ; qu'il croyoit auoir esté assez heureux pour y reussir , & qu'il ne restoit qu'à faire executer les paroles qu'il auoit dōnées au Duc d'Espéron de la part de la Ville , lesquelles il recita. La Cour le remercia de la peine qu'il auoit prins a faire ce traité , & l'assura par le desir qu'elle auoit de voir le repos restably dans la Ville , qu'elle employeroit son autorité à faire executer les paroles qu'il auoit donné au Duc d'Espéron. A cet effet elle ordonna que le Chasteau du Ha seroit remis entre les mains de celuy que le Marquis de Roquelaure y auoit commis ; que les sieurs d'Espagnet & de Bordes , demeureroient deschargez de la garde d'iceluy ; que les Iurats seroient mandez sur l'heure , & leur seroit enjoint de faire abbatre les barricades , qui estoient au deuant le Chasteau Trompette , la porte saint Iulien & autres lieux de la Ville , & rendre les vaisseaux qui auoient esté prins pour le seruice de la mesme Ville , aux propriétaires d'iceux & les desarmer , & conseruer les armes , poudres & autres choses qui se trouueroient dans iceux , appartenantes à la Ville.

Le sieur Archeuesque sortit , & s'en alla sous la faueur de cet Arrest aux barricades de S. Iuliē , pour disposer ce peuple à les abbatre. Mais de quelle Rhetorique qu'il se seruit , il ne sceut les persuader ; au contraire ils s'aigrirent desorte , qu'il fut contraint de se retirer sans effet. Les Iurats , qui ne vouloient pas deffaillir aux intentions du Duc d'Espéron , voulurēt employer la force pour enfoncer ces barricades. Le sieur de Niac s'y presenta deux fois de bien loing , il en fut tout autant de fois repoussé. On tira de l'Hostel de ville deux pieces

de campagne ; on les fit rouler iusques à demy chemin ; mais les Iurats n'oserent pas les hazader plus auant , de crainte que ceux de S. Iulien les faississant , ne s'en seruissent contr'eux. Ils firent prendre les armes aux Bourgeois de la Rousselle , qu'ils connoissoient les plus fideles au party du Duc d'Espernon ; d'autres qui eussent esté bien marris de perdre cette belle occasion , pour faire valoir le party qu'ils seruoient , se joignirent à eux , si bien qu'ils faisoient en tout enuiron deux cens hommes , resolus de perir, où de faire entrer le Duc d'Espernon par la porte de S. Iulien. Les plus apparens vouloient les premiers rangs ; il ne se vit iamais de pertuisanes mieux dorées ; ils se mirent en marche ; mais à mesmes qu'ils eurent approché les barricades , vn Sergent estant sorti avec six mousquetaires pour les recônoistre , ceux qui estoient les premiers à la teste , se trouverent faire teste à la queüe , par vne soudaine conuersion , & s'allerent retrancher dedans l'Hostel de ville. Le premier President , qui reconnut que les plus genereux n'estoient pas du costé du Duc d'Espernon , luy donna aduis de changer de dessein , & prendre , pour faire son entrée la porte la plus proche de sa maison de Puypaulin , pour ne s'engager pas dans les rencontres du reste de la Ville. Cepédant les Iurats couroiét les portes , pour faire retirer les gardes , & rōpre les barricades. Ils n'estoiét point obeys. On demandoit vn Arrest ; ils asseurerent qu'il auoit esté rendu ; on ne les en croyoit pas ; il le falut faire publier , lors on l'executa. Le Duc d'Espernon se presenta à la porte Di-jaux avec quatre cens Cheuaux , deuancez par des Trompettes , qui n'oublioient pas la

fanfare

fanfare dans les ruës. Il gardoit le mesme ordre d'un Triomphant, qui entre dans vne Ville de conqueste. On ne le pouvoit voir qu'avec auersion. On se cachoit dans les maisons, pour n'estre pas obligé de le saluer. Ses gens auoient peine à trouver logement. Il obligea sa Noblesse à le garder chez luy. Quelqu'un des siens ayant appelé vn habitant pagnotte de Libourne, il en fut bien frotté. Les Parlementaires, qui auoient perdu leurs cheuaux au deuant de Libourne, les reconnoissant à l'abreuoir ou dans les Escuries, les enleuoient impunement. Les habitans de S. Iulien gardoient tousiours leurs barricades; mais enfin par obeyssance à l'Arrest, & par la creance qu'ils auoient au sieur d'Espagnet, qui leur fit des remonstrances, ils les abandonnerent.

C H A P I T R E VI.



LE Duc d'Espernon ayant eu aduis qu'il ne receuroit point de compliment de la part du Parlement, pource qu'il auoit esté resolu par vne deliberation secrette, que pas vn de Messieurs ne le visiteroient, sous peine d'interdiction, taschoit de gagner les Bourgeois & les particuliers des autres Compagnies, pour les détacher de cette vnion, que l'on auoit juré avec le Parlement. Les Iurats trauailloient à ce dessein d'un costé, & les Iuge & Consuls de l'autre; mais ils ne profitoient pas beaucoup: car vne bonne partie de ceux qui se lais-

soient emporter à la force de cette pratique, ne le fa-
 lioient qu'à la façon de ces anciens, qui apotheosoient
 tout ce qui leur estoit ennemy, afin de destourner de
 leurs testes, par des adorations, les maux qu'ils crai-
 gnoient recevoir des coups de leur colere. Le Duc
 estoit prodigue d'embrassemens, de protestations d'a-
 mitié & d'offres de service. Les vns estoient prins par
 cette amorce, & les autres dissimuloient leur defiance.
 Mais comme ces grandes ciuilitéz ne durerent que deux
 iours; & qu'entamant dans ses discours familiers le fô-
 del'affaire, pour lequel il promettoit à la verité vne
 amnistie de sa part, & d'obtenir de la bonté du Roy le
 rasement de la Citadelle, il faisoit quelquefois glisser
 la proposition, sur laquelle il faisoit ferme, qu'il y auoit
 du crime d'auoir porté ses armes contre Libourne, vne
 Ville du Roy, de quoy il promettoit d'en auoir le par-
 don. L'innocence de Bourdeaux se creut choquée par
 cet entretien, & à la veille d'une oppression plus vio-
 lente, sur le bruit qui fut semé sourdement, qu'il rete-
 noit sa Caualerie dans la Ville, & qu'il faisoit entrer des
 visages deguisez, à dessein de desarmer les habitans. En
 sorte que les Bourgeois, deschargeans la nuit leurs
 mousquets & fusils, pour rafraischir leurs charges, &
 tenir leurs armes en estat, il fut tellemēt effrayé du bruit
 de ces descharges, que ne se croyant pas en seureté
 dans la Ville, il en sortit le lendemain, pour aller à
 Cadillac.

ON rendoit cependant de fort mauuais offices en
 Cour au Parlement. Les aduis du Duc d'Espemon;
 ceux des faux freres Officiers en la Cour, taschoient de

rendre le Parlement criminel dans l'esprit du Roy, & des Ministres d'Etat. Il ne falloit pas grande peine à le persuader. Le Duc d'Espernon leur auoit baillé de trop mauuaises impressions, qu'on ne pouuoit effacer par l'antipathie naturele, qui est entre l'interest des Ministres, & le zele des Parlements. Il falloit donc pour passer l'esponge sur ces premiers traits, & justifier l'innocence de toutes ces demarches, enuoyer du secours au sieur de Lauie Aduocat General, qui en demandoit, & faire promptement partir Messieurs les Presidents Gourgues l'aîné, Monjon & Mirat Conseillers, qui auoient esté desia deputez. Il ne restoit plus qu'à demeurer d'acord des memoires qui auoient esté dressez, les concerter dans les Chambres, où ils furent rapportez & approuvez.

*SENSVIT LA TENEVRE DES
Memoires & Remonstrances, qui ont esté don-
nées à Mrs. les deputez du Parlement.*

REMONSTRANCES TRES-HVMBLES
que la Cour de Parl. de Bourdeaux, les Chambres as-
semblees, a ordonné estre faites au Roy & à la Reyne
Regente, par Messire Ioseph du Bernet, Conseiller
du Roy en son Conseil d'Estat, & premier President
audit Parlement, Messire Iean de Gourgues, Conseil-
ler du Roy en son Conseil d'Estat, & President audit
Parlement, Messieurs Iean de Monjon & Iean Luc
de Mirat Conseillers en la Cour, & Thibaut de La-
uie Aduocat General de sa Majesté en ladite Cour,
pour le bien & honneur de sa justice, repos & tran-
quilité de la Ville de Bourdeaux, & Prouince de
Guyenne.

LESDITS sieurs deputez estans arrivez à Pa-
ris, confereront avec le sieur de Lauie, sur les
affaires qui se sont passées puis son depart, & luy
communiqueront les instructions de la Cour, pour re-
soudre suivant les occurrences ce qu'il conuiendra
faire.

Représenteront au Roy les iustes plaintes du pro-
cedé du sieur Duc d'Espéron, sur la descente des
troupes, qui a troublé la tranquillité de la Ville &

de la Prouince, à quoy la Cour desiroit remedier, lors qu'elle le conuia d'assister à la deliberation du quatriesme de Mars dernier, lequel article pourra estre estendu sur les autres sujets de plaintes, sçauoir la prinse de Puymeinol & de la Citadele de Bourg, l'armement & l'auitaillement extraordinaire du Chasteau Trompette, les canons pointez sur la Ville.

Les preparatifs comme pour vn dessein, le démeublement de Puypaulin, l'enleuement de nuict des canons du Chasteau du Ha, & autres choses qui ont troublé & troublent le repos public.

Adjoûteront les violences commises en suite par ledit sieur Duc d'Espéron, & le blocus par luy fait de ladite Ville, par le logement des troupes.

L'interdiction du commerce par les deux riuieres de Garonne & Dordogne, avec Ordonnance pour ce publiée, la prinse de nombre de farines, & dix-huict cens boisseaux de bled, appartenans aux Boulangers de la Ville, l'arrestement de tous les vaisseaux portans la subsistance de la Ville, les rauages du plat pays insques aux portes de la Ville, avec incendies, violemens, sacrileges, & prophanation du S. Sacrement de l'Autel, rasement des maisons par ses gardes: ce qui a esté fait avec plus de violence depuis l'arrivée du sieur d'Argenson, Commissaire de sa Majesté, & pendant les conferences qu'il

faisoit avec la Cour, & ses Commissaires à ce député.

Fairont plainte de la violence commise par celuy, qui commande dans le Chasteau Trompette, contre les Conseillers de la Cour, le dernier iour de Mars: ce qu'il n'eust entrepris sans les ordres du sieur Duc d'Espernon. C'est pourquoy le Roy sera supplié d'accorder à son Parlement & Ville de Bourdeaux, ce qui luy a esté demandé autrefois, tant par ledit Parlement que ladite Ville, que le Gouvernement du Chasteau soit en autres mains que celles du Gouverneur: ce qui est aussi de trop grande consideration pour le service du Roy, afin que toutes les forces & puissances de la Ville, ne soient pas en une main.

Adjousteront que le sieur Duc d'Espernon, de son autorité, fait des prisonniers dans ledit Chasteau, & les y retient tant que bon luy semble, au lieu de les mettre à leurs Iuges naturels, pour les punir s'ils sont coupables, contre les Ordonnances & Declarations du Roy.

Représenteront la surcharge de la garnison, dont le payement a esté rejetté sur le peuple, contre les ordres anciens.

Comme aussi les gardes du sieur d'Espernon, vivent à discretion à la foule du peuple, bien qu'ils soient payez, ou le doiuent estre sur les deniers qui sont imposéz.

Fairont plainte de ce que despuis quelque temps en ça, tous les ans sur les six Eslections de Bourdeaux, on impose la somme de vingt & un mil deux cens quarante-huict liures, pour l'entretienement de la garnison du Chasteau Trompette; ce qui ne se pratique en lieu du Royaume, d'autant que la solde & entretienement des garnisons, se prend sur le fonds d'une imposition établie pour cet effet, qu'on appelle la Cour des garnisons, unie & incorporée au principal de la Taille.

Le Roy sera supplié de maintenir la Ville de Bourdeaux, dans le privilege accordé par le feu Roy, que les gens de guerre n'approcheront pas de ladite Ville, qu'à la distance de dix lieües, & de souslager la Prouince du continuel logement du Regiment de Guyenne.

Qu'il soit deffendu audit Duc d'Espéron d'usurper aucune Iurisdiction contencieuse, au preiudice de celles qui sont establies par le Roy.

Comme aussi de parler des Villes de Saint Macaire & autres, comme siennes, & prendre la qualité de Prince & d'Altesse, suivant l'Arrest de la Cour.

Représenteront l'entreprise du sieur d'Espéron, & l'usurpation d'un pouvoir qui n'appartient qu'au Roy, de casser & annuller les Arrests du Parlement, par les Ordonnances qu'il a fait publier, enregistrer par force aux Senéchaux, & imprimer avec

des termes si injurieux & extraordinaires, qu'il est nécessaire que sa Majesté ordonne la réparation convenable à sa justice. Et attendu toutes ces violences, les desputez, suivant l'Arrest, supplieront tres-humblement le Roy de donner un autre Gouverneur à la Province, & pourvoir au dédommagement des maux qu'elle a souffert, par la violence des gens de guerre, commandez par le sieur d'Espèrnon.

Représenteront la violence commise contre le Lieutenant General de Bazas, la Roche Secrétaire, celle de Gradignan, d'avoir fait pendre un homme contre la capitulation de vie sauver, & au préjudice de la parole qu'il avoit donnée.

Deffences de se saisir à l'advenir des maisons particulières, & d'enfreindre les Privilèges des Officiers de la Cour, pour le logement des gens de guerre, en quels lieux que leurs maisons soient situées.

Demandèront au Roy la réparation des infractions des privilèges & immunitèz des maisons de Messieurs les Evêques, & autres Ecclesiastiques, même du logement du sieur Evêque de Bazas, Conseiller en la Cour.

Que la liberté des Elections des Consuls & Jurats, demeurera entière aux Communautés, sans que le sieur d'Espèrnon l'empêche, ny qu'il prenne connoissance desdites Elections.

Que la même liberté sera conseruée pour les Juges & Consuls de la bource.

Fairont aussi leurs remonstrances tres-humbles, suivant l'Arrest du troisieme Mars dernier, pour la suppression de la Cour des Aydes, establee au prejudice de l'incorporation faite de l'ancienne Cour des Aydes de Perigueux: en quoy ils représenteront ce qui est de l'intérêt public, à sçauoir les gages excessifs qui leur sont attribuez, l'excez des droits & emolumens qu'ils prennent, le peu de respect, voire le mespris qu'on rend à leurs Arrests, à cause de leurs desordres, qui sont si grands, que le grand Conseil, qui en a esté Juge, a esté à mesme de le représenter au Roy, afin de leur oster la Jurisdiction dont ils usent si mal.

Fairont instance sur la demolition de la Citadelle de Libourne, laquelle en effet a causé les mouuemens des peuples; & sur les infractions des Traitez faits pour raison de ce.

Comme aussi fairont plainte des leuées & impositions extraordinaires, que fait ledit sieur d'Espèrnon sous ce pretexte, qui montent beaucoup au delà de la Taille, contre la Declaration du Roy, qui par sa bonté en a remis un cinquieme.

Adjousteront l'imposition de trente mill liures, faite sur l'Agénois, pour la batisse de quelques Escurries, sans aucune permission du Roy.

*Supplieront sa Maieſtè d'octroyer à ſon Parlement
moderation de l'annuel, ſur le pied du Parlement de
Toloſe.*

Fait & arreſté à Bourdeaux en Parlement,
les Chambres aſſemblées, le huitieſme de Juin
mil ſix cens quarante-neuf.

Signé, LE CONTE.

Extraordinationné, CVRICE.

A ſuite de cela, Meſſieurs le Preſident Gourgues,
de Monjon & Mirat deputez, prindrent congé de la
Cour, & ſe mirent en eſtat de faire leur voyage, & par-
tirent quelques iours aprez. Cependant il eſtoit que-
ſtion d'examiner les deſpences, qui avoient eſté faites
pendant ces troubles. Les ſieurs de Sabourin l'aiſné &
Raymond Conſeillers, furent commis pour les arreſter,
& aprez en auoir rapporté le calcul, il fut delibéré que
les eſpices, apresdinées, & autres emolumens, ſeroient
remis entre les mains des Greffiers des Chambres, pour
eſtre employées au payement des ſommes empruntées,
iuſques à ce qu'il euſt eſté trouvé quelque autre fonds
ſuffiſant. La Cour des Aydes ſe ſeruit auſſi du repos de
cet interualle, pour reprendre l'exercice de ſa Jurisdi-
ction. Le Parlement auoit peine à la ſouffrir, à cauſe
qu'il l'auoit interdite par vn Arreſt precedent, rendu
en conſequence de la Declaration du mois d'Octobre
dernier, ſuiuant qu'il en a eſté deſia parlé. Elle au con-

traire auoit rendu vn autre Arrest pour se maintenir, & cassoit celuy du Parlement. Mais pource qu'elle l'auoit fait expedier en forme, avec le nom du Roy, & qu'il estoit conceu en des termes, qui estoient injurieux à l'autorité du Parlement, Messieurs des Enquestes demanderent l'assemblée des Chambres, qui leur fut accordée, en laquelle on voulut ouyr les Gens du Roy, & leur faire prendre leurs conclusions sur cette proposition, pour la consequence de laquelle le Pr. Gen. remōstra, Qu'il est aduertty d'un pretendu Arrest temeraire & injurieux à l'autorité du Roy & de la Cour, donné par certains soy disans Officiers de la Cour des Aydes, le 18. du mois de Mars, lequel en soy ne peut estre prins que pour vn pur libelle diffamatoire, d'autant plus odieux & punissable, que dans iceluy le nom auguste du Roy se trouve employé, pour faire passer plus hardiment les calomnies & impostures euidentes, & sans exemple, dont il est remply. La Cour en donnant son Arrest du 13. dudit mois de Mars dernier, n'ayant vsé que de son droit & du pouoir exprez que sa Majesté luy donnoit, par la derniere Declaration du 22. d'Octobre dernier. Aussi cet Arrest de la Cour, est conforme aux intentions du Roy, qui n'ayme rien tant que le bien & souffagement de son peuple, puis qu'en ce faisant, il oste l'exercice d'un nombre effrené d'Officiers du tout inutiles, qui depuis leur establissement, n'ont causé que la ruyne & la desolation de la Prouince, tant par excessiueté de leurs gages, espices & autres emolumens, que par la multiplicité des procez qu'ils ont excitez & fomentez, ne pouuans se seruir du temps, ny

alleguer de prescription en leur faueur, veu qu'ils doivent sçauoir que tous establissemens abusifs; contraires au bien public, & qui choquent l'Estat, en sont exēpts, & que la saison est tousiours conuenable pour les reformer, sans entrer en consideration des diuerſes protestations que la Cour en a fait de temps en temps, & les propositions faites dans les cayers des Estats pour leur suppression; estant d'ailleurs faux & supposé, que les formalitez requises, & telles qui furent pratiquées en la creation des autres Compagnies des Aydes du Royaume, ayent esté obseruées en leur establisſement, en quoy ils tesmoignent ignorer leurs principes, & ont encore plus auant marqué leur temerité & extrauagance, en ce qu'ils ont eu l'audace de faire inserer dans leur pretendu Arrest, que la Cour tendoit par le sien susdit, d'inspirer aux Sujets de sa Majesté vne desobeyſſance, & se rendre Maîtres de ses finances. A quoy la Cour n'a jamais pensé, & a ce glorieux aduantage, qu'elle s'est tousiours maintenue dans la fidelité, respect & obeyſſance qu'elle doit au Roy. A tant, ledit Procureur General a requis que sa Majesté soit informée au pluſtoſt, du susdit libelle fameux par ses deputez, pour estre les auteurs d'iceluy punis des peines portées par les Ordonnances Royaux, & ſuiuant l'exigence du cas. Et cependant que le susdit pretendu Arrest soit cassé & annulé, avec inhibitions & deffences ausdits pretendus Officiers de la Cour des Aydes, de contreuenir à l'Arrest de la Cour, du 13. iour de Mars dernier, à eux deüiement ſignifié, lequel sera executé selon sa forme & teneur, sous le bon plaisir du Roy. L A C O V R, les Cham-

bres assemblées, faisant droict sur la requisition du Procureur General du Roy, a ordonné & ordonne que le Roy sera informé au plustost par les deputez d'icelle, du libelle fameux contenu dans vn pretendu Arrest, donné par certains soy disans Officiers de la Cour des Aydes, pour estre les auteurs d'iceluy, punis des peines portées par les Ordonnances Royaux, & suiuant l'exigence du cas. Et cependant a cassé & annullé ledit pretendu Arrest, comme donné par attentat, par des personnes priuées, sans pouvoir ny Iurisdiction. Fait inhibitions & deffences à toute forte de personnes d'y deferer. En outre ladite Cour ordonne, sous le bon plaisir du Roy, que l'Arrest d'icelle du 13, Mars dernier, sera executé selon sa forme & teneur. Fait inhibitions & deffences ausdits pretendus Officiers & toutes autres personnes d'y contreuenir, aux peines portées par iceluy. Et sera le present Arrest executé en vertu du simple Dictum d'iceluy, attendu ce dont s'agist. Fait à Bourdeaux en Parlement les Chambres assemblées, le 15. iour de Iuin 1642.

Signé, DE PONTAC.

Cet Arrest fut signifié au sieur Robillard, Aduocat General en la Cour des Aydes, par Cauaille, Huissier en la Cour.

CHAPITRE VI.



LES Jurats auoient prins cœur par l'entrée du Duc d'Espéron, & croyoient que pour se reſtablir dans leur premiere autorité, il ne falloit que ſuiure ſes mouvemens. Ils rappellerent pour cet effet dans l'Hoſtel de ville, Valadon, qui de garde du Duc qu'il eſtoit originairement, auoit eu pour recompence de ſes ſeruices la place de Lieutenant du Cheualier du Guet; laquelle il auoit quittée, pour eſtre Canonier dans le Chateau Trompette, pendant tous ces deſordres, & contre lequel le Parlement auoit decreté de priſe de corps, pour auoir pointé & tiré les canons ſur la Ville. Le Conſeil de Police auoit fait durant ces deſordres, des Capitaines nouveaux, ſe deſſiant de quelques vns des anciens. Les Jurats changerent ces nouveaux & remirent les anciens en leur premiere place. Et enfin pour ſe deſtacher de l'autorité, & de l'ancienne Iuriſdiction du Parlement pour ce fait de Police, & afin que ſuiuant le gré du Duc, dont ils ſeruoient la paſſion, contre la fidelité de leurs Charges, les habitans de Bourdeaux rendiſſent par leur propre adveu leur innocence criminelle, ils deputerent le ſieur Ardent, l'un de leurs Collegues, pour demander au Roy l'euocation de leurs cauſes, & des Bourgeois de Bourdeaux, & renuoy en vn autre Parlement; & vne abolition generale de ce o'

auoit esté fait ; (deputation autorisée non seulement par l'approbation des Jurats , mais aussi par le seing de quelques Bourgeois laschement pratiquez) Ce rappel de Valadon , ce changement des Capitaines , & cette deputation , baillerent de l'employ au Parlement , & matiere pour diuerses assemblées des Chambres. Mais comme le sujet de cette deputation estoit plus important , à cause qu'il auoit des consequencés tres-perilleuses , il s'y attacha plus fortement qu'au reste. La Barriere Jurat , & le Procureur Syndic , s'estans presentez à la porte de la Grand-Chambre pour d'autres affaires , sur le point qu'on traittoit cette matiere , leur en fournit l'occasion. La Cour les ayant fait entrer , leur fit entendre qu'elle vouloit estre esclaircie du sujet , pour lequel ils auoient député vers le Roy vn des Jurats , sans luy en donner aduis. Le sieur Barriere declara ne sçauoir point qu'aucun de leurs Collegues eust esté député. Le sieur de Blanc Procureur Syndic , parlant plus auant , accorda qu'il auoit esté proposé dans l'Hostel de ville , de deputer quelqu'un des Jurats pour les affaires particulieres de la Ville ; mais non pas pour celles du temps ; que cette proposition auoit esté resoluë , mais qu'il ne sçauoit pas qu'aucun eust esté précisément nommé. La Cour ne voulut pas pour ce coup chercher plus auant l'esclaircissement de cette affaire , sur la difformité de ces responses. Elle se contenta de leur faire entendre qu'il alloit de son autorité , de ne souffrir pas que l'on deputast vers le Roy , qu'elle n'en fust aduertie , & de resoudre qu'il seroit donné aduis au sieur de Lauie Aduocat General , qui estoit en Cour , du voyage du sieur

Ardent, pour veiller sur ses démarches, & que copie du registre, qui contenoit les réponses de la Barrière & du Procureur Syndic, luy seroit enuoyée, pour s'en servir au besoin.

IL parut vne Ordonnance de laquelle le Duc d'Espèrnon auoit enuoyé plusieurs coppies dans les Seneschaussées & Parroisses du ressort, par laquelle il imposoit sur chacune certaine somme, pour la subsistance de ses troupes, avec pouvoir de contreindre toute sorte de personnes, excepté les Gentils-hommes d'extraction, à la réserve de ceux qui auoient prins les armes dans ces derniers mouvemens pour le Parlement, contre le service du Roy (c'estoit les termes dont il se seruoit) & dans la même piece, parlant de Messieurs du Parlement, il les traittoit de rebelles & de factieux. Cela joint au reste, esueillla les Enquestes, pour demander l'assemblée des Chambres. Le premier Président eluda quelque temps, à la faueur des iours que l'on tenoit les Audiénces; mais enfin il salut y venir; & la premiere des propositions fut, qu'il falloit legitimer les Iuges, n'estant pas iuste de souffrir dans les opinions, aux affaires qui regardoient precisement le Duc d'Espèrnon, ceux qui n'appuioient pas seulement ses interets avec chaleur; mais aussi qui l'estoient aller visiter à son arriuée, contre l'expresse deffence de la Cour. Le premier Président se trouua du nombre. Les sieurs de Salomon, Dubernet & Blanc, seruans à la seconde des Enquestes, ne s'en pouuans non plus desdire, furent obligez, apres vne longue contestation, à passer par les

les deliberations données en diuers temps, qui portoit qu'ils s'abstiendroient dans les affaires du Duc.

La resolution des premieres propositions fut interrompue par de nouvelles rencontres, qui se presenterent. On voyoit rouler dans les ruis nombre de personnes sans adueu, qui se portoit à cette insolence, de faire des scandales en beaucoup d'endroits, iusques dās les Eglises. Le Procureur General en porta la plainte à la Cour, qui rendit son Arrest, par lequel il fut enjoint aux Iurats de chasser hors la Ville les vagabons, & gens sans adueu, & aux Hosteliers, & autres personnes qui logent les estrangers, de porter aux Iurats deux fois de la sepmaine, le nom de ceux qui logeroient dans leurs maisons, qui en aduertiroient la Cour. D'autre part le sieur de Lescure seruant à la grand-Chambre, se plaignit que Martinet, Commandant dans la Citadele de Libourne, auoit fait piller & rauager toutes ses maisons, proches de S. Emilion, depuis la pacification des troubles; qu'il luy auoit fait enleuer sept cens boisseaux de bled, & tous ses meubles, pour les porter dans Libourne; surquoy il luy fut permis d'informer, & les sieurs Boucaut l'aîné & Voisin Conseillers, furent nommez Commissaires, pour ouyr les temoins, & receuoir l'information. Il fut présenté au Parlement vn passeport qu'on auoit obtenu du Roy, portant permission de transporter des bleds en pays estrangers; lon delibera sur l'enregistrement. Et pource qu'on craignoit que ce ne fut vn pretexte pour desgarnir la Ville de sa prouision, il fut ordonné qu'il seroit registré, à condition que le bled qu'on pretendoit charger, ne seroit pas pris

dans la Ville; ou qu'en mesme temps il en seroit mis d'autre à la place de celuy qui seroit tiré, & deux Bourgeois Marchands, sçauoir Hugla & Fieuzal, furent cōmis pour veiller à l'exécution de cette deliberation. La Cour eust aduis que des visages nouveaux arriuoient chasque iour dans la Ville; qu'ils portoient des armes avec eux; qu'il estoit à craindre que ce ne fust à l'effet de quelque surprinse; desorte que la Cour, estimant qu'il estoit important d'y pouruoir, manda les Jurats, pour sçauoir ce que c'estoit, ausquels il fut représenté par le President Latrenne, que si l'obligation de leurs charges exigeoit d'eux à veiller à la seureté de la Ville, les desordres de ce temps demandoient vn soin particulier, puis que lon auoit appris que beaucoup de personnes inconnuës & armées, faisoient des assemblées de nuict, qui ne pouvoient produire que de tres-pernicieux effets; que la Cour leur fournissant l'Arrest qu'elle auoit déjà rendu contre les vagabons, leur auoit donné des moyens d'y pouruoir, à quoy elle les exhortoit de traualler soigneusement. Les Jurats respondirent qu'ils s'employoient assiduellement à seruir leurs Charges avec honneur, & conseruer à la Ville la tranquillité dās laquelle elle estoit; qu'ils redoubleroient toutefois leurs soins, pour preuenir, ou rompre les mauuais intentions de ceux qui la voudroient broüiller; que pour cet effet ils commenceroient à faire patrouille dès cette nuict. Et pour monstrier leurs diligences, ils rapportoient à la Cour qu'ils s'estoient saisis de deux soldats, lesquels ils auoient interrogez, & trouvé grande ingenuité dans leurs responses, accordant qu'ils estoient

venus en la Ville prendre party , au bruit qu'on vouloit armer ; qu'un Hoste de la Ville les auoit aduertis de l'arriuée de quatre personnes , qui auoient vn cheual chargé de bagage & d'espées , qu'on croyoit estre voleurs ; qu'ils auoient député vn d'entre eux pour s'en faisir.

Cela sembloit estre satisfaisant , neantmoins le Parlement , qui estoit en grande deffiance de la fidelité des Iurats , ne voulut pas s'arrester à ces discours , & creut qu'il estoit important d'y deliberer , & d'y pourvoir , par le soin des personnes plus affidées. Si bien que les Chambres ayans esté assemblées , & le President Latrenne leur ayant fait le rapport de ce qui s'estoit passé dans la Grand-Chambre avec les Iurats , le sieur de Pontac Procureur General , remonstra à la Cour , que le premier du mois elle auoit donné Arrest à leur requeste , contre les vagabons & personnes sans adueu ; que cet Arrest estoit sans fruit , voire dans le mespris , pour ce que nonobstant , les gens de cette trempe s'assembloient le iour & la nuit ; les vns dans les places publiques , les autres dans les carrefours , avec des armes. En sorte que si on ne rapportoit promptement quelque remède à ce mal , on deuoit apprehender que la tranquillité publique ne fut alterée , pour raison de quoy , il requeroit que pour rendre l'exécution de l'Arrest plus aisée ; il pleust à la Cour députer des Commissaires , pour avec les Iurats , faire la visite des estrangers , qui entroient & sortoient de la Ville. Sur quoy la Cour , les Chambres assemblées , afin de maintenir le repos dans la Ville , & pour faciliter l'exécution de l'Arrest du pre-

mier du mois, ordonna que deux Commissaires de la Cour iroient dans chascque Iurade avec le Jurat d'icelle, faire la visite des maisons, pour sçauoir les personnes qui entroient & sortoient de la Ville, & nommeroient des Dizeniers dans chascune des Iurades, & dans les faux-bourgs, lesquels seroient obligez de porter aux Commissaires chaque iour, la liste du nom des estrangers, qui seroient logez dans leur Iurade. Enjoignit à cet effet aux Hosteliers & autres personnes, qui logent des estrangers dans leurs maisons, de porter tous les iours aux Dizeniers, le nom de ceux qui seroient logez chez eux, & qui en sortiroient. En consequence de quoy les sieurs de Suduiraut, Dufolier, Blanc sieur de Mauvesin, Lescure, Farnoux, Boucaut, Massiot, Massip, Fayard, Thibaut, Dufault & Cursol Conseillers, furent faits Commissaires pour l'exécution de cet Arrest, qui fit tant de bruit auant qu'il ne fut publié, que beaucoup de personnes deslogerent, touchés du remords de conscience, & de l'apprehension de la Police de cet Arrest, duquel l'exécution fut différée pour quelques iours par la mauuaise intelligence, qui estoit dans le Parlement, & dans l'Hostel de ville; car dans le Parlement on auoit differé de le signer; dans l'Hostel de Ville, le Cheualier du Guët, qui doit assister à ces publications, ne paroissoit pas; & ayant esté rencontré, il s'excusa sur ce qu'il n'auoit pas la permission des Jurats. L'un des Jurats interpellé de la fournir, dit qu'il ne le pouoit faire, sans auoir prins l'aduis de ses Collegues. Il fallut enfin assembler la Grand-Chambre & Tournelle, & mander les Jurats pour leur enjoindre

de vive voix, tant il est vray que le deffaut d'intelligence cause de retardement pour les affaires les plus importantes.

IL est fascheux de passer pour criminel quand on se croit innocent. La deputation d'Ardent qu'on disoit nostre, quel déguisement que rapportassent les Jurats, pour obtenir vne abolition, faisoit grande peine aux gens de bien. L'abolition est vne grace du Prince; mais elle presupose le crime de celuy qui s'en sert, dont l'absolution est vne fustissure. Les gens de cœur & les intelligens, ne pouvoient point consentir d'estre emportez par les mauvais sentimens de quelques lâches & ignorans, qui auoient souscrit cette deputation. Le Parlement se trouuant enuelopé dans ce ressentiment general, il estoit iuste qu'il en tirast tous les esclarcissemens necessaires. Labarriere & Lestilles Jurats, furent interrogez separement, sur la verité de la deputation d'Ardent, laquelle ils auoierent, desguisans neantmoins le suiet, & soustenans que ce n'estoit que pour les affaires particulieres de l'Hostel de Ville. On creut le pouvoir apprendre plus certainement par l'original de l'acte, lequel il fut ordonné au Greffier de l'Hostel de Ville de le porter le lendemain; mais au lieu de le faire voir au desfin de l'Arrest, il n'en mit qu'une grosse au pouvoir du Procureur General qui la porta à la Cour, dont elle ne fut pas satisfaite. Clameau fut mandé par des Huissiers, de porter son registre; il chercha des eschapatoires; la Cour le renuoya chercher dans l'Hostel de ville & dans sa maison; on ne le trouua en l'un ny en l'autre endroit; mais on apprint qu'il estoit allé disner dans la maison de

Puypaulinauec le sieur la Roche Capitaine des gardes du Duc d'Espéron. Il ne fallut point aprez cela aller au Deuin, pour sçauoir quel party il tenoit, ny quelles lumieres on pouuoit tirer de la veuë de son Registre.

LE bruit croissoit. Cependant que le principal motif de cette deputation estoit la poursuite de cette abolition, que le Duc d'Espéron vouloit faire prendre à la Ville, sous l'adueu de quelques faux Bourgeois, par l'entremise des Iurats, qui dependoient de luy, on en receuoit par tous les Ordinaires des aduis de Paris. Cela ne pouuoit plus estre dissimulé; il ne s'agissoit donc que de sçauoir si c'estoit le sentiment de la Bourgeoisie, de laquelle la plus grande partie murmuroient hautement contre ce procedé, & desapprouuoient ces secretes pratiques des Iurats, qui, au lieu de chercher des moyens à iustifier les actions de ceux, pour le salut desquels ils deuoient vueiller, les engageoient à s'auoier criminels, combien qu'ils creussent auoir esté tousiours innocens. Le Parlement trouua à propos de faire vne assemblée generale de la Ville au son de la cloche, & commit Messieurs Pichon President pour y presider, & faire la proposition, Farnoux & Boucaud Conseillers, & Dufault Aduocat General pour y assister. Les Iurats furent mandez pour donner ordre à la conuoquation de cette assemblée. Lestrilles alla seul à la Cour sans Colleague, dequoy il fut blasmé, pource que suiuant la pratique en ces rencontres, ils doiuent estre deux pour recevoir les mandemens de la Cour. Neantmoins comme il representa qu'il luy seroit bien malaisé de rencontrer à cette heure quelqu'vn de ses Collegues, le Pre-

fidant Latrenne luy fit entendre la deliberation de la Cour, & luy enioignit d'y trauailler promptement, sans chercher de deffaitte, ou des pretextes pour retarder l'assemblée. Mais quelques diligences que fissent les Commissaires, ils ne sceurent obliger les Iurats à faire cette conuoquation. En sorte que le lendemain le President Pichon s'en plaignit à la Cour, & remonstra qu'il auoit enuoyé à l'Hostel de Ville, par l'aduis des autres Commissaires ses adjoints, Cauaille Huissier, sçauoir des Iurats s'ils auoient satisfait à ce que la Cour leur auoit ordonné, lequel leur rapporta que l'entrée de l'Hostel de Ville luy auoit esté refusée par huit ou dix soldats du Guet, qui luy dirent qu'ils auoient deffences expresse des Iurats de laisser entrer qui que ce fust; que Valadon, l'un des Cheualiers du Guet, s'estant par aprez présenté, luy dit qu'il auoit ordre de refuser l'entrée aux Commissaires mesmes de la Cour, iusques à ce que les Iurats fussent assemblez; que toutetois ayant souffert qu'il entrast, aprez beaucoup de contestations, il alla dans la Chambre du Conseil, où il trouua Niac & Bechon deux des Iurats, auxquels il exposa sa charge, & luy firent responce qu'ils n'auoient rien à luy dire iusques à ce que leurs Collegues fussent arriuez; que peu de temps aprez le retour de Cauaille, Labarriere & Lestrilles estans allez chez luy, remonstrerent aux Commissaires, qu'il estoit vray qu'ils n'auoient peu consentir à faire cette assemblée, pource qu'elle choquoit l'autorité des Iurats, en ce qu'ils sont en possession de faire toutes les propositions dans l'Hostel de Ville, que s'il auoit esté pratiqué, au contraire pendant les troubles,

c'estoit vndroit que le Parlement auoit prins sur eux, en vn temps de confusion, qui ne pouuoit pas faire consequence pour l'aduenir, & moins en ce temps, auquel cettē mesme autorité des Iurats estoit entierement restablie; que s'il falloit assembler la Bourgeoisie, ce n'estoit pas seulement par leur ordre que cela deuoit estre fait, mais aussi qu'ils en deuoient sçauoir le suiet, faire la proposition & recueillir les voix, & qu'encore ils ne pouuoient estre contraincts de dire leurs aduis separément, mais bien par la bouche d'un seul; qu'ils auoient prié Messieurs les Commissaires de trouver bon que l'assemblée fut differée, iusques à ce qu'ils eussent instruit la Cour de leurs raisons. Le President Latrène adiousta à cette relation que les Iurats estoient allez le mesme iour dans sa maison, qu'ils l'auoient traité avec des discours plus defferens & plus respectueux, & luy auoient demandé la mesme grace que la iustice accorde à la moindre personne, de faire en sorte que la Cour les ouyst: ce qu'il leur accorda.

LES Iurats frapperent à la porte de la Chambre; pendant qu'on traittoit cette affaire. A mesme qu'ils furent entrez, Labarrière assisté de Lestrilles son Collegue remonstra à la Cour, que l'affaire estant tres-importante, elle meritoit vne audience fauorable; qu'ils la supplioient de ne les considerer pas comme des personnes priuées, mais bien comme celles qui estoient marquées d'un caractere public, & qui auoient l'honneur de porter la liurée de la Magistrature; qu'ils protestoient de ne rien dire qui peult blesser le respect qu'ils deuoient à la Cour, ny alterer l'ordre que leurs Collegues leur auoient

auoient donné par escrit ; qu'il estoit vray que le sieur Lestrilles ayant fait entendre à tous les lurats, que la Cour auoit indit vne assemblée generale de releuée, & qu'elle auoit nommé Messieurs le President Pichon, deux Conseillers & vn des gens du Roy, pour y faire la proposition, ils furent trouver Monsieur le President Latrenne, & quelques autres de Messieurs, pour leur faire entendre les raisons par lesquelles ils estimoient que cette assemblée ne se deuoit point faire, dautant que connoissant les esprits tous esmeus, & qu'ils s'aigrissoient plus fortement tous les iours, par des mauvais discours, que semoient des factieux, & des personnes mal intentionnées pour le bien du public, ils apprehendoient de retomber dans les desordres passez, & troubler par cette assemblée, le calme de la tranquillité publique ; qu'on auoit voulu persuader au peuple, que les lurats auoient deputé le sieur Ardent leur Colleague au Roy, pour obtenir au nom des Bourgeois vne abolition des esmotions passées, & vne euocation generale des causes de la Bourgeoisie ; que c'estoit vn artifice pour les exposer à la haine publique ; que bien esloignez d'auoir iamais eu cette pensée, ny de l'auoir pour l'auenir, ils estoient sur le point de demander à la Cour permission de faire publier vne Ordonnance, contenant cette declaration qu'ils estoient prêts de signer, la suppliant d'agréer, en cas qu'elle persistast dans la resolution de cette assemblée, qu'ils ne s'y trouuassent point. Ces discours finis, ils furent interpellés de declarer s'ils auoient leur ordre escrit, & de le faire voir ; mais comme Labarriere ne l'auoit pas sur luy, il l'alla

chercher, & le remit en original sur le Bureau de la Cour, qui, apres auoir meurement deliberé, rendit l'Arrest qui suit.

S*UR* ce qui a esté représenté à la Cour, les Chambrés assemblées, par Labarriere & Lestrilles Jurats, Qu'il y a certaines personnes mal affectonnées à la tranquillité publique, qui sement des discours dans la Ville au suiet d'Ardent Jurat, presupposant qu'il soit pour demander abolition au nom des Jurats & de la Bourgeoisie, & vne euocation generale des causes des Bourgeois de Bourdeaux; jàçoit que les Jurats n'ayent donné aucun ordre pour ce regard, ny autre semblable, & n'ayent intention de le faire, qu'aucontraire ils soient à mesme de demander permission à la Cour de faire publier vne Ordonnance, pour detromper les peuples de cette pensée, & preuenir les desordres que tels discours forment dans la Ville, au prejudice du seruice du Roy & du repos public. Et ouïy le Procureur General du Roy, **LA COUR**, attendu la declaration des Jurats inserée au Registre, a differé au premier iour l'assemblée ordonnée estre faite dans l'Hostel de ville. Et cependant fait inhibitions & deffences à toute sorte de personnes, de quelque qualité & cōdition qu'elles soient, de parler d'abolition & euocation generale, comme contraires à l'intention des Bourgeois & habitans de

la Ville, & de semer tels discours & autres semblables, prejudiciables au service du Roy, & à la tranquillité publique, à peine d'estre procedé contre les contrevenans comme perturbateurs du repos public. A ces fins ladite Cour ordonne qu'il en sera informé par le ministère du Procureur Général du Roy, devant les Commissaires deputez par la Cour. Et que le present Arrest sera leu, publié & affiché dans tous les cantons & carrefours accoustumez de la presente Ville. Enjoint aux Jurats d'assister à la publication. Fait à Bourdeaux en Parlement les Châmbres assemblées, le sixième iour du mois de Juillet mil six cens quarante-neuf.

LE même iour l'Arrest fut leu & publié par les Huissiers de la Cour, assistant Richon Jurat, accompagné du Cheualier & des Archers du Guet.

C H A P I T R E V I I I.



ON apprint à Bourdeaux que le sieur de Comminges, Capitaine des gardes de la Reyne, estoit allé trouver le Duc d'Espéron de la part du Roy. On parloit diuersement du suiet de son voyage. Les vns creurent qu'il estoit venu à dessein de traiter quelque accommodement par des conferences; les autres, qu'il estoit por-

teur des Lettres d'abolition, que le Duc d'Espéron auoit demandé pour ceux de Bourdeaux à Monsieur le Chancelier avec instance. Il feignit de vouloir aller à Bourdeaux, & en auoit donné l'aduis à quelques vns de ses amis & de ses alliez; mais comme en effet il n'auoit point cette pensée, & qu'il ne faisoit courir ces bruits que pour sonder la disposition des esprits, on jugea qu'il ne vouloit pas moins fourber que les autres. Le Duc d'Espéron, qui pretendoit aussi retourner à Bourdeaux, & faire passer cette abolition, voulut préparer les habitans à la recevoir, & reconnoissant qu'elle ne seroit pas agreable, tout autant que la Bourgeoisie demeureroit vnüe dans les interets du Parlement, il fit effort pour destacher les Bourgeois d'avec les Conseillers. Les Iurats, le sieur de la Roche Capitaine de ses gardes, Giac Intendant de sa maison, & quelques Bourgeois mal intentionnez pour le bien de leur Ville, taschoient à pratiquer les esprits de tout le menu peuple, faisant entendre iusques dans la moindre boutique du plus chetif Artisan, que le Duc d'Espéron estoit plain de bonté pour eux; qu'il leur juroit amitié, & ne vouloit rien faire qui ne leur fut agreable & salutaire. Ces emissaires employoient les journées entieres à estaler leur Rhetorique, tantost dans vn quartier, tantost dans l'autre, mais presque sans fruit, tant l'auersion que les habitans de Bourdeaux auoient contre le Duc d'Espéron, auoit jetté de profondes racines dans leur cœur. La nouvelle qui fut portée que les deputez du Parlement, au lieu d'auoir audience de leurs Majestez, auoient esté releguez à Senlis, ne contribua pas peu à

irriter cette aigreur. Le Parlement assembla les Chambres, pour sçauoir ce qu'il auoit à faire sur ce nouveau suiet. On fit sortir le sieur de Montesquieux Conseiller, pource qu'il estoit gendre du premier President, à qui on imputoit la cause de ce mauvais traitemēt. Les propositions qui furent faites pour cette affaire, ne purent estre résolues dans l'assemblée du matin, elles furent continuées de releuée, où il fut arresté que le Roy feroit tres-humblement supplié de donner audience favorable à leurs deputez; que pour cet effet, il seroit escript à Messieurs les Princes & Ministres d'Estat, & en cas qu'ils ne peussent point estre ouys, qu'ils reuiendroient faire leurs Charges, sous le bon plaisir de sa Majesté; qu'il seroit fait plainte du traitement qu'ils auoient receu, & que ceux-la reuenans, on ne pourroit pas en renuoyer d'autres.

L'abolition ne pouvoit plus estre dissimulée, tout le monde la sçauoit. On ne la consideroit que comme vn voile, dont on couvroit la face des crimes qui auoient si long-temps, & si impunement triôphé de l'innocence, comme vn chaos dans lequel la vertu & le vice estoient confonduës pesse-messe, comme vne tache infame, qui flattrissoit esgalement les meschans & les gens de bien. Le gros des habitans s'en plaignoit, sur le mesme temps que les Iurats escriuirent au Duc d'Espernon que tout rioit à son dessein; qu'ils estoient les Maistres de la Ville; que ses emissaires luy donnerent aduis qu'ils luy auoient acquis les affections du peuple de Bourdeaux; qu'il pouvoit se promettre que par son retour dās la Ville, il asseureroit quelques cœurs chancelans, & que

disposant de la Bourgeoisie en la sorte qu'il voudroit, il luy seroit aisé d'abbatre l'autorité du Parlement. Le Procureur General, qui doit estre le surueillant aux interets du service du Roy & du bien public, voyant que cette abolition faisoit vn effet tout contraire, s'en plaignit, pour empescher cet enregistrement qu'on proposoit de faire contre les formes, au Greffe de l'Hostel de Ville, & obtint l'Arrest que voicy, rendu les Chambres assemblées.

SV R ce qui a esté représenté à la Cour, Qu'au prejndice del' Arrest du 16. du present mois, interuenu sur les remonstrances des Jurats de Bourdeaux, pour arrester les discours d'abolition, & autres semblables, contraires au bien du service du Roy & au repos public, pour les raisons contenues audit Arrest, publié le mesme iour, diuerses personnes se jactent auoir obtenu Lettres d'abolition, contre la Declaration des Jurats, & sans l'aduen des Bourgeois & habitans de la Ville, & lesquelles Lettres ne pourroient auoir esté obtenues qu'à dessein d'éuiter par ce moyen l'execution des Decrets ordonnez par la Cour, à la requeste du Procureur General du Roy, pour les volleries, violemens, boute-feux, sacrileges & autres cas enormes & execrables, commis dans la Prouince, & ez environs de cette Ville, & reietter leur crime sur ceux, qui ont tousiours esté dans l'inuiolable fidelité du service du Roy. Et en-

core au mespris de la justice souveraine, proposent l'exécution de ladite abolition, par des voyes contraires aux Ordonnances Royaux, Edicts & Declarations du Roy: ce qui trouble la tranquillité publique, & donne occasion à de pareils desordres à ceux que les Jurats rapportèrent à la Cour, ledit iour 16. de ce mois, & rendent inutiles les soins qu'elle a prins pour les arrester, si la Cour par sa prudence ne tasche d'y pourvoir. Et ouï sur ce le Procureur General du Roy, LA COUR, fait comme autrefois deffences à toutes personnes, de quelque qualité & condition qu'elles soient, de parler d'abolition & autres choses semblables, qui pourroient troubler le repos & la tranquillité publique, conformément à l'Arrest du 16. du présent mois; Ordonne que les informations seront continuées contre les contreuenans, & que les Lettres d'abolition, si aucunes ont esté obtenues, seront rapportées & remises deuers le Procureur General du Roy, pour icelles veües y estre pourueu ainsi qu'il appartiendra. Et cependant fait ladite Cour inhibitions & deffences aux Jurats de Bourdeaux & tous autres, d'enregistrer ny publier aucunes Lettres d'abolition, & de faire d'assemblée pour raison de ce dans l'Hostel de ville ou ailleurs, à peine de nullité, & telle autre que de droict. Ordonne qu'à la diligence du Procureur General du Roy, tous decrets seront executez, & le procez fait aux coupables desdites voleries publiques, violemens, bonte-

feux, impietez, sacrileges, & autres cas execrables, selon la rigueur des Ordonnances. Enjoint à tous Officiers & suiets du Roy d'y tenir la main. Et sera le present Arrest leu, publié & affiché par les cantons & carrefours accoustumez de la presente Ville. Fait à Bourdeaux en Parlement les Chambres assemblées, le vingt & vniesme Iuillet mil six cens quarante-neuf.

IL ne fut pas possible de faire assister les Jurats à la publication de cet Arrest, ny de fournir le Guet, & les Trompettes de la Ville, il choquoit l'engagement qu'ils auoient desia fait au Duc d'Espéron, & les paroles qu'ils luy auoient donné pour l'affection de la Bourgeoisie. Les Huissiers le publierent sans la ceremonie ordinaire, sur le mesme temps que le Duc d'Espéron entroit dans la Ville, & à l'ouye de la pluspart de son équipage, qui iugea par vn *Vue le Roy & le Parlement*, que le peuple fit hautement resonner, que tous les cœurs n'estoient point attachez aux inclinations du Duc leur Maistre. Le Parlement fut aduertty par ses deputez, qu'un Huissier à la chaisne estoit party pour l'interdire. Il falut preuenir ce coup, non seulement pour le rendre moins surprenant, mais aussi pour aller au deuant des desordres qu'il pouuoit causer. Il fut donc arresté que les sieurs de Pomiers Doyen, d'Espagnet & Duval, s'assembleroient chez le President Latrenne, pour voir ce qu'il seroit à propos de faire; & cependant que les Commissaires iroient chascun dans son quartier faire la

visite

visite des personnes sans adueu, suiuant que la Cour auoit desia ordonné, & qu'ils fairoient par mesme moyen comprendre aux Bourgeois la dangereuse consequence de cette abolition, & la ruyne euidente de la Ville que caueroit cette Interdiction. Le Duc d'Espernon de son costé entra dans l'Hostel de ville, où s'estoient rendus quelques Bourgeois de longue & courte robe, que les Iurats auoient inuitez à cette ceremonie; & apres auoir prins sa place dans vne chaise, il fit vn recit assez court, des troubles que les desordres passez auoient causé, & leur dit que ces mal-heurs auoient esté tousiours fort esloignez de ses intentions, qui n'estoient autres qu'à cherir les Bourgeois, desquels il estoit le premier; Qu'il n'auoit basti la Citadele de Libourne que par des puissantes considerations, qui auoient porté le Roy à luy en donner le commandement, enuers lequel il se rendroit le mediateur, pour la mettre à bas, & oster tout l'ombrage que son esleuation & sa subsistance pouvoient donner; Que choquant le seruice du Roy, & ayant prins les armes, au contraire on s'estoit rendu criminel. Neantmoins que Sa Maiesté auoit eu assez de bonté pour donner à sa priere vn pardon general pour la Ville, & la mettre en estat de jouyr d'une longue & agreable paix, tout autant que les habitans se maintiendroient dans l'obeyssance que l'on deuoit au Roy. Labarriere l'un des Iurats, portant la parole pour ses Collegues & les Bourgeois qui l'assistoient, representa que la presence de son Altesse (ce fut avec cet abaissémēt qu'il le traitta) faisoit changer de face à cet Hostel de Ville, qui estoit rendu saint de pollu qu'il estoit au-

parauant, par tant de mauvaises pratiques qui s'y estoient faites; Qu'il esperoit voir germer l'oliue en ce lieu, que les desordres passez auoient infecté; Que les Bourgeois protestoiēt qu'ils n'auroient à l'aduēir de defferēce que pour ces commandemens, ny d'obeyssance & de fidelité que pour le seruice du Roy; Que la paix & le pardon que son Altesse faisoit esperer, estoit vn ouvrage sensible de sa bonté, pour la reconnoissance de laquelle les habitans rendroient tous les temoignages possibles. Ces harangues firent quelque impression sur quelques vns de ceux qui les oyoient; mais elles animerent aussi sensiblement au reste de la Ville, la haine & le mespris contre la bassesse des Iurats.

F I N du Second Liure.





LIVRE TROISIEME.

Chapitre Premier.



OMBIEN que les ames genereuses ne redoutent point les coups de la fortune, & qu'elles soient preparées à ses vischitudes comme au changement des saisons, elles passeroient pour temeraires, si elles s'exposoient aueuglement à toutes ses rigueurs, ou pour insensibles, souffrant ses disgraces sans marquer du ressentiment. C'est pour cela qu'il est également del'interest de cette generosité d'aller avec prudence au deuant du coup qui la menace, & de le recevoir avec vne fermeté que la raison produit. Le Parlement sceut par diuers aduis que les Huiffiers à la Chaisne estoient arriuez pour interdire la pluspart de ses Officiers; Que ce carreau n'estoit lancé que sur la teste de ceux, qui auoient soustenu avec vigueur les interests du

Roy & du public ; Qu'on pretendoit en garantir les autres, desquels on n'estoit satisfait, que pource qu'ils auoient esté lasches. Il fallut consulter la raison, suiuant de la justice, pour parer à ce coup, s'il pouvoit estre destourné, ou pour en estourdir l'effort, s'il estoit inéuitable. Les Chambres s'assemblerent, & apres auoir longuement opiné, elles demeurerent d'accord, qu'aucune proposition ne seroit receuë, ny pas vne deliberation prinse sur les affaires passées, ou celles qui regarderoient l'honneur & la dignité de la Compagnie, tout autant que les Officiers de la Cour, qui seroient compris dans cette Interdiction, se trouueroient absens ; Et que ceux qui n'auoient point assisté aux dernieres deliberations, pour les causes couchées dans le Registre, ou qui s'estoient absentez volontairement & sans permission de la Cour, ne seroient point receus à donner leurs aduis, pour les deliberations qui deuroient estre prinse sur les affaires qui se presenteroient, estant estroitement deffendu à tous les Officiers lors presens, de s'absenter sans permission de la Cour. Cette resolution estoit adroite & juste. Les genereux declinoient le jugement des lasches, & retenant les presens avec eux, se fortifioient par le nombre enuélépé dans vn mesme reuers contre l'effet de cette Interdiction, qui autrement eust outragé les vns, & n'eust que menassé les autres.

Le Duc d'Espemon, qui ne croyoit pas qu'on peust descouvrir sa pensée, ny penetrer le fonds de son dessein, qui n'estoit autre que de se rendre le Maistre de la Ville, par les artifices d'un amour desguisé, charmant

la Bourgeoisie, sous l'appast d'une grace & d'une abolition, & par l'appareil de la violence, forçant la justice par la terreur d'un Anathème & d'une Interdiction, donna ordre aux Jurats d'assembler le lendemain dans l'Hostel de Ville les Bourgeois & tous les habitans, par billets & au son de la cloche, pour entendre des propositions, qui regardoient le service du Roy & l'intérêt public, qu'il vouloit faire en personne. C'estoit ainsi que les billets estoient conçus.

CETTE façon de convoquer, comme extraordinaire, esmeut la curiosité d'un chacun d'en sçavoir le sujet. Par avance on apprit qu'il vouloit faire lire & registrer au Greffe de l'Hostel de Ville une abolition des desordres passez, pour laquelle il vouloit persuader à la Ville, qu'elle estoit fort redevable aux soins qu'il avoit prins pour l'obtenir avec peine de la bonté du Roy. Et afin que cet enregistrement se fît avec plus de pompe, attendant que l'assemblée fût nombreuse, il alla ouyr Messe dans le Convent des grands Carmes, suivi de deux à trois cens chevaux. Mais comme les habitans ne vouloient point de cette abolition, qui leur estoit injurieuse, de prez de deux mil qui furent convoquez, il n'y eust que sept ou huit personnes affectées qui s'y rendirent. Il enuyoit par temps voir si cette troupe grossissoit; mais inutilement. Si bien que voyant que les assurances que les Jurats & ses Emissaires luy avoient donné de la disposition des Bourgeois à recevoir cette grace, estoient des vaines esperances; & qu'il n'estoit pas au pouvoir de ceux qui commandent les peuples, de promettre leurs cœurs quand ils n'en sont point aimez,

la cholere le saisit & remontant à cheual il alla à l'Hôtel de la Bource, où les Huissiers à la Chaisne l'attendoient pour faire leur Commission, lesquels apres auoir conferé & prins ses ordres, allerent au Palais avec leurs rocques, leurs robons & leurs Chaisnes, conduits par le sieur de Comenges. Ils furent suiuis de bien prez par le Duc d'Espéron, qui laissa sa Cauallerie en deux escadrons au deuant la porte du Palais; vne partie de ses Gardes au dedans, vne autre bigade le long de l'escalier, & encore vne autre partie qui marchoit au deuant de luy, avec laquelle il monta dans la grand-Sale, accompagné du sieur d'Argenson, & quarante à cinquante Gentils-hommes, comme on estoit sur le point d'ouuoir l'Audience de la Tournelle. La Sale estoit remplie d'Aduocats, Procureurs & de Parties poursuiuant. Chascun se pressoit par la curiosité qu'on auoit de voir cette ceremonie. La presse le faschoit. Il commanda son Capitaine des Gardes de jouier du baston. Cette façon d'agir choqua si fort l'esprit des spectateurs, que les Clercs commencerent à crier *Aux armes, on viole la Justice*, & traissant avec eux le reste de la foule, ils en firent blesmir des plus asseurez, & ceux d'en bas n'eurent pas moins de frayeur quand ils virent qu'on fermoit les boutiques.

Les Huissiers à la Chaisne fraperent à la porte de l'Audience. Vn Huissier de la Cour alla porter l'aduis à la grand-Chambre, qui commanda de les ouuoir, & au Greffier d'aller mader les autres Châbres. Soudain que les portes furent ouuertes, ces Huissiers à la Chaisne entrerent en la grand-Chambre avec le sieur de Comen-

ges Capitaine des Gardes de la Reyne, ayant l'espée & les esperons & vn baston en main dont la poignée estoit d'yuoire, accompagné d'un Exempt des Gardes, & suivi d'une foule des domestiques du Duc d'Espernon, l'espée au costé, bottez & esperonnez, & le chapeau en teste, qui pousserent en esuentez avec violence jusques au milieu de la grand-Chambre, & se saisirent de la porte. Ensorte que Messieurs qui estoient mandez ne pouvoient point entrer; dequoy le President Latrenne s'aperceuant, les obligea de laisser l'abord libre pour assembler les Chambres. Cela fait, Messieurs estans placez, le sieur de Comenges prenant la parole, leur dit qu'il estoit là de la part du Roy. Surquoy à même temps il luy fut donné place au Bureau. Mais comme on rapporta à la Cour, que beaucoup de gens armez estoient entre les Chambres; Qu'il y en auoit encore beaucoup dans la Salle d'Audience avec le Duc d'Espernon, & que ses Gardes estoient iusques à l'entrée de la Chambre des Huissiers de la Cour, le President Latrenne estant à la teste de cette Compagnie, fit entendre au sieur de Comenges & aux Huissiers à la Chaisne, qu'ils n'auoient point besoin d'escorte pour porter des Ordres & des Commandemens de Sa Majesté en vn lieu, qui scauoit les recevoir avec respect, & les faire executer avec vne parfaite obeyssance; Que la Cour ne pouvoit point souffrir de se voir opprimée en cette sorte, & qu'on fit tant de violence à la justice souveraine du Roy. Les Huissiers s'excuserent, disans que ces personnes les auoient suivis sans les y auoir appellez. Le sieur de Comenges fit retirer les domestiques du Duc d'Espernon,

qui piquez de ce commandement, furent assez insolens pour dire à haute voix qu'il falloit remercier le sieur de Comenges ; & ayant rencontré à leur sortie quelques-uns de Messieurs qui n'auoient peu entrer, ils ne se contenterent pas de les repousser avec mespris, les chargerent d'injures & de menasses ; & passant de cette insolence à vne autre, l'un d'entr'eux fut si effronté que d'en saisir vn par la robe, & porter l'autre main sur la garde de son espée ; mais l'ayant tirée à demy, le sieur de Bordes la luy saisit ; Et possible que ce braue Espernoniste eust esté mal traité, sans le respect du lieu, par les sieurs d'Espagnet & de Bordes Conseillers, qui l'entreprindrent bien genereusement.

LA Parole fut couppee aux Huissiers qui commençoient à lareprendre, quand le President Latrenne leur dit qu'ils ne seroient point escoutez, que plustost le Duc d'Espernon, & ceux qui auoient inuesti le Palais, ne fussent retirez ; Que la justice du Roy deuoit auoir du moins cet aduantage de jouyr de sa premiere liberté. Le sieur de Comenges & le Procureur General sortirent de la grand-Chambre, pour obliger le Duc d'Espernon & ses gens de faire retraite. Mais ils ne peurent obtenir de luy que quelque desmarche vers la porte de la Sale d'Audience, tant il luy estoit fascheux de quitter vne place, dans laquelle il sembloit qu'il se deust cantonner. Neantmoins le sieur de Comenges rapporta à la Cour que le Duc d'Espernon alloit sortir, & poussant sa fierté plus auant, il dit à ces Messieurs qu'il falloit obeyr, non pas deliberer : ce qui donna sujet au President Latrenne de le prier par l'autorité que le Roy luy auoit

auoit confié, de rendre la liberté à cette Compagnie ; Que cette violence n'estoit pas seulement injurieuse aux Ordres de Sa Majesté, qui estoient retardez ; mais aussi au respect que la Cour a tousiours eu pour leur execution ; Que luy accordant ce qu'elle demandoit, il trouueroit cette vérité confirmée par l'obeyssance du general & du particulier de ceux qui la composent. Le sieur de Comenges voulant donner cette satisfaction à la Cour, sortit encore pour faire retirer le Duc, & estant reuenu & assuré qu'il s'en estoit allé, la Cour jugeant que le sieur de Comenges auoit assez de complaisance pour ne le presser pas, & que le Duc d'Espernon estoit d'une humeur assez opiniastre pour contester le terrain, nomma des Commissaires, pour, avec le Procureur General, voir si le Palais & ses entrées estoient libres, lesquels rapporterent qu'ils l'auoient veu enuironné de gens de guerre tant à pied qu'à cheual, & le Duc d'Espernon à leur teste, qui estoit arresté à demy escalier. Il falut que le sieur de Comenges fit vn autre voyage, pour l'obliger à quitter entierement la place, laquelle il abandonna plustost qu'il n'eust voulu ; d'autant que pendant tous ces differens, le peuple, qui s'estoit esmeu, se ramassoit pour courir au Palais, venger l'outrage qu'on faisoit à la Iustice. Les habitans de la Chapelle S. Iean estoient desia sous les armes, & dressoient des barricades pour renfermer cette Cauallerie. Ceux du quartier de S. Pierre auoient chargé Filouze, Major du Chasteau Trompette, qui faisoit rouler du canon au Palais, & l'obligerent de se retirer à grande haste dans le Chasteau, d'où il estoit sorti avec cent cinquante hommes. Et le

sieur de Roquette, Ministre des passîons du Duc, s'estant voulu mesler de faire le hola, receut des coups de pierre qui le firent aller plus viste que le pas, aduertir le Duc que tout estoit perdu pour luy. Il ne falut point de plus fort commandement pour sonner la retraite. Quelques-uns de ses Caualliers s'en allerent d'ouye; les autres abandonnerent leurs cheuaux & leurs armes. La frayeur faist si estrangement le Duc d'Espernon, que luy ostant la couleur du visage, elle luy osta la force de monter à cheual. Il fut remarqué tremblottant, & sans le secours de ses gens, qui le mirent sur la selle, il fust allé à pied. Il estoit deuancé par son Aumosnier, qui preschoit la paix dans les rîes, & crioit que tout estoit d'accord, pendant que son Maistre haussait les yeux, non pastant vers le Ciel, comme vers le haut des maisons, apprehendant d'en receuoir quelque coup fatal.

CETTE esmotion fit bruit jusques dans la grand-Chambre, d'où la Cour fit sortir deux Commissaires & le Procureur General, pour appaiser le peuple, & visiter les enuirs du Palais, pour sçauoir si le Duc d'Espernon auoit entierement quitté. Leur presence seruit beaucoup pour esteindre le feu qui s'allumoit. Alors la liberté renduë à la Cour, reestablit la Iustice en sa premiere Majesté. Le President Latrenne rappelant ce que le sieur de Comenges luy auoit desia dit; Qu'il estoit venu de la part du Roy, luy demanda de faire voir ses Ordres à la Cour; à quoy il respondit qu'ils estoient attachez à son Baston & à son Caractere; Qu'il estoit chargé de tenir la main à l'execution des volontez de Sa Majesté, qu'ils apprendroient par la bouche des Huiſ-

sers qu'elle auoit enuoyé. Il luy fut reparti que la Cour estoit bien informée du merite de sa personne, & de l'importance de sa Charge; Que le Parlement se conduisant par des formes, il ne deuoit pas trouver mauvais qu'on vid jusques où s'estendoit son pouvoir; Que c'estoit la pratique des Compagnies souveraines d'examiner les Charges de ceux qui s'aduoient au Roy; Et d'autant plus que sur ce qu'il auoit remonstré qu'il venoit de sa part, le traitrant en son Commissaire, la Cour luy auoit donné vne place, en laquelle il ne pouvoit auoir droit sans cette qualité. Si bien que se voyant pressé du costé de la forme, & par le respect que la Iustice inspire pour elle-mesme, il tira de sa pochette vn parchemin seëllé, disant que c'estoit sa Commission, de laquelle il ne pouvoit faire voir la teneur. Il luy fut dit qu'il la falloit remettre entre les mains du Procureur General. Surquoy ils sortirent tous deux, & peu de temps aprez estans rentrez ensemble, le Procureur General rapporta qu'il auoit veu cette Commission, qui portoit que le Roy enuoyoit le sieur de Comenges dans la Prouince, pour faire executer ses Ordres. Ce rapport ne satisfit pas la Cour. Il ne suffisoit pas que le Procureur General en eust eu la communication. Les formes desiroient quelle fust veüe & leuë publiquement dans la Chambre. On prie le sieur de Comenges de la vouloir remettre sur le Bureau. Il s'excuse, sur ce qu'elle portoit des choses qu'il n'estoit pas necessaire de voir. Cela mesme donnant des ombrages à la Cour, fit redoubler sa sollicitation pour en permettre la lecture. Mais enfin le sieur de Comenges ne voulant pas souffrir

qu'elle fust leuë, & ne pouvant resister à cette douce violence, sortit, & abandonna la seance qu'il n'auoit pas long-temps gardée.

LES Huissiers à la Chaisne resterent dans la Chambre, auxquels le President Latrenne commanda de faire leur deuoir. Et sur ce temps ayant mis leurs tocques à la main, l'un d'iceux prononça ces parolles, *Messieurs, Nous sommes icy de la part du Roy, vostre tres-honoré & Souuerain Seigneur & Maistre & le nostre, pour vous porter ses Ordres, que vous verrez par la Declaration que nous auons en main, de laquelle nostre Compagnon d'Office vous fera la lecture.* Finissant ce discours il la remit en la main de son Compagnon, qui la desuelopant, aprez s'estre tous deux couverts, se print à la lire hautement. C'est sa teneur.

DE PAR LE ROY.

LOVYS par la grace de Dieu Roy de France & de Nauarre, A tous ceux qui ces presentes Lettres verront, Salut. Les entreprises faites sur nostre authorité par les Gens tenans la Cour de Parlement de Bourdeaux, nous auoient donné assez de sujet de leur faire ressentir les peines que meritent leurs fautes. Mais le desir que nous auons tousiours eu de conseruer nos Sujets dans le repos, & de retrancher toutes les occasions qui pourroient l'interrompre, nous auoient tenté à tenter toutes les voyes

de prudence & de bonté, pour ramener les Officiers de nostre dite Cour de Parlement dans leur deuoir, plus tost que de les traiter avec la seuerité que meritoit leur mauuaise conduite. Cette consideration nous auoit fait resoudre d'enuoyer le sieur d'Argenson, Conseiller ordinaire en nos Conseils, pour leur faire connoistre nos bonnes intentions, d'oublier ce qui s'estoit passé, & les porter à se despartir des desseins qu'ils auoient assez fait paroistre d'entreprendre sur nostre authorité. Mais au lieu de receuoir la grace que nous leur presentions, ils se sont portez avec plus de passion à continuer d'exciter les mouuemens qu'ils auoient preparez de longue main, & que l'on a veu naistre tout d'un coup avec tant de violence, que si nostre tres-cher & bien amé Oncle le Duc d'Espernon n'eust opposé nos armes, avec le courage, la valeur & la prudence qu'il a fait paroistre en toutes occasions pour nostre seruice, la Rebellion se fust rendue puissante, & eust estendu ses forces dans toute la Prouince. Lors que nous considerons que tous ces mouuemens ont esté excitez par les Officiers qui portent les marques de nostre authorité souveraine, & qui sont preposez pour rendre la Iustice à nos peuples, nous ne pouuons sans estonnement penser que cette rebellion, si injuste & si monstrueuse, soit leur ouvrage. Nous auons fait à cette Compagnie toutes les graces qu'elle pouuoit esperer de nous, en

luy donnant entre autres, & avant qu'elle l'eust demandé, le droit annuel, qui a assésé leurs Charges. Neantmoins lors que l'on leur a enuoyé la Declaration du mois d'Octobre, qui auoit esté concertée avec nostre Cour de Parlement de Paris, au lieu de l'enregistrer, ils ont ordonné des Commissaires pour examiner les impositions qui se leuoient dans la Prouince, pretendans supprimer celles qu'ils n'auoient point verifiées. Et ensuitte ils ont fait deffences de leuer les deux escus par tonneau de vin, qui se leuoient dās la ville de Bourdeaux. Il est vray que l'Arrest porte que se seroit sous nostre bon plaisir. Mais apres leur auoir fait connoistre que l'estat present de nos affaires ne permettoit pas que cette imposition fust entierement supprimée, ils ont par un mespris de nostre volonté, demeuré dans la premiere resolution. Ce n'estoit pas assez d'auoir prins connoissance d'une imposition qui n'estoit point de leur Iurisdiction, ils ont voulu passer plus auant; & faisans les Souverains ils ont reuoké l'establissement de la Cour des Aydes, en leur interdisant la fonction de leurs Charges: comme s'ils auoient le pouuoir de disposer de nostre puissance, & d'abolir ce qui a esté si iustement ordonné par le Roy deffunct, nostre tres-honoré Seigneur & Pere, & supprimer des Officiers, qui ont exercé leurs Charges pendant vingt années sous nostre authorité, à laquelle seule appartient la crea-

tion & la suppression des Officiers. Il ne faut pas trouver estrange toutes les actions déreglées de cette Compagnie, lors qu'ils ont ouvertement entrepris d'usurper un pouvoir qui n'appartient qu'aux Roys seuls. Aussi leur conduite s'est portée à tel excès, qu'après s'estre asseurez des esprits des peuples, par les descharges des impositions qu'ils leur avoient données, ils les ont portez à prendre les armes, sous le commandement de Chambaret leur General. Et voyant que nostre Oncle le Duc d'Espernon avoit fait esloigner nos forces, sur l'assurance qu'ils avoient donnée de mettre les armes bas, & de faire cesser tous actes d'hostilité, ils firent sortir leurs troupes de Bourdeaux, sous le commandement dudit Chambaret, assisté de cinq Conseillers, par l'ordre du Parlement. Ils attaquèrent la place de Libourne, deffendue par nos armes, & donnerent les assauts comme en une place ennemie. Et ensuite ils entreprennent ouvertement de combattre nos troupes, conduites par nostre dit Oncle le Duc d'Espernon, qui s'estoit rendu en diligence pour le secours de Libourne. Et bien qu'il n'eust que la septiesme partie de leurs forces, il remporta la victoire avec tant d'avantage, que ces rebelles furent entierement deffaits & leur General tué sur la place. Il y avoit apparence que les Officiers de nostre dite Cour de Parlement ouvreroient enfin les yeux; pour condamner eux-mêmes la Rebellion qu'ils avoient formée. Mais au

contraire, aprez la perte de Chambaret, ils ont fait choix du sieur de Lusignan pour nouveau General de leurs troupes. Et si les habitans de nostredite Ville de Bourdeaux eussent suivi leurs mouvemens, la rebellion seroit encore puissante. Ils ont bien fait connoistre qu'ils continuoient tousiours dans leurs mauvaises intentions, puis que la Cour des Aydes s'estant reestablie suivant nos ordres en sa fonction, ils cassent l'Arrest de leur reestablissement, comme donné par personnes privées, sans pouvoir ny jurisdiction. Font deffences à toutes sortes de personnes d'y deferer. Et que sous nostre bon plaisir l'Arrest qu'ils avoient donné d'Interdiction de cette Compagnie, seroit executé selon sa forme Et teneur, avec deffences ausdits pretendus Officiers Et tous autres d'y contrevenir, sous les peines portées par ledit Arrest. Leur violence a passé bien plus avant, lors qu'ils font deffences à toutes sortes de personnes de visiter nostredit Oncle le Duc d'Espéron, que les habitans, se remettans dans leur devoir, avoient receu dans nostre ville de Bourdeaux. Et pour plus grande marque de l'averfion qu'ils avoient de nostredit Oncle, ils menassent d'interdire le premier President de nostredite Cour de Parlement, pour l'avoir visité. Et au contraire par leur Arrest ils permettent à Lusignan, General de leurs armées, si nostredit Oncle en voyoit ses Gardes en sa maison, de repousser la force par la force

la force. Enjoignant aux Senéchaux, Vis-sénéchaux, Preuosts, Consuls des Villes & Communautés, de tenir la main à l'exécution de leur Arrest, pour armer les peuples contre la puissance legitime du Gouverneur de nostre Prouince, & les entretenir dans l'esprit de rebellion. Toutes ces actions sont bien esloignées du deuoir de vrais Officiers, qui portent les marques souveraines de nostre puissance; mais plus encore les artifices dont ils se sont seruis, pour porter nos Sujets à prendre les armes contre nous, faisant semer des bruits que l'on vouloit establir la Gabelle dans nostre Prouince de Guyenne. Cependant lors qu'ils veulent persuader nos peuples, qu'ils desirent leur soulagement, ils donnent des ordres aux Communautés pour leuer des deniers, fournir du pain de munition à leurs troupes, prennent les deniers des consignations, pour soutenir les frais des gens de guerre qu'ils auoient mis sur pied. Et enfin, contre nos ordres, ils entreprennent d'ordonner la liberté de la traitte des bleds, moyennant vne imposition qu'ils exigent, pour acquitter les debtes qu'ils ont faites en nous faisant la guerre. Nous n'auons rien obmis du deuoir d'un bon Roy pour preuenir tous ces mouuemens, ayant enuoyé en nostredite Ville de Bourdeaux le sieur d'Argenson, Conseiller en

nos Conseils , pour faire connoistre nos volontez à nostredite Cour de Parlement. Mais au lieu de defferer aux Ordres que nous auions donnèz, pour establir le repos & la tranquillité dans nostredite Prouince , ils les ont raéprisez , & ont mieux aimé tenter de combatre nos armes , que de nous rendre une obeysance si legitime. Il ne faut pas s'estonner si , apres toutes les voyes de douceur , nous prenons enfin resolution de nous seruir de la puissance que Dieu nous a donnée , pour rendre à nostre Estat la justice que nous luy deuons en cette occasion , de ne pas souffrir un si dangereux déreglement , qui attaque les droicts les plus sacrez de nostre Couronne , & qui pourroient enfin esbranler les plus solides fondemens de nostre puissance. Si nos Magistrats oublient ce qu'ils nous doiuent , nous sommes obligez de nous souuenir que nous auons esté establis de Dieu sur eux pour leur commander , & qu'ils n'ont autorité , pouuoir ny Iurisdiction que celle que nos predecesseurs Roys & Nous leur auons donnée. Nous sommes dans cette resolution de conseruer leurs Priuileges , & d'observer religieusement toutes les Loys qui ont esté ordonnées pour les maintenir dans la dignité de leurs Charges. Mais le Parlement deuoit considerer que ces Loix ne sont pas faites pour destruire la puissance &

l'autorité Royale, & la mettre dans le mépris, au lieu d'en affermir le repos. Il est juste que les Juges rendans la justice, soient assurez contre la violence que l'on pourroit exercer contre eux, pour les rendre plus puissans & plus genereux à bien faire, & non pas plus hardis d'attaquer la Royauté, & de faire ouvertement la guerre à leur Roy, lors qu'il leur tend les bras pour les recevoir en sa grace. Les Officiers de nostre Cour de Parlement de Bourdeaux se peuvent-ils plaindre de nostre justice, si, après avoir traité avec tant de mépris nostre autorité, & avoir fait un si mauvais usage de la puissance que nous leur avons déposée, nous la retirons de leurs mains, puisque en mesme temps & sans pouvoir, ils entreprennent pour leur interest particulier, d'interdire une Cour toute entiere de la fonction que nous luy avons donnée. Nous voudrions bien dissimuler toute cette mauvaise conduite; mais nous craignons qu'un si mauvais exemple ne donne la hardiesse d'attenter contre nostre autorité. Les actions des Magistrats sont de grande consequence; elles passent dans le public, qui croit souvent devoir imiter ceux qui leur ont esté donnez pour regle de leur conduite, que les habitans de nostre Ville de Bourdeaux ont reconnues si mauvaises, qu'ils ont député l'un

de leurs Jurats vers nous , pour tesmoigner la resolution qu'ils ont prinse de demeurer dans la fidelité & obeyssance qu'ils nous doient ; & qu'ils condamnent toutes les resolutions du Parlement , avec lequel ils ne veulent auoir aucune participation de ce qui s'Ordonnera contre le bien de nostre seruice. A CES CAUSES ,
 De l'aduis de la Reyne Regente , nostre tres-honorée Dame & Mere , de nostre tres-cher & tres-amé Oncle le Duc d'Orleans , & de nostre certaine science , pleine puissance & authorité Royale , Nous auons par ces presentes signées de nostre main , Interdit & Interdisons les Officiers de nostre Cour de Parlement de Bourdeaux de tout exercice & fonction de Iustice , soit en Corps ou autrement. Dessendons à tous nos Sujets de leur Ressort de les reconnoistre pour Iuges , declarant des à present tous Iugemens , Arrests & autres actes qu'ils pourroient rendre cy-aprez , nuls & de nul effet , & comme donnez par personnes priuées & sans pouuoir , iusques à ce que par nous en ait esté autrement Ordonné. Et d'autant qu'il n'est pas juste que les Arrests donnez cõtre nostre authorité, le biẽ de nostre seruice , & la persõne de nostred. Oncle le Duc d'Espernõ & ses domestiques, demeurèt en leur force & vigueur, Nous auons cassé & annulé, cassons & an-

nulons tous les Arrests donnez par nostred. Cour de Parlement de Bourdeaux, depuis le 26. Ian. dernier iusques à present, tāt en matieres publiques que cōtre la persōne de nostred. Oncle le Duc d'Esp & ses domestiq. Cōmādons aux Huiſſiers de nostre Conseil qu'à ce faire nous cōmettōs, de se transporter en lad. Cour de Parl. de Bourdeaux, & icelle seante & assemblée, leur signifier ces presentes nos Lettres d'Interdiction, leur faisant cōmandement d'y obeyr. Et aux Officiers d'icelle de sortir de ladite Ville de Bourdeaux quatre iours aprez la signification des presentes, sur peine de desobeyſſance, & d'estre procedé contre eux comme rebelles, & contreuénans à nos commandemens. Enjoignons à nostre tres-cher & bien amé Oncle le Duc d'Espéron de donner main forte pour l'execution de nostre presente Declaratiō. Et à tous nos autres Officiers & Suiets d'obeyr aux Ordres qui leur serōt par luy donnez pour cet effet. Car tel est nostre plaisir. En tesmoin de quoy nous auōs fait mettre nostre Sēel à cesd' presentes, données à Compiègne le 12. iour de Juillet, l'an de grace 1649. Et de nostre Regne le septiesme.

Signé, L O V Y S.

Et plus bas,

Par le Roy, la Reyne Regente
sa Mere presente,
PHELIPEAVX.

Et scellé du grand Sceau de cire jaune.

CHAPITRE II.



A lecture de cette Interdiction , & les paroles foudroyantes qu'elle portoit , eussent effrayé des ames criminelles. Mais ces Messieurs , assurez de l'innocence de leurs actions , & de la justice de leur procédé , attendirent pied ferme l'acheuement de cette Commission, qui fust, que le mesme Huissier qui auoit parlé au commencement, se descouvrit avec son Compagnon , apres qu'il eust acheué de lire , & leur dit, *Messieurs, le vous fais commandement de la part du Roy, d'obeyr aux Ordres de Sa Majesté, contenus dans la Declaration dont vous venez d'ouyr la lecture; & de sortir de la Ville dans quatre jours; & laisserent soudain copie de la Declaration sur le Bureau, avec l'exploict de signification, vne autre au Procureur General, & vne troisieme au Greffier de la grand-Chambre pour tous les autres Greffiers.* Apres quoy le President Latrenne les requist de la part de la Cour, de charger leur Verbal des violences faites à la Iustice par le Duc d'Espènon, & des autres desordres qu'il auoit causé, dont ils estoient tesmoins. Et à mesme le Procureur General s'estant leué , declara qu'il estoit opposant à l'exécution de ces Lettres d'Interdiction, pour les raisons qu'il se reseruoit de représenter à Sa Majesté: ce qui donna sujet à la Cour, apres auoir longuement delibéré, d'ordonner que le

Roy feroit informé par les Deputez d'icelle, de ce qui s'estoit passé à ces jours; Que les Registres & les informations seroient enuoyées à Sa Majesté; Que sur l'opposition aux Lettres d'Interdiction, le Procureur General se pouruoiroit deuers le Roy; Que les moyens d'opposition seroient representez par le sieur de Lauie, Aduocat General de Sa Majesté; Que tres-humbles Remonstrances seroient faites sur l'obtention desdites Lettres, par Messieurs de Gourgue President, Monjon & Mirat Conseillers, & Lauie Aduocat General, que la Cour commit & deputa à cet effet. Et que cependant, sous le bon plaisir du Roy, les Officiers de la Cour & Chambre de l'Edict, continueroient l'entrée du Palais, & l'exercice de leurs Charges, pour le bien du seruice du Roy, la conseruation de la tranquillité publique; Qu'enfin le Roy feroit tres-humblement supplié d'agréer l'Arrest qui suit.

SVR ce, que ce jour-d'hy les Officiers de la Cour s'estans rendus dans le Chasteau de Lombriere, lieu destiné par le Roy pour l'establissement du Parlement, pour y rendre sa justice souveraine à ses Sujets de la Prouince de Guyenne, lesdits Officiers estans chacun dans leurs Chambres ordinaires à la Tournelle, sur le point d'auoir l'audience Criminelle, le sieur Duc d'Espernon seroit venu dans le Palais accompagné de deux cens hommes armiez, lesquels il auoit fait aduancer iusques à la porte de la grand-Chambre du Conseil, & occupé la Sale de

l'Audience criant Tuë, Tuë : parmy lesquelles personnes armées ont paru ceux , qui par l'enormité de leurs crimes ont esté cy-deuant decretez par la Cour, & pour le mespris de la justice ont mis l'espée à la main, & fait outrage aux Officiers de la Cour , qui les ont voulu exhorter à se retirer. Et dans ce temps ledit sieur d'Espernon auoit fait sortir du Chasteau Trompette deux cens hommes de guerre, qu'il fit glisser par des petites rues le long des murs iusques au proche du Palais, y faisant traifner vne piece d'artillerie, & auoit fait barricader par vn autre costè les issues du Palais, à ce point qu'il a esté iuesti & occupé au dedans & au dehors; Et à mesme temps sont venus dans ladite grand-Chambre deux Huisfiers du Conseil, portans les commandemens du Roy, lesquels, accompagnez de sept ou huit domestiques du sieur Duc d'Espernon armez, inter-pellez si c'estoit la volonté de Sa Maiesté & leur ordre d'en vser de la sorte que le sieur Duc d'Espernon auoit fait, ne pouvant pas douter que les commandemens du Roy ne soient receus par la Cour avec le respect & soumission qu'elle doit, auoient tesmoigné qu'ils n'auoient ny cet ordre, ny le moyen d'empescher que le sieur Duc d'Espernon en vst ainsi, & qu'ils n'auoient rien contribué à ce traitement, bien contraire à la liberté deüë à la Maison du Roy & à ses Officiers, & qui pouvoit troubler la tranquillité publique

bligue : comme à l'instant en leur presence , on a entendu la Ville en alarme , de voir rouler le canon dans les rues , les gens de guerre sortis du Chasteau s'advancer vers le Palais , le Temple de la Justice assiégué , & ses Officiers violentez , à ce point , que toute la Ville a esté dans une alarme generale , laquelle , à mesmes que le sieur de Comenges , aprez diverses interpellations , a obligé le sieur Duc d'Espernon de se retirer , & laisser l'issue du Palais libre , des Commissaires de la Cour ont travaillé à pacifier. Et par aprez lesdits Huissiers du Conseil ont notifié à la Cour des Lettres d'Interdiction generale des Presidens , Conseillers , Gens du Roy , & autres Officiers de toute la Cour , du douziesme du present mois de Juillet , avec Enjonction ausdits Officiers de se retirer de la Ville dans quatre iours , aprez la notification desdites Lettres , decernées sur des faits contraires aux intentions de la Cour , & à sa fidelité inviolable pour le service du Roy , & obtenues à la poursuite du sieur Duc d'Espernon , pour exposer les Officiers de ladite Cour à la fureur des troupes qu'il fait approcher des environs de la Ville , au prejudice de la negociation du sieur Archevesque de Bourdeaux , & pour esloigner les iustes plaintes , & tres-humbles Remonstrances que les Deputez enuoyez

vers le Roy auoient ordre de faire pour le bien du service de Sa Maïesté, & représenter les motifs que ladite Cour a eu de surcoir, sous le bon plaisir du Roy, partie desdits droicts, establis dans la Prouince par des voyes extraordinaires, & contraires aux Ordonnances Royaux, Edicts & Declarations du Roy, sans aucune verification, demesme que de s'opposer aux entreprises faites contre l'autorité du Roy & de sa Justice souveraine dans la Prouince, & aux leuées qui se font en icelle, sans pouuoir legitime, à la foule des Suiets du Roy, & au grand retardement des deniers Royaux, & conseruer l'Amnistie & Priuileges de la Ville & des Habitans d'icelle, par des Arrests conformes aux Ordonnances, & qui n'ont peu dissimuler, sans reproche enuers le Roy, ce qui estoit prejudiciable à son service & au bien de son Estat: de quoy Sa Maïesté eust esté informée par lesdits Deputez de la Cour, s'ils eussent eu audience. Et Ouïs sur ce les Gens du Roy, qui ont esté opposans à l'exécution desdites Lettres d'Interdiction, pour les raisons & moyens qu'ils représenteront à Sa Maïesté, LA COUR, les Chambres assemblées, A ORDONNE ET ORDONNE que le Roy fera informé, par les Deputez d'icelle, de ce qui s'est passé à ce iour, & les Registres &

les informations enuoyées à Sa Maiesté; Et que sur l'opposition à l'exécution desdites Lettres d'Interdiction, le Procureur General se pouruoirra deuers le Roy, & les moyens d'oppositions représentés par Maistre Thibaut de Lauie, Advocat General de Sa Maiesté; Et que tres-humbles Remonstrances seront faites sur l'obtention desdites Lettres, par Messire Jean de Gourgue President, Maistres Jean de Monjon & Jean Luc de Mirat, Conseillers du Roy en ladite Cour, & Thibaut de Lauie, que la Cour a pour ce commis & député. Et cependant, sous le bon plaisir du Roy, que les Officiers de la Cour & Chambre de l'Edict, continueront l'entrée du Palais & l'exercice de leurs Charges, pour le bien du seruice du Roy, & la conseruation de la tranquillité publique. Et sera le Roy tres-humblement supplié d'agréer le present Arrest.

LA violence qui fut faite à la justice auant que l'Interdiction n'eust esté prononcée à la Cour, fit connoître qu'encore que ce fust la voix du Prince, ce n'estoit qu'un coup de la main du Duc d'Espernon. On ne pouvoit pas se persuader qu'un Roy si jeune & si tendre, poussast des tons de voix si rudes, & que si sa bonté n'eust esté surprise, qu'il eust jamais pensé à degrader vne Compagnie souveraine, que ses ayeuls ont tou-

I i ij

siours considerée. Le Duc d'Espernon ne sçauoit pas encore que les ames genereuses se releuent sous la pesanteur du fardeau qui les presse. Et croyant prendre les Officiers du Parlement par le foible, les prenant par l'abbatement de la dignité de leurs Charges, il les faisoit menasser de leur faire vuidier la Ville à main armée les quatre jours escheus, puis il leur faisoit dire à l'oreille que s'ils vouloient deputer vers luy, qu'il arresteroit l'effet de cette Interdiction. Mais la Iustice, qui ne sçait point fleschir estant inexorable à ces propositions, fit du Palais vn rempart, dans lequel les Conseillers pretendoient, diseputant leur vie, conseruer son autorité. Le peuple, qui n'estoit pas seulement outré de ce que le Duc d'Espernon l'auoit voulu obliger à s'aduoüer (acceptant vne abolition) coupable des actes qu'il n'auoit pas commis ; mais aussi qui prenoit part dans l'injure que receuoit le Parlement, avec lequel il estoit vny, souffroit avec desplaisir l'injustice de ce procédé, & protestoit hautement de n'abandonner point le party de la Iustice persecutée. Le 24. de ce mois de Iuillet se passa dans l'entremise de quelques amis communs, qui taschoient d'ajuster les choses. Mais le mal estoit que le Duc d'Espernon auoit auprez de luy des Conseils violens, qui portoient les affaires dans l'extrême, & luy suggeroient de vouloir les choses de hauteur. Ces Entremetteurs se voyans desauoüiez en la pluspart des paroles qu'ils auoient donné, sous la foy de celles que le Duc leur donnoit, tenoient les affaires en longueur, croyant les pouoir reprendre ; tout au contraire le mal s'empiroit par le temps, & l'on vidle

lendemain ce traitté rompu, au point qu'on le croyoit plus affermi.

IL y a des mauvais Medecins, qui pour ne connoistre pas bien les malades qu'ils traittent, leur ordonnent des remedes qui esueillent des maux qui croupissent, & d'une simple maladie en font des compliques. Le Duc d'Espernon faisoit courir le bruit par ses gens, que s'il ne pouvoit pas auoir les Conseillers en gros pour les mettre dehors, qu'il les auroit en destail, les prenant chascun dans sa maison, & qu'apres il luy seroit aisé de chastier le Bourgeois, qui faisoit le rebelle. Ce discours faisoit vne fort mauuaise Rhetorique pour persuader la pacification. Chascun estant en doute de sçauoir sur la teste de qui l'indignation deuoit verser la Coupe, se pre-paroit à repousser le venin. En sorte que comme on derouïloit les armes, & qu'on faisoit des descharges, le Duc fut effrayé par ce bruit, & craignant qu'on l'allast attaquer dans sa maison de Puypaulin, il fit commander sa Cauallerie de monter à cheual pour faire retraite. Le peuple au contraire qui ne sçauoit pas son dessein, creut que c'estoit pour faire des courses dans la Ville. Les vns barricadent les ruës; les autres allerent aux fenestres; les autres aux places d'armes, & chascun se mettoit en estat de ne donner sa vie qu'à la gloire. Le Duc d'Espernon pliant son bagage le fit aduancer, pour sortir par la porte de S. Iulien; mais il trouua vne barricade, & les chaisnes tenduës à l'entrée de la place de S. Projet, avec vn gros de Bourgeois qui les soustenoïët. Ils furent contraints de reuenir à Puypaulin sur leurs pas; Et n'en eurent pas porté la nouvelle à leur Maistre, que

le frayeur se redoublant dans sa maison, ceux de sa suite firent porter la plus part de leurs hardes dans le Chasteau Trompette, craignant de n'auoir pas le loisir de les emporter avec eux. Cependant le Duc ne voulut point se hazarder à trauerser la Ville; mais defilant avec sa Cauallerie par vne ruelle, il alla sortir par la porte Dauphin, qui est fort proche du derriere de sa maison, où il ne fust pas apperceu par des enfans, qui se battoient à coups de fronde dans les champs qui sont proches de la Ville, qu'ils se rallierent, & fondans sur l'arriere garde, la pousserent à coups de pierre, pendant que le menu peuple, montant sur les remparts, les chargea d'injures & de coups de cailloux, qui blefferēt quelques vns de ceux qui estoient les plus proches de luy. Ainsi celuy qui estoit entré en triomphe, aprez auoir vaincu par l'infidelité, fut contraint de sortir avec honte, pour auoir mis la Iustice à la chaisne, & joiué le Bourgeois par vne abolition, qui tenoit plus de la condamnation que de la grace.

Ce desordre en attira vn autre : car sur le mesme temps que le Duc d'Espéron sortoit de la Ville du costé de la terre, le Baron de Fumel & le sieur de Bridoire avec quelques-vns de leurs amis, venoient par eau pour grossir ses troupes, & voulans entrer par le petit pont du Chasteau Trompette, ayans esté surpris par le montant, & ne pouuans aller contre Marée, aborderent au Quay du Chapeau-rouge pour prendre terre. A mesme, nombre de crocheteurs & de gueux se presenta pour porter des malles ou des valises, jugeant qu'il y en deuoit auoir, pour ce qu'ils les voyoient avec des casa-

ques bien estoiffées. Comme on mettoit le pont pour les faire sortir hors du bateau, ils entendirent que quelques enfans, qui se trouverent à cet abordage (comme Dieu parle bien souvent par des bouches innocentes, & que la verité s'exprime par ces mêmes leures qui succēt encore le lait) dirēt que c'estoient des Espernonistes. La frayeur les faist, sçachant rres-bien deslors qu'on auoit de l'horreur pour ce party. Si bien qu'ayant fait reprendre le pont, pour se faire mettre au large, cela augmenta le soupçon à tous ces crocheteurs, qui les huant comme des Espernonistes, les suiurent le long de l'eau iusques au deuant la porte du Caillau, où plusieurs personnes armées & non armées s'assemblerent, & s'estans jettées dans des bateaux pour les aborder, ils firent descharge sur eux à coups de caillous & de fusil, dont quelques-vns furent blesez. Vne partie de ces Espernonistes chercherent leur salut dans la riuiera, & se jettans à l'eau, les vns furent noyez, les autres assommez quand ils furent à bord. Il en eust esté le même du Baron de Fumel & de Bridoire, & quelques autres de leur suite, si le sieur de Muscadet Conseiller, qui par vne heureuse rencontre estant au Palais qui est tout proche, n'eust accouru au bruit, & ne les eust garantis de la fureur ce ce peuple, les faisant conduire dans la Conciergerie, tous blesez & presque mourans qu'ils estoient. Le peuple estoit irrité contr'eux, à cause qu'il auoit descouvert que dans le bateau qui les portoit, il y auoit quantité de mesche, & nombre de bandoüillieres, qu'il jugea ne pouoir estre que pour le seruice de leur ennemy. Le sieur de Marin, qui ne

ſçauoit pas encore la retraitte du Duc d'Espéron, s'eſtant trouvé en vn quartier de Ville à cheual l'eſchappabelle, & bien luy en print de ne pas donner loifir de ſe faire connoiſtre à ceux qui deputoient ſi ce n'eſtoit point luy : tant il eſt vray qu'il eſt dangereux de ſe trouver embarraſſé dans la cholere d'un peuple.

CE n'eſtoit que par coniecture que l'on eſtimoit que le Duc d'Espéron auoit lancé ce coup de foudre ; mais on n'en douta plus apres que le lendemain de ſa sortie, le Procureur General representa aux Chambres aſſemblées, que les meſmes Huiffiers à la Chaiſne, qui auoient ſigniſié à la Cour l'Interdiction generale de tous ſes Officiers, luy auoient porté vne autre Declaration du 14. du meſme mois, par laquelle on faiſoit dire à Sa Majeſté qu'elle n'auoit entendu comprendre dans l'Interdiction generale quelques Officiers particuliers, laquelle ayant ouvert, il remarqua que les noms des exceptez auoient eſté laiſſez en blanc au temps de ſon expedition, & qu'ils auoient eſté ſans doute remplis d'as Bourdeaux d'une main differente : ce qui luy auoit donné ſujet de demander aux Huiffiers en quel temps, & en quel lieu ces noms auoient eſté adjouſtez, leſquels luy reſpondirent qu'eux-meſmes les auoient mis de leur main dans Bourdeaux, par commandement du Roy & de Monsieur le Chancelier. En ſuitte dequoy il les requit de luy fournir l'exploit de la ſignification de cette Declaratiō : ce qu'ils refuſerent, pour ce qu'ils auoient ordre de luy laiſſer le propre original pour le porter à la Cour. Et pour ce que dans la lecture de cette piece, il auoit remarqué des paroles qui bleſſoient l'honneur & la dignité de

ré de la Justice souveraine, la vertu & fidelité des particuliers, tesmoignage infailible que Sa Majesté auoit esté surprinsé, il requit que cette Declaration demeurast au Greffe, pour y auoir recours au besoin; Que tres-humbles Remonstrances fussent faites au Roy, tant sur la matiere que sur la forme d'icelle; Que cependant sous son bon plaisir, pour le bien de son seruice, repos & trāquillité de ses Sujets, les Officiers qui restoiēt interdicts en vertu de la premiere Declaration, pour n'estre pas nommez dans la derniere, continueroient l'exercice de leurs Charges conjointement avec les autres. Surquoy apres auoir ouy la lecture de cette Declaration, & fait reflection sur les deffauts remarquez par le Procureur General, la Cour ordonna que tres-humbles Remonstrances seroient faites au Roy sur cette Declaration, laquelle demeureroit au Greffe, pour y auoir recours quand il seroit besoin. Et que cependant, sous son bon plaisir, tous les Officiers de la Cour continueroient l'étrée du Palais & l'exercice de leurs Charges, pour le bien de son seruice & la conseruation de la tranquillité publique. En consequence dequoy, le sieur de Pommiers, President en la premiere des Enquestes, fut député, pour informer le Roy de la verité des choses passées & de l'estat de la Prouince, en cas que les Deputez, qui estoient deslors en Cour, ne peussent point auoir audience.

CHAPITRE III.



OMME le Soleil ne tombe point en defaillance que la Nature ne souffre de grandes convulsions, on ne peut s'opposer à ce que la Iustice a de plus esclattant, sans exposer le Corps Politique à des symptomes dangereux. La teste a beau dissiper les vapeurs, qui la choquant mettent le reste dans vn aneantissement, si à mesmes qu'elle commence a rauoir sa vigueur, elle ne redonne le mouvement aux membres qui languissent pour elle. La Iustice estoit blessée par vnē Interdiction. La douleur de ce coup respanduē sur les Officiers comme dessus ses membres, les auoit fait paralitiques, leur ostant l'exercice de leurs fonctions. Si bien que pour se reestablr dans le droit de sa premiere Majesté, il fallut qu'elle rappellast à soy & à leurs Charges, les Conseillers, que le respect qu'ils auoient pour le nom de leur Maistre, quoy qu'emprunté, tenoit dans vn estonnement. Le peuple accoustumé de reposer à la faueur des Loys, ne pouuoit point souffrir que la voix, qui fait entendre leurs Oracles demeurast interdite. Ce silence formoit vn horrible Chaos. Les Iurats, que le Duc sortant à la haste de la Ville, auoit menassé de la corde, pour n'auoir peu tenir ce qu'ils luy auoient promis, taschoient de regagner ses bonnes graces, par vne nouvelle pratique des esprits. L'empressement dans

lequel ils estoient pour en venir à bout, augmenta la deffiance & l'aersion contr'eux. Ensorte que craignant qu'ils ne fissent quelque party contraire, & qu'ils ne se fassissent de l'Hostel de Ville, ou des portes, il fust trouvé à propos de le faire garder & de jour & de nuit par la garde Bourgeoise, qui demeueroit aussi depositaire pendant la nuit des Clefs des portes de la Ville. Le Duc d'Espernon pour se venger aussi de son costé, ferma les passages, & empêcha la dessente des bleds vers Bourdeaux, nonobstât l'Arrest du Parlemēt, qui deffendoit à toutes personnes de quelle qualité & condition qu'elles fussent, d'empêcher le transport des bleds du haut pays, & des Seneschaussées d'Agenois & Condomois & autres voisines; Et que par vn autre du mesme jour il eust aussi deffendu de charger des bleds dans les Ports de la Xainctonge, pour les transporter dans les pays estrangers, à peine de 4000. liures d'amende, & de confiscation des bleds, Barques & Nauires.

Le trouble de ce temps, & la police que le Parlemēt y raportoit, frapperent l'esprit de Labarriere, l'vn des Iurats, de quelque terreur, qui luy persuadant quil ny auoit plus d'assurance pour luy dans la Ville, l'obligea, feignant d'aller à la promenade, de se retirer chés vn de ses amis, en vn petit lieu hors la Ville, non gueres esloigné des murailles, pour là prendre la botte quil auoit fait porter par son valet, affin qu'à la faueur des palus & des vignes, il peust s'embarquer pour quelque autre plage plus fauorable pour luy. Mais quelqu'vn de ses ennemis ayant obserué sa demarche, le logea dans cette maison, & l'ayant remarqué à l'escart dans vne al-

lée, luy lascha vn coup de fusil, dont il mourut fort peu de temps apres; Et volontiers ne luy eust-on pas donné le loisir de mourir en repos, si le Parlement n'eust arresté, par le transport des Commissaires qu'il deputa pour informer sur les lieux, la foule d'une populace, qui le vouloit rendre la victime de sa cholere. Ce coup effraya ses Collegues. Bechon & Lestrilles sortirent promptement de la Ville, qui demeura par cette rencontre desertée presque par tous ses Magistrats. Frans & Niac, les deux Gentils-hommes, auoient resté tous seuls. Le premier estoit malade, & l'autre ne pouvoit pas porter tout le faix de cette Charge. La Cour le mande pour l'exhorter à continuer sa fonction, & rappeler ses Collegues. Mais il auoit beau les appeller, il n'estoit point ouy. Cependant il estoit necessaire de pouruoir à la Police de la Ville. L'eslection des nouveaux Iurats estoit à la verité bien prochaine, mais il y auoit beaucoup de temps à perdre dans ce peu de retardement. Si bien que les Bourgeois, assemblez avec des Commissaires de la Cour, jugerent qu'il falloit eslire quatre Chefs, qui donnassent les ordres dedans & dehors la Ville, & pourueussent à establir vn fonds, pour secourir les necessitez publiques. Les sieurs de Boucaut jeune, Cieutat, Sabourin jeune & Fayard Conseillers, furent nommez pour Commissaires. Les vns agissoient avec zele, les autres avec tiédeur.

LA Iurade de Bourdeaux n'est pas d'une petite consequence. Son autorité prend sa force de ses années. Et quoy que des falles pratiques l'ayent souvent portée jusques dans le tombeau, elle s'est releuée avec la pre-

miere vigueur qu'elle auoit dans son adolescence. Quand cette autorité est vnüe avec l'affection du peuple, elle reprend ses premiers aduantages, qui la font aller du pair avec des puissances dont elle releue. Le Procureur General, qui auoit connoissance de cette verité, & qui voyoit dailleurs que le pouuoir de la Cour auoit besoin dans cette confusion de cet appuy, qui ne pouuoit estre que tres efficace, si la place des trois Iurats, dont la Charge finissoit, estoit donnée par la liberté des suffrages à la vertu & au merite, luy remonstra, *Que comme le respect du peuple enuers ses Magistrats naturels, est le lieu de la legitime obeysance, des Suiets enuers leur Prince souverain, leur eslection est vne action si importante, qu'elle desire l'entiere liberté des suffrages de ceux à qui elle est comise. Et neantmoins il arriue que les brigues & les menées sont si puissantes, qu'elles engagēt les voix des Eslecteurs, pour s'acquitter non pas tant du serment qu'ils font en ce lieu, comme de la promesse qu'ils ont fait auant y aller, d'où vient que ces Charges & ces Magistratures se trouvent entre les mains de ceux, qui sçauent mieux demander ce qu'ils desirent, que meriter ce qu'ils demandent. C'est pourquoy La Cour a jugé digne de son soin, de pouruoir à des actes si importants, par ses Arrests du dernier de Iuillet 1630. sixiesme & dix-septiesme Aoust 1643. autorisez par Arrest du Conseil du vingt-quatriesme Fevrier*

1644. Mais comme le temps use les Loix les plus saintes, & affoiblit leur vigueur, il est besoin de les renouveler de temps en temps, pour leur redonner leur premiere force, par forme d'une seconde naissance. A CES CAUSES, le Procureur General requit, que conformément aux Arrests, avant proceder au choix & nomination des prud-hommes par les anciens Jurats, ils fairoient le serment entr'eux, & dans la Chapelle de l'Hostel de Ville, de n'avoir conferèny concerté avec personne pour l'eslection prochaine, ou de ne nommer pour prud-homme aucun, auquel ils ayent parlé ou fait parler pour ladite eslection, qu'ils l'ayent proposé ou fait sçavoir à personne, ou qui leur aye esté proposé pour cet effet; Et que soudain aprez la nomination faite par chascun d'eux de huit prud-hommes, il sortira à l'accoustumée, sans marquer aux autres Jurats ses Collegues, qui sont les quatre des huit qu'il desire estre choisis, lesquels prud-hommes seront prins parmy les plus notables Bourgeois de la Ville, Nobles d'extraction, Officiers du Roy en la Chancellerie ou Siege du Seneschal, Aduocats, frequentant le Barreau depuis dix ans pour le moins, ou Bourgeois qui ayent esté Jurats, Juges ou Consuls de la Bource, ou ceux qui auront fait la Charge de Tresorier de l'Hospital, Greffiers, Nottaires & Secretaires de la Cour, & Procureurs au Parlement,

qui auront serui & exercé leurs Charges pendant vingt ans. Et ceux d'entr'eux qui seront choisis pour prud-hommes, outre le serment qu'ils feront, en consequence du Statut, jureront de ne nommer & eslire aucune personne, pour laquelle ils ayent esté briguez & sollicitez, le tout suivant lesdits Arrests qui seront executez de point en point selon leur forme & teneur. Et le present Arrest enregistré dans l'Hostel de ville, & leu auant proceder aux nominations & eslections; le tout à peine de nullité, & autre telle que de droict. SUR QUOY eue delibération, a esté arresté que conformément aux Arrests de la Cour des dernier de Iuillet 1630. sixième & dix-septième Aoust 1643. & Arrest du Conseil confirmatif d'iceux du vingt-quatrième Fevrier 1644. auant proceder au choix & nomination des prud-hommes par les anciens Jurats, ils feront serment entr'eux, & dans la Chapelle de l'Hostel de Ville, de n'auoir conseré ny concerté avec personne, pour l'eslection prochaine des Jurats, & de ne nommer pour prud-homme aucun, auquel ils ayent parlé ou fait parler pour ladite eslection, qu'ils ayent proposé ou fait sçauoir, ou qui leur ait esté proposé pour cet effet, Et que soudain apreç la nomination faite par chascun d'eux de huit prud-hommes, il sortira à la forme accoustumée, sans marquer aux autres Jurats ses Collegues, quels sont les quatre des

huit qu'il desire estre choisis, & que lesdits prud-hommes seront prins parmy les plus notables Bourgeois de la Ville, Nobles d'extraction, Officiers du Roy en la Chancellerie ou Siege du Senechal, Advocats frequentans le Barreau depuis dix ans, ou Bourgeois qui ayent esté Iurats, Iuges ou Consuls de la Bource, & ceux qui auront fait la Charge de Tresoriers de l'Hospital, Greffiers, Notaires & Secretaires de la Cour, & Procureurs au Parlement qui ont servi vingt ans; & que ceux d'entr'eux qui seront choisis pour prud-hommes, outre le serment qu'ils feront en consequence du Statut, iureront de ne nommer & eslire aucune personne pour laquelle ils ayent esté briguez & sollicitez, suiuant lesdits Arrests qui seront executez de point en point, suiuant leur forme & teneur. Et que le present Arrest sera enregistré dans l'Hôtel de Ville en suite des precedens, & leu auant proceder ausdites nominations & eslections, à peine de nullité.

COMBIEN que les Fermiers du Conuoy estably à Bourdeaux, n'eussent aucun sujet de se plaindre qu'on leur fit quelque trouble dans la leuée des droicts qui sont deubs au Roy, les principaux neantmoins se retirèrent à Blaye, & abandonnerent le Bureau. Cette retraite esmeut vn peu les habitans, & d'autant plus qu'on n'en sçauoit pas les motifs. Les vns croyoient qu'ils ne s'en estoient allez que pour leur interest particulier, & pour tromper le Roy, obtenant vn rabais du Conseil, pour

pour les payemens sur leur ferme, par pretexte des mouvemens de Bourdeaux; & supposans qu'ils ne pouvoient pas leuer les droicts avec liberté. D'autres s'imaginoiēt que c'estoit vne intrigue du Duc d'Espernon, par le pouvoir qu'il auoit sur ces personnes, non seulement pour se venger des Bourgeois, faisant exiger d'eux à Blaye des droicts dont leurs Priuileges les affranchissoient; mais aussi pour les rendre criminels dans l'esprit de Sa Majesté, luy faisant entendre que les Bourdelois estoient assez hardis pour s'en prendre à ses finances, & empescher la leuée de ce qui luy est deu. Il peut estre qu'il y auoit quelque vne de ces raisons, ou volontiers toutes ensemble, qui auoient obligé les Fermiers à prendre la route de Blaye. Mais comme on auoit interest de se justifier de cette calomnie, à mesmes que les Tresoriers Generaux en furent aduertis, ils s'assemblerent, & deputerent deux d'entr'eux, pour mettre le Sceau au Bureau du Conuoy, & empescher le diuertissement des Finances du Roy; Et soudain estans allez au Parlement, & s'estans presentez à la porte de la grand-Chambre, on les fit entrer, où l'on leur bailla place au dessous des Gens du Roy, d'où ils rapportèrent l'aduis qu'ils auoient eu, les ordres qu'ils auoient donné, & le dessein qu'ils auoient d'enuoyer à Blaye deux Commissaires, pour obliger les Fermiers à reuenir: ce qui fut approuvé du Parlement.

LE Duc d'Espernon, qui auoit interest d'auoir des creatures dans l'Hôtel de Ville, jugeant que son absence luy ostoit les moyens d'en substituer d'autres, en la place de ceux qui estoient de Charge, & qui s'estoient

desia absentez, donna ordre à ceux qui restoient, lesquels fauorisoient son party, de rompre l'eslection, par pretexte de ce qu'ils n'estoient pas nombre suffisant pour la faire, & nommer les vingt-quatre prud-hommes. Mais afin de faire reussir ce dessein par quelque pretexte de justice, le sieur de Niac Gentil-homme, l'un des Jurats, alla remonstrer au Parlement, Qu'estant le seul de ses Collegues dans la Ville, il ne pouvoit satisfaire aux formes que le Statut prescrit; Et demanda que la Cour y pourueust. Il reussit autrement qu'il n'auoit en pensée. Il attendoit d'estre deschargé de les faire. La Cour en usa autrement, & ordonna que la nomination des vingt-quatre prud-hommes se feroit par les Jurats qui se trouueroient en Ville, & le Procureur Syndic à la place des absens, pour estre par eux procedé à la nomination de trois nouveaux Jurats, suiuant les formes accoustumées. Cela fut executé de la sorte: de façon que la liberté des suffrages, & la pluralité des voix, porterent le choix sur les sieurs de Pontac Greffier en chef de la Cour, Maistre Leonard de Constant Aduocat, & Emanuel Hugla Marchand, du zele desquels trois personnages, le public attendoit vn tres-grand secours dans sa persecution.

IL courut vn bruit que le Duc d'Espèrnon auoit fait tuer deux hommes à Languon, pour cela seul, qu'ils estoient Habitans de Bourdeaux; & qu'il auoit ordonné de faire main basse sur ceux qui seroient reconnus tels. Le Parlement ordonna qu'il seroit informé de ces meurtres par deuant des Commissaires. Mais ce remede estoit trop doux pour arrester vne si haute violence. Il fallut songer à la deffensue, & opposer la force à la for-

ce. Le Duc d'Espèrnon faisoit des grands preparatifs. Il mandoit la Noblesse. Il leuoit sourdement des troupes, & Bourdeaux estoit tout desarmé. La preuoyance de son ennemy esueilla la sienne. Et pource que les gens de guerre ne se font point sans argent, le Parlement ordonna qu'il seroit leué vn sol sur chasque liure de viande qui se consomme dans la Ville, & quinze sols sur chaque boisseau de farine; Et que cette leuée seroit communiquée aux Bourgeois. Ils arresterent encore d'emprunter de trois en trois, la somme de trois mil liures. Ce fond n'estoit pas suffisant pour fournir à la despence de la guerre; il seruoit toutefois à faire quelque aduance. Cette premiere disposition effraya plusieurs Officiers du Parlement, & autres Habitans, qui, soit par interest ou par lascheté, deserterent la Ville. Il eust esté à propos de les laisser dehors, & d'y mettre ceux qui restoient touchez de la mesme foiblesse, puis qu'au lieu d'asseurer, ils affoiblissoient la cause de Bourdeaux. Toutefois le Parlement croyant les ramener par son exemple, & leur bailler du cœur en veüe de la generosité de ses actions, rendit Arrest, par lequel il fit deffences à tous les Presidens, Conseillers & autres Officiers de la Cour; ensemble à tous autres Officiers du Roy, Iurats, Iuges & Consuls, Bourgeois & Habitans, de sortir de la Ville sans permission expresse, à peine de mil liures, payables sans deport; & par execution de leurs meubles & autre plus grande. Enjoignit à ceux qui en estoient sortis d'y reuenir dans trois jours pour tout delay, à mesmes peines.

CE n'estoit encore se battre qu'à coups de pommes. Le Duc d'Espernon railloit de ces Arrests. Il enuoyoit ses Gardes tantost chez l'un des Conseillers, pour rauager ses maisons, & tantost chez l'autre, pour enleuer ses grains. Les sieurs de Suduiraut & de Taranque, grands-Chambriers, porterent leurs plaintes à la Cour, sur les desordres qu'ils auoient soufferts. On leur donna des Commissaires pour en informer. Ceux du Chasteau Trompette commençoient à quereller dans Bourdeaux. Ils menassoient de se saisir du quartier du Chapeau-rouge, & le fortifier, pour attaquer le reste de la Ville. Ils auoiēt desia coupé les buissons qui fermoient le jardin, & se dispoisoient à faire quelques retranchemens. Tous ces aduis furent portez à la Cour, ils furent verifiez par la veüe des lieux. Il estoit donc question de chercher le remede à ce mal, qui commençoit à croistre. Mais comme la Iustice ne va qu'avec des démarches pesantes, & que son autorité ne consiste pas seulement en la force des armes, lesquelles elle ne prend que dans l'extremité, le Parlement creust necessaire, auant se declarer, d'aduertir le Roy de cette nouvelle oppression, de la bonté duquel, comme la source d'où descoulent les graces, qui se respendent sur les Sujets, il attendoit le soulagement. Et à cet effet donna l'Arrest qui suit.

SUR ce qui a esté représenté ; Que la Cour a
 Sprins soin à diuerses fois de pacifier les troubles
 excitez dans la ville de Bourdeaux & Prouince de
 Guyenne , & de rappeler la tranquillité , à mèm-
 e qu'il en a paru quelque occasion ; Et ayant
 esperé que la negociation du sieur Archeuesque de
 Bourdeaux seroit suiui de l'esloignement des troup-
 pes , de la restitution des prisonniers , du delaisse-
 ment des maisons des particuliers , de la cessa-
 tion des leuées des deniers faites sans commission ,
 de la liberté du commerce , de la seureté du Ge-
 neral & du particulier , & des moyens conuenab-
 les pour oster le sujet des troubles , & restablir
 le repos & l'entier exercice de la justice souverai-
 ne du Roy , non moins necessaire pour la conser-
 uation de l'autorité Royale , & de la tranquilli-
 té publique , que la force des armes , **LA**
C O V R auroit au contraire veu avec dou-
 leur , la continuation des logemens des gens de
 guerre , & non seulement la detention des mai-
 sons & des prisonniers ; mais aussi de nou-
 veaux emprisonnemens , des leuées extraordi-
 naires & sans pouvoir , pour la subsistance des
 troupes , & des actes d'hostilité , desquels la
 Cour attendoit soulagement de la bonté Royale de

270 D E S M O U V E M E N S ,
leurs Majesté, sur les Remonstrances de ses
Deputez , lors que sans auoir eu la libertié de
les faire , & au prejudice de la fidelité inuiola-
ble de la Cour pour le seruice du Roy , & des
preuves qu'elle en a donné en toutes occasions , il
a esté obtenu par euidente surprinse , une Inter-
diction generale de tous les Officiers , sur des mo-
tifs si contraires à la sincerité de leurs intentions
& de leur procedé , pendant les troubles qui ont
precedé , que la verité connue qu'elle soit sera
leur justification , & seruira de conuiction à ce-
luy qui l'a sollicitée. Et en executant lesdites
Lettres , il n'a pas esté fait moins de violence
aux Officiers du Roy par le sieur Duc d'Esper-
non , qu'il auoit esté fait de preiudice à la justice
& à la bonté de Sa Maiesté en les obtenant ,
ayant le vingt-quatriéme Juillet dernier , avec
assemblée de quatre à cinq cens hommes armez ,
occupé & inuesty le Palais Royal de Lombriere ,
fait rouler le canon , sortir des gens de guerre du
Chasteau Trompette , assiéger la Iustice souverai-
ne du Roy iusques dans son Sanctuaire , où elle
doit estre reuerée & inuiolable , & mis en peril la
vie & l'honneur de ses Officiers , qui sans au-
tres forces que celles de la dignité de leur Mini-
stere , & de l'estat de leur fidelité , imprimée sur
le front aussi bien que dans le cœur , l'obligerent

Et toutes ses troupes de se retirer , sans rapporter autre aduantage de cette entreprinse , que d'auoir causé une alarme Et esmotion generale à toute la Ville , Et d'auoir abusé des armes du Roy dans un lieu où son autorité regne par les voyes de la iustice , Et contre ses Officiers , qui reçoient tout ce qui leur vient de la part de leurs Maiestez , avec une parfaite Et respectueuse soumission , Et qui ont employé tous leurs soins pour pacifier ces troubles , que ces voyes de fait ont excité dans la Ville , qui s'augmentent de plus en plus , par la retention des batteaux qui descendent du haut pays , chargez de bleds , marchandises Et autres choses necessaires pour la subsistance de la Ville , par l'occupation de diuers passages de viures à main armée , par l'emprisonnement de diuers Habitans de cette Ville , par l'enleuement des grains qui leur appartiennent , par la violence faite aux Courriers ordinaires , contre la foy publique , Et l'autorite des Arrests du Conseil , par la conuoocation de la Noblesse , par l'approche des troupes , Et des leues Et assemblees de gens de guerre , faites de toutes parts par l'ordre du sieur Duc d'Espernon , Et par des actes d'hostilité , qui descouurent un dessein de faire une cruelle guerre à cette Ville Et Habitans d'icelle , Et d'executer les menasses de

la desoler par le fer & par le feu, sans aucune differance de sexe ny d'aage, au preiudice du service du Roy & du bien de l'Estat, & contre les intentions de leurs Maiestez, à quoy il est necessaire de pourvoir Et ouï le Procureur General du Roy, LA COVR, les Chambres assemblees, A O R D O N N E' E T O R D O N N E que le Roy sera informé des troubles excitez de nouveau dans la Ville de Bourdeaux & Prouince de Guyenne, par la continuation des actes d'hostilité, pratiquées contre la foy des traittez & negociations precedentes. Et neantmoins que dans trois iours apres la publication du present Arrest au deuant l'Hostel de Puypaulin, le sieur Duc d'Espernon renouquera les ordres par luy donnez pour la leuee des gens de guerre, l'approche des troupes, conuoquation de la Noblesse, & autres preparatifs pour faire la guerre aux Suiets du Roy de la presente Ville & des environs d'icelle, & laissera les passages des chemins & riuieres libres, pour le conuoy des viures, & autres denrees necessaires à la subsistance de la Ville & à l'entretien du Commerce; & pour la liberté des Courriers & Messagers ordinaires, & fera cesser les actes d'hostilité contre le general & le particulier.

liers, dans leurs personnes & biens, autrement & à faute de ce faire, ledit delay passé, sera procédé suivant les Ordonnances. Fait L A D I T E C O U R inhibitions & deffences à tous Gentils-hommes, Communauté & autres, d'assister ny tenir la main aux entreprises qui pourroient estre faites pour l'exécution de ce dessein, si prejudiciable au service de Sa Majesté, & si contraire à sa bonté Royale, à peine d'estre les contreuenans traittez comme perturbateurs du repos public, deraeurans lesdits Gentils-hommes & Communautéz responsables, & leurs biens chargez & hypothèquez, pour le desdommagement de tous lesdits actes d'hostilité, degasts, dommages & interests des particuliers & du general, qui le souffriront. Et sera le Roy tres-humblement supplié d'agréer qu'il soit pourueu cependant à la seureté & conservation de la Ville pour son service. Et à ces fins, L A D I T E C O U R Ordonne que tous Seigneurs justiciers, Gentils-hommes, Officiers & Communautéz, prestent ayde & main forte pour la deffence de ladite Ville, & la garantir & les Habitans d'icelle, & leurs biens, de l'oppression extrême dont ils sont menassez. Et qu'à la diligence du Procureur General du Roy, le present Arrest sera leu, publié & af-

274 DES MOUVEMENTS,
*fichè par tout où besoin sera ; Et executè en ver-
tu du simple Dictum , attendu ce dont s'agist.*
FAICT A BORD DE AVX en
*Parlement , les Chambres assemblées le quatrié-
me Aoust 1649.*

Signé , DE PONTAC.

CHAPITRE III.



DE Parlement , que l'ordre de la Iustice obligeoit à reclaimer le Prince , & la violence de son persecuteur forçoit à la deffence , rechercha l'un & l'autre remede. Le premier estoit long & sans fruit , pour ce que le Conseil d'enhaut , preuenu d'amitié pour le Duc d'Espèrnon , ne faisoit d'autre aduance que celle qu'il vouloit. Le deuxiesme tenoit du desespoir , puis qu'il armoit vn frere contre vn frere ; & qu'on ne pouvoit presque trouver de salut que dans le sang du proche. Il ne fut pas content d'auoir ordonné les Remonstrances susdites. Il appella ses voisins au secours. Ordōna qu'il seroit écrit aux Parlemēs de Paris & Tolo- se , pour les esmouvoir à quelque cōpassion de la misere de leurs freres ; Que la Noblesse , les Seneschaux & les

Communautez , feroient inuitez à ce meſme deſſein. Et que pour cet effet il ſeroit pourueu à faire vn fonds , attendant l'eſtabliſſement duquel , il fut arreſté , que ſur la ſomme de vingt-neuf mil cinq cens dix-ſept liures , qui auoit eſté trouuée dans la caſſe du Conuoy , il ſeroit prins ce à quoy reuenoit le quartier deſia eſcheu de leurs gages , pour eſtre employé aux neceſſitez publiques. Il eſtoit juſte que les Bourgeois y contribuafſent de leur part , & qu'ils cherçaſſent à ſe deſcharger du mal-heur dans lequel ils n'eſtoient pas moins enuelopez que les autres. On reſolut de faire vne aſſemblée generale de tous les Corps , pour ouyr toutes les propositions qui ſe feroient pour trouver de l'argent. Cette aſſemblée euſt eſté rompuë par vne Ordonnance du Duc d'Eſpernon , qui faiſoit deffences aux trois nouveaux Iurats , de prendre cette qualité ny d'en faire la Charge , ſi le Parlement en ayant eu aduis , n'eũſt aſſemblé extraordinairement les Chambres , pour reſoudre ſur cette affaire , & n'eũſt rendu Arreſt , par lequel il leur enjoignit de continuer l'exercice de leurs Charges , à peine de reſpondre en leurs priuez noms , de l'éuenement des choſes qui pouvoient arriuer. Et de vray cette Iuriſdiction n'appartenoit pas au Duc d'Eſpernon , puis qu'elle dependoit d'une Police ordinaire , dont la connoiſſance eſt naturellement acquiſe au Parlement , & que diuers Arreſts du Conſeil auoient ſouuent arraché de l'vſurpation des Gouverneurs de la Prouince.

LES Bourdelois ont touſiours eu vne ſi puiffante jaloſie pour la conſeruation de leur franchise , qu'ils

n'ont iamais peu souffrir que leurs biens fussent mis à la taxe. Neantmoins comme la necessité des affaires est vn Démon auquel on ne peut résister, il fut conclu dans l'assemblée des Corps, qu'on feroit vne taxe sur chascun des particuliers. Toutefois, neantmoins la necessité, l'exécution en fut surcife: tant on apprehendoit d'en venir à cette extrémité. Le Parlement print encore d'une autre part trente mil liures par emprunt, au payement de laquelle, tant en principal qu'interests, quelques-vns de leurs Officiers s'obligerent, sous l'indemnité que tout le reste de leur Compagnie fit en general & en particulier, affectant tous leurs biens, & particulièrement leurs gages & leurs Charges.

C E P E N D A N T le Duc d'Espèrnon, sçachant que Bourdeaux estoit sans argent & sans troupes, faisoit aduancer les siennes. On craignoit qu'il ne vint surprendre les Faux-bourgs des Chartreux & ceux de S. Seurin. La garnison du Chasteau Trompette faisoit grande peur à beaucoup de personnes. Les pensées pour la deffence estoient si estrangement lentes, qu'on ne faisoit pas mesmes de gardes. On auoit l'ennemy à la porte. Ses Partisans vaguoient impunément dedans; Et il sembloit qu'on fust dans vn calme profond; Et possible n'eust-on veu esclorre pas vn de ces desseins, si le peuple, qui pour estre tousiours deffiant, veut voir les choses asseurées, n'eust hautement murmuré contre cette lenteur, & obligé ses Magistrats & le Parlement à diligenter les preparatifs qu'on auoit resolu. Ce fut alors qu'on ordonna les gardes; qu'on se saisist du Chasteau du Ha; qu'on delibera des barricades & des

retranchemens, qui sembloient mettre le Chasteau Trompette au dehors de la Ville; qu'on se resolut d'esquiper des vaisseaux & des chaloupes, pour conseruer le port & la nauigation; qu'on desliura des Commisfions pour la leuée des gens de guerre; qu'on donna le pouuoir au Marquis de Lusignan de commander les armes, pendant qu'on enuoyoit chercher le Marquis de Saulvebeuf, en la reputation duquel on auoit vne tres-grande confiance; & qu'enfin on establit vn Conseil de Police, pour pouruoir aux despences & aux necessitez de la guerre. On bailla des Commissaires pour s'informer des prouisions qui estoient dans la Ville. On fit des Commissaires des quartiers par eslection des voix. On nomma des Dizeniers. On ordonna des moulins à bras de dix en dix maisons. En vn mot on pratiqua en ce rencontre toute la Police necessaire dans vne Ville qui se prepare à soustenir vn siege: tant il est vray que la necessité est ingenieuse, & que le desir de conseruer la vie avec la liberté, est industrieux à fournir des inuentions, pour se preparer contre toute sorte d'attaques.

Les Bourdelois, piquez d'une genereuse ardeur de voir leur ennemy en face, se resolurent, apres auoir appresté leurs Galiottes, d'aller au deuant. Et pour leur premier coup d'essay, ils monterent vers le haut de la riuere, où ayant mis pied à terre, ils entrerent dans la maison de la Dame de Beauroche (famille attachée de longue main au seruice du Duc d'Espernon) d'où ils emmenerent les sieurs de Blanc Conseiller au Parlement, de S. Meard, Intendant de la maison du Duc,

& les deux cadets de Beauroche prisonniers, à la veuë desquels le peuple s'anima en telle sorte, que si par la prudence du Parlement, les sieurs de Massiot & de Bordes Conseillers en la Cour, ne fussent allez au deuant en qualité de Commissaires, & ne les eussent fait mener en la Conciergerie pour les mettre à l'abry de cette fureur, leurs vies n'eussent point esté en assurance. Cette entreprise fut suiuiue d'une seconde plus hardie : car le Marquis de Lusignan, qui commandoit les armes de Bourdeaux, print quelques Galiottes & autres vaisseaux, sur lesquels il fit monter cinq à six cens hommes, à dessein de battre les Espernonistes, qui auoient descendu iusques au Tourne, qui est à trois lieües de Bourdeaux. Mais il ne peust aller par cette marée plus haut que l'Isle S. George, où il n'eust pas mouillé, qu'il apprint que les ennemis auoient resolu de se saisir de trois ou quatre Galions, qui estoient dans le Port du Tourne : ce qui luy donna sujet de commander le Cheualier Thibault avec deux Galiottes pour les reconnoistre, lequel, les ayant recontré sur sa route, poussa avec tant de vigueur, qu'ils furent contraints de se retirer sans effet. Ces diuers partis auoient des desseins differens. Le Marquis pensoit monter jusques à Cadillac, & forcer les retranchemens que les ennemis auoient fait à Paillet, bien proche du bord de la riuiera. Les Espernonistes au contraire s'aduançoient vers Bourdeaux. Mais comme le bruit de cette petite attaque, qui auoit esté faite sur l'eau par le Cheualier Thibault, leur donna quelque soupçon que le Marquis auoit enuie de porter ses armes plus auant, ils firent reculer jusques à Portets le Regi-

ment de Guyenne, qui estoit desia bien proche de Beautiran, & se logerent dans ce Bourg, pour observer la contenance du Marquis, qui les ayant apperceus sur le bord de la riuere, fit rembarquer ses gens pour les aller attaquer, ayant pour cet effet donné le commandement de l'auant-garde aux sieurs la Mote Delas, Galibert & Richon, dont chascun d'eux commandoit vne Galiotte, laquelle estoit soustenuë par le reste des vaisseaux, à la teste desquels estoit le Marquis, accompagné du Cheualier Thibaut, des sieurs de Ceridos, Vigier le jeune, Suaud jeune, autre Richon & la Mothe sauvage.

CETTE petite flotte marchant par cet ordre, alla droit à l'ennemy, qui souffrit diuerses escarmouches des pierriers & de mousquets. Mais enfin, cedant au grand feu que les Bourdelois faisoient, qui leur auoit tué quatre-vingts quatre hommes, parmy lesquels estoient trois Officiers, sans que les Parlementaires perdissent que quatre soldats, ils gagnerent les retranchemens qu'ils auoient desia fait dans la garenne de Portets : ce qui fit prendre vne autre resolution au Marquis, qui se disposant de les forcer à la faueur de la nuit, se fit porter à terre avec vne partie de son Infanterie, & posa vn corps de garde en veuë de leurs sentinelles, pensant leur donner de la jalousie par ces approches, pendant qu'il donnoit ordre de les faire attaquer par le derriere du Chasteau sur le point du iour, par ceux qu'il auoit laissé de reste dans les Galiottes, d'où les Espernonistes preuoyant ce dessein, deslogerent à minuit, & sans qu'ils fussent apperceus. Cet

abandonnement ne fut pas decouvert, que le Marquis apprint que les ennemis pourfuiuoient leur premiere pointe, & tafchoient d'enleuer les Galions qui estoient fur le Port du Tourne, qui est de l'autre costé de riuie-re. Le Cheualier Thibaut fut commandé de s'y opposer : ce qu'il executa avec tant de generosité, qu'il ne les repoussa pas avec moins de vigueur que dans le premier rencontre. En sorte que s'estant rendu Maistre de ce Port & du poste, il destacha trente mousquetaires, avec vn Lieutenant qui les commandoit, pour se saisir de la maison du Baron de Luxe, partisan du Duc d'Espèrnon, en veüe du Chasteau de Langoiran, où les Espèrnonistes estoient postez, qui n'osant pas faire la moindre sortie, donnerent le loisir à ce Lieutenant de surprendre cette maison, emporter quatre fauconneaux montez sur leurs affuts, trois fauconneaux à croc, vingt-cinq mousquets & fusils, toute laquelle artillerie fut rapportée à Bourdeaux dans trois gros Galions, & vne Chaloupe de Cadillac, prise sur l'ennemy.

L'HEUREUX succez de cette seconde attaque, seruit d'amorce pour vne troisieme. Le Marquis de Lusignan, dont la prudence & la sage conduite luy faisoit esperer autant de victoires que l'occasion luy presentoit de combats, souffrant avec inquietude les approches de l'ennemy, vouloit tousiours aller au deuant, les armes à la main. Il sceut que le Duc d'Espèrnon auoit diuisé ses troupes en deux corps differens, qui costoyoient la Garonne de l'un & l'autre costé, pour venir à Bourdeaux. Les vns estoient à Bautiran ; & les autres

autres au Tourne. Il fit monter huit à neuf cens hommes sur deux frégates, montées l'une de treze pieces de canon, & l'autre de six; deux Galeres, qui portoient deux canons chacune, & dix Galiottes garnies de leurs pierriers. Ce dessein ne fut pas formé qu'il fut connu par le Duc d'Espéron, qui craignant que l'on allast tout droit abbatre son Cadillac, fit rallier ses troupes du costé du Tourne, composées en tout de deux mil fantassins, & cent cinquante chevaux. Le Marquis, qui ne cherchoit que le nombre pour faire vne deffaitte plus glorieuse, fit aduancer son auant-garde, en laquelle estoit vne Galere, commandée par le sieur de Pont-castel, premier Capitaine du Regiment du Parlement, & deux Galiottes, soustenües du reste de la flotte, à la teste de laquelle estoit le Marquis, monté sur vne autre Galere. Il alla droit aux ennemis, qui s'estoient mis en bataille, sur lesquels l'auant-garde fit sa descharge avec effet. Mais comme c'estoit combattre de trop loin, le Marquis se fit desbarquer, & ayant prins terre avec six vingts mousquetaires qu'il conduisoit luy-mesme, il taschoit d'attirer l'ennemy sur luy, pendant que d'un autre costé, il faisoit escarmoucher si rudement, que les Espéronnistes ayant esté repoussez iusques dás leurs bataillons, abandonnerent tous leurs postes aduancez. Et possible que dès lors on eust forcé leur gros, si le Marquis n'eust apprehendé que la marée s'en retournant ne laissast ses vaisseaux à sec. De sorte qu'il fit rembarquer ses gens, attendant le retour de la marée du soir, pour reprendre vne seconde attaque, laquelle fut faite pendant trois heures avec vne grande oppiniaistreté de

part & d'autre. Et enfin le succez en fut si heureux, que le courage des Parlementaires l'emportant sur celuy de leurs ennemis, ils les contraignirent de faire retraite, avec perte de plus de trois cens hommes des leurs, & nombre de blesez; les autres n'ayant perdu que douze ou quinze soldats morts, & autant de blesez.

Ce progres alluma le cœur des plus pacifiques. On ne parloit que de se bien deffendre. On disoit d'une voix qu'il falloit leuer quantité de troupes. Les plus auares sacrifioiēt le fons de leurs coffres à cette deffence. Mais quand il fallut venir aux effets, & mettre la main à la bourse, il ne se trouva jamais tant de courages morfondus. On essaya la voye de la liberalité; mais on en retira si peu de secours, qu'il fallut faire passer en nécessité, ce qui sembloit ne deuoir estre que volontaire. On visita les caisses des Receueurs & des Banquiers. On mit les Bourgeois à la taxe. On leur fit faire des prests & des emprunts forcez. Enfin on espuisa toutes les inuentions à trouver de l'argent, par lesquelles il est vray qu'on fit vn fonds assez raisonnable. Cependant le Duc d'Espèrnon faisoit ruyner les moulins qui estoient aux enuirs de la Ville; fit publier vne Ordonnance à Blaye, par laquelle il deffendoit aux Habitans toute sorte de Commerce avec ceux de Bourdeaux. Tout au contraire le Parlement, confirmant l'Ordonnance des Jurats, ordonna qu'il seroit fait des moulins à bras de dix en dix maisons, aux frais desquels il fut dit que les particuliers contribueroient leur part. Enjoignit aux Dizeniers de veiller incessamment à ce traual, & aux Menuisiers de s'y employer, abandonnant tout autre,

iufques à ce que celuy-la fust acheué. Et contre l'Ordonnance du Duc il rendit autre Arrest, par lequel, fâs auoir efgard à icelle, il fut enjoint aux Iurats de Blaye & Bourg, & autres Officiers du Roy, de faire entretenir le Commerce aüec les Habitans de Bourdeaux, & autres perfonnes de porter des viures, & autres choses neceffaires pour la fubvention de la Ville, fous peine d'eftre procedé contr'eux comme perturbateurs du repos public.

LE Duc d'Efpernon, dans l'efprit duquel la hayne & la vengeance trouvent de la matiere à produire de profondes racines, non content d'auoir exercé fa rigueur fur les cendres du feu Marquis de Chambaret, la porta fur fa memoire & fa pofterité, ayant obtenu au Conseil priué du Roy, vn Arrest fur Requête, par lequel il le fit declarer criminel de leze-Majefté; & ordonner que fa maifon feroit rafée, & fes bois degradez: ce qui donna fujet à la Dame de Chafteau-neuf fa vefue, de porter fa Requête au Parlement, chargée de regrets & pleine de compaffion, pour, à la faueur de fes hypotheques, & de celles des creanciers de fon Mary, arrefter l'execution de cet Arrest, qui par cette furprife outrageoit la fidelité d'vn mort, & ruynoît vn nombre de viuans. On peut bien s'imaginer qu'elle n'eust pas beaucoup de peine à obtenir ce quelle demendoit. La valeur de fon Mary; les feruices qu'il auoit rendu à Bourdeaux; le refpect qu'on auoit pour fa memoire, & l'affection qu'on deuoit à fa famille, follicitoient affez ouuertement pour elle. En forte que par Arrest rendu, apres auoir ouy le Procureur General,

qui conclut à son aduantage, la Cour octroya acte à cette Dame, de l'opposition qu'elle formoit à l'exécution de l'Arrest du Conseil ; & ordonna que sur icelle, toutes parties y ayant interest, se pouruoyroient par deuers le Roy dans deux mois. Et cependant que sous le bon plaisir de sa Majesté, l'exécution de cet Arrest surcroiroit. Deffences formelles furent faites à toutes personnes, de quelque qualité & condition qu'elles fussent, de passer outre au prejudice de l'opposition, à peine de trente mil liures, & de respondre en leurs priuez noms de tous les despens, dommages & interests de ladite Dame de Chasteau-neuf & des creanciers legitimes de feu Marquis de Chambaret. Et ordonna que le Gouverneur de la Province de Limosin, seroit exhorté de tenir la main à l'exécution de l'Arrest. Enjoignit à tous Seneschaux, Vi-seneschaux & Consuls des Villes & Communautéz voisines, de prester main forte à l'exécution d'iceluy, à peine de suspension de leurs Charges ; & de respondre en leurs priuez noms du rase-ment de la maison de Chambaret, & de tous les despens, dommages & interests qu'icelle de Chasteau-neuf opposante, & autres legitimes creanciers du defunct Marquis de Chambaret, pourroient souffrir.

CHAPITRE V.



ENDANT ces coups fourrez ce n'estoit qu'un cōbat de papier. Ces Arrests qu'on opposoit aux autres; les Ordonnances qui se cassoient entr'elles animoient les partis, mais ne deffaisoient pas les troupes. Le Duc d'Espèrnon enuoyoit des coureurs qui rauageoient la cāpagne, & pilloient iusques aux portes de Bourdeaux. On auoit beau ordonner des Conseillers pour Capitaines Colonels dans chacune des Iurades; faire des Reglemens pour les gardes; mettre les portes au sort, les Espèrnonistes ne s'effrayoient point au bruit de tous ces ordres. Il falloit auoir des troupes réglées pour garder la campagne, & s'opposer aux forces de l'énemy. Le sieur de Guyonnet fut cōmis pour aller dans le Limosin, faire executer l'Arrest que la Cour auoit rendu contre les leuées extraordinaires que faisoit le Duc d'Espèrnon dās l'estenduë du Ressort. Ce n'estoit neantmoins qu'un pre-texte pour joindre à Chèronac le Marquis de Saulvebeuf, qui s'estoit engagé dans la deffence du party de Bourdeaux, duquel le Duc d'Espèrnon ne sceut le diuertir, quelle priere qu'il luy en fit par escrit ou par la voix de ses intimes : laquelle deputation il receut avec tant d'honneur, qu'il creut estre obligé d'en faire vne reconnaissance particuliere, par cette Lettre qu'il escriuit au Parlement.

MESSEIGNEURS,

Je serois au terme de mes souhaits, si je pouvois par mes tres-humbles services, correspondre aussi parfaitement à l'honneur dont vous me comblez, comme j'en estime l'employ glorieux. Tout ce que vous pouvez attendre de la sincerité de mes obeysances & de la diligence de mes soins, MESSEIGNEURS, je vous les vouë & vous les consacre avec ma vie & mes amis. Et en remettant les plus amples assurances au témoignage de Monsieur Guyonnet, sans vous en escrire davantage, je vous feray parler mes effets pour moy, afin de vous donner de meilleure grace les preuves de la qualité que je porte,

MESSEIGNEURS,

De vostre tres-humble & tres-
obeyssant Seruiteur,
SAVLVEBEVF.

A Pierre-buffiere, le 11.

Aoust 1649.

C E Marquis , qui par la reputation de sa valeur & par la dignité de ses emplois , ayant esté longuement Marechal de Camp des armées du Roy , & depuis General des troupes du Duc de Parme , auoit acquis beaucoup d'amis & de credit dans le Limosin & Perigord , se porta avec tant de zele dans cette affaire , qu'en moins de cinq jours il courut , luy deuxiesme , l'une & l'autre Prouince , & attacha à ce party prez de quatre cens cheuaux , nonobstant les intrigues du Duc d'Espéron , qui auoit desia preuenu les siennes , & arresté la parole de la principale Noblesse , qui ne craignit pas de s'en excuser , avec pretexte d'honneur , pour s'engager avec luy. Cette Lettre fut suiue d'une réponse que la Cour luy fit , avec l'inscription qu'elle luy donna , *d'honoré Seigneur*. Pendant qu'il traualloit à arrester la parole de ses amis pour le party de Bourdeaux , le sieur de Mirat Conseiller , & l'un des Deputez du Parlemēt , reuenant à Bourdeaux pour y porter quelques ordres du Roy , fut arresté à Blaye par le sieur de Ioüigny , qui commande la place sous le Duc de S. Simon ; & en donna aduis à mesme temps au Duc d'Espéron : comme aussi le sieur de Mirat en escriuit au Parlement , & luy fit entendre cette violence ; à laquelle il auoit defferé , par vne prudence que la Cour approuua.

IL est souvent vray ce que l'on dit , Que l'on donne au loup les brebis à garder. Monstry , qui tire de la substance de Bourdeaux , les appointemens de Garde-coste de Xainctonge & de Medoc , entra dans la riuere de Garonne avec huit vaisseaux , & quelques batteaux ou

pinasses, sous pretexte de venir à Bourdeaux, pour mettre pied à terre, faire du ravage dans le Faux-bourg des Chartreux, fermer le passage de la ruiere, & favoriser le dessein du Duc d'Espernon, qui faisoit bruit de se saisir du Faux-bourg de S. Seurin du costé de la terre. Mais tout au contraire il battit l'une & l'autre coste de Xainctonge & de Medoc, sur les bords desquelles, il pratiqua toute sorte de brigandages; & portant sa piraterie plus auant, il arresta les Nauires Bretons & d'autres estrangers, qui alloient en droite route à Bourdeaux, les pillà, & mit tellement l'espouvente parmy les Habitans du Medoc & de la Xainctonge, que le Commerce en fust entierement interrompu. Cela donna sujet au Procureur General de s'en plaindre, & demander la permission d'informer de toutes ces volleries, sur la preuve desquelles le Parlement rendit Arrest, par lequel il ordonna que les informations seroient continuées. Et cependant desfences furent faites à Monstry & ses adherans, d'vser de telles violences & pillages à peine de la vie. Et en cas de contrauention, fust permis aux Habitans de Royan, des Isles & Bourgs adjacens de se saisir d'eux, à tous Capitaines & soldats de ces lieux & des costes de Medoc & Xainctonge, de prendre les armes pour les repousser, & leur courre sus, comme peit irbateurs du repos public, & vrais pirates. Enjoignit à tous les Seigneurs, Gentils-hommes dudit pays, Escheuins, Consuls & Commuuautez des lieux, de prester main forte à l'execution de cet Arrest, & faire en sorte que la force en demeurast au Roy & à sa justice. Desfences furent aussi faites à toutes personnes, de quel-
que

que qualité & condition qu'elles fussent, de fournir à Monstry aucuns viures, victuailles & munitions de guerre, à peine de la vie; & de respondre des euenemens en leurs priuez noms. Le Duc d'Espéron conuoquoit de son costé la Noblesse de son Gouvernement; contraignoit les Communautéz de luy fournir des hommes; assembloit des troupes, ausquelles il faisoit rauager les champs, ruyner les maisons, enleuer les meubles & les grains des Habitans de Bourdeaux; & bouchoit tous les passages des riuieres. Surquoy le Parlement donna vn autre Arrest, qui faisoit deffences aux Gentils-hommes du Ressort, & tous autres, de porter les armes à la suite du Duc d'Espéron, dans le dessein qu'il auoit contre cette Ville, à peine de priuation de Noblesse, razement de leurs maisons, dégradations de bois, & de respondre en leur propre & priué nom, de tous les degats & rauages, despens, dommages & interests. que les particuliers souffriroient. Exhorta la Noblesse d'assister Bourdeaux de leurs armes & de leur credit, contre les oppressions du Duc d'Espéron. Enjoignit aux Communautéz de son Ressort, de fournir hommes & argent, suiuant leur pouuoir pour la deffence de la Ville.

IL faut aduoüer que si la justice est aueugle pendant la paix, elle est aussi bien paralitique dans la guerre; & que ceux qui ont les armes & la force en la main, scauent railler de son bandeau & de ses balâces; & se joüir de ses Arrests, pour si foudroyans qu'ils soient, si elle ne les fait valoir à coups d'espée dont on la despeint armée. Les Nobles & les roturiers presentotent leur sang

& leurs vies ; mais c'estoit pour le vendre au plus difant. Si bien que reconnoissant qu'on ne pouvoit rien faire de bon sans argent , il fallut en chercher. Les Officiers du Parlement s'estoient desia taxez. Ils auoient comprins dans la taxe les Conseillers honoraires , & les vefues de leurs confieres. Le sieur de Muscadet auoit esté commis pour en faire la leuée. Cette Commission le faschoit , par la rencontre de beaucoup de personnes qu'il ne vouloit pas choquer. Le sieur de Geneste President aux Requestes fut subrogé en sa place , qui faisant ceder ces considerations de respect à la necessité , s'en acquitta bien exactement. On assembla tous les autres Corps , & les cent & trente dans l'Hostel de Ville , où l'on resolut vn emprunt payable à proportion par toutes les Compagnies ; & que pour cet effet il seroit estably vn Conseil des finances , composé du sieur Dufault Aduocat General , vn Tresorier de France , vn Iurat & deux Bourgeois , dont le soin particulier estoit d'estudier toutes les inuentions , pour auoir de l'argent , & en voir faire l'employ. On sceut d'abord qu'il y auoit dix mil liures oisues dans la recepte des decimes. On s'en faisit , sous la charge du remplacement. On apprint que les fuyards auoient ferré dans les Conuents ce qu'ils auoient de plus precieux , & qu'ils n'auoient osé emporter avec eux. On bailla des Commissaires pour aller à la descouverte , qui fut assez infructueuse , ou par la conniueance de quelques Commissaires , ou par le secret des Superieurs de ces maisons Religieuses.

CEPENDANT que ces Députez particuliers trauailloient à faire fonds pour l'espargne , le Parlement estoit

occupé à donner ordre au gros des affaires. Il donna audience au sieur de Mirat, qui leur faisant recit de sa negociation, & de toutes les rencontres qui s'estoient présentées pendant sa Deputation, fit voir qu'il n'auoit pas moins de jugement & de prudence en sa conduite, que de cœur & de generosité en toutes ces actions. Mais comme les Ministres auoient grande peine à se deffendre de la vigoureuse poursuite que les autres Deputez, que le sieur de Mirat auoit laissé en Cour, faisoient au prez du Roy, & de la crainte qu'ils auoient que le Parlement de Paris ne se joignist à leurs interests, ils tascherent de faire choir les armes des mains des Bourdelois, par l'enuoy du sieur de Comenges, lequel, au lieu d'aller droit à Bourdeaux, alla trouver le Duc d'Espéron, duquel il prenoit les instructions pour conduire sa negociation. Il faut aduoüer qu'il s'en acquitta bien mal; & que d'ailleurs, encore qu'il fust recommandable par le merite de sa personne, il n'estoit pas neantmoins d'assez haute consideration pour estre fait l'arbitre d'un si grand differend. Il print mal ses mesures d'entrée, quand il écriuit au President Latrenne, qui estoit à la teste de cette Compagnie, qu'il auoit vn pouvoir absolu pour pacifier les troubles de la Ville & de la Prouince, sans qu'il justifiast autrement son ordre. Il enuoya vne pareille Lettre aux Iurats, qui en donnerent à mesme temps aduis à la Cour, avec protestations d'une dependance absoluë, & d'une parfaite obeyssance aux ordres qu'elle leur prescriroit. Ces Lettres ayant esté renduës par vn Ecclesiastique, & ce grand pouvoir du sieur de Comenges n'ayant pas esté assez puissant, ou n'ayant pas esté

employé, pour empescher que le Duc d'Espéron ne fit des actes d'hostilité aussi estranges qu'auparavant, fit croire qu'il n'y auoit pas moins de fourberie dans les discours de cet Entremeteur, que dans les actions de ceux qui l'auoient deuancé. Ensorte que la Cour ordonna au President Latrenne de luy faire response en son particulier, & luy tesmoigner que s'il y auoit de grace à receuoir, c'estoit dans la source qu'elle la vouloit puiser, & la prendre immédiatement de la bonté du Roy. Cette faute qu'auoit desia fait le sieur de Comenges, fut suiuite d'une autre plus grande, quand à peu de iours de là, escriuant au Parlement pour le mesme sujet, il fit porter sa Lettre par vn Religieux, & qu'au lieu de mettre en l'inscription vn mot de *Messeigneurs*, il mit l'adresse seulement à *Messieurs de la Cour du Parlement de Bourdeaux*, paroles de mespris, qui furent payées sur le champ d'un plus grand, la Lettre luy ayant esté renuoyée sans auoir esté ouverte, & sans response de la part du President Latrenne, entre les mains duquel elle auoit esté remise: ce qui aigrist les esprits, tant il est important de prendre garde à n'employer dans les affaires d'importance, que des personnes capables & adroites, estant certain qu'en matiere de complimens, qui doiuent estre rendus aux Grands, & aux Compagnies Souueraines, il vaut mieux faillir dans l'exez que dans le manquement, pource que l'un chatoüille, & l'autre blesse avec outrage.

Le sieur de Geneste, President aux Requestes, faisoit exactement son deuoir. Il contraignoit au payement des taxes les absens, qui estoient marquez sur son roole,

par execution & vente de leurs meubles. Le premier President & le sieur de Montesquieux son gendre, ny furent point obmis. Ils estoient taxez à mil frans chascun. Les Huissiers toutefois auoient du respect pour eux, & consideroient leurs meubles comme des choses sacrées. Le sieur de Geneste s'en plaignit à la Cour, qui par son Arrest, leuant ce scrupule, les rendit esgalement sujets à la loy de la necessité, & les meubles du premier President responsables de l'une & de l'autre taxe. Cette façon d'agir fit esclat, & fit entendre à ceux qui vouloient de l'employ, qu'il y auoit de l'argent. Ensorte qu'à ce bruit beaucoup de Noblesse se rendit à Bourdeaux. Il falloit les faire subsister attendant qu'ils fussent employez. Et pour cet effet, il fut arresté que les Commissaires du Conseil de Police, les distribueroient dans les maisons Bourgeoises, & celles de Messieurs du Parlement: ce qui pourtant ne fut pas executé, pource qu'on ne demeura pas long-temps à leur donner employ. La paix, que le sieur de Comenges auoit proposé, ne fut pas rebutée, que l'on apprint que le sieur Duburg Conseiller au Parlement, traittoit à Paris où il estoit la paix à la sourdine, sans ordre de sa Compagnie, & au prejudice du pouvoir des Deputez qu'elle y auoit; & qu'il parloit de reünir les cœurs du Parlement & du Duc d'Espéron. Il entreprenoit vn ouvrage bien difficile, & moralement parlant impossible. Il faut croire qu'il agissoit par tendresse. Neantmoins la hauteur de cette entreprise, & la connoissance deses conuersations ordinaires, rendirent sa negociation si fort suspecte au Parlement, que sur la plainte du

294 D E S M O V V E M E N S ,
Procureur General, il fut rendu Arrest , par lequel
deffences tres-expresses furent faites à toutes personnes,
autres que les Deputez qui estoient à la suite du Roy ,
& nommément au sieur Duburg , de traiter des affaires
qui concernoient la Cour , & les oppressions & actes
d'hostilité que le Duc d'Espéron faisoit faire contre
les Officiers d'icelle & les Habitans de Bourdeaux , ny
se mesler de parler de paix entre la Cour & le Duc d'Es-
pernon , à peine de dix mil liures , & autre plus grande
si le cas y escheoit. Et ordonna que l'Arrest qui inter-
viendroit , seroit signifié au sieur Duburg en son domi-
cile , & enuoyé aux Deputez , pour le luy faire signifier
parlant à sa personne. Il est quelquefois injurieux d'estre
si volontaire.

I L n'appartient qu'aux Villes qui sont frontieres
des Royaumes , ou qui sont teste des Republiques ,
d'entreprendre à faire la guerre. Les principaux soins
des Magistrats , qui conduisent celles-la , consistent à
mettre chasque année de l'argent en reserve , & remplir
les Magasins des choses necessaires pour leur deffence ;
aux autres , tous ces preparatifs sont la derniere de leurs
pensées. On n'auoit pas presque amassé de l'argent à
Bourdeaux qu'il estoit despensé. Et bien souvent le
fonds de la despesse surpassoit celuy de la recepte. Si bié
qu'il falloit auoir des soins continuels pour la finance.
On eust aduis que plusieurs Marchands deuoient
des sommes assez considerables aux Receueurs du
Conuoy ; On ordonna que tous ces debiteurs remet-
troient les sommes qu'ils deuoient , entre les mains des
Receueurs des deniers publics , pour employer aux ne-

cessitez de la guerre, à la charge qu'elles seroient empruntées par tous les Corps, suivant la deliberation de l'Hôtel de Ville & l'Arrest de la Cour, & d'estre remplacez sur les premiers & plus clairs deniers prouenans de la communauté de la Ville. Ce n'estoit pas assez. On trouuoit de l'argent à prester. Mais comme ceux qui l'auoient, preferoit la seureté de leur coffre à celle de leur vie; & qu'ils ne le vouloient point fournir qu'ils n'eussent des debiteurs solubles, & contre lesquels ils peussent bien agir; & que les autres n'en vouloient point prendre, ayment mieux obliger leur personne d'as le peril d'une ruine commune, qu'engager leur famille dans une indigence particuliere, cette auarice reciproque ruynant tout, le Parlement fut forcé d'vser de son autorité, & d'ordonner que ceux qui seroient demandez par les creanciers & choisis par les Commissaires, qui estoient deputez à cet effet, passeroient obligation en presence des Jurats & du Procureur Syndic, des sommes qui seroient empruntées, sous l'indemnité qui leur seroit promise de la part de tous les ordres de la Ville & de la Bourgeoisie, le Procureur Syndic stipulant pour tous. Et qu'à cet effet chaque Compagnie & la Bourgeoisie, luy remettroit le lendemain l'acte de leur consentement en bonne forme. Et que ceux qui ne voudroient pas signer, ou consentir à ces obligations, seroient chassés de la Ville, & leurs biens employez au payement de ce qui seroit aduancé pour les necessitez publiques.

CELA fit à la verité quelque effet; mais non pas tout celuy qu'on pouvoit desirer. On considéra que tous les

Habitans, estans esgalement obligez à la deffence d'une cause commune, deuoient contribuer aux moyens pour la faire. On ne vouloit point pourtant venir à la capitation, pource qu'elle traïsne avec elle des suites dangereuses, & qu'elle ne se peut faire dans vne Ville libre, qu'avec beaucoup d'inegalité & d'injustice. Neantmoins cette necessité qui morgue la justice, contraignit le Parlement & les Jurats de la suïure. Ce ne fut pas sans beaucoup de murmure. On grondoit contre ceux qui faisoient les taxes. On parloit contre les Receueurs. Plusieurs aymoient mieux tirer l'espée du fourreau qu'un teston de la bourse. Ils aymoient mieux souffrir les outrages de leur ennemy, que donner de quoy les repousser. C'est vne chose estrange que le caprice d'une communauté, & l'inegalité des esprits qui la composent. Les vns se portoient au payement de leur taxe avec gayeté; les autres avec douleur. Quelques autres se laissoient violenter iusques dans la prison; & d'autres estoient encor si opiniastrés, qu'ils se laissoient ronger aux garnisons qu'on enuoyoit chez eux. Et en effet cette façon d'agir eust passé pour vne tyrannie, & vne oppression aussi rude que celle de l'ennemy, si la faueur de la cause publique, & la conseruation de la liberté ne l'eust fait trouver aussi raisonnable que necessaire. Le sieur Duduc, qui auoit cette commission, s'en acquittoit avec tant de ferueur, qu'il eust attiré sur luy les imprecations d'un chascun, sans ce que l'on reconnoissoit que le zele qu'il auoit pour le bien du public, estoit le vray motif de cette exactitude. D'autres Commissaires s'employèrent aussi de leur co-

costé

sté, tantost à fouïller les coffres des consignations, tantost à faire contribuer les Marchands Portugais, & puis à rechercher les contreventions des raffineurs de sucre, lesquels on receut à composition: ce qui ne doit point estre trouvé estrange dans vne occasion si pressante, puis que de nostre temps on a veu mettre en party, dans le Conseil du Roy, l'impunité des roigneurs.

CHAPITRE VI.



Un grand amas d'argent, qui reuenoit presque à vn million, fut l'Ayman qui attira grand nombre de soldats au secours de Bourdeaux. Toutefois le Duc d'Espernon ne laissoit point ses troupes dans l'oyfueté. Il craignoit d'en estre abandonné, à cause qu'il ne les payoit point, encore qu'il fist de tres-grandes leuées. Si bien que pour les retenir, il souffroit qu'ils se portassent au dernier point du libertinage. Les fruiçts des Habitans de Bourdeaux enleuez dans les champs; leurs bois degradez; les moulins ruynez; leurs maisons abbatuës, estoient les moindres de leurs mauvaises actions. On n'oyoit parler que d'hommes massacrez, de femmes forcées, de filles violées, d'Autels despoüillez, de Prestres meurtris, & de profanation des choses les plus sacrées. Il auoit receu vn Exprez, en suite de l'enuoy du sieur de Mirat, qui luy

portoit commandement de la part du Roy, pour entendre à la paix, & arrester ses actions violentes. Mais tout au contraire il s'aigrift dauantage ; & non content de faire tous ces rauages à la campagne, il donna ordre à la garnison du Chasteau Trompette de mettre Bourdeaux en poudre, & le faire brusler. Ce fut alors que du Haumon, qui iusques à ce jour auoit esté plus retenu que son Maistre, suiuit les mouuemens de son indignation. Il menassa les Habitans de les consommer par des bombes. Il fit mettre le feu à des choppes qui estoient le long du Quay. Il fit tirer nombre de volées de canon sur les toits de la Ville, & dans quelques maisons Religieuses. Il enleua les bestiaux qui passoient au deuant du Chasteau. Il tua les passans. Il en eust fait dauantage, s'il eust eu plus grande liberté.

Les esprits les mieux faits estoient tous alarmez, non pas par raison de foiblesse, & qu'ils creussent n'estre pas assez forts pour se pouuoir deffendre ; mais bien par vne reflection qui portoit leur pensée iusques au bout de la guerre, dont ils apprehendoient l'éuenement, si le party n'estoit soustenu par vne personne qui fust en consideration dans l'Estat. Le Duc de Beaufort, qui auoit attiré à soy le cœur des peuples, pour s'estre déclaré hautement le protecteur de leurs libertez, estoit sollicité par des intrigues secretes de prendre la protection de celuy-cy. Il le promit aux traittans. Le Marquis de Saulvebeuf deuoit estre le garant de son engagement. Les Marquis de Sainte Croix, Lusignan, Theobon & d'Autefort, promirent de s'y joindre. Les

deux premiers se rendirent à Bourdeaux. Les autres faisoient des troupes chez eux. Ces deux premiers d'abord partagerent les cœurs. Le menu peuple couroit en foule au Marquis de Sainte Croix, par le respect que Bourdeaux conseruoit pour la memoire du feu Marechal d'Ornano son pere. Et cet applaudissemēt estoit si grand parmy les artisans, que non contens de luy auoir rendu des honneurs & des salutations publiques, ils pretendoient le proclamer leur Maire. Toutefois cela ne faisoit pas grande impression dans les esprits les plus sensez, qui regardans l'vtilité du seruice, l'en jugeoient incapable, par vne maladie inueterée, qui menassoit sa ruyne : ce qui les obligeoit à porter leurs affections presentes sur le Marquis de Lusignan, du zele & de la conduire duquel on auoit desia receu des preuues. La reputation du vieux Theobon faisoit esperer beaucoup de la valeur de son fils, par la raison qui fait croire que l'Aygle produit bien rarement vne Colombe peureuse. Lamote d'Autefort estoit celuy qui satisfaisoit le moins l'attente qu'on auoit, le jugeant homme d'interest, & qu'il ne se faisoit de la partie, que pour meriter les bonnes graces d'un Parlement dans lequel il plaidoit.

L'ENGAGEMENT de ces braues n'empescha pas que le Parlement n'appellast à son secours le Marquis de Saulvebeuf, sur lequel il auoit vne plus ferme confiance, soit pource qu'il le tenoit de la main du Duc de Beaufort, qui leur faisoit esperer de se declarer leur Generalissime, soit par la connoissance qu'ils auoient de ses emplois, sa valeur & sa fidelité. Le sieur de Guyon-

net Conseiller estoit desia auprez de luy pour l'emmener à Bourdeaux. Le sieur Fonteneil Aduocat y fut encore enuoyé pour presser son voyage, qui le trouua flottant en diuerſes pensées. Le zele que ce Marquis auoit pour secourir Bourdeaux, estoit vn puissant sollicitateur pour l'y faire aller promptement. Les menasses que faisoit hautement le sieur de Pompadour, Lieutenant pour le Roy dans le Limosin, avec lequel il auoit eu querelle quelques iours auparauant, & les emplois qu'il faisoit pour rompre son voyage, & l'assiéger dans Pierre-buffiere, lieu de son assemblée, le retenoit, d'enuie d'aller au deuant de son ennemy. Les aduis qu'il receut que le Duc d'Espéron auoit bouché les passages de l'Isle & de la Dordogne, à la faueur des garnisons de Bourg & de Libourne, luy donnerent matiere à former vn dessein de Brauour, de faire vn Camp volant, pour franchir ces pas de hauteur; & battant les troupes du Duc, comme il se promettoit, commencer le secours par le triomphe. Toutefois comme ce n'estoit pas là qu'estoit le mal dont on cherchoit le remede, & que ce temps & ce courage se deuoit mesnager pour d'autres occasions, il se laissa persuader à ces deux enuoyez, de prendre la route de Bourdeaux, où il se rendit, apres auoir trauersé le Limosin & le Perigord, en esquipage de Chasseur, & à petites journées, pour donner loisir à ceux qui le suiuiotent, de le pouuoir atteindre, s'ils eussent eu assez de resolution pour l'ozer attaquer.

Chascun se peut imaginer avec quelles acclamations & quels transports de joye il fut receu dans Bourdeaux.

Le Parlement s'assembla extraordinairement , pour prendre son serment en qualité de *General des armées du Roy dans toute l'estendue du Ressort de la Cour , sous l'autorité du Parlement.* On delibera sur le rang que l'on luy bailleroit , & fust jugé à propos de le placer au dessus des Gens du Roy. Et tout en mesme temps , ayant esté mandé , & logé en la place susdite , qui luy fut marquée par le President Latrenne , il complimenta la Cour en cette sorte. *Messieurs , la plus grande gloire que j'aye jamais eue & que j'ay pu esperer , a esté l'advis qui m'a esté donné , que je pouvois servir le Parlement , pour le service duquel , je proteste d'employer ma vie jusques à la dernière goutte de mon sang , mes biens & mes soins avec grande affection. Et que si je ne le fais avec toute la fidelité possible , ma teste en respondra* Ce compliment ne fut pas sans repartie , le President Latrenne luy dit , *Monsieur , cette Compagnie a grande joye de vous voir ; & dans la connoissance qu'elle a de vostre valeur , elle espere que par vostre bonne conduite , cette Ville , la Province & le Parlement , seront à l'abry des persecutions & oppressions qui leur sont faites par le sieur d'Espernon , contre les intentions de leurs Majestez , qui n'ont que bonté pour leurs sujets , & pour cette Compagnie , qui ont demeuré tousiours fermes dans l'obeyssance & fidelité au service du Roy.* A suite de quoy , son serment ayant esté receu , la Cour deputa les sieurs de Raymon & d'Espagnet Conseillers , pour les reueuës , payement & subsistance des gens de guerre , tant à pied qu'à cheual , & pour assister avec le Marquis de Saulvebeuf , à pourvoir aux

302 DES MOVVEMENTS,
fortifications nécessaires à la deffence & feureté de
la Ville.

LE Parlement de Bourdeaux , qui ne vouloit pas
se trouver seul enuelopé dans vne affaire de si haute im-
portance , sollicitoit ceux de Paris & de Tolose de se
joindre à ses interests. Le premier trauailloit à calmer
cet orage. Le deuxiesme payoit de belles paroles. Et
combien que le sieur de Thibaut Conseiller fust allé ex-
prez à Tolose , pour lier la partie qu'on promettoit im-
manquable , il n'en rapporta qu'un Arrest qui ne fut pas
beaucoup satisfaisant. Ce n'est pas qu'il ne s'y fust em-
ployé bien vigoureulement , & que la Cour ne luy té-
moignast qu'elle se loüoit beaucoup de ses soins. Alors
le Marquis de Saulvebeuf formant des desseins glorieux
pour les armes de Bourdeaux, resolut de leur faire cueil-
lir des Lauriers dans les champs que leur ennemy raua-
geoit. Mais considerant qu'il estoit perilleux de porter
les armes au dehors , & laisser la Ville desarmée entre
les bras des ennemis qui estoient au dedans , il entra au
Parlement pour faire deux propositions ; par l'une des-
quelles il demandoit qu'il luy fust permis d'attaquer &
de prendre le Chasteau Trompette , qui estoit le frein
par lequel le Duc d'Espernon retenoit la fougue des
Bourdellois ; & en l'autre , que les Habitans déclaras-
sent s'ils tenoient le party de la Ville ; & que ceux qui
ne voudroient point faire cette declaration , & qui ne
seroient pas dans le party , vuidassent la Ville dans
vingt-quatre heures , à peine de la vie. On ne sceut fai-
re resoudre cette derniere , par l'engagement que la

plupart de ceux du Parlement auoient dans le party contraire, ou par la crainte que s'estans declarez, ils ne fussent exposez à la persecution du Duc. Pour la premiere, chascun s'y porta volontiers, par le desir qu'on auoit de s'affranchir de la tyrannie de ce Chasteau & de sa garnison. Surquoy fust baillé l'Arrest qui suit.

LA COUR deliberant sur la necessité des affaires presentes, & les actes d'hostilité que les gens de guerre du sieur Duc d'Espernon commettent de tous costez, contre les Habitans de la presente Ville; mesmes qu'il a fait tirer le canon du Chasteau Trompette de jour & de nuict puis le dix-sept du present mois d'Aoust, incessamment sur la presente Ville, & sur le Port & Havre d'icelle iusques à present; & qu'il a esté tué ou bleffé grand nombre de personnes, tant par le moyen des coups de canon que des mousquets, que les Capitaines & soldats dudit Chasteau tirent & font tirer continuellement, soit dans les rues ou sur les maisons & Monasteres de ladite presente Ville; & de plus ont mis le feu dans un quartier de la Ville la nuict de Dimanche dernier: ce qui a mis ladite Ville en grande alarme, lesdites volées de canon incommodant le bord de la riui-

304 DES MOUVVEMENTS,
re , depuis la porte du Chapeau-rouge jusques à
la porte des Salinieres , à tel point que personne
ne peut sortir sur le Quay sans peril de sa vie.
Ouy le Procureur General du Roy, LADITE
COUR, les Chambres assemblées , à Ordon-
né & Ordonne que le Marquis de Saulvebeuf
faisa tous les actes & entreprinſes qu'il jugera
necessaires , pour la seureté & deffence de la pre-
sente Ville & des Habitans d'icelle. FAICT
à Bourdeaux en Parlement , le vingt-septiesme
Aoust 1649.

Signé , DE PONTAC.

VNE troisieme proposition fut jointe à ces deux
premieres , de faire rabais d'une moitié des Tailles dās
le Ressort du Parlement , moyennant l'auance de l'autre.
Ce dessein auoit trois visées ; l'une d'empescher
que le Duc d'Espernon ne profitast des Tailles pour la
subsistance de ses troupes , estant croyable que le plat
pays aymeroit mieux estre quitte en payant la moitié
aux Receueurs que le Parlement commettrait , que
se laisser persecuter aux Espernonistes pour l'entier
payement ; l'autre , que par la leuée & l'auance d'une
moitié , on pourroit faire vn fonds raisonnable voire
suffisant pour la despence de la guerre ; & la troisieme
c'est que ce soulagement , charmant les peuples , pou-
voit attirer leurs cœurs & leurs forces au secours de
ceux

ceux qui leur faisoient la grace. Cette proposition demeura quelque temps en balance , par la considération que le Parlement auoit pour les deniers du Roy. Neantmoins le dernier motif l'emporta, & fit résoudre l'Arrest en cette sorte.

SVR ce qui a esté représenté à la Cour , Que le sieur Duc d'Espernon , ayant esté deuëment informé par un Courier expréz , des Ordres de Sa Majesté , donnez au sieur de Mirat Deputé de la Cour , pour reuenir dans la Prouince porter paroles de paix , & assurance des Commandemens faits audit sieur Duc d'Espernon , de cesser tous actes d'hostilité ; neantmoins ledit sieur Duc d'Espernon auroit fait retenir ledit sieur de Mirat à Blaye pendant trois iours , apres lesquels luy ayant fait rendre la liberté de venir à Bourdeaux avec assurance , le mesme iour & dans le mesme temps que ledit sieur de Mirat faisoit la relation de sa negociation , & les Commandemens du Roy dans le Parlement , les Chambres assemblées , ledit sieur Duc d'Espernon , par un pur mespris desdits Ordres de Sa Majesté , & pour oster aux Habitans de cette Ville une esperance si chere que celle qu'ils auoient desia conceüe du bien de la paix , continuant ses rauages & ses desolations ordinaires contre la

Ville de Bourdeaux , qui est la Capitale du Gouvernement , & ses pays voisins , fist tirer les canons du Chasteau Trompette sur la Ville , & a continué depuis nuict & iour , la battant incessamment , ruynant les maisons , s'estant attaché aux Eglises , mesmes à celle des Jacobins , qui ne peut donner aucun ombrage audit Chasteau , ayant percé aussi en diuers endroits , & ruyné le dortoir du Couuent des Religieuses de Sainte Catherine , qui ont esté contraintes de l'abandonner , au grand scandale de la Religion , l'une d'elles ayant esté blessée d'un coup de boulet. Et en suite il auroit fait faire une sortie dudit Chasteau de la plus part de la garnison la nuict du vingt-deuxiesme du present mois , & fait mettre le feu dans un quartier de la Ville avec des flambeaux allumez , & des feux d'artifice , qui est la dernière calamité de laquelle on peut affliger une Ville. En sorte que plusieurs bastimens & plusieurs meubles , marchandises & personnes y furent consommées. Et qu'en outre par un brigandage manifeste , ceux de ladite garnison , pendant la cessation des armes , ont enleué de plain iour diuerses denrées & marchandises de notable valeur qu'on portoit dans la Ville , & prins des bœufs & des charettes , & mesmes des bestiaux appartenans aux Bouchers de la Ville , qu'on passoit au deuant dudit Chasteau , en mesme temps que

ladite garnison tiroit sa subsistance & ses alimens de la Ville ; Qu'ils ont battu , blessé & tué en diuers rencontres plusieurs Bourgeois , & des personnes de toutes conditions , qui passoient à leur veüe , sur la foy de la paix. Et que pour acheuer une desolation generale de la Ville & de toute la Prouince , ledit sieur d'Espernon a formé un blocqus entier de ladite Ville , aduancé des vaisseaux à l'emboucheure des riuieres , & basti de nouveaux forts en diuers endroits le long de leurs riuages , demolissant les maisons , abbatant les bois , & interdisant le Commerce ; non seulement aux originaires François , mais encore aux vaisseaux estrangers & Marchands , qui commençoient de venir pour la prochaine Foire ; Qu'il a bruslé aussi depuis la venue dudit sieur de Mirat , les moulins de terre des enuiron de la Ville , pillé & rauagé les maisons des Messieurs de Suduiraut , de Boucaut , Denis & Cursol , Conseillers , & celle du sieur de Pontac , Greffier en chef de la Cour , & de plusieurs autres Officiers du Parlement & Bourgeois de la Ville , demolyrais pied de terre plusieurs Chasteaux à la campagne , parmy lesquels il y en a trois qui releuent en foy & hommage du Roy , dans la Duché d'Albret , adjoustant à toutes ces miseres les menasses qu'il fait de donner le pillage de la Ville à ses

soldats , & d'exercer tous actes d'inhumanité contre tous aages & tous sexes ; Qu'après avoir fait enlever les bleds par toute la campagne , il a fait vendre en quelque endroit & brusler dans les autres , les vaisseaux vinaires , & les barriques préparées pour les vendanges , pour priver non seulement les propriétaires de leurs biens , mais encore les aliéz de l'Estat & estrangers , du fruit du Commerce , & de la fertilité d'une si grande Prouince , qui perit par des estranges degats. Et dautant que de son autorité priuee il s'est emparé depuis six mois de tous les deniers Royaux qu'il a trouvé dans les Receptes , & qu'en outre il a fait de nouvelles impositions sur le peuple , qu'il exige à main armée , contre les termes de l'Ordonnance & nouvelles Declarations du Roy ; Qu'il entretient aux despens du peuple dans toute l'estendue du Gouvernement quantité de gens de guerre , un nombre extraordinaire de ses gardes , qui viennent à discretion dans toute l'estendue du Ressort , comme en pays ennemy ; Que sous pretexte de la Citadelle de Libourne il fait des contributions continuelles dans l'entre-deux Mers ; Et qu'il a procuré de faire donner des routes aux troupes du Roy dans les Prouinces de Limosin & Xainctonge , pour affliger , comme elles font , par leurs passages tout le Ressort de la Cour , &

leur oster les forces de secourir la Ville Capitale, opprimée ; & qu'ainsi par un abus injurieux à l'autorité Royale, il se sert des droits du Roy, & abuse des biens des peuples, à leur grande foule, & à leur ruyne totale ; Et qu'il n'est pas juste qu'il demeure tousiours Maistre des deniers des Tailles & subsistance, lesquels estans destineez pour la seureté & repos des Prouinces, ne doiuent point estre conuertis en des vsages si contraires, ny servir d'instrument à leur ruyne, au lieu de leur conseruation. Ouy sur ce le Procureur General du Roy, L A C O V R, les Chambres assemblées, pour conseruer le reste de la Prouince affligée, & en esuiter la ruyne & désolation entiere, A O R D O N N E E T O R D O N N E, que sous le bon plaisir de Sa Maiesté, les Sujets du Roy seront deschargez dans toute l'estendue du Ressort du Parlement, de la moitié de la Taille & subsistance, à la charge qu'ils payeront presentement l'autre moitié à ceux qui seront Commis par la Cour pour en faire la leuée en chaque Eslection du Ressort, pour estre les sommes en prouenant, employées au seruice du Roy & de son Estat, & pour la conseruation de la Ville & de la Prouince, dans vne si iuste & si nécessaire despence, deduction prealablement faite sur ladite moitié restan-

te des Tailles & subsistance des Charges locales & gages des Officiers qui leur seront payez, suivant la dernière Declaration de Sa Majesté, & moyennant le payement fait de ladite moitié des Tailles & subsistances, les Sujets du Roy seront valablement deschargez du payement du total. Fait ladite Cour inhibitions & deffences à toutes personnes de les contraindre, ny exiger d'eux aucunes sommes excedantes ladite moitié, à telles peines que de droict. Enjoint à tous Officiers, Jurats & Consuls des Villes, & autres Sujets du Roy, à peine de respondre des evenemens en leurs propres & priuez noms, de prester main forte à l'exécution du present Arrest, lequel, affin que personne n'en pretende cause d'ignorance, sera leu, publié & affiché par tout où besoin sera, & exécuté en vertu du simple Dictum, attendu ce dont s'agist. FAICT à Bourdeaux en Parlement, les Chambres assemblées, le vingt-huictiesme d'Aoust 1649.

Signé, DE PONTAC.

Tout ce qu'opéra cet Arrest, fust que le peuple de toutes les Prouinces, qui sont dans l'estendue du Ressort du Parlement de Bourdeaux, marqua qu'il auoit inclination pour la deffence de cette cause; & qu'il auoit de l'aersion contre les Gentilshommes & les Officiers qui se jettoient dans le party contraire. Il combattoit par le desir, mais il n'osoit se declarer les armes à la main. Il n'y eust que le Pareage seul dans le Perigord qui forma des troupes, à la barbe du Lieutenant du Roy, & qui alla en foule s'enrooler dans cet armement. On ne toucha jamais pour cela aux deniers du Roy. On ne contraignit point les Receueurs à rendre compte de leur recepte. On n'en establist point de nouveaux pour faire la leuée de cette moitié, qui, suiuant l'Arrest, deuoit estre aduancée. En vn mot cet Arrest n'estoit entreprenant que dans les apparences; encore qu'il semblast qu'il y eust grande raison à le faire valoir, pour affoiblir dautant le Duc d'Espéron, qui, abusant de l'autorité du Roy, prenoit impunément les deniers des Tailles, fouilloit les receptes, & surchargeoit les peuples, sans que ces troupes en fussent mieux payées. Il demandoit tousiours; il receuoit tousiours, & ceux qui le suiuiot languissoient tous de faim, & n'auoient point d'argent.

CHAPITRE VII.



LES esprits estoient tous empressez ; les vns à faire vn fonds, les autres à l'employer. Le sieur Duduc pressoit le payement des taxes. Le sieur de Geneste faisoit vendre les meubles des absens. Le sieur de Massiot alla iusques aux caues desterrer la vaisselle d'argent. Le Conseil de finances pressoit les bons Bourgeois sur le fait des emprunts, pendant que le Marquis de Saulvebeuf & celui de Lusignan, qui peu de iours auparavant auoit presté le serment de Lieutenant General, regloient les troupes d'Infanterie & de Caualerie, & en distribuoient les Commissions & les armemens. Les partisans du Duc d'Espéron, qui croyoient abbatre par la terreur le courage des Bourdelois, faisoient courir le bruit que dans son Conseil de guerre il auoit esté resolu de se faire entrer dans la Ville, le flambeau dans la main & l'espée dans l'autre. On persuadoit cette affaire facile, si, pendant que la garnison du Chasteau Trompette faisoit des sorties dans la Ville, Monstry mettoit le feu aux Chartreux, & l'armée de terre attaquoit les Faux-bourgs de S. Seurin, & qu'à la faueur de ces diuersions, le secours entrant par le petit Pont du Chasteau, qui estoit vers le dehors, il ouvroit vne porte au Duc, pour entrer en assurance, & voir d'un œil satisfait le saccagement & les

les cendres d'une des belles Villes de France. Ce Dieu qui met à sec les gouffres de la mer pour garantir son peuple bien aymé, des oppressions violentes & tyranniques de ceux qui le gourmandent, & qui renuëse par un souffle les chariots de ceux qui se proposent des triomphes, voulut faire connoître à tous par une marque sensible, que la défense des Bourdelois estoit juste, puis qu'il en prenoit la protection, & qu'il pouvoit esleuer ceux qu'on vouloit abbatre. Le Cheualier Thibaut, qui commandoit l'armée Nauale des Bourdelois, alla au deuant de Monstry, & mouilla l'ancre au bec d'Ambes, pour garder le passage des deux riuieres, la Dordogne, qui conduit à Libourne, & la Garonne, qui monte vers Bourdeaux, où il attendoit le vent propre pour combattre son ennemy. L'attache qu'il auoit eu quelque temps auparavant au seruice du Cardinal Mazarin, inspiroit du soupçon pour sa fidelité dans l'esprit de beaucoup de personnes. Ses ennemis se preuaient de ces mauvaises impressions, & les poussant jusques au bout, trauailloient à luy faire oster l'honneur de ce commandement. La connoissance qu'il en eust, le piqua de generosité, & luy fit former le dessein de perir ou de vaincre, pour donner par un signalé seruice, qu'il prétendoit rendre à la liberté de sa Ville, un desmentir tout net aux ennemis de sa reputation. Attendant que le vent & la marée fussent d'accord pour trauailler à sa gloire, il enuoya reconnoître Monstry, & donna les ordres pour l'attaque. L'heure ne fust pas venuë, que leuant ses ancres fust apperceu par Monstry, qui voyant sa perte & sa confusion inéuitable, leua les siennes, pour

chercher son salut dans la fuitte. Mais son Pilote n'ayāt pas bien sondé la route qu'il tenoit, eschoüa sur vn sable: ce qui fut remarqué à mesme temps par quelques Galiottes du Cheualier Thibaut qui tenoient l'auant-garde, lesquelles luy en vindrent donner l'aduis. Et comme il n'y auoit pas d'honneur pour luy d'attaquer vn vaisseau eschoüé, il y renuoya les mesmes Galiottes, soustenuës par des Chaloupes armées de soldats, à la veüe desquelles Monstry fit effort de descharger son artillerie sur le sable, pour souflager son Vaisseau; mais voyant qu'il estoit abordé, il se jetta avec son argent, & vne partie de son esquipage dans son esquif, & faisant mettre le feu aux poudres, il fit enleuer ce qui auoit resté, pendant qu'il alloit prendre terre en la coste de Medoc.

Ces Galiottes & ces Chaloupes qui auoient esté commandées, allèrent promptement à la flamme, & par la diligence qu'elles y rapporterent, sauuerent du naufrage grand nombre de canons & de boulets, qui fournirent à Bourdeaux vn Magasin d'artillerie, pour l'attaque du Chasteau Trompette, dont l'exécution, quoy que resoluë par le Marquis de Saulvebeuf, auoit esté retardée par ce seul manquement. Ainsi celuy qui auoit projecté l'incendie de Bourdeaux, vid renuerfer son dessein, par la perte d'un vaisseau que le feu consumma dans le milieu des ondes. Ce succez pourtant n'asferinist pas Thibaut dans sa Charge; car le jeune Treillebois estant allé à Bourdeaux pour offrir au Parlement son seruice & celuy de son pere, qui estoit dans l'estime de grand homme de Mer, Thibaut se vid sollicité par

le Marquis de Saulvebeuf, & la pluspart de ses amis, de luy quitter la place, pour recompense de laquelle on luy donna la Charge de Mareschal de Camp, & vn Regiment d'infanterie, à quoy il se resolut avec peine.

LES soins continuels qu'il falloit auoir pour faire subsister les gens de guerre, tant de terre que de mer, bailloient bien autant d'inquietudes que ceux qu'il falloit employer pour les regler. L'on auoit deliberé des taxes, tant contre les Habitans qui estoient dans la Ville, que ceux qui s'estoient absentez. Quelques-vns auoient payé; mais il n'y auoit rien à prendre sur les autres, pource qu'ils n'auoient point laissé de meubles, ou autres effers pour satisfaire aux taxes. Il estoit iuste de pouruoir à ces inconueniens, soit à cause qu'il estoit raisonnable que ceux, qui auoient deserté la deffence de la cause commune, portassent la peine de leur absence, que pource que la justice vouloit que ceux qui estoient absens, ne fussent pas de meilleure condition que les presens, qui supportoient le faix & la fatigue de la guerre. Il auoit encore esté resolu dans l'Hostel de Ville, par vne assemblée bien solennelle, que l'on emprunteroit des sommes des particuliers; que les autres s'obligeroient enuers eux, sous l'indemnité du Procureur Syndic de la Ville. L'Arrest en auoit esté desia donné. La pluspart toutefois se faisoient tirer l'oreille, & ne consideroient pas le peril present dans lequel ils estoient. Si bien que pour remedier à ces maux, il fallut donner deux Arrests; par l'un desquels il estoit dit, que les Presidens & Conseillers du Parlement, qui s'estoient absentez de la Ville sans permission de la Cour,

seroient priuez de l'entrée du Palais , & exercice de leurs Charges , & les Bourgeois absens sans congé de leurs Magistrats , priuez de la Bourgeoisie , jusques à ce qu'ils auroient payé leur taxe , & la peine de leur absence. Et par l'autre il fut Ordonné que ceux , qui seroient demandez par les creanciers , & choisis par les Commissaires , en presence des Jurats & du Procureur Syndic , passeroient obligation des sommes qui seroient empruntées , sous l'indemnité qui leur seroit promise de la part de tous les ordres de la Ville & de la Bourgeoisie , le Procureur Syndic stipulant pour tous. Et qu'à cet effet chaque Compagnie & la Bourgeoisie , luy remettrait dans le lendemain l'acte de leur consentement en bonne forme. Et que ceux qui ne voudroient pas signer ou consentir à ces obligations , seroient chassez de la Ville , & leurs biens employez au payement de ce qui seroit aduancé pour les nécessitez publiques. A suite de la deliberation susdite , qui auoit esté faite dans l'Hôtel de Ville avec célébrité , les Bourgeois s'estas plains de ce , qu'encore que l'on rejettast sur eux la plus grande partie des charges & de la despence , ils estoient neantmoins si peu considerez , qu'ils n'estoient point appellez en part de la distribution , & des ordres qui se donnoient pour cela. Et combien que les Jurats fussent appellez dans le Conseil de Police , qui se tenoit dans la seconde des Enquestes , & qu'ils fissent la teste de la Bourgeoisie , neantmoins le nombre des affaires qu'ils auoient , empeschoient qu'ils n'y fussent assidus , ou pour le moins leur ostoit les moyens de leur communiquer ce qui s'y passoit. Si bien qu'ils jugerent à propos

d'y deputer le sieur Fonteneil Aduocat, Bourgeois de robe longue, & Maillard Marchand, Bourgeois de robe courte, pour, avec l'adueu du Parlement, auoir droit d'entrée dans le Conseil de Police, pour toute la Bourgeoisie : ce qui fust rapporté à la Cour & accepté, en consequence de quoy ils furent mandez dans le Conseil de Police, & y presterent le serment en qualité de Commissaires.

LE Duc d'Espernon faisoit de son costé le pis qu'il pouuoit. Il faisoit rauager les maisons de la Campagne. Ses Gardes allerent publier au Bourg de Preignac vne Ordonnance de la part de leur Maistre, par laquelle il enjoignoit, à peine de la vie, aux Cottifateurs & Habitans de ce Bourg, & des Parroisses voisines, de degrader les bois de haute fustaye du sieur de Suduiraut, Conseiller en la grand-Chambre, qui jusques alors s'estoit porté fort vigoureusement à desmolir sa maison & couper les vignes au pied. Ces actions violentes au lieu de calmer les esprits, les irritoient. Le Marquis de Saulvebeuf, qui, apres auoir reconnu le Chasteau Trompette, en compagnie du sieur d'Espagnet Conseiller, qui n'est pas seulement tres-intelligent dans les affaires du Palais, mais aussi pour celles de la guerre, en resolut le siege, & partagea le trauail, prenant pour luy l'attaque du Bastion comme l'endroit le plus fort, qui commandoit le dehors de la Ville & le commerce du Port (tant il se plaist à s'attacher aux choses difficiles & mespriser les aisées) laissant au sieur d'Espagnet celle d'vne Tour quarrée, laquelle, quoy que plus foible, ne laissoit pas d'estre bien fascheuse, pource qu'el-

le regnoit sur le dedans & dehors de la Ville. Cette resolution fut à mesmes suiuite de l'exécution. Le Marquis de Saulvebeuf, pour animer par son exemple les soldats & les Officiers, à l'assiduité pour le travail, quitta son logement de la Ville, pour aller chez vn Bourgeois au Faux-bourg des Chartreux en veuë du Bastion, & à la portée du pistolet, resolu de n'en partir point qu'il ne couchast entre les bras de sa Maistresse (c'est ainsi qu'il appelloit le Chasteau) tant sa passion estoit grande de l'auoir. Et de vray il s'y porta avec vne telle ardeur, qu'il ouvrit & poussa les trenchées en huit iours bien proche de la contrescarpe du fossé, à la teste desquelles il fit dresser vne batterie de deux petites pieces de fonte, laquelle les assiegez, qui auoient des Canoniers tresajustez, desmonterent, estant d'ailleurs assez inutile, pource que le calibre estant petit, les coups, apres auoir rompu quelque guerite, ne faisoient que blanchir le corps du Bastion. Le sieur d'Espagnet travailloit vtilement de sa part. Il n'eust pas acheué ses retranchemens du costé de la Ville, qu'il fit dresser vne autre batterie de trois pieces de fer cõtre la Tour quarree, de laquelle il ruyna les deffences qui incommodoient les pionniers & les soldats.

CETTE presse esueilla dans l'esprit des Ministres des pensées de paix. Il fust neantmoins reconnu, par la surprinse du paquet qui estoit adressé au Duc d'Esperron, que ce n'estoit qu'un artifice, pour faire lascher prinse, & vn temps qu'on prenoit pour preparer vn chastiment exemplaire sur la teste des Bourdelois; les affaires de France n'estant pas lors en estat pour recueil-

lir des forces suffisantes à les combattre. Ces Lettres furent portées ouvertes dans le Parlement par le Marquis de Saulvebeuf, qui rompit la glace, communiquées & lües à la Bourgeoisie dans l'Hostel de Ville, d'où ils se retirèrent avec ces impressions, que le salut de Bourdeaux dependoit du succez de ses armes. Ce fut pour lors que le Parlement nomma les sieurs de Thibaut & Mosnier pour prendre soin de faire executer les ordres necessaires pour l'attaque du Chasteau Trompette; que le sieur Guyonnet fust fait Commissaire pour demeurer dans le Camp avec le Marquis de Saulvebeuf; que le sieur de Biré eust la Commission des munitions de guerre; les sieurs de Mirat, Nesmond & Voisin, celles de l'artillerie; & que l'on distribua aux Conseillers les emplois, qu'ils partagerent avec des Bourgeois qu'ils prindrent pour adjoints.

CE ne fust pas vne fort bonne conjoncture pour le sieur de Lauie, qui estant reuenu en poste de la Cour, pour faire quelques propositions de paix, fust amusé quelques iours par des remises; & enfin ayant esté oüy, ne peut vaincre par l'adresse & l'ajustement de sa relation, le degoust qu'on auoit pour les articles qu'il portoit, dont on auoit receu l'aduis, ny le soupçon qu'on commença de former deslors contre son procedé. Le Parlement, qui va à pas comptez, ne vouloit point resoudre cette affaire, qu'il n'eust esté instruit du sentiment general des autres Compagnies: en consequence de quoy, il ordonna qu'il seroit fait vne assemblée generale de tous les Corps dans l'Hostel de Ville, à la-

quelle les propositions, & les articles portez par le sieur de Lauie, seroient leus, & qu'elle seroit informée de l'assurance qu'il auoit donné de viue voix, que Bourdeaux, rendant ses respects & ses obeysances à leurs Majestez, receuroit de leur bonté toutes les graces qu'il pouvoit esperer. Dans cette assemblée, qui estoit fort celebre, & à laquelle les sieurs de Farnoux & Raymon Conseillers, assisterent en qualité de Commissaires, les vns furent d'aduis que des Commissaires du Parlement & des Deputez des Corps, examineroiēt les articles enuoyez par le Roy, & ceux que le sieur de Lauie auoit proposé de bouche; D'autres vouloient que le sieur de Lauie fust renuoyé au Roy, en chercher de plus fauorables. Mais le plus fort des voix fust à n'entendre point parler de paix, que le Chasteau ne fust prins, & qu'il n'eust pleu au Roy donner vn autre Gouverneur à la Prouince, c'estoit mettre la coignée à la racine du mal. Ce sentiment ne fut pas esloigné de celui du Parlement, qui ordonna, en consequence de cette deliberation, que ses Deputez fairoient tres-humbles remonstrances à leurs Majestez sur les occasions presentes, & seroient particulièrement suppliées, de vouloir, pour le bien de leur seruice, donner vn autre Gouverneur à la Guyenne que le Duc d'Espéron, & pareillement leuer l'Interdiction generale des Officiers de la Cour, comme donnée par surprinse, & qu'à cet effet le sieur de Lauie iroit rejoindre les Deputez, qui estoient prez du Roy.

A mesmes que le Duc d'Espéron eust eu connoissance de cette resolution, & qu'il reconnust que les Bourdelois

delois ne se payoient pas de paroles, & ne vouloient point se laisser piper vne seconde fois par des vaines esperances, il fit approcher ses troupes de Bourdeaux, & leur fit faire tous les maux imaginables, pendant que le canon du Chasteau taschoit à faire dans la Ville toutes les ruynes possibles. Cela donna matiere au Parlement de rendre deux Arrests, par l'un desquels il permettoit au Marquis de Saulvebeuf d'exercer les mesmes actes de rigueur sur les maisons & biens appartenans, tant au Duc d'Espèrnon qu'aux Gentils-hommes & autres ses adherans, & qui suiuoient son party, & se servir sur leurs biens des mesmes voyes qu'ils auoient fait & fairoient à l'auenir. Et par le deuxiesme, le Duc d'Espèrnon fut declaré perturbateur du repos public. Et en consequence, deffences furent faites à tous Gentils-hommes & Sujets du Roy de le suiure, & executer ses ordres ruyneux & dommageables à la Prouince. Et conformément à autre Arrest du 20. Avril dernier, que le Roy feroit tres-humblement supplié pour le bien de son seruice, & tranquillité publique, de bailler vn autre Gouverneur à sa Prouince de Guyenne. Il vomit feux & flammes à l'ouye de ces Arrests. Il protestoit ne vouloir entrer dans Bourdeaux que par la breche. Il menassoit à toute heure de faire leuer le siege du Chasteau. Il faisoit rouler ses troupes d'un costé & d'autre pour donner de la jalousie; mais il n'en venoit pas jusques à l'essay. Et quoy que l'impatience des Bourdelois les emportast jusques à presser le Marquis de Saulvebeuf d'aller au deuant de leur ennemy, il n'en voulut rien faire, demeurant assidu à la poursuite de ses trenchées,

se contentant de garnir de gens de guerre toutes les aue-
nuës , pour empescher le secours. Les Chartreux, qui
estoit le quartier du General, & lequel il fortifioit par
sa présence, estoient garnis de forces suffisantes, non
seulement de fournir à la garde des trenchées, mais
aussi pour s'opposer à la descente, qui pouvoit estre
faite du costé du bas de la riuere. Le faux-bourg de S.
Seurin, commandé par le Marquis de Lusignan, estoit
barricadé, retranché & soustenu par vne partie des
troupes soldoyées, de la milice des villages de Cau-
deran, Boscat & Villeneuve, des Habitans du Faux-
bourg & des gardes Bourgeoises, qui les foulageoient
dans les rencontres. Treillebois qui commandoit l'ar-
mée Nauale, deuoit respondre du costé du haut de la
Garonne, à la faueur de cinq gros Vaisseaux, deux brus-
lots, seize Galiottes, deux Galeres & vne estacade, qui
estoit posée au deuant du Chasteau, pour arrester l'abor-
dage du secours.

ENCORE que le Duc d'Espernon n'eust de son co-
sté que ses Compagnies d'Ordonnance & celles de ses
Gardes, & quelque Caualerie volontaire, quelques
Regimens, & des milices ramassées dans ses terres; &
que ses forces parussent foibles au prez de celles que
pouvoit fournir dans vne occasion de necessité vne grã-
de Ville comme Bourdeaux, neantmoins le Marquis de
Saulvebeuf, qui auoit appris dans la longue pratique
de la guerre, qu'il ne faut jamais mespriser son ennemy,
pour si foible qu'il soit, fit faire de grands retranche-
mens, depuis le derriere de la maison où il logeoit, jus-
ques proche du Mail, & du costé qui vient de S. Seurin

pour aller au Chasteau par le dehors de la Ville, sur chaque bout desquels estoient esleuez deux petits bastions, qui se deffendoient l'un à l'autre, & desquels on pouvoit aller à couvert à la faueur d'une ligne de communication jusques à l'une des portes de la Ville, nommée S. Germain, d'où l'on pouvoit faire sortir en cas d'attaque & sans peril, les gardes Bourgeoises, pour soustenir les barricades avancées, & les retranchemens.

Ce penible trauail, & l'assiduité avec laquelle il pressoit nuit & iour l'auancement des trenchées, luy causerent vne fièvre que les Medecins jugerent deuoir estre longue & dangereuse. En sorte qu'il le falut porter dans la Ville, pour estre traicté avec plus de soin. Le Marquis de Lusignan fut contraint de quitter son poste, pour prendre celui du General, dans lequel le Cheualier Thibaut, Mareschal de Camp, auoit esté laissé pour commander le trauail; auquel il s'employa avec assez de lenteur, par le peu d'attache que la fougue de sa jeunesse, & le voisinage de ses habitudes luy faisoient auoir. Le sieur d'Espagnet n'en vsoit pas de la sorte. Il s'employoit avec plus de zele & d'ardeur. Il ne se contenta pas des retranchemens & de la batterie qu'il auoit dressée dans la Ville, il perça les murailles dans la rue du Portau-barrat, & poussant ses trenchées au dehors, il fit dresser vne autre batterie de deux pieces de fer, pour battre cette Tour quarrée, qui en peu de iours fut ouverte, & rendue inutile pour la deffence de ceux du Chasteau. Cette batterie ne demeura pas long-temps en estat, pource qu'elle fut desmontée par quelques vo-

lées de canon tirées du Bastion, dont l'une ayant donné contre le terrain de la tranchée, poussa si rudement un caillou sur le sieur d'Espagnet, que luy perçant la botte, il luy couppa les tendons d'un pied, & le retint longuement au liect. Cet ouvrage ne fut pas pourtant interrompu, car le Marquis de Theobon, qui estoit allé au secours de Bourdeaux, escorté de quelque nombre de Cavalerie & d'Infanterie, à la teste desquelles il avoit passé à la barbe des troupes Espernonistes, en print le soin, apres avoir presté quelques iours auparavant le serment de Lieutenant General, sous l'autorité du Parlement. Il espargnoit si peu sa santé, & prodiguoit si fort sa vie, qu'il passoit les nuits dans les retranchemens, & s'exposoit au feu des mousquetades, dont l'une fust si favorable, qu'elle ne brusta que le bout de sa plume, & pensa demeurer ensevely avec le sieur de l'Isle-fort, qui mourut sous les ruynes de la terre qui s'abbatit sur eux: tant ce Marquis avoit de passion, ayant percé le fossé, de faire attacher le mineur à cette Tour, qui se monstra si lasche, que quoy qu'il fust couvert de mantelets, neantmoins chaque fois que quelque soldat estoit ou blessé ou tué prez de luy, il se retiroit, & abandonnoit le dessein, ce qui apportoit beaucoup de retardement.

CHAPITRE VIII.



LE Parlement ne se laissoit pas de frapper par ses Deputez à la porte du Palais Royal, pour faire entendre à leurs Majestez la voix de leur persécution, & reclamer leur bonté, pour arrester ces desordres. Mais voyant que leurs plaintes ne pouvoient point estre escoutées, il eust recours à la protection & à l'entremise du Parlement de Paris, qu'il jugea deuoir estre touché de compassion pour ses souffrances. Demesme que la douleur qui frappe des cadets reflexchit son coup sur le cœur de laisné, il luy enuoya par Lettre le portraict de son oppression, & du juste ressentiment qui l'engageoit à sa deffence. Ce tres-Auguste Senat, qui dès le jour de son establissement a esté fait l'arbitre des Roys & des peuples, print la parole pour celuy de Bourdeaux. Et ayant tiré quelques bons discours des Ministres, il escriuit en cette forme.

MESSIEURS,

Sans attendre celles que nous auons receuës de vostre part, nous n'auons pas laissé d'essayer d'obtenir la fin des maux de vostre Prouince. Et ayant sceu que le Roy vous a enuoyé la Declaration de sa volonté, si les articles contenus en icelle vous peuvent contenter, on peut se promettre qu'elle sera assez puissante pour calmer tous les orages. Vous ne doutez point de nos sentimens, qui continueront tousiours de rendre au bien general de la France, à l'honneur de la Iustice, & à la conseruation de l'authorité des Parlemens, tout ce que nous deuons. Et si nous auons aduis que vous desiriez quelque chose de nous, vous connoistrez que ceux qui seruent en la Compagnie, ont conserué le mesme esprit pour la vostre, qu'ils ont cy-deuant tesmoigné. Et

*par les actes cy enclos vous verrez avec quel
soin l'on s'est employé, & quelles assurances
nous avons receues pour vostre satisfaction,
pour laquelle nous demeurons unis avec vous,
afin que vous ayez autant d'avantage que vous
peuvent souhaiter.*

MESSIEURS,

**Vos bons freres & amis les
Genstenans le Parlemēt.**

Signé, GUYET.

A Paris ce 7. Sept. 1649.

*Presentée & lue en la Cour de Parlement
extraordinairement assemblée, le
18. Septembre 1649.*

CETTE Lettre estoit aussi ciuile & obligeante qu'on pouvoit souhaitter, & marquoit assez dans son sens que cette Declaration ny les paroles qu'on leur auoit donné, ne pouvoient pas estre assez satisfaisantes. Le Parlement & la Bourgeoisie l'auoit bien reconnu, puis qu'ils ne l'auoient pas voulu accepter en cette forme, comme il a esté dit. Le Duc d'Espéron, qui ne pouvoit pas non plus goustier ces propositions, print neantmoins ses aduantages de ce refus. Et pour empescher que les forces du Limosin & du Perigord ne s'vnissent à celles de Bourdeaux, comme elles y estoient fort disposées, il faisoit courir des bruits au desaduantage des Bourdelois, lesquels il faisoit passer en beaucoup d'esprits pour des rebelles & des factieux. Il estoit donc à propos de destromper ces peuples, pour raison de quoy le Parlement ne trouua pas de meilleur expedient que d'enuoyer en chasque Seneschaussée de l'une & l'autre Prouince l'Arrest qui suit.

SUR ce qui a esté représenté à la Cour, Que les Villes de Sarlat, Doume, Limoges, Briue, Vzerche & autres du Perigord & de Limosin, ont esté mal informées des justes suiets qui ont meu ladite Cour & presente Ville à prendre les armes pour leur juste deffence, contre les oppressions & actes d'hostilité que le sieur Duc d'Espéron a fait faire sur les personnes, maisons & biens

biens des Officiers & Habitans de la presente Ville ; & qu'à faute d'estre lesdites Villes & autres du Perigord & Limosin informées de la verité desdites oppressions , elles ont , par la crainte dudit sieur Duc d'Espéron , & par les mauvais bruits qu'il a fait semer faussement & contre la verité dans lesdits pays , que ladite presente Ville s'estoit rebellée contre le service du Roy , à quoy elle n'a jamais pensé , ayant tousiours rendu de bons & grands tesmoignages de son inuiolable fidelité enuers Sa Majesté , & nos anciens Roys ses predecesseurs , ayans esté contraincts en ce rencontre de prendre les armes pour sa conseruation , contre les violences & menaces dudit sieur Duc d'Espéron , reduites aux effets , qui ne sont que trop nottoires & manifestes , puisque lesdites maisons pillées , volées , ranagées & ruynées dans la campagne aux environs de Bourdeaux , en portent les marques funestes & desplorables , non d'une guerre legitime , mais d'une pure vollarie & brigandage , plus feant à des Barbares qu'à des naturels François. Et sous ce faux pretexte , a desbauché les esprits de quelques Habitans desdites Villes , & les a contraincts de suivre son party. A C E S C A V S E S , il estoit nécessaire d'y pourvoir , & desabuser les Habitans desdites Villes ,

Et leur oster ces mauvaises impressions qu'on leur a donné, Et les remettre dans l'union que lesdites Villes ont tousiours eu avec la presente Ville, pour le bien du service du Roy Et l'honneur de sa justice. Oüy sur ce le Procureur General du Roy, LA COUR, les Chambres assemblées, en consequence de l'Arrest du vingtiesme du present mois, A ORDONNE ET ORDONNE que lesdites Villes de Doume, Sarlat, Limoges, Briue Et Vzerche; Et autres Villes du Perigord Et Limosin, seront informées des justes causes, pour lesquelles la presente Ville a prins les armes, contre les oppressions Et actes d'hostilité commis par ledit Duc d'Espernon, sur les personnes Et biens des Officiers Et des Habitans de la presente Ville, Et qu'elles seront exhortées de retirer à soy les troupes des gens de guerre, qu'elles auront fourny audit Duc d'Espernon, pour suiure son party, Et le fortifier contre ladite presente Ville, Et se tenir unies aux interests d'icelle, comme elles ont esté cy-deuant. Et en cas que quelqu'un de la part dudit Duc d'Espernon, les vueillent empescher pour adherer à ses mauvais desseins, leur permet de repousser la force qui leur sera faite de sa part, Et prendre les armes pour le service Et secours de la presente Ville. Et à ces

fin, LADITE COUR les a mis sous la protection & Sauve-garde du Roy & de ladite Cour. Fait inhibitions & deffences audit Duc d'Espernon, & tous autres de son party, de mesfaire aux Habitans desdites Villes, & à ceux qui les assisteront, en leurs personnes & biens, à peine de trente mil liures, & d'estre procedé contre eux comme perturbateurs du repos public. Et en consequence, a permis & permet ausdits Habitans desdites Villes de s'armer, & repousser ceux qui voudroient y porter de l'empeschement, & Ordonné que le present Arrest sera Imprimé, leu & publié par tout où besoin sera, & executé en vertu du simple Dictum d'iceluy, attendu ce dont il s'agist. FAICT à Bourdeaux en Parlement, extraordinairement assemblé, le vingt-deuxiesme Septembre mil six cens quarante-neuf.

Signé, DE PONTAC.

LA hayne du peuple & de tous, prenoit vn grand accroissement contre le Duc d'Espernon. Elle se repandoit de sa personne sur tous ceux qui suiuoient son party. Pontac d'Anglade auoit tellement espousé sa passion, qu'encore qu'il fust Bourdelois de naissance, & qu'il fust attaché par le sang aux plus illustres familles de la Ville, il ne falloit neantmoins qu'estre

332 DES MOUVEMENTS,
Bourdelois pour estre vn agreable objet de sa brutalité. C'estoit contre ceux-la qu'il battoit la campagne ; c'estoit contre ceux-la qu'il faisoit des partis ; c'estoit de ceux-la qu'il rauageoit les biens ; c'estoit de ceux-la qu'il enleuoit les fruicts. Ensorte qu'il imprimoit dans l'esprit des Habitans de Bourdeaux vne telle auersion , que le peuple ne pouvant marquer sa personne d'une flestrisseure eternelle, s'en print à sa maison ; Et quelle resistance que les Generaux , les principaux de la Ville , les Magistrats & les Capitaines du quartier y rapportassent , ils ne peurent empescher qu'on ne la desmolist , se contentans d'y laisser quelques ruynes comme autant d'instructions aux passans ; qu'il fait mauvais irriter la Parrie de laquelle on tient & la vie & les biens. Ce libertinage estoit à craindre , pource qu'il est de la cholere du peuple comme de l'impetuosité d'un torrent , qui , pour auoir esté longuement retenu , n'a pas rompu sa digue qu'il se fait iour par tout. Il estoit important d'arrester cette fougue , & s'opposer à cette fureur , qui menassoit au cuglement les bons & les mauvais d'une semblable indignation. Ce fut pour cela que le Parlement bailla , sur la plainte des Jurats , vn Arrest en cette sorte.

SVR ce qui a esté representé à la Cour par les Jurats de la presente Ville ; Qu'on auoit entrepris de piller & desmolir des maisons de cette Ville ; & qu'à la campagne , sous pretexte

des mouvemens presens, on a pillé de tous costez amis & ennemis, & un chascun a usurpé l'autorité publique: ce qui est contre les Loix Divines & humaines, & attireroit sur la Ville & Prouince la cholere de Dieu, & seroit une imitation des crimes qu'on condamne en la procedure des ennemis. Et partant il est necessaire d'y remedier promptement. Et oüy sur ce le Procureur General du Roy, **L A C O V R** a Ordonné & Ordonne qu'il sera informé à la Requeste du Procureur General du Roy, desdites demolitions & pilleries par devant les Commissaires, lesquels à ces fins seront depputez; Et que le Procez sera fait & parfait à ceux qui seront trouvez coupables. Cependant fait inhibitions & deffences à toutes sortes de personnes de demolir ny piller aucune maison de la Ville, à peine de la vie. Enjoint à tous les Habitans de quelle qualité qu'ils soient de se renger prez leurs Iurats, & courir sus aux contreuenans; Et au Major & Capitaines, de suiure l'ordre qui leur sera donné par lesdits Iurats, sans remise ny delay, à peine de desobeyssance. Et pour ce qui est de la campagne, ceux qui iront faire des attaques, ou exploicter quelque action de guerre & d'hostilité, seront obligez d'auoir l'ordre du General ou Lieutenant General des

334 DES MOUVEMENTS,
armées , ou du Conseil de guerre par escrit , autrement sera procédé contre eux comme ennemis publics. Ordonne la Cour que le present Arrest sera leu , publié & affiché par tout où besoin sera. FAICT à Bourdeaux en Parlement , extraordinairement assemblé , le vingt-troisiesme Septembre mil six cens quarante-neuf.

Signé , DE PONTAC.

PENDANT que le Parlement s'employoit à calmer ces orages , le Marquis de Saulvebeuf estoit sur le bord du tombeau , & son ame balançant sur ses leures , n'estoit retenuë que par le nombre des vœux que les Habitans faisoient pour le retour de sa santé , duquel seulement on esperoit la fin d'un siege , dont la longueur bailloit matiere à des murmures. Les Lettres qui venoient de dehors marquoient l'impatience que les autres Prouinces auoient pour la prinse de ce Chasteau. On craignoit qu'une petite jalousie , qui estoit entre les Chefs (dont le Duc d'Espernon faisoit grand bruit par tout) ne produisit une diuision , qui ruynast cet ouvrage. Mais le Parlement usant de son adresse , estouffoit ces desordres dans leur naissance. Les Soldats du Chasteau tirant incessamment à droict & à gauche sur ceux qui trauailloient dans les retranchemens , & incommodant par d'autres endroits aduantageux les gardes Bourgeoises , il fut trouvé à propos de dresser une troisieme batterie , montée de trois pieces de fer,

sur la voute des Pilliers de Tutelle , commandée par le sieur de Voisin Conseiller , & Romats , Lieutenant de l'artillerie ; de laquelle , encore que l'on ne deust pas attendre grand effet , pour ce qu'elle estoit incommodee par vn canon du Chasteau appellé le gros Iean , qui portoit quarante-deux de bale , elle reussit neâtmoins assés heureusement renuersant vn Donjon , qui la commandoit sur cette grosse piece , qui fust faite inutile par les ruines

A cette batterie succeda vne quatriéme montée d'autres trois pieces de fer , qui fust dressée par les soins du sieur de Mirat Conseiller , & Danuillers autre Lieutenât d'artillerie lequel s'e aquitta si biē , qu'il abbatit en peu de jours le pôt & les guerites , du dedás de la ville & fit vne breche raisonnable , au pied de la quelle on eust fait deslors vn logemēt , sás qu'o remarqua , que ceux de la garnisō s'estât fortemēt barricadez par derriere , ce poste ne pouvoit point estre conserué , dautāt plus qu'il estoit cōmádé à plain par la Tour du Diable , dōt les assiegez faisoient vn tres-grand feu , qui obligea Danuillier de changer de batterie , & ruyner les deffences de la Tour , pendant qu'on ouvrit sur le bord de cette batterie vne trenchée qui fut poussée jusques à la contrescarpe du fossé , dans laquelle les assiegez tuerent quelques soldats , aussi bien que dans celle du costé des Chartreux . Et entr'autres le sieur de Sainte Hermine , Capitaine de Caualerie , proche parent du Marquis de Saulvebeuf , qui pouvant legitimement prendre son rang parmy les braues , frappa d'vn desplaisir sensible tous ceux qui ayment la vertu.

Ces auances mettoient la puce à l'oreille de beaucoup de personnes. L'assoupissement dans lequel il sembloit que le Duc d'Espèrnon fust, en estonnoit beaucoup d'autres. Les Ministres d'Estât jugeoient bien que la prise de ce Chasteau estoit vn coup de partie, & qu'elle donnoit de grands aduantages à ceux qui fauorisoient le party de Bourdeaux. On n'estoit pas en estat de secourir cette place par la voye des armes. Les troupes qui estoient dans la Catalogne, l'Italie & la Flandre, estoient trop esloignées pour estre à temps à fournir le secours que le Duc d'Espèrnon pressoit avec importuniré. Il fallut donc employer l'artifice pour rompre ce dessein par adresse. Le Marechal du Plessis Praslin eust la Commission pour aller à Bourdeaux, faire les ouvertures d'un accommodement. Soudain qu'il fust à Blaye, il donna aduis de sa venue. On le prie de s'approcher de Bourdeaux, il ne vouloit point entrer dans la Ville, par l'apprehension qu'il auoit du caprice du peuple. Il demanda le Chasteau de Lormon, le sieur Archeuesque s'en excusa. Il fut logé par les Jurats chez la vefue de feu Raoul citoyen de Bourdeaux, assise sur la croupe d'une montagne dans le mesme lieu de Lormon, d'où il voyoit à plomb l'attaque du Chasteau. On luy enuoya des Commissaires pour traiter de la paix; sçauoir les sieurs de Pomiers, Doyen de la Cour, Suduiraut, Massiot & Martin Conseillers, le sieur Dufault, Aduocat General, le sieur Constant Jurat, & Blanc Procureur Syndic; les vns pacifiques, les autres agissans. Les premieres conferences se passerent presque toutes en ciuilité, en deplorations des malheurs

malheurs du temps, en expressions de la fierté & de la tyrannie du Duc d'Espéron, contre lequel le Marechal de Praslin frondoit bien hautement avec eux, pendant qu'il estudioit leurs humeurs, qu'il s'essayoit de connoistre ceux avec lesquels il auoit à traiter, & qu'il negocioit avec le Duc, par des enuoyez reciproques. La difference des Courriers faisoit la diuersité de leurs conferences. Tantost il auoit plain pouvoir, & d'autrefois il estoit restraint. Quelques fois il leur bailloit des esperances, & puis il renuoyoit vers le Roy pour la resolution. Cependant il faisoit des cabales dans le Parlement & dans l'Hostel de Ville. Il attachoit à luy les vns par la crainte de la peine, & les autres par l'appast de la recompense; les vns, à ce qu'on soupçonnoit, par des Offices, les autres par des benefices. A la fin il duppa les vns & les autres, & fit connoistre à tous que les longueurs qu'il rapportoit en cette negociation, n'estoit que pour gagner le quartier d'hyuer, & donner loisir aux troupes de s'approcher, & au Conte du Doignon d'esquiper des Vaisseaux, affin d'attaquer vertement Bourdeaux & par mer & par terre. Il voulut suborner la fidelité du Marquis de Saulvebeuf, par l'entremise des Euesques de Comenges & de Bazas, qui s'estoient rendus à Bourdeaux pour fortifier ses intrigues. Ils agirent tantost par eux-mesmes, & puis par son Confesseur; mais ce fut fort inutilement, s'en estant deffendu avec autant de generosité, comme on auoit employé d'artifice & de cajolerie pour le surprendre.

Ces amusemens du Marechal de Praslin aigrissoiēt les esprits au lieu de les adoucir. Le peuple ne le peust

plus souffrir au lieu où il estoit, comme trop proche de la Ville, & trop commode à faire des pratiques. Ce soupçon fust augmenté par la descouverte de quelques Lettres qui luy estoient escrites par des Officiers du Parlement & quelque autre de sa cabale, surprinſes entre les mains de son Pouruoyeur : ce qui donna sujet à deux Galiottes d'aller à son depart luy donner de la frayeur pendant la nuit, laquelle il apprehenda si fort, & avec raison, qu'il quitta son logement pour retourner à Blaye. Le Marquis de Lusignan ne relascha pas pendant ce traitté de sa tasche, & ayant fait passer le fossé, il fit attacher son mineur à la muraille du Bastion, qui eust beaucoup de peine à traualler en seurté, non seulement pource que les assiegez auoient pointé vn canon tellement à plomb, qu'il donnoit dans l'ouverture de la Galerie; mais aussi pource qu'il estoit exposé en flanc à quelques mousquetades. Si bien qu'il fallut faire vne nouvelle ouverture, & sapper le Bastion par vn autre endroit, qui fust plus à couvert & du feu & des pierres. On commanda trois gros Vaisseaux de mouiller au deuant du Chasteau pour faire leurs descharges sur vne Gallerie & vne courtine, de laquelle on craignoit que les assiegez se voulussent seruir, pour empescher le dessein qu'on auoit de mettre le feu au Pont; mais leurs coups furent si peu considerables, & portoiēt si haut par dessus la Ville, qu'on fut contraint de changer l'ordre, & de les rappeler. L'imprudence que l'on auoit eu de laisser pendant le iour l'estacade en veuë du Chasteau, pensa causer du desordre, pource que des batteaux ayant esté commandez pour la retirer, les assie-

gez firent jouër le canon sur eux, enforte que quelque matelot fut tué, & quelqu'autre noyé, & le reste, demeurant exposé par l'embarras dans lequel il estoit, y eust sans doute pery, sans que le sieur Lamote Guyonnet, à qui le peril n'a jamais fait de peur, l'alla retirer hardiment du feu des canonades, & merita à juste tiltre la Couronne de Chene, pour auoir conserué par vne action si glorieuse, la vie de ses concitoyens.

TOUT ce temps, qui auoit donné le loisir aux assiegez de se retrancher sur le Bastion, rendit la vie au Marquis de Saulvebeuf; & comme s'il estoit reuenue de l'autre monde pour se faire rendre compte des trauaux. A mesme qu'il reconnut qu'il deuoit acheuer ce qu'il auoit commencé, il reprit la vigueur, & sans partir du liêt dans lequel il estoit retenu depuis vn mois ou cinq semaines, il assembla le 16. du mois d'Octobre le Conseil de Guerre, où il fut resolu que le lendemain sans plus differer on donneroit l'attaque. Il s'y disposa avec tant d'ardeur, que sans considerer qu'il n'auoit point encore humé l'air de dehors, ny faire reflection sur le danger d'une recheute, voulant offrir à Dieu sa premiere sortie par le sacrifice de son cœur, il se fit porter dans vne chaire en l'Eglise des Recolets, accompagné d'une foule incroyable de peuple qui le suiuiot, avec des acclamations & des resiouyssances publiques pour sa conualescence. Il ouyst la Messe, en laquelle il communia, & print sa route vers son premier logemēt des Chartreux, où il ne fut pas arriué, que la joye parut aussi sans fiblement dans le cœur de l'armée, que l'estouuante sur le visage des assiegez. Le Duc d'Esper-

non, qui dès le iour auparauant s'estoit campé avec toutes ses troupes au bourg du Carbon-blanc à deux lieües de Bourdeaux, destacha des troupes de Caualerie & d'Infanterie avec quatre pieces de canon, pour battre deux maisons à la campagne des sieurs de Massip & de Ragancau, Conseillers au Parlement (que des pommes eussent abbatu) Mais le Marquis de Saulvebeuf en ayant eu aduis, enuoya ordre aux Commandâs qui y auoient esté mis pour les garantir des courses de Pontac d'Anglade, de se rendre à la veuë du canon: ce qu'ils firent. Et le Cheualier Vauzele qui commandoit, fust escorté sur le Port de Lormon par l'ordre du sieur de Marin, qui eust beaucoup de peine de le faire eschapper à la mauuaise humeur du Duc d'Espèrnon, qui luy vouloit faire piece, nonobstant la foy de la capitulatiõ. Mais quoy que ce Cheualier raportast que le bruit de l'armée enemye estoit que le Duc pretendoit trauerser la riuere, pour enleuer le Marquis de Saulvebeuf dans son quartier, & forcer les Chartreux, on sceut le lendemain qu'il s'estoit contenté de monter sur vne eminence, proche de Lormon, pour obseruer les ruynes du Chasteau, & luy dire le dernier adieu, apres lequel, il fit defiler ses troupes, & se retira avec la honte de n'auoir osé entreprendre de luy donner le secours qu'il luy auoit si souvent promis.

Ce mesme iour tous parurent avec vne genereuse resolution de bien faire. Les troupes soldoyées & celles des Bourgeois furent commandées de se mettre sous les armes, pendant que le Marquis de Saulvebeuf, qui estoit attaché sur son liét par la foiblesse de sa santé,

donnoit les ordres, & dispoſoit les attaques. On eſtoit ſur le point d'exécuter le commandement, quand le Marquis de Saulvebeuf, qui s'informa de l'eſtat des fourneaux, des eſchelles & des faſcines, & des autres preparatifs neceſſaires à cette attaque, trouva que la dernière diſpoſition n'y eſtoit point encore: en forte qu'il fallut differer au lendemain 18. cette moisſon de gloire, lequel à meſme qu'il paruſt, piqua le courage des ſoldats d'une genereuſe ardeur de faire voir qu'ils n'eſtimoient rien tant que d'expoſer leur vie pour la deſſence & la liberté publique. Le Marquis de Theobon, laiſſant à part la conſideration qu'il devoit avoir pour le rang de Lieutenant General qu'il avoit dans l'armée, voulut prendre la charge de ſouſtenir en ſimple ſoldat les enfans perdus, & courir au peril comme au theatre d'honneur. Les Bourgeois choiſirent une attaque ſeparée, afin qu'on ne leur peuſt pas reprocher qu'ils ne tenoiſent leur liberté que des armes eſtrangères. Le Soleil eſtoit deſia monté au plus haut de ſon Apogée, pour eſtre plus fidelle teſmoin des effets de cette reſolution, quand ſur le meſme temps que le Marquis de Saulvebeuf commanda vn Tambour d'aller ſommer les aſſiegez de ſe rendre, il ſe vid deuançé, par la demande qu'ils firent d'eſtre receus à capituler, & de parler au General.

CETTE nouvelle frappa d'un coup ſoudain l'eſprit du Marquis de Saulvebeuf & des Officiers, qui euſſent bien deſiré pouvoir reſuſer, par l'eſperance qu'ils avoient de vaincre, l'aduantage que la civilité & les formes de la guerre les obligeoient d'accepter. Si bien

que Filouze Major de la garnison, qui a tousiours passé pour homme de cœur, & intelligent dans le mestier, apres auoir rendu des tesmoignages de l'estime qu'il faisoit de la valeur de ce General, qu'ils auoient creu mort, & de la confiance qu'ils auoient en la fidelité de sa parole, qui estoient deux motifs qui les forçoient à se rendre à luy, qui les eust fait opiniastrer à la deffence contre tout autre Chef, il demanda des ostages, & de visiter les mines : ce qui fut accorde. Les sieurs de la Lande & l'autre Guyonnet furent baillez de la part des Bourdelois; les sieurs Filouze & Talanges du costé des assiegez, avec lesquels les propositions furent arrestées, la capitulation escrite & signée par le Marquis de Saulvebeuf & le sieur du Haumon, Gouverneur de la place. On auoit appellé les Iurats au concert des propositions. Ils n'y voulurent point assister : ce qui donna de l'ombrage, & fit croire, ou que cette ardeur, que quelques-vns d'entre eux auoient tesmoigné dès le commencement, estoit feinte, ou qu'elle auoit esté adoucie par les pratiques du Marechal de Praslin. On ne laissa pas de les arrester sans eux, & le sieur de Blanc, Procureur Syndic, s'y estant rencontré avec le sieur Fonteneil Aduocat, député pour le Conseil de Police, furent jugez suffisans pour représenter le Corps de la Bourgeoisie. Cela fait, les Marquis de Saulvebeuf, Lussignan & Theobon, & le sieur d'Espagnet, qui s'estoit fait porter dans vne chaire, à cause de son infirmité qui duroit encore, entrèrent dans le Chasteau avec vne partie de leurs forces, composées entr'autres des gardes Bourgeoises, auxquelles on ne voulut pas disputer.

l'honneur de la premiere entrée. Les assiegez, qui estoient deux cens soixante, sans compter les malades ou blesez, eussent quitté deslors la place, si le temps qu'on employa à concerter les articles, n'eust laissé couler la marée qui les deuoit porter à Rions, qu'ils auoient choisi pour le lieu de leur retraite; & si vn orage qui se leua soudainement, & vn faix d'eau si estrange & si long, que personne ne peust demeurer à descouvert, n'eust empêché l'execution du traité; & mesme si la foule du peuple, qui accourut au bruit de cette reduction, n'eust donné matiere aux assiegez d'apprehender la fougue & l'effet de leur ressentiment: ce qui obligea le Marquis de Saulvebeuf, tousiours bien-faisant & genereux, de retenir ses ennemis; & les traiter comme ses hostes jusques au lendemain 19. qu'il les fit embarquer sur les trois heures du soir avec l'escorte qu'il leur auoit promis, ayant bordé pour cet effet de gens de guerre, tout le terrain qui est depuis le Chasteau jusques à la riuere, de crainte que l'inegalité d'un peuple animé, ne fist injure à la fidelité de sa parole. Et de vray sa presence, jointe à l'amour respectueux que tous les Ordres de la Ville auoient pour luy, fut vn puissant frein pour arrester la violence des esprits qui pouvoient eschapper.

F I N du Troisième Liure.





L I V R E Q V A T R I E S M E.

Chapitre Premier.



E N C O R E que cette reduction chatoüillast le cœur des Habitans d'une joye rauissante, se voyans deschargez de la crainte d'une garnison, & de la tyrannie d'une place que leurs ayeulx auoient fait bastir, sans preuoir les suites qui deuoient fascher leur posterité, leurs esprits neantmoins furent bien partagez. Ceux qui se laissoient flatter aux pensées du Mareschal de Praslin, ne vouloient point aller plus auant, & taschoient d'empêcher la demolition de ce Chasteau, dont les murailles & les Tours esleuées, estoient autant de phantosmes qui renouveloient à chasque coup d'œil la terreur aux Bourdelois. Les autres dans l'emportement de cet heureux succez, dont on donnoit la premiere gloire à Dieu, vouloient

vouloient mettre en campagne, & porter les conquêtes plus loin. Cette irresolution pensa perdre l'armée. La subsistance croissoit. Le soldat venoit faincant, se voyant sans employ ; Et les Officiers, débauchez par la délicatesse d'une Ville aisée, abandonnoient leurs Charges. Cette affaire mise en deliberation dans le Conseil de Guerre, trouva diuers aduis. Le Marquis de Saulvebeuf pretendoit rouler avec vn Camp volant dans le Limosin & le Perigord, grossir ses troupes à la faueur des Tailles qu'il esperoit leuer, pour aller fondre sur le Duc d'Espéron, en quelle part qu'il fust dans la Province. D'autres s'inquietoient à faire ruyner Cadillac, & ne pressoient le despart de l'armée, que pour ce sujet, non seulement pour satisfaire la passion qu'ils auoient de voir la ruine de tant de maisons de leurs concitoyens vengée, par l'abbatement de celle, qui a la reputation d'estre vne des plus belles de France ; mais aussi pour ce qu'ils estimoient que cela toucheroit si sensiblement le Duc d'Espéron, que la perte de cette maison luy osteroit le goüst pour le Gouvernement. Mais enfin l'incommodité que Bourdeaux souffroit à cause des passages bouchez ; & que la pensée que l'on auoit, que si l'armée des Bourdelois montoit le haut de la Garonne, toutes les Villes qui sont assises sur son bord, comme la Reolle, Marmande, Agen, se joindroient aux armes de Bourdeaux, l'emportèrent sur toutes les autres considerations. Cette resolution eust esté promptement executée, sans la recheute du Marquis de Saulvebeuf, qu'on desiroit voir à la teste ; & sans que quel-

ques-vns des Iurats, dont le premier zele estoit attiedi par le soufle du Mareschal de Praslin, trauailloient mollement aux preparatifs necessaires.

LE Parlement de Bourdeaux souspiroit incessamment apres l'vnion de celuy de Paris, qui ne pouuant le satisfaire entierement sur ce point, pour ce qu'estant clos on ne pouuoit assembler les Chambres pendant les vacations, ceux qui seruoient pour lors luy escriuirent cette Lettre.

MESSIEVRS,

Nous auons appris avec un desplaisir tres-sensible, la continuation de vos malheurs, par les Lettres qui nous ont esté presentées de vostre part, Et par la creance de celuy de vostre Compagnie, que vous nous avez envoyé : ce qui nous a fait resoudre d'arrester des Remonstrances au Roy, Et à la Reyne Regente, lesquelles nous faisons aussi-tost qu'il plaira à leurs Majestez nous don-

ner audience, ne pouvans manquer à vous rendre cette assistance, puisque nous sommes unis avec vous au dessein commun du bien de l'Estat, & à la conservation de vos interests, comme,

MESSIEURS,

*Vos bons freres & amis,
Les Gens tenans la Cour de Par-
lement, en la Chambre des va-
cations.*

Signé, G VYET.

A Paris le 29. Octob. 1649.

ILs tindrent leur parole : car deu iours apres, le President Nouion, personnage d'un rare merite, & d'une vertu heroïque, accompagné de Messieurs de Broussel, à la generosité duquel toute la France a des obligations extrêmes, le Nain, Ferrand, Doujat, de Champrond, Menardeau, Collon, Lottin, Godard & de Paris, Conseillers, seruans à la Chambre des vacations, furent au Palais Royal, où ils attendirent quel-

que temps dans vne sale basse ; & estans aduertis par les sieurs de Saintot , Maistre des ceremonies , & de Guenegaud , Secretaire d'Estat , entrèrent dans la Galerie, où estoit la Reyne Regente assise, à sa main droite Monsieur le Duc d'Orleans, de l'autre costé Monsieur le Prince Conty, Monsieur le Cardinal Mazarin , Monsieur le Chancelier, Messieurs de Villeroy, Seruien & l'Abbé de la Riuere, les Secretaires d'Estat & plusieurs autres ; Et Monsieur le President Nouion parla à la Reyne en cette sorte.

MADAME,

Vostre premier Parlement jaloux du bien de vostre Estat, & du repos de vos peuples, ayant appris par les Lettres qui luy ont esté expressement adressées, & par le recit & la voix d'un des Officiers de vostre Parlement de Bourdeaux, enuoyé à cet effet, les injustes violences que l'on exerce chascun iour contre vos Sujets, Habitans de vostre Prouince de Guyenne, cette Compagnie n'a pas

creu satisfaire à ses obligations, si dans une occasion si pressante, elle se contentoit de donner à ce Parlement de foibles marques de sa tendresse, & de ses justes ressentimens ; Elle a jugé que ses regrets seroient inutiles, s'ils n'estoient entendus de V. M. Elle a pensé qu'en vain elle ietteroit des larmes, & feroit esclatter des plaintes, sinon en la presence de celle dont la main est assez puissante pour apporter le remede au mal. Enfin elle s'est resolue d'implorer cette justice, en faueur de cette malheureuse Prouince, esperant que si les Roys vos predecesseurs ont plusieurs fois approuvé ses soins en de pareilles rencontres, V. M. ne luy refuseroit pas une audience favorable, à present qu'il s'agist du repos general de son Royaume, & de la conseruation de son autorité Royale, que l'on destruit malheureusement chaque jour, sous pretexte de la maintenir. Helas ! Madame, quelle maniere de seruir son Roy ? Qui pourra se persuader que par un chemin si esgaré l'on vueille paruenir à une bõne fin ? pour obliger, dit-on, vos Sujets à l'obeyssance qu'ils ne refuserent jamais. L'on force des Prouinces entieres ; l'on pille ; l'on viole ; l'on brusle, les biens mesmes les plus sacrez ne sont pas exempts de la main prophane du soldat, abandonné à toute la liberté, & dont l'insolence & la rage peuvant à peine satisfaire à la vengeance de celuy qui les conduit. Non ; non, c'est imposture,

V. M. a ce malheur, commun presque à tous les Princes du monde, d'apprendre la dernière la vérité de ses affaires. Si l'on avoit eu des sentimens si purs, il n'auroit point fallu assieger une Ville assiégée, une Ville dont les Habitans ne respirent que respect & obéissance. Il n'auroit pas esté nécessaire de violenter un Parlement, mandier des Interdictions contre des Officiers, qui publient tout hautement qu'ils n'ont qu'une puissance seconde, dependante de celle de leur Roy, & font consister tout leur aduantage, en la conservation de vostre Couronne. Ouy, c'est une maxime certaine, qui ne peut estre raisonnablement contestée, que nul dans toute la Monarchie, ne peut avoir tant d'intérêt à la conservation de l'autorité Royale, que les Officiers & les Parlemens. Leurs inclinations les y attachent, leurs fortunes y sont engagées, & ils ont cette gloire & cet honneur de se pouvoir dire comme les membres de leur Prince. Aussi cette désobéissance, que l'on colore, n'est qu'une raison empruntée, un pretexte malignement inventé, pour couvrir une injuste vengeance, qui ne se peut d'ailleurs excuser. Par là l'on peut faire passer l'accusateur pour l'accusé, l'innocent pour le coupable, & persuader à *V. M.* d'opprimer un Parlement bien intentionné, pour satisfaire & servir à la cholere d'un homme, qui ne peut rien souffrir qui s'oppose à ses injustes desseins. La

conduite respectueuse de vostre ville de Bourdeaux, la deffERENCE avec laquelle vostre Parlement recent vos ordres & vostre Declaration, lors de leurs premiers mouvemens, leur sert assez de justification & de legitime deffence; & si les ennemis eussent à leur exemple obey punctuellement, s'ils se fussent ainsi despoillez de cet esprit de vengeance, la Prouince qui souffre aujourd'huy, jouyroit du repos qui luy est si necessaire. Mais hélas! qu'ils cachotent des lors des sentimens contraires à vos bons desseins, & aux esperances du peuple, lors qu'on traittoit la paix, ils meditoient une nouvelle guerre. Et si tost qu'ils ont peu surprendre l'esprit de V. M. ils ont obtenu d'elle cette Interdiction fatale, source de tous les maux presens. L'on a veu esclatter les effets de leur injuste vengeance. Il falloit que les auteurs d'un si pernicious Conseil, fussent bien descheus de lumiere & de connoissance, de croire qu'un Parlemēt, fortifié par la pureté de sa conscience & l'innocence de ses actions, verifiast luy-mesme une Interdiction contre ses propres Officiers.; & passast ainsi sa condamnation. Et qu'estoit-ce autre chose en verité, sinon obliger un corps bien sain en toutes ses parties, de faire de sa propre main la dissection de ses membres, N'estoit-ce pas forcer celuy? que l'on tient pour le patient, de forger luy-mesme le glaive qu'on luy veut plonger dans le sein? Mais, dit-on,

cette Declaration n'auoit esté accordée qu'avec ordre de ne s'en pas seruir, sinon en vne occasion pressante. Et pouvoit-on pas bien juger que c'estoit mettre l'espée en la main d'un furieux, & que cette mal-heureuse semence ne pouvoit produire que des fruiçts remplis d'amertume. C'estoit perdre bientôt la memoire de cette grande & celebre Declaration que V. M. accorda à ses Suiets au mois d'Octobre dernier. L'on consideroit le Sceau & l'effigie Royale dont cette piece estoit fortifiée, & on vous desgageoit bien promptement, Madame, de la parole si publiquement donnée, & à laquelle vous ne pouvez legitimement contreuenir.

Nous ne scauons, Madame, si l'on vous aduertit de l'estat de vos affaires, si l'on vous fait connoistre la defiance generale de tous vos Suiets; mais nous sommes obligez de vous dire que les esprits penchent si fort du costé de la crainte & du desespoir, & qu'il leur reste si peu d'esperance, que dans cette assiete incertaine, il y a lieu d'apprehender, le ne sçay quelle fatalité nous conduit de telle sorte, qu'il semble que nous ne voudrions pas nous-mesmes éuiter les malheurs qui nous menassent; que nous fomençons la confusion & le desordre, plustost que d'apporter le remede necessaire. Tantost l'on écrit des Lettres à des Gouverneurs des Prouinces, par lesquelles on les exhorte de se resoudre à la paix, leur
faisant

faisant esperer qu'un iour ils seront satisfaits, & que l'on retarde seulement la punition des rebelles. Apres l'on souffre que dans la ville capitale du Royaume, en la presence de vostre Majesté, l'on publie hautement des paperaces, qualifiées Remonstrance des pretendus Officiers, dans lesquelles l'on lit, pour premiere Maxime, Qu'un Prince n'est point obligé de garder la foy à ses Sujets.

L'on fait plus, toute une Province estant en feu, le Gouverneur armé contre la principale Ville, poussé de jalousie contre le Parlement, l'on envoie une Declaration pour pacifier ces desordres; l'on ordonne aux deux partis de poser incontinent les armes; l'un obeit avec tout respect, l'autre, contre toute fidelité, exerce plus de violence en un moment depuis cette paix simulée, qu'il n'avoit fait auparavant, dans la plus grande chaleur de la guerre.

C'est, Madame, la maniere dont se sert aujourd'hui celuy qui commande en Provence sous vostre autorité. C'est avec desplaisir que nous avons accepté l'ordre qui nous a esté expressement donné, de nous plaindre de ces violences. Nous découvrons avec regret à V. M. ce qu'on luy avoit peut-estre celé, plus de cinq cens mil escus d'exactions & de levées dedans cette Province depuis la paix publiée. Mais nous sommes obligez, de rompre tout silence, & d'abandonner le respect particulier, pour

entreprendre la legitime deffence de vos peuples, tous prests de succomber sous le joug del'iniustice & de la tyrannie. Cette pauvre Prouince, qui auoit esperé la paix, qui se promettoit de recouurer le calme & la bonace, se void plus exposée que iamais au pillage & à la cruauté des soldats. Le Parlement, qui s'estoit promis le restablissement de son authorité, n'est pas plus à present qu'un ombre de ce qu'il estoit autrefois, hors le pouuoir de rendre la justice qu'il doit à vos Suiets, par le moyen des euocations frequentes, contraires aux formes de vos ordres & de vos Ordonnances. Tous ces desordres, Madame, doiuent à nostre sens obliger V. M. à une reflection serieuse. Il est mes-huy temps qu'elle mette la main à l'œuvre, qu'elle face hautement esclatter les effets de son authorité, & qu'elle dissipe par sa puissance, ainsi que le soleil par ses rayons, toutes ces vapeurs grossieres; c'est à dire, qu'elle reprime les iniustes entreprinsees de ceux qui abusent & se preualent de sa trop grande bonté. Ce sont, Madame, les vœux de tous vos peuples: ce sont les tres-humbles Remonstrances que vous font vos tres-humbles, & tres-obeyssans & tres-fideles Seruiteurs & Sujets.

Ladite Dame Reyne leur dit que Monsieur le Chancelier expliqueroit sa volonté.

Ledit sieur Chancelier ayant prins la parole,

dit, Que la Reyne auoit tousiours conserué de bons sentimens pour la Ville de Bourdeaux; qu'elle en auroit ressenti les effets, si elle ne s'estoit renduë indigne par sa mauuaise conduite; Que ces peuples auoient esté si temeraires de sortir au nombre de huit mil hommes; entre lesquels on auoit veu des Officiers du Parlement, & auoient esté attaquer vne place dependante du Roy seulement: ce qui ne se pouuoit excuser, & dont l'on ne pouuoit dire autre chose, sinon que c'estoit declarer la guerre à son Roy; Que neantmoins depuis, la Reyne leur voulant donner les dernieres preuves de sa bonté, leur auoit enuoyé vn Mareschal de France, avec pouvoir absolu de calmer tout le desordre de cette Prouince, auquel ils auoient fait des responses si hardies, & depuis proposé des articles si extraordinaires, que la Reyne, quoy que portée à leur faire du bien, n'a pas peu mesme en souffrir la lecture, tant ils estoient prejudiciables à l'autorité du Roy & à l'honneur de sa Regence. Pour ce qui est de la Prouence, qu'elle n'auoit sujet de se plaindre, puis qu'on executoit ponctuellement à leur esgard le contenu aux articles par eux enregistrez, lors des derniers mouuemens; qu'ils se pleignent inutilement des troupes qui alloient pillant la Prouence, puis qu'il estoit nottoire qu'elles estoient

retirées; Que les leuées des sommes immenses faites par Monsieur le Conte d'Alais, estoit vne chose supposée, de laquelle ils n'auoient point de preuves; & que mesme le Deputé, qui auoit mis en auant des paroles si hardies, ne seroit point aduoié de la Compagnie. Quant aux euoquations des affaires particulieres de la Prouence, tant s'en faut que la Reyne en eust accordé à ceux qui legitimement les deuoient obtenir de Sa Majesté, qu'au contraire elle en a vsé avec tant de moderation, qu'elles les a refusées aux personnes qui les pouvoient demander, en consequence des articles verifiez au Parlement de Prouence, lors du Traitté de paix; Que toutes ces raisons ne faisoient point changer à la Reyne ses bonnes intentions; Que quand ces deux Prouinces, & particulierement celle de Guyenne, seroient rentrées en leur deuoir, elles obtiendroient de la Reyne toute la justice qu'elles pouvoient attendre d'une bonne & juste Princeesse.

Ayant finy, firent tres-humbles reuerences à ladite Dame Reyne, & se retirerent.

CETTE Remonstrance, quoy que composée d'un discours eloquent, & d'un raisonnement vigoureux, ne fit autre effet que tirer des paroles de la Reyne qui n'estoient pas efficaces pour arrester les desordres que

Bourdeaux apprehendoit. Le Duc d'Espéron, qui auoit cet aduantage de faire aduouër ses actions, quelle couleur qu'il leur donnaſt, ſe preualoit de cette faueur, à laquelle il ſe laiſſoit ſi fort emporter, qu'il n'y auoit point d'outrage qu'il ne fiſt à ceux de Bourdeaux, voyât qu'il y auoit impunité pour luy. Ce n'eſtoit pas aſſez de faire arreſter les bleds & tous les viures qui deſſendoieût à Bourdeaux, par les garniſons qu'il auoit à Rions, Cadillac, Podensac & Langon, qui ſont des Villes qu'il poſſede en Domaine, ils s'en prirent au vin qui eſtoit dans les celliers des Habitans de Bourdeaux, duquel il conſiſquoit vne partie au profit de ſes domeſtiques, & faiſoit reſpandre le reſte. Si bien que le Parlement creuſt qu'il alloit de ſon autorité, des intereſts du Roy & de la juſtice de la cauſe publique, d'arreſter ces violences, & denicher ces garniſons des places, qui ſeruoient de retraite à tant de brigandages : ce fut pour cette raiſon qu'il donna cet Arreſt.

S*VR ce qui a eſté repreſenté à la Cour ; Que les diuerſes violences & oppreſſions exercées dans la Prouince par le ſieur Duc d'Espéron, particulièrement puis huit mois, contre cette Ville capitale de ladite Prouince & les Habitans d'icelle, continuent avec la meſme hoſtilité dans les choſes*

les plus importantes au service du Roy, & qui choquent le plus son aùthorité ; Qu'il empesche le transport des bleds, & autres viures necessaires pour la subsistance de la Ville & pays circonuoisins, Qu'il tient les passages des riuieres, occupe ceux de Dordogne, à la faueur de la Citadelle qu'il a esleuée sans pouuoir dans Libourne, & des garnisons qu'il a mis en diuers lieux, & ceux de Garonne, par les fortifications qu'il a faites contre les Ordonnances Royaux à Rions, Cadillac, Podensac, & aùtres places & Chasteaux qu'il a en Domaine sur ladite riuere, abusant en tous ces lieux des armées du Roy, & les employant pour priuer ses Sujets de cette Prouince, de la liberté du commerce, non moins necessaire pour le service du Roy, que pour le bien de ses peuples, puis qu'outre le damage qu'en recoiuent les Sujets de sa Majesté, mesmes ceux du haut pays, qui ne peuvent debiter leurs denrées pour satisfaire aux deniers Royaux. Les estrangers, qui sous la foy publique abordent à ce Port, souffriront des incommoditez si notables, que le negoce sera entierement ruyné, & le Roy priué de ses droicts, & d'une subuention bien considerable à l'Estat, laquelle subuention est irrepá-

rablement diminuée, par les desolations generales
 que ledit sieur Duc d'Espéron a fait faire nouvel-
 lement dans l'entre-d'eux mers, & autres endroits
 de la Prouince, renuersant les tonneaux pleins de
 vin, & faisant couler dans les chais celuy qui estoit
 dans les barriques, ostant aux particuliers le meil-
 leur de leur reuenu, & au Roy les dorictz qu'il en
 eust retiré: en telle sorte que le bien de son seruice,
 & le soulagement de ses Sujets requierent, de
 s'opposer à toutes ses violences, lesquelles conti-
 nuent avec impietez, sacrileges, incendies, vio-
 lemens, rasemens des maisons des particuliers, en-
 leuement de leurs biens, & autres actes d'hostili-
 té, qui attireroient la ruïne entiere de la Prouin-
 ce, s'il n'y estoit pourueu. Et à ce que les Arrests
 de la Cour pour la liberté du commerce soient exe-
 cutez, & que les Sujets du Roy de cette Prouin-
 ce jouyssent de l'aduantage qu'il a plu à Dieu leur
 donner, d'auoir abondance de bleds, & ayent
 moyen d'en pouuoir secourir les autres Prouinces,
 & particulièrement la Ville de Paris, capitale du
 Royaume, laquelle se trouve dans vne telle neces-
 sité de bleds, que les Prenosts des Marchands &
 Escheuins d'icelle, ont escrit à la Cour & aux In-

rats de cette Ville, pour faciliter le transport desdits bleds, & le secours qu'ils attendent de cette Province. Ouy sur ce le Procureur General du Roy, LA COVR a Ordonné & Ordonne que le Roy sera informé de la continuation desdites violences, & du prejudice fait à son service par le sieur Duc d'Espernon. Et neantmoins que toutes les fortifications faites ès Villes de Rions, Cadillac, Podensac & autres terres & Chasteaux appartenans audit sieur Duc d'Espernon, seront rasées, comme contraires aux Ordonnances Royaux, & faites au prejudice du Roy & du bien de ses Suiets. Et que les troupes ordonnées pour le service du Roy & la deffence de la Ville, seront employées à l'exécution des Arrests de la Cour, à restablir la liberté du commerce, ouvrir les passages, & faire demolir lesdites fortifications, & arrester les desolations publiques, & les actes d'hostilité pratiquez avec impietez & sacrileges, contre les loix Divines & humaines. Enjoint la-dite Cour à tous Seigneurs, Gentils-hommes, Gouverneurs des places, Officiers, Consuls des Villes, Habitans d'icelles & autres Sujets du Roy, de tenir la main à la liberté des passages, &

& à

à l'exécution desdits Arrests. Et à ces fins, d'obeyr aux ordres qui leur seront donnez, pour raison de ce par les chefs commandans desdites troupes, & de les reconnoistre en ladite qualité, à peine d'en respondre en leur propre & priué nom; Et à tous Marchands de transporter des bleds en cette Ville, pour l'entretien d'icelle, & de pouvoir secourir les autres Prouinces, & particulièrement la Ville de Paris. Fait tres-expresses inhibitions à toutes personnes de quelle qualité & condition qu'elles soiēt, d'empescher ledit transport, & de s'opposer à l'exécution desdits Arrests, à peine d'estre traittez comme perturbateurs du repos public, ennemis du Roy & de son Estat. Permet ladite Cour de courir sus aux contreuenans; & aux Officiers d'assembler pour cet effet les Communes. Et aux fins qu'il soit nottoire, sera le present Arrest leu, publié & affiché ez Villes du haut pays, & autres lieux du ressort qu'il appartiendra, le tout en vertu du simple Dictum, attendu la matiere dont s'agit. Fait à Bourdeaux en Parlement extraordinairement assemblé, le cinquiesme iour du mois de Nouembre mil six cens quarante-neuf.

Signé, DE PONTAC.

LE libertinage s'estoit glissé dans les troupes. Le cabaret auoit des appasts desquels les Officiers ne pouvoient se desprendre. Les soldats, estans sans Chef, rouloient emmy les champs, & destrouffoient ceux qu'ils trouuoient sur leur route. Ce desreglement faschoit tout le monde, & faisoit solliciter avec plus de chaleur le depart de l'armée, que quelques autres empeschoiēt par des pratiques sourdes, & par le retardement qu'on faisoit rapporter au payement des troupes. Il fallut enfin que le Parlement s'en meslast tout à bon, & qu'il rendist Arrest, par lequel il fut ordonné que tout sur l'heure les troupes partiroient, pour l'exécution de l'Arrest precedent. Et qu'à ces fins le Marquis de Saulvebeuf, General de l'armée, leur donneroit la marche qu'il jugeroit necessaire, pour ouvrir le passage de la riuiera de Garonne pour les viures, & l'entiere execution de l'Arrest susdit.

CHAPITRE II.



NE double tierce qui retenoit le Marquis de Saulvebeuf dans le liēt, luy causa d'estranges inquietudes, pour ne pouuoir suiure l'armée pas à pas, & partir avec elle. Cette impatience redoubla son accez, qui le trauailla si tres-fort, qu'on desespera de le voir à la teste. Neantmoins, à mesme que la fievre marqua quelque relaschement, il se fit mettre dans son carosse,

& fuiuit la meſme route, contre l'aduiſ des Medecins, & les prieres de ſes amis; & s'eſtant logé cette nuit dans la maiſon de Carbonieux, à deux lieües de Bourdeaux, & couché ſur quelque faix de paille, il joignit l'armée ſur le grand chemin de la Prade, où il l'a trouua en bataille, de laquelle aprez auoir viſité les rangs, & animé les Chefs & les ſoldats à bien faire, & tenu Conſeil avec les Lieutenans Generaux, il donna la route droit à Podensac, qui d'autres fois a porté le nom de Ville, & maintenant eſt vn gros Bourg, dependant du Domaine du Duc d'Eſpernon, où ſoudain que l'auantgarde l'aborda, commandée par le Marquis de Theobon, elle deſcouvrit que la garniſon que Commandoit Petro-Paulo, Gentil-homme Corſe, auoit aduancé quelques barricades à l'entrée du Bourg, lesquelles furent ſi vigoureuſement attaquées par le Cheualier de Vauzelle, qui conduiſoit vne Compagnie de fuſiliers à pied, & quelques ſoldats deſtachez du Regiment de Theobon, que les Eſpernoniſtes furent contraints de les abandonner, pour ſe ſauver bien ſoudainement les vns dans l'Egliſe, les autres dans le Chateau. L'apparence eſtoit grande qu'ils eſtoient retranchez dans l'vn & l'autre de ces lieux. Il falloir deliberer de la forme de l'attaque. Le Marquis de Saulvebeuf tint Conſeil, pendant lequel on roula par ſon ordre deux pieces de fonte en veü de l'Egliſe, & on dreſſa bien promptement la batterie, cependant que Morpain, Capitaine dans le Regiment de Saulvebeuf, qui auoit monté avec les Galiottes bien proche de Podensac, la battoit par ſon artillerie du coſté de la riuiera.

A l'issuë du Conseil, qui ne tint pas long-temps, pource que la nuit estoit proche, Lamote Guyonnet, Marechal de bataille, receut l'ordre de sommer les assiegez de se rendre, dont ils firent refus. Si bien que le Marquis de Saulvebeuf, que l'on soustenoit sous les bras, disposa les attaques, & commanda qu'on tirast le canon, lequel ne fist pas grand effet en ses premiers coups : en sorte qu'il fust aduancé jusques au pied de la barricade qui estoit proche de l'Eglise. Sur le mesme temps il fut donné aduis qu'un escadron de Caualerie paroissoit sur l'autre bord de la riuere. On creut qu'il vouloit trauerser pour secourir le bourg. Il fust trouvé à propos que le Marquis de Theobon allast s'opposer au passage, avec Beaupuy Marechal de Camp, & deux Compagnies de cheuaux legers. Et à mesme on fit aduancer le Marquis de Lufignan, qui estoit à la teste de l'arriere garde, pour faire l'attaque de ce retranchement, lequel fust ouvert à la premiere volée, & acheué de rompre par l'ardeur des soldats, & des Chefs qui les commandoient : ce qui effraya si estrangement les Espernonistes qui estoient renfermez dās l'Eglise, qu'ils demanderent la vie sauue. Mais le Marquis de Saulvebeuf ne les voulut receuoir qu'à discretion, ce qu'ils accepterent, scachant bien qu'il n'y a rien à risquer avec vne ame genereuse. On roula d'une mesme main le canon au deuant du Chasteau que Petro-Paulo commandoit, lequel ne fust pas sommé qu'il offrist de se rendre. Et ayant luy-mesme dressé la capitulation, elle fust reformée, & reduitte à leur donner la vie sauue, & la liberté de sortir avec le mousquet sur l'espaule, apres la-

quelle la place fust remife entre les mains du Cheualier de la Vauzele, & Petro-paulo conduit le lendemain à Cadillac avec escorte. Les sieurs de la Cheze, Gentil-homme fut tué, & Gaston Thibaut blessé dans cette attaque, ayans rendu tous deux des preuves de leur generosité. Sans la diligence qu'apporterent les Generaux à esteindre le brasier que des payfans voisins, qui auoient accouru à cette conquête, dont ils estoient ravis, auoient allumé, tout le bourg eust esté mis en cendres.

CE progresz enfla le cœur du soldat, & luy fit entreprendre avec plus de gayeté la route qui luy fust marquée le lendemain vers le bourg de Barsac, apres auoir laissé vne garnison raisonnable pour la deffence du Chasteau, sous le commandement du Cheualier de Vauzelle. On fit alte sur le chemin pendant vne heure, que les Generaux, qui s'estoient arrestez dans la Maison de Ceron, qui est au sieur de Niac, firent tirer quelques volées de canon sur Cadillac, qui est vis à vis, ou ils rompirent quelque croisée, & casserent quelques vitres, se contentans de faire voir qu'ils pouvoient luy faire plus grand dommage: comme de vray les Habitans de cette petite Ville en eurent grande apprehension, car il ne se vid jamais rien de plus alarmé. Cette station fit que l'armée ne peust pas aller plus auant que Barsac, d'où elle decampa le iour apres pour se rendre à Lengon. Pendant cette marche, le Marquis de Saulvebeuf eust en pensée de retourner sur ses pas, faire embarquer les troupes à la faueur des Galiottes, & attaquer Cadillac, toutes-fois il ne voulut rien faire sans le communiquer aux

Lieutenans Generaux, lesquels furent appelez en son carosse, où cette affaire fust concertée bien meuremēt. Et quoy que les Marquis de Saulvebeuf & de Theobon fussent d'aduis de suiure ce dessein, neantmoins le Marquis de Lusignan l'emporta, & les fit reuenir, sur la consideration de l'ordre qui leur auoit esté donné dans le Conseil de Guerre au sortir de Bourdeaux, d'aller en droite route à Lengon; leur representant qu'il valloit mieux faillir avec les formes, que pecher contre l'ordre. Le bruit courut que le Duc d'Espernon estoit arriué dès le soir auparauant dans la Ville de S. Macaire. On creut cette fauce nouvelle par l'apparence, en ce qu'on voyoit sur l'autre bord de la riuiera quelque caualerie, qui battoit le chemin de cette Ville, estimant qu'elle s'allast ioindre à luy. Il parut en effet qu'elle n'auoit autre dessein que d'observer la marche de l'armée. Cela n'empescha pas pourtant que sur cette imagination le Marquis de Saulvebeuf ne fist embarquer Beaupuy Mareschal de Camp, & le sieur de Razens Capitaine de Caualerie, sur les Galiottes, avec trois cens hommes du Regiment de Iaure, pour se saisir de S. Macaire, s'il y trouuoit iour, ou l'investir en cas de resistance: cela luy reussit, car la Ville ayaut esté sommée, capitula d'abord; & se rendit au party qu'elle embrassoit avec cœur.

LE gros de l'armée marchant en bataille approcha les faux-bourgs de Lengon, à l'entrée desquels on trouua des retranchemens, qui furent viuement soustenus par quelques soldats du Regiment de la Marine, qui passe pour vn des meilleurs Regimens de France;

mais plus vigoureuſement attaquez par ceux de Beaupuy & la Roche Duval , qui s'y portèrent avec tant de généroſité , que n'estans pas laſſez d'un feu continu , qu'ils firent pendant vne demie heure , ils grimperent ſur les toits pour deſcouvrir plus à plomb leurs ennemis dans les retranchemens , d'où ils les pouſſerēt avec vne telle ardeur l'eſpée dans les reins , que s'ils n'euffent eſté diligens à fermer les portes de la Ville , ils y fuſſent entrez tous meſlez. Dès l'heure on ſe logea au pied de la muraille. On dreſſa deux batteries qui tirerēt juſques à la nuit , n'ayans pas voulu ſe rendre apres auoir eſté ſommez. En ce rencontre, Serpe , Commandant le Regiment de Beaupuy, Cirer, Capitaine dans celui de la Roche , Montagne, Lieutenant dans celui de Luſignan, marquerent leur liēt d'honneur au pied de la muraille. Blanc , Dorlic , Rodarel , Montader, tous natifs de Bourdeaux , Tamaignan , Dauba & Dehinx , Capitaines du Regiment de Beaupuy , firent voir qu'ils ſçauoient combattre & commander. La Fortune marqua auoir du reſpect pour la valeur de la Lande , Ayde de Camp , l'ayant ſauvé de trois mouſquetades , dont les deux percerent le bord de ſon chapeau , & la troiſieſme le colet du pourpoint , ſans toucher à la peau.

IL eſt du courage comme du feu , qui pour ne pouuoir ſubſiſter ſans agir , cherche toujours des nouvelles matieres pour faire des nouveaux progrez , & s'il eſtoit ſans action , on le verroit ſans force. Le Marquis de Saulvebeuf , qui reprenoit ſes forces à meſure qu'il trouuoit de l'employ , eſſaya dès ce ſoir de monter à

cheval, où il ne sceut se tenir sans appuy, à la faueur duquel il visita les quartiers de l'armée avec les Lieutenans Generaux, ordonna des lignes de circonuallation, fit changer les batteries dans le quartier plus foible, qui estoit proche des Carmes, suiuant l'aduis qui luy en fut donné, & lequel reüssist à tel point, que dans cinq heures la breche fut faite raisonnable. Tous y vouloient courir, toutefois le Regiment de Theobon, soustenu par celuy du Parlement, eust l'ordre pour la premiere attaque, ceux de Lusignan & Saulvebeuf soustenoient les deux premiers, lesquels s'y porterent tous ensemble avec vne telle vigueur, qu'ayant trouvé fort peu de resistance à la breche, ils forcerent neuf barricades par vn combat opiniastré de quatre heures, avec si peu d'apprehension des feux & des flammes, dans laquelle ils estoient presque enseuelis, que ceux de la Marine, qui deffendoient leurs retranchemens avec cœur, contrains de ceder à vne si genereuse resolution, se retirerent les vns dans le Chasteau, les autres dans l'Eglise. Ils furent fommez de se rendre, mais ils firent response qu'ils sçauoient faire achepter leur vie, & qu'il seroit honteux aux soldats de la Marine de se rendre à si bon marché: cela fut cause que le Marquis de Sauluebeuf fit rouler le canon dans la Ville, & dresser deux batteries; l'une contre l'Eglise, l'autre sur le Chasteau, dont l'attaque fust reseruée pour le iour suiuant, à cause de la nuit qui sembla s'aduancer, pour preparer le repos à des soldats fatiguez. Pont-castel, Bourdelois, premier Capitaine du Regiment du Parlement fust frappé d'une mousquetade, apres auoir entré l'espée à la main dans

barricades , dont il mourut quelques iours apres. Ceridos , Marechal de Bataille , Mondeuis , Ayde de Camp , Morin , Cheualier , Picaud , Chanteloube , aussi Bourdelois , & plusieurs autres Officiers , rendirent des témoignages tres-sensibles de leur valeur.

Ce lendemain n'eust pas paru que les soldats tous frais ne demandoient qu'à combattre. Il ne fust pas tiré quelques volées de canon sur l'Eglise , que ceux qui la gardoient demanderent à capituler. Les vns estoient Bourgeois de Langon , & les autres soldats de la Marine. Les premiers furent prins à rançon. La capitulation des autres fut promise semblable à celle qui se faisoit pour ceux qui estoient au Chasteau , contre lesquels d'abord on dressa toutes les batteries , qui en moins de trois heures firent vne breche raisonnable , sur laquelle le courage emportoit les soldats & les Officiers en foule , si le Marquis de Saulvebeuf , qui auoit interest de conseruer ces Lions pour d'autres occasions , n'eust arresté cette ardeur , pour prendre son temps à reconnoistre quelque autre endroit plus foible que celuy-la , estât fortifié par des retranchemens aduantageux par l'assiette du lieu , & du nombre des soldats aguerris qui les sustenoient. Il print luy-mesme cette Charge , qui luy pensa couster la vie , Cacheron , Lieutenant de sa Compagnie d'Ordonnance , sur lequel il estoit appuyé , ayant esté frappé d'une mousquetade , de laquelle il mourut bien-tost apres , laissant pour les rares qualitez qu'il auoit , vn tres-sensible desplaisir dans le cœur de l'armée , & particulièrement en celuy du General , qui outré de douleur par le ressentiment de cette perte , re-

ſuſa de receuoir autrement qu'à diſcretion les aſſiegez, qui demandoient à capituler. Et poſſible ne leur euſt-il point fait cette grace, ſi le Marquis de Luſignan, qui auoit beaucoup de pouuoir ſur ſon eſprit, n'eũt calmé ſa paſſion, & ne l'eũt perſuadé de leur permettre de ſortir tambour battant, la meſche allumée, leur vie & bagage ſauue, en quoy il teſmoigna ſa vertu, puis qu'il ſçauoit ſe vaincre, & ne pratiqua pas moins la prudence dans cette occaſion, eſpargnant les ſiens, que la généroſité, donnant la vie à des ennemis qui ſçauoient ſe deffendre, leſquels il fit eſcorter à Bazas, où le Duc d'Eſpernon auoit vne partie de ſa Caualerie, commandée par le ſieur de Marin, ſon Mareſchal de Camp.

ON ſe perſuada que les autres Villes du haut pays ſe rendroient au bruit de ces conqueſtes; & que ſe voyât fortiſiées par le ſecours de ces armes victorieuſes, elles ſe declareroient hautement pour le party de Bourdeaux. Neantmoins le bruit que le Duc d'Eſpernon faiſoit courir de nouvelles & puiffantes forces qu'il attendoit de la Catalogne, Italie & Prouence, tenoit les habitans dās la retenuë. Le Marquis de Luſignan negocioit quelques intelligences pour l'Agenois. On faiſoit entendre que la Reole, Marmande & Agen, auoient les intentions tres-bonnes pour les Bourdelois; mais ils n'oſoient promettre l'entiere aſſurance pour les portes. Cette affaire ſe deuoit conduire avec vn peu de patience; non ſeulement à cauſe que ces partis n'eſtoient point encore bien formez, mais auſſi pource que l'armée de Bourdeaux auoit beſoin de ſe rafraichir. Ce fut pour cela que le Marquis de Sauluebeuf, apres auoir

laissé son Regiment dans Lengon, sous le commandement de Royere, sieur de Masvieux, passa à S. Macaire, où il estoit aux escoutes, feignant d'y vouloir faire son quartier d'hyuer avec l'armée. Mais à quelques iours dela, le Duc d'Espéron, apprehendant qu'on voulust muguer la Reole, resolut d'y enuoyer vne garnison pour s'en asseurer, dequoy les Habitans firent aduertir le Marquis de Saulvebeuf, promettant, que s'il deuançoit ceux du Duc d'Espéron, qu'ils le receuroient. Il ne mesprisapoint cet offre, car à mesme tēps il donna ordre que l'armée fust prestē à my-nuiet pour la marche. Mais quelle sollicitation qu'il fist, elle ne se trouua en estat de marcher qu'à sept ou huit heures du matin. Cependant le Duc d'Espéron s'estoit saisi de la Reole à la pointe du jour. Cela fāscha le Marquis de Saulvebeuf, qui ne laissa pour cela de continuer sa route, & enuoyer des coureurs reconnoistre la Ville, & faire entendre par leur contenance aux Habitans qu'il estoit proche d'eux, s'ils auoient enuie de tenir leur parole. Ils le vouloient bien, mais la presence du Duc d'Espéron les tenoit dans la crainte, lequel en sortist bien-tost, estant escorté presque de toute sa Caualerie, lequel le Marquis de Saulvebeuf fist pousser si rudement que le Duc d'Espéron, ayant prins l'espouuente & toutes ses troupes, ils piquerent sans bailler haleine, & en tres-grand desordre jusques à Marmande, desquelles neantmoins le sieur de Biron se destacha, pour rentrer dans la Reole, trouver la garnison que le Duc y auoit laissé.

DIVERS aduis estoient portez de la Rochelle, que le

Conte du Doignon armoit par mer, pour attaquer Bourdeaux. On auoit peine à le croire, à cause qu'il faisoit affleurer le Parlement par dessous main qu'il ne prendroit pas party contre luy; & qui plus est il luy faisoit offrir de l'argent s'il en auoit besoin, sous les assurances qu'il demandoit. L'infidelité avec laquelle il a traité le Roy se maintenant dans Broüage contre son autorité, & la reputation qu'il a d'estre vn des plus grands fourbes du Royaume, deuoit auoir empesché le Parlement d'auoir creance en ses paroles, & ne faire ny fondement sur l'argent qu'il offroit, ny sur le seruice qu'il protestoit de leur rendre. L'éuenement le tesmoigna, car apres auoir fait tout l'amas des gens qu'il peut auoir dans son Gouvernement, jusques à faire garotter les enfans de quatorzeans, pour les mettre dans les Vaisseaux, ou en qualité de soldats, ou bien comme manœuvres, il fit publier vne Ordonnance dans ses terres, par laquelle il enjoignoit à tous ses Iusticiables, & autres qui dependoient de son Gouvernement, qui seruoient le party de Bourdeaux, de le quitter promptement, à peine d'auoir leurs maisons rasées & les biens rauagez. Cela fit peur à ceux qui commandoient les Vaisseaux Bourdelois; & entre autres à Treillebois le pere, qui à la teste des autres Capitaines de Marine ses compatriottes, porta cette plainte dans le Conseil de Police; Et faisant vn beau semblant de seruir avec affection, demanda vn Arrest qui le mist à couuert de l'indignatiõ du Conte du Doignon, qu'il craignoit, & pour l'indemnité des autres. Cette affaire fust portée dans les Chambres assemblées, qui reconnoissant la justice, mais non pas la fourberie de

cette demande, donnerent Arrest, par lequel deffences furent faites à toutes personnes de quelle qualité & condition qu'elles fussent, de faire, ny causer aucun dommage ou ruyne aux biens & maisons des Capitaines des Vaisseaux, leurs Officiers & equipage, à peine de la vie, & de tous despens, dommages & interests. Et en cas de contrevention, il fut ordonné qu'il en seroit informé à la requeste & diligence du Procureur General, pour les informations faites & rapportées y estre pourueu ainsi que de raison. Il fut encore ordonné que les ruynes portées, & les dommages qui seroient causez à ces Capitaines par les ennemis de Bourdeaux, leur seroient reparez, & qu'ils en seroient indemniséz sur les deniers publics, ou autrement, en cas qu'ils ne fussent desdommages sur les biens des ennemis. Deffences furent encore faites tant à Treillebois, qu'aux Capitaines, Officiers & equipage des Vaisseaux, de les abandonner, & quitter le seruice auquel ils estoient obligez avec serment, à peine de la vie. Il ne se pouvoit souhaitter vn Arrest plus formel ny plus satisfaisant : toutefois Treillebois, qui, pour auoir autrefois trahi son party à la Rochele, a fait habitude de trahison, deserta l'armée Nauale qu'il commandoit à Bourdeaux, & traïna quelques autres Officiers avec luy.

CEPENDANT le Marquis de Saulvebeuf, qui voyoit que son armée perissoit dans S. Macaire, non seulement par l'oysiueté, mais principalement par le deffaut de fourrage & de subsistance, estant tres-perilleux de faire voïcturer de Bourdeaux ou par terre ou par eau ny argent ny pain de munition, à cause de la difficulté des

passages, resolut de chercher fortune plus auant, & faire rouler ses troupes jusques dans l'Agenois, pour y trouver le Duc d'Espéron, à quoy le sieur de Bordes Conseiller, qui auoit esté donné pour Commissaire ou Intendant de l'armée, s'opposoit par des raisons qui furent approuvées dans le Parlement, & sur lesquelles il enuoya le sieur de Mirat aussi Conseiller, pour le prier de ne rien entreprendre jusques à nouvel ordre: ce que le Marquis de Saulvebeuf ne pouvoit pas goustier. Si bien qu'il reuint à Bourdeaux pour sçauoir les motifs de cet empeschement, & proposer luy-mesme le dessein de son entreprise. Mais il ne fust pas de retour, qu'il fust obligé de changer d'aduis: car on sceut d'un costé que le Duc d'Espéron estoit en campagne avec des forces qu'il auoit recouvré. Le Conte du Doignon d'autre part entroit en Riuiera, monté sur la Lune, vn das grands bastimens qui ait paru sur mer, escorté de huit gros Vaisseaux, dont le Iules faisoit la teste, trois bruslots & seize trauersiers.

Ces nouvelles fournirent assez de matiere à vn Conseil de guerre. Le Marquis de Saulvebeuf vouloit aller reprendre à S. Macaire ses troupes pour combattre le Duc d'Espéron. D'autres vouloient qu'on allast assieger Cadillac, ou conduire les troupes dans le Medoc pour faire diuersion. Les autres encoré combattoient le premier aduis, par la foiblesse de l'armée de Bourdeaux, qui estoit desia fort delabrée faute de subsistance, & qu'il valoit mieux ou soustenir vn siege à S. Macaire, ou se retirer y laissant vne garnison raisonnable, pour conseruer l'honneur des armes qu'on auoit acquis jusques

alors. On respondoit au deuxiesme que la saison estoit trop auant dans l'hyuer, pour entreprendre vn siege dās vn pays gras, par vn temps dans lequel ordinairement les pluyes sont frequentes, avec des soldats mal vestus; Que cette diuersion pour le Medoc estoit hors de propos, pource qu'à tenir la lande, c'estoit vn pays trop aduantageux pour la Caualerie du Duc d'Espernon, qui estoit beaucoup plus forte que celle de Bourdeaux; Qu'il estoit perilleux de se jetter dans le palus, à cause que c'estoit s'enfermer entre deux ennemis, le Duc d'Espernon & le Conte du Doignon, d'autant plus que le Medoc estant vne terre ennemie, & accablée des ruines qu'elle auoit souffert, il y faudroit perir. Mais enfin d'autres, considerant que la personne du Marquis de Saulvebeuf estoit necessaire à Bourdeaux, pour raffermir beaucoup d'espiits chancelans de frayeur, par les approches du Conte du Doignon; Qu'il valoit mieux exposer aux attaques des gens soldoyez que des Bourgeois; Qu'il estoit plus important de conseruer Bourdeaux que S. Macaire, ou faire des nouvelles conquestes, opinerent à faire reuenir l'armée: pour raison de quoy les ordres furent expediez.

CHAPITRE III.



A crainte que l'on eust que l'infidelité de Treillebois le pere ne passast en la personne de son fils, qui commandoit le Vis-admirail, fist que l'on luy bailla son congé ; & quelle protestation qu'il fist d'un service fidel, & du ressentiment de l'injure que luy faisoit l'action de son pere, on apprehenda l'artifice de cette Rhetorique. Il falloit toutefois pourvoir ces Vaisseaux de Commandans. On donna la Commission de l'Admirail à Lamote Guyonnet, & celle du Vis-admirail à Richon de Larodiere, lesquels n'eurent pas presque le loisir de se faire connoistre dans leurs bords, car à mesme qu'ils en eurent prins possession, l'armée du Conte du Doignon, apres s'estre rafreschie au bec d'Ambez, & receu du renfort de la Rochelle, Broüage, les Isles Dalvert & la Tremblade, monta deuant Valliers, où se fit la réueüe generale de son armée, qui se trouua composée de la Lune, Vaisseau du Roy, du port de 800. tonneaux, armé de 54. pieces de canon de fonte, dont tout le rang de bas estoit de pieces de batterie de trente-deux liures de balle, & le haut de coleuvrines de 18. & 24. liures. Salenoue & la Roche-gauchere commandoient l'esquipage, composé de 300. matelots. Villevert, Maistre de Camp du Regiment du Conte du Doignon, commandoit la soldatesque, au nombre de

300. hommes en six Compagnies , & plus de 150. ou 200. volontaires , tant Gentils-hommes que Capitaines de Marine. Le Iules de 500. tonneaux , armé de 42. pieces de fonte , & equipé de 3. à 400. hommes, cōmandé par le Cheualier de la Lande. La grande Fluste du Conte du Doignon , montée de 24. pieces de canon , & equipée de 200. hommes , que le Cheualier de Fonteny commandoit. Le Leopard , fregate du Roy , montée de 34. pieces , equipée de 300. hommes , & commandée par le Capitaine Gargot. Le Berger , qui est aussi au Roy , armé de 36. pieces , equipé de 300. hommes que Duquesne commandoit. Vn grand Anglois que l'on auoit freté , monté de 30. pieces de canon , & armé de 250. hommes , commandez par Duvi gnaut. Vn Flamen que Gabarret commandoit avec 200. hommes & 24. canons. Vne Fregate commandée par le sieur de Cachas de Broüage , armée de 20. canons & 150. hommes. Vn Flibot de 12. pieces , & 100. hommes commandez par Lauder , Ayde Major de Broüage. Le Nauire que Guitard , qui estoit pour les Bourdelois , auoit perdu à l'Isle de Cazeaux , equipé de nouveau de 100. ou 120. hommes & môté de 22. pieces. Lescadre de Montry , composée de sa grâde Fregate , sur laquelle il y auoit 24. pieces & 200. hommes. Les deux Fregates que le Duc d'Espéron auoit eu à Libourne sur les Bourdelois , montée de 100. ou 120. hommes. La Sylvie avec 8. pieces de canon & 40. hommes. Le Nauire que le Bureau tient à Blaye , & les Pataches qu'il a d'ordinaire à Bourdeaux & Libourne. Vingt grands Trauersiers remplis d'Infanterie du Regiment du Conte du Doi-

gnon. Deux Brulots , 15. ou 20. Barques longues , chargées de mousquetaires du mesme Regiment , commandez par Dejeu , 25. ou 30. Galiottes & Chaloupes doubles , chargées de matelots & de volontaires. Toute cette armée estant en ordre de bataille couvroit prez d'une lieue de riuere.

CELLE des Bourdelois estoit bien foible au prix de celle-la. Son Admirail , que cōmandoit Lamote Guyōnet, & ou Blanchard estoit Capitaine , n'auoit que 26. pieces de canon & 200. hommes. La Nostre-Dame , ou estoit Commandant Richon de Larodiere & Vrignaut, Capitaine , auoit 20. pieces & 80. hommes. La Fregate commandée par le Capitaine Labat , estoit montée de 22. pieces de canon & 80. hommes. Trois Flustes , commandées par les Capitaines Giraud, Chantier & Guitard , auoient chascune 22. canons , & prez de 80. hommes. Six Brulots , 16. Galiottes & 2. Galeres. Le Conte du Doignon ayant encore fait sa reueüe , donna ses ordres le lendemain , & à mesme se seruant de la marée , il monta de Valliers à la Barranquine , où l'armée de Bourdeaux estoit à l'ancre , qui voyant venir cette forest flottante sur elle , fit sa retraitte peu à peu jusques à Lormon , en canonant tousiours de part & d'autre. Il n'y eust que le Capitaine Giraut , dont le Pilote mal adroit fist eschoüier le Nauire sur vn banc de sable , qui demeura là sans le vouloir abandonner. Cette nouvelle fust portée à mesme temps à Bourdeaux. Le Marquis de Saulvebeuf alla dans les ruës animer la Bourgeoisie à prendre les armes , pour monter sur les Vaisseaux. L'obeyssance quel'on auoit pour ses ordres , remplist d'a-

bord les places d'armes de Bourgeois, d'où il tira des Compagnies, pour aller sur l'eau. Et luy-mesme, montrant l'exemple, se mit dans vne petite Chaloupe pour aller joindre son Admirail. Il est mal aisé d'expliquer avec qu'elle ardeur les troupes Bourgeoises se precipitoient dans les batteaux pour le suiure, & prendre part à la gloire. Elles n'eurent pas joint leur General, qu'elles firent à l'enuy qui feroit vne plus belle descharge sur l'ennemy, nonobstant la continue de ses canonades qui les couvroient de feu & de fumée, de l'une desquelles Porcher, l'un des Capitaines Bourgeois, & quatre soldats de la Compagnie de Roquette, aussi Capitaine de la Bourgeoisie, furent tuez.

CETTE foule de Lions estoit le Conte du Doignon; mais ce n'estoit rien faire si on ne formoit vn dessein. Le Marquis de Saulvebeuf monta sur l'Admirail, où il tint vn Conseil de guerre, dans lequel il fut resolu, que puis qu'apparamment on ne pouvoit reprendre le Nauré eschoüé, à cause qu'il estoit gardé par vne avant-garde, qu'on ne pouvoit forcer sans courir risque de perdre toute l'armée, il falloit tascher de la brusler à la faueur du vent & de la marée, qui pour auoir changé, sembloient s'accommoder à ce dessein. Mais comme les bruslots n'estoient point encore prests, par la negligence que les Bourdelois auoient de ne mettre jamais leurs preparatifs en estat que par la force de la necessité, il fust trouvé à propos d'amuser l'ennemy par des escarmouches. Et pour cet effet le Capitaine Guiraut, de Bourdeaux, fust commandé de faire prendre terre à sa Compagnie, & de l'approcher autant qu'il

pourroit du vis à vis de l'ennemy : ce qu'il fit, & se porta fort auant & fort proche du bord, mesprisant les canonades qui les couvroient & de terre & de bouë. Ce poste estoit proche de la maison de Deydie, qui suiuoit le party du Duc d'Espéron. On apperceut dans vn bois non gueres esloigné, vne Compagnie de Caualerie, avec dessein sans doute de les surprendre, & leur bailler en queuë : ce qui obligea le Capitaine Guiraut de commander Canot, Procureur en la Cour, son Enseigne, non seulement de les aller reconnoistre, mais aussi de les charger avec vingt fusiliers : ce qu'il fist bien courageusement. Mais il ne les eust pas approchez à la portée du pistolet, qu'ils firent volte face, desorte qu'il fust obligé de s'en retourner sans rien faire. Et pource que l'on print garde qu'aux enuirs de cette maison il y auoit des chemins & des routes, à la faueur desquelles des ennemis pouvoient venir fondre sur eux à couuert, le mesme Canot fust commandé de destacher trente fusiliers, & se saisir de toutes les auenues, lesquelles il garda fort bien, pendant qu'on estoit à l'escarmouche.

LES petits Vaisseaux faisoient leur deuoir sur l'eau. Deux Galeres allerent avec grand cœur faire deux descharges au bord des Vaisseaux du Conte Doignon, & les aborderent par vne troisieme brauade l'espée à la main. Il y a de l'apparence que sans la grande disproportion de leurs bords, il y eust eu beaucoup de sang respandu sur le Tillac. Le Marquis de Sauluebeuf n'estoit point oyssif parmy toutes ces attaques. Il estoit descendu de l'Admirail dans vne Chaloupe, avec laquelle il al-

loit (avec aussi peu de crainte des canonades, comme s'il eust pactisé avec elles pour la seureté de sa personne) inuiter les Capitaines des Galiottes descorter cinq brulots, que les sieurs Boucaud laisné, Taranque, Estrancars & Alefme Conseillers, auoient fait preparer avec tres-grande diligence. Mais il est bien mal aysé que la Rhetorique ny la persuation surmontent la crainte, ou plustost la lascheté, quand elle vient de la nature, car ceux qui commandoient les brulots, mirent le feu de si loing, que les trauersiers du Conte du Doignon les voyant approcher, auoient loisir de les cramponner, & les pousser ou sur les bords de la riuiera, ou sur les bancs de sable, où ils acheuoient de se consommer. Cette flâme, qui paroissoit de loin, esleuoit des esclans de joye parmy les Bourdelois, qui ne voyoient pas que ce feu estoit inutile; & qu'il n'y auoit de perte que pour eux. Le Marquis de Saulvebeufen eust bien voulu faire bruler dauantage, afin de rencontrer vn coup heureux; mais voyant la lascheté de ceux qui les commandoient, & les approches de la nuit, il fit sonner la retraite, qui fust faire avec honneur.

Le Capitaine Giraut, qui se vid exposé à la cholere de son ennemy, puis que son Nauire estoit eschoüé, & qui aimoit mieux perir qu'abandonner son Vaisseau, se resolut à demeurer jusques au soir, qu'il esperoit le retirer quand il feroit en flot au retour de la marée. Le Conte du Doignon, qui auoit bien remarqué qu'il auoit touché, se reserua de le faire attaquer à la faueur de la nuit. Et pour cet effet il en donna l'ordre à la Roche, qui commandoit la Lune, lequel s'imaginant a-

auoir affaire à vn homme du commun, se contenta de prendre pour cette execution huit grandes Galiottes qu'il remplist de soldats & de volontaires, avec lesquelles il costoya la terre, pour luy gagner le deuant, sans estre reconnu; & à mesmes allant droit à luy à la faueur de l'obscurité, il se trouua bien proche auant qu'il ne fust apperceu par celuy qui faisoit le quart, & par Giraut mesme, qui estant dans la deffiance, estoit sur le Tillac pour voir qui l'abordoit, & cria le *Qui va là*, à quoy Laroche & les siens demanderent bon quartier. Dans le commencement, & auant qu'on ne parlaist, Giraut creut que c'estoient des Galiottes de Bourdeaux, pour le secours qu'il auoit enuoyé demander à son Admirail, mais il n'auoit garde de les receuoir, à cause que ceux de son bord, ausquels il auoit donné cet ordre, auoient gagné la terre & emmené leurs Chaloupes à couvert. Ayant ouy parler de quartier, il creust que quelque Galiotte effrayée de se voir au prez d'un grand Vaisseau dans l'espaisseur de la nuit, luy demandoit composition. Neantmoins il se trouua surprins, quand il descouvrit beaucoup de meches allumées. Vne partie des ennemis, qui estoient desia montez sur les percintes, & qu'il oyoit crier par tout, tuë, tuë, alors faisant valoir son courage, il appelle ses gens, les rassemble sur le Chasteau de poupe, les anime au combat, & courant le premier vne demy pique en main à la Proüe, il rencontra la Roche qui montoit par les aubans du Mast, qui luy tira à faux vn coup de pistolet, sur lequel Giraut se rua, & porta si rudement vn coup de sa demy pique, qu'il l'eust percé de part & d'autre, s'il

n'eust esté armé, mais il le renuerfa du haut des aubans dans la Galiotte. Ses gens qui avoient desia monté, furent repouffez de la mesme sorte, sur lesquels Giraut fit faire vne descharge de mousquets & de canons chargez de petites balles, qui fit vne telle escarre, que la Roche fust contraint de faire vne honteuse retraite.

CETTE vigoureuse deffence piqua de jalousie le Conté du Doignon, qui print sa part de la confusion, voyant qu'un simple Vaisseau, arresté sur les sables, defendu seulement par quinze ou vingt hommes, attaqué à la teste de toute cette puissante armée, par l'un des premiers Commandans, & par vn nombre de soldats choisis, se fust si genereusement demeslé de cet insulte. Il y renuoya le mesme la Roche, recouvrer son honneur, avec vingt-cinq tant Galiottes que Trauersiers & barques longues, armées de huit cens hommes, qui auoient ordre d'inuestir ce Nauire, passer tout au fil de l'espee, sauf Giraut, auquel il recommanda de donner quartier, reconnoissant le prix de son courage, qui ne s'effraya pas dans les approches de ces nouvelles forces; au contraire, redoublant sa vigueur, il en tua bon nombre par vne descharge qu'il fit faire à l'abord de ces bateaux descouverts, qui l'inuestirent soudain, le chargerent de feu à coups de mousquets, & par beaucoup de grenades dont ils couvrirent son bord, & tuerent vne partie de ses soldats, au trauers desquelles courant incessamment de la prouë à la poupe, il renuersoit à coups de coutelas ce qui s'opposoit à luy. Mais enfin voyant que le nombre l'emportoit, & qu'il n'auoit pas de quoy resister à vne si rude attaque, il se resolut à la

derniere extremité, encore que la Roche luy promist bon quartier, & qu'une Chaloupe fust depeschée à la haste par le Conte du Doignon, pour luy offrir composition de sa part, laquelle il refusa tousiours avec generosité, mais comme il dessendoit entre les deux ponts, pour mettre le feu à vn baril de poudre, afin d'enleuer l'ennemy qui estoit sur la premiere couverte, il fust porté mort par terre d'un coup de pistolet qu'il receut dans la teste, qui couronna sa vingt-deuxiesme année d'honneur & de gloire. Son frere, aagé seulement de quinze ans, disputant encore sa vie, fit vne composition honorable pour luy & les soldats qui restoient. Quoy que le Conte du Doignon perdist en ce rencontre prez de quatre-vingts hommes des plus braues qu'il eust, il fut si sensiblement touché de la mort de Giraut, qu'il ne peust s'empescher de publier qu'il eust bien désiré luy conseruer la vie, pour acquerir pour luy vn courage si masse.

APRES cette journée, quelques iours se passerent par des legeres attaques, sans effet, & avec grande despence de poudre, jusques au dixiesme de Decembre que le Conte du Doignon s'approchant de Bourdeaux, vint mouïller au deuant de Lormon, qui est presque en veüe de la Ville. Et à mesme il enuoya reconnoistre la maison de la vefue de Raoul, que le Mareschal de Praslin auoit abandonné, laquelle il jugea luy pouoir seruir de retraite, à cause de l'assiette du lieu, qui est sur la croupe d'un rocher, dont les auenuës sont assez fascheuses de toutes parts, & où l'on ne peut aborder que par des defilez. Cette maison, enceinte de vignes presque
de

de tous costez; fort propres à faire des embuscades, estoit fauorable à son dessein. Il y pouvoit faire deux places d'armes; l'une dans le jardin, clos de buissons espais, & l'autre dans la Cour, fermée de muraille & d'offices qui se communiquoient à couvert les vns aux autres. La cour & le jardin aboutissoient à vne allée qui pouvoit seruir de ligne de communication, pour aller à la faueur des vignes qui sont à droit & à gauche sur vne balustrade, qui comme vne plate forme regnoit le long de la cime d'un precipice, au bout de laquelle est vne descente faite en replis avec des petits esperons entaillees dans le rocher par artifice, à six ou sept hommes de front, & laquelle conduit dans vn cellier bien spacieux assis sur vn Quay, reuestu de pierre, dont la riuere baigne le pied. Le rapport luy ayant esté fait des aduantages de ce lieu, il y enuoya quatre cens des meilleurs hommes qu'il eust, & la pluspart Officiers, desquels il en distribua vne partie dans la maison, où il fit le Corps de garde, fortifié des retranchemens qu'il fit faire dans la Cour. Il en aduança vn autre sur le chemin qui venoit de Bourdeaux du costé de la terre, entre vne vigne & vn petit bois qui est sur le penchant du rocher. Il en mit encore vne autre partie dans les retranchemens qu'il auoit fait faire proche des balustres, soutenus d'une barricade, & dressa au bas de la descente du terrain & sur le Quay, vne batterie de quatre pieces de canon, enfermée dans deux barricades & vn retranchement.

ON ne vid presque le iour que par le feu de cette batterie, qui fist sa descharge sur les Vaisseaux de Bourdeaux, qui furent contrains de relascher vn peu vers la

Ville, demeurans neantmoins à port, pour leur faire réponse. Ce tonnerre reciproque fit abandonner aux Bourdelois le soin de leurs affaires particulieres pour courir au salut des publiques, & prendre les armes pour leur deffence contre vn ennemy qu'ils voyoient à leurs portes. Le Marquis de Saulvebeuf, qui dès le soir auparavant, s'estant persuadé que le Conte du Doignon feroit assez hardy pour, à la marée du matin, brauer les murailles de la Ville, auoit disposé les batteries endieurs endroits du Quay, & sur le Bastion du Chasteau, pour le receuoir & luy faire la moitié de la peur, les visitant, pour sçauoir si elles estoient en estat, eust la curiosité d'aller reconnoistre en personne l'armée Nauale de l'ennemy, & cette nouvelle batterie qu'il auoit fait sur le bord de la riuiera, soustenue par vne escadre de Vaisseaux aduâcez, lesquels estoient en fort bon ordre, se resolut de les aller attaquer dâs ce fort, apres s'estre informé de la carte du pays, & des auenuës de ce lieu. Il fit aduâcer à la portê de la Graue deux-cës cinquâte Perigordins du Pareage, trois cens payfans de S. Seurin, Boscât & Caudeyrans, qui s'offrirent à luy de bonne grace, quatre-vingts Caualliers, tant volontaires que soldoyez, commandez par le jeune Marquis de Chambaret, lesquels il fit passer au dela de la riuiera, & sur le bord de la Bastide sur les trois à quatre heures du soir. Il ne se vid iamais vne pareille ardeur à celle des Bourgeois, voyant passer l'eau à leur General. Et quand il voulut regler sa marche, il se trouua en peine de ne donner point de jalousie à des personnes qui le vouloient suivre si passionnément, il fust contraint, feignant de faire

des Corps de reserve, de laisser les paysans sur vne aduenüe, & nombre de Bourgeois sur vne autre, n'ayant choisi que huit cens hommes en tout, composez de Caualliers, Bourgeois & Perigordins, à la teste desquels il se mit, avec les sieurs d'Espagnet & Taranque Conseillers au Parlement, qui voulurent prendre part à l'honneur, lesquels Grand-champ, Mareschal de Bataille, renga sur vne plaine, & le Marquis de Saulvebeuf partagea en deux Corps, dont l'un qui faisoit le tiers, fust enuoyé sous la conduite de Morpain, Major de l'armée Nauale, & Iules Duverger, premier Capitaine du Regiment du Parlement, pour attaquer en bas du costé de la batterie de l'ennemy, au signal qui leur fust marqué.

Le Marquis de Saulvebeuf se mit à la teste d'une Compagnie Bourgeoise, commandée par Guyraut, l'un des Capitaines de la Ville, laquelle soust enoit quelques mousquetaires du Pareage, qui s'estoient aduancez proche d'un cabinet de laurier, où ils furent decouverts par vne sentinelle de l'ennemy, qui tira sur eux, & tout soudain chargez de feu par un Corps de garde, qui estoit là proche, sur lequel les Perigordins & les Bourgeois firent vne si rigoureuse descharge, que l'ennemy pliant fust poursuiuy jusques dans la Cour de la maison, & se renferma dans les barricades, dans lesquelles le Marquis de Saulvebeuf & Guiraut entrerent bien genereusement l'espée à la main, & donnerent avec tât de cœur, que suivis du reste des troupes, ils se meslerent parmy les ennemis, desquels ils tuerent quelques uns dans les Chambres, & en firent quinze ou seize pri-

sonniers, pendant que les autres, ayant eschapé par une porte de derriere dans les vignes, allerent rejoindre leurs camarades qui estoient dans les retranchemens des balustres, où les sieurs d'Espagnet Conseiller, & Grand-champ, Marechal de Bataille, allerent droit à eux avec la Compagnie de Guiraut. Ducornet & Roquette Capitaines des Bourgeois les battoient à droit, & Robert aussi Capitaine de la Ville, escorté d'autres, les fusiloient à gauche. Le Marquis de Saulvebeuf, qui avoit le bas de son haut de chausse percé de deux balles, n'avoit garde de demeurer derriere. Il y alloit teste baissée l'espee à la main, si Canot, Enseigne de Guiraut, tout blessé qu'il estoit ne l'en eust retiré avec grande peine. Si bien qu'ayant fait reflection qu'il estoit dangereux d'aller combattre pendant la nuict vn ennemy retranché sur la pointe d'un precipice, il fit sonner la retraite; à laquelle revindrent le sieur d'Espagnet, apres avoir veu l'un de ses hommes mort à ses pieds, & l'autre blessé à son costé, Grand-champ, percé dans le bras d'une balle ramée, Robert blessé d'un coup qui le fit mourir quelques iours apres, Guiraut, Fourton & Canot, Capitaine, Lieutenant & Enseigne, trois Officiers d'une mesme Compagnie Bourgeoise, qui firent tout ce que l'on devoit attendre des gens de cœur, & qui emporterent avec leurs blessures des marques honorables, & le sieur de Vigier, Capitaine de Cavalerie, qui s'estoit présenté comme volontaire, fit voir que la galanterie n'estoit pas incompatible avec la valeur.

MORPAIN & Duverger, qui avoient prins le che-

min d'en bas, forcerent cependant deux barricades, qui estoient sur vn chemin fort estroit. Et pource que ce n'estoit pas tout faire, & qu'ils auoient ordre de se rendre Maistres de la batterie des ennemis, qui estoit sur le Quay de Raoul, laquelle estoit deffenduë par des retranchemens soustenus de nombre d'Officiers & soldats, ils rassemblèrent leur gros, composé de Bourgeois & quelques Perigordins; & tous ensemble donnant dessus bien vertement, ils entrèrent par trois fois dans ces retranchemens, desquels ils furent repoussez tout autât de fois. Enfin redoublant leur vigueur, ils donnerent pour vne quatriesme avec tant de courage, que leurs ennemis ne pouvant resister à cette chaleur, abandonnerent le poste, & se precipiterent dans des Chaloupes, pour se sauuer dans leurs bords. Le Conte du Doignon perdit en cette attaque presque toutes ses Gardes & leur Capitaine, outre nombre de prisonniers qui furent faits, entre lesquels estoit la Rochette Capitaine dans son Regiment. Morpain se seruit du canon qu'il auoit prins sur eux, & l'ayant fait pointer, il en fit tirer quelques volées sur les Vaisseaux ennemis, qui relascherent, se voyant maltraitez. Cela mesme piqua d'enuie le Conte du Doignon de rauoir son artillerie; & pour cet effet il fit débarquer nombre de soldats tous frais, lesquels voulant mettre pied à terre, furent viuement repoussez par trois fois, avec perte de beaucoup de ceux qui furent tuez & d'autres noyez. Si bien que comme c'estoit vn poste que les Bourdelois ne pouuoient point garder, Morpain fit encloüer les canons, & renuerfer dans l'eau pour les rendre inutiles,

& reprint son chemin pour se rejoindre à son General, qui se retiroit à Bourdeaux en triomphe, ayant neantmoins trouvé dans la reueuë de sa troupe que Duverger & Veniel, Capitaines dans le Regiment du Parlement, & Pierron, Enseigne d'une Compagnie Bourgeoise, auoient esté faits prisonniers, & menez dans le bord de l'Admirail du Conte du Doignon. Dans l'une ou dans l'autre de ces occasions, Viaut, Major du Regiment du Parlement, Fontanieux, Lieutenant d'une Compagnie Bourgeoise, Ducornet, Roquette, Capitaines de la Ville, Labaille dit le Guit, Enseigne de la Compagnie du sieur d'Espagnet, Lassus Sergent de Roquette, Saffore Capitaine de Navire, Taranque fils, suiuant les pistes de son pere, Suaut Greffier de la grand-Chambre, Boulere le jeune, Sage, Vincens le cadet, tous Bourgeois & volontaires, & nombre d'autres, baillerent des marques sensibles de leur generosité. Et ces attaques furent bien si rudes, que le Conte du Doignon relascha le lendemain à sept lieües au dessous de Bourdeaux, pour remplir l'Hospital de Bourg de blesez, & les Cimetieres de Blaye de morts.

CETTE mesme nuit l'armée du Parlement qui reuenoit de S. Macaire, estoit bien proche de Bourdeaux, & on eust souhaité qu'elle y eust encore demeuré, pour ce que l'on apprint qu'à mesme que le Duc d'Espernon auoit sceu le depart de l'armée, il l'estoit allé assieger, à raison dequoy les Marquis de Lusignan & Theobon, qui en auoient receu l'aduis deslors qu'ils furent à Preignac, furent blasmez de n'auoir pas retourné sur leurs pas, pour faire leuer le siege, comme sans doute il eust

esté leué à l'ouye des approches: ce qui estoit d'autant plus croyable, quel'on sçauoit tres-biē que les Habitās de S. Macaire pretendoient se bien deffendre, non seulement par vn esprit de generosité; mais aussi par l'aprehension qu'ils auoient de tomber entre les mains du Duc d'Espéron, en la grace duquel ils n'esperoiēt rien. Et de vray, à mesme que les troupes du Duc aborderent cette Ville, elles reconnurent aux premieres barricades du dehors, qu'elles auoient à faire à des soldats, & à des gens de cœur, car quoy qu'ils ne fissent pas lōgue resistance, ils en firent neantmoins demeurer quelques-vns sur la place. Beaupuy, Marechal de Camp, qui auoit esté laissé dedans par le Marquis de Lusignan, pour commander la Ville en son absence avec le Regiment de Iaure, estoit sollicité tous les iours par les Habitans pour faire des sorties. Mais quoy qu'il n'y voulust pas consentir, quelques-vns se destachoiēt par tēps à la derobée pour escarmoucher l'ennemy, & en tuoiēt assez bon nombre. Le Duc d'Espéron commençant à battre les murailles, Beaupuy enuoya demander du secours à Royere sieur de Masvieux, qui commandoit à Languon, lequel luy enuoya vne partie de sa garnison, composée du Regiment de Saulvebeuf, qui auoit de fort bonnes gens, & qui vouloient bien faire. Mais on a beau prendre de bonnes resolutions si elles ne sont point executées. La breche estant faite, quoy qu'elle ne fust pointraiasonnable, & qu'elle fust tres-perilleuse à monter, à cause qu'elle respondoit au dedans de la Ville à vne caue, aussi profonde presque qu'un precipice, neantmoins Beaupuy commença de trembler, & ayant

tenu Conseil de guerre, sur ce que quelques-vns qui auoient resté dans la Ville partisans du Duc d'Espéronnon, parloient, quoy que plus foibles, de capituler, vne partie de ses Officiers conclurent à la capitulation, les autres à la deffence. Les Bourgeois & les artisans piquez de cette lascheté, demandoient quelque Chef pour faire vne sortie, & leur monstrent que tout le courage n'estoit pas sous l'or & l'escarlate. La voix de la composition l'emporta, pource que ce Commandant, pour lequel jusques alors on auoit eu quelque estime, s'estoit laissé saisir à la peur, & persuader à Rions & Mauleon, tous deux Majors, l'un du Regiment de Laure & l'autre de la Ville mesme, & tous deux intelligés avec le sieur de Marin, qui commandoit les troupes du Duc. Desorte que Rions & Roux, Capitaines du mesme Regiment, furent enuoyez pour traiter, & s'en acquiterent tous si mal, que non seulement ils abandonnerent les Bourgeois à la discretion du Duc d'Espéronnon, mais aussi ils laisserent entrer dans la Ville par la porte de la riuere ses Gardes, conduits par Rions, auant que la capitulation ne fust agréée & signée. Et en effet ils porterent bien la peine de leur mauuaise conduite, car les soldats du Parlement ne furent pas entre les portes, que ceux du Duc d'Espéronnon leur osterent les armes & les habits, contre la foy du traité. Le Marquis de Saulvebeuf outré de cette perfidie, fist arrester prisonnier Beaupuy à mesme qu'il fut de retour à Bourdeaux. Et cet infame eust expié sa faute par vn supplice digne de sa lascheté, si le Marquis de Theobon ne se fust rendu son intercesseur

intercesseur, & n'eust obtenu la grace qu'il demanda pour luy dans le Parlement aux Chambres assemblées.

LES Habitans croyoient estre perdus. Les femmes pleuroient par aduance la mort de leurs Maris, les enfans celle de leurs peres, & les peres celle de leurs enfans. Cette Ville qui ne manque pas de cordes, croyoit ne l'auoir filée que pour ses Habitans. Neantmoins la douceur du sieur de Marin ayant prins peine à calmer l'esprit du Duc d'Espéron, fist que l'apprehension de cette seuerité aboutist au pillage des principales maisōs de la Ville, à la mort d'un Marinier, homme de cœur, qui fust pendu, & à vne taxe de dix mil liures, pour le present du sieur de S, Quentin, premier Escuyer du Duc, dont il le recompensoit. Cette reduction fust un prejugé pour celles de Langon & de Podensac, que Masvieux & le Cheualier Vauzele furent cōtrains de remettre avec des conditions plus honorables, par la foiblesse de leurs garnisons & des manquemens de viures, Bourdeaux ne leur en ayant peu fournir, à cause que les passages estoient bouchez, d'où l'on peut voir comme la Fortune prend plaisir à se railler des desseins des hommes, arrachant d'une main les lauriers qu'elle donne de l'autre : ce qui vient le plus souvent de ce que nous faisons nos forces de la gloire du succez, au lieu de la rapporter toute entiere à Dieu, qui defait & couronne les armées.

CHAPITRE III.



ES reprinſes auoient enflé le cœur du Duc d'Efpernon. Il croyoit mettre Bourdeaux dans vne conſternation, l'ineſtiſſant par trois endroits. Il receuoit tous les iours de nouvelles forces. Les troupes qui ſe retiroient de l'Italie, de la Flandre & de la Catalogne, auoient leur quartier d'huer dans le Bourdelois. On n'oyoit parler que du nombre & de la brauour de ces gens de guerre. Il enuoya la Caualerie dans les Graues, du coſté de Blanquefort & du Taillan, qui eſt à vne lieuë de Bourdeaux, commandée par le Marquis de Nauaille, dit Jambe de bois. L'Infanterie, commandée par le ſieur de Marin, ſe reſpandoit par tout l'entre-deux mers iuſques au Carbon-blanc. Il ne reſtoit que l'armée Nauale, laquelle s'eſtât eſloignée depuis qu'elle auoit eſté maltraitée à Lormon, il falloit faire approcher. Le Conte du Doignon ſe faiſoit tirer l'oreille, ou ſoit qu'il n'y vouluſt plus faire contre des perſonnes qui ſe ſçauoient bien battre, ou ſoit qu'il fuſt meſcontent du Duc d'Efpernon, qui ne luy auoit pas tenu toutes les promeſſes qu'il luy auoit fait. Il faiſoit dire par deſſous main à ceux de Bourdeaux qu'il vouloit bien viure avec eux (& quelques-vns eſtoient aſſez faciles pour le croire) pendant qu'il ſe faiſoit courtiſer par le Duc d'Efpernon, & qu'il ſeſtoient ſur ce point de primeur,

quel d'entr'eux se visiteroit le premier. Le Duc d'Espernon fust à Bourg, croyant inuiter le Conte à le voir par droit de voisinage. Mais il demeuroid dans son bord, dissimulant ne sçauoir pas ce qui se faisoit à terre. Il fallut enfin par le besoin que le Duc d'Espernon en auoit, qu'il s'humiliast, & qu'il rendist la premiere visite au Conte, qui le receut avec grande ciuilité, & le regala splendidement dans son Admirail.

IL est vray que les approches des troupes que le Duc d'Espernon fit faire de tous costez, obligerent le Parlement de sonder pour vne derniere fois la voye de l'accommodement; Et à cet effet ils deputerent à Blaye les sieurs de Pommiers, Doyen de la Cour, Suduiraut, Blanc de Mauvesin, Espagnet & Martin Conseillers, Dufault, Aduocat General. L'Hostel de Ville joignit à eux le sieur de Constant Iurat, & Blanc Procureur Syndic, pour renoüer les conferences avec le Marechal de Praslin. Mais ils trouverent que pour auoir changé de lieu, il n'auoit pas changé la trempe de son esprit; Et tant s'en faut qu'ils y peussent rencontrer quelque adoucissement, qu'aucontraire ils le trouverent plus fier, & leur disoit assez ingenuëment que les affaires n'estoient plus en estat pour tenir les articles qui auoient esté auparauant accordez; Que bien loing de faire esloigner le Duc d'Espernon de son Gouvernement, comme il auoit promis, il pretendoit luy faire maintenir, & le faire reconnoistre, puis qu'il auoit la force en main; Que le Chasteau Trompette qui auoit esté abbattu deuoit estre restably, ou en tout cas déposé sous la garde des Iurats, ou de quarante Bourgeois, qui

en respondroient au Roy. La peur saisist quelques-vns de ces Deputez. Ils vouloient accepter ces conditions, sans en considerer l'infamie & la flestrissure. Mais d'autres qui ne les pouvoient goustier, apres auoir tesmoigné beaucoup de vigueur en tant d'actions, estimant qu'il valoit mieux perir honorablement, que composer si laschement, les refuserent. Et bien leur en print, car presque en mesme temps on sceut par vn bruit sourd, qu'il estoit passé à cachetes vn Courier, qui apres s'estre entretenu avec le Marechal de Praslin, estoit allé trouver le Duc d'Espéron, pour luy dire que les affaires de Bourdeaux auoient esté accommodées en Cour, & qu'il estoit important qu'il fist quelque composition honorable pour luy, auant que l'affaire ne fust esventée.

CETTE nouvelle quoy qu'incertaine, anima le courage des Deputez. Ils voulurent en tirer esclaiçissement du Marechal de Praslin, qui le leur nia tout à bon. Mais ce doute fut bien-tost leué, quand l'Ordinaire arriuant, les sieurs d'Espagnet & Martin furent chez luy ouvrir sa malle; Et ayant trouvé des paquets adressans à des Habitans de Bourdeaux, qui receuoient ordinairement des nouvelles, ils les leurent, & trouverent la confirmation de cet aduis, qui fut encore autorisé par l'arriuée du Secretaire du sieur de Lauie, qui reuenoit de la Cour, lequel s'estoit arresté à trois lieues de Blaye, qui auoit porté des coppies du Traitté, qui furent à mesme temps enuoyées à Bourdeaux, qui les receut avec grand applaudissemēt. Cette joye toutesfois estoit trauersée par les alarmes frequentes que la Caualerie du Duc d'Espéron donnoit du costé de S. Seurin, par les

approches de l'armée Nauale, qui rauageoit tout sur les costes de la riuiera, d'où l'on tiroit vn pronostic, ou que cette paix deuoit estre fardée, ou que le Duc d'Espéron ne l'executeroit iamais. Et de vray il sçauoit bien que s'il pouvoit auoir l'auantage, il feroit changer les articles. Il voulut donc faire vn effort, & se resolut pour cet effet d'attaquer en mesme temps Bourdeaux par trois endroits.

LA Caualerie qui estoit du costé des Graues auoit aduancé vers Bourdeaux. Le Marquis de Saulvebeuf ne la pouvant souffrir si proche, resolut de l'attaquer, & commanda pour cela quelques troupes, tant de Caualerie que d'Infanterie, de se tenir prestes pour le lendemain à midy, & assigna aux Chartreux leur place d'armes. Ce dessein neantmoins fust interrompu par l'attaque que le Duc d'Espéron fit faire dès le matin à la Bastide, où le Marquis de Theobon commandoit. Ce poste estoit assez mal fortifié, car il n'auoit pour toutes deffences que quatre barricades assez foibles, & vn réduit proche du Port. Les Espéronnistes allerent droit à la premiere barricade, laquelle fust abandonnée apres quelque descharge, & poussant à la deuxiesme, ils firent defiler des troupes à droit & à gauche à la faueur des vignes, qui prenant en flanc cette barricade, la saisisrent, & prindrent deux pieces de fer qui y estoient, lesquelles ne furent deffenduës que par Morpain & le canonier, qui firent fort vaillamment, mais qui enfin, estans obligez de ceder au nombre, furent faits prisonniers. Les autres deux barricades furent plus genereusement soutenues par quelques soldats des Regimens du Parle-

ment, Theobon & la Roche-Duval, qui pourtant furent obligez de se retirer dans le reduit, se voyant inuestis à la faueur des marais & d'un broüillard espais, par les Regimens de Guyenne, la Marine, Picardie, Piedmont, la Meillèraye, Vxel & Lamothe Hodancour, dont la seule reputation estoit capable de faire trembler des Prouinces entieres. Ce ne fust pas pourtant qu'il ne fust fait vn tres-beau feu par les Parlementaires, & que par leurs descharges ils n'en fissent bien demeurer sur la place, estans animez au combat par le Marquis de Theobon, qui payoit de sa personne autant qu'on pouvoit souhaiter du plus genereux soldat, courant de barricade en barricade, pour donner par son exemple de la fermeté à ceux qu'il reconnoissoit lascher du pied.

CE Marquis ne s'estoit iamais trouvé dans vn tel embarras, & croyoit-on que ses gens l'eussent abandonné, sans que se voyans acculez jusques au bord de l'eau, ils virent leur perte inefuitable dans la fuite. Il fit promptement passer vn bateau pour demãder secours à Bourdeaux. A mesme on sonna le tochain en la Parroisse de S. Michel, celuy-la esueilla les autres & celuy de l'Hostel de Ville, au bruit duquel tous les Bourgeois furent soudain aux places d'armes. Le Marquis de Saulvebeuf, qui montoit à Cheual pour aller combattre les Allemans & la Cavalerie qui estoit dans les Graues, changea de dessein pour aller sur les Chartreux, faire embarquer promptement quelques troupes soldoyées qui l'attendoient, pource qu'il leur auoit donné le rendez-vous, lesquelles il donna à la conduite du Marquis de Lusignan, & visitant par apres les places d'armes de la Vil-

le, il destacha des Compagnies pour la Bastide; & les autres pour renforcer les postes de S. Seurin & Bacalan, de crainte qu'on attaquast par les trois endroits. Ce fut avec tres-grande diligence & tres-à propos que ces nouvelles forces arriuerent au Marquis de Theobon; & la chaleur qui emportoit les Bourgeois à cette deffence, ne surprint pas moins l'ennemy, qu'elle satisfit le Marquis de Theobon, qui à vray dire estoit desia hors d'haleine.

La presence du Marquis de Lusignan, du jeune Marquis son fils, du Marquis de Chambaret, qui ne cedé point à la valeur de son pere, & beaucoup d'autre Noblesse volontaire, qui courroit en foule à l'occasion, escortée par vn tres-grand nombre de Bourgeois, qui couvroit presque la riuere par le nombre des batteaux qui les portoit, anima ce Heros d'une nouvelle ardeur, qui voyant entrer le Regiment de Picardie dans le réduit, alla droit à luy l'espée à la main, & secondé par le jeune Marquis de Lusignan, la Vinaterie, Lassaigne, Costis & quelques autres Officiers & soldats, le pressa si fort qu'il l'obligea de l'abandonner avec autant de honte comme il se proposoit de gloire à le gagner. Le Duc d'Espernon qui estoit à cheual sur vne eminence proche d'une forest de cyprez, appelée le cypressa, creut ses aduantages perdus à voir vn si grand & si prompt secours. Il depescha vn Courrier au Comte du Doignon, qui n'estoit pas beaucoup esloigné de là, pour l'obliger non seulement à l'attaque du poste de Bacalan, à la faueur duquel il pouoit aller faire du desordre dans le Faux-bourg des Chartreux, mais aussi pour faire porter

avec ses barreaux des gens à la Bastide du costé de l'eau, & enfermer les Bourdelois dans le reduit & entre ces deux armées. Ce dessein fust reconnu soudain que l'on vid le grand Iules appareiller ses voiles, & approcher quelques Galeres & Trauersiers du Conte du Doignon chargez d'Infanterie, qui radoient le long de la coste de Queyries, pour aller prendre terre à la Bastide. Mais quoy que cela fust bien pensé, il ne fust point executé, pource que quelques Galeres & Galiottes Bourdeloises allerent au deuant en despit du vent & de la marée, & les amusant par vn combat de quatre à cinq heures, les empescherent de donner le secours que le Duc d'Espernon attendoit avec inquietude.

CETTE opiniastrété fit changer de resolution au Côte du Doignon, qui ne pouvant secourir la Bastide, tourna ses forces sur le poste de Bacalan, lequel il pretendoit enleuer d'abord; neantmoins il luy cousta bien cher, car ayant fait auancer à la faueur de la marée le grand Iules, commandé par le Cheualier de la Lande, il mouilla au deuant de ce lieu, & fit faire descharge tout à mesmetemps de toute la bordée de canons qu'il auoit de ce costé, qui ne portoient pas moins de trente à quarante de balle. Il croyoit effrayer les Parlementaires au bruit de ce tonnerre, & faire couler à terre ses Galeres & ses Trauersiers dans la nuit de cette fumée. Cela ne luy reussist point, pource que les Galiottes Bourdeloises, qui à la veüe du grand Iules auoient gagné le bord du costé de Bacalan, firent leurs decharges sur les Galeres ennemies, à mesmes qu'elles approchoient; mais nonobstant elles firent effort de prendre

dre terre , d'où elles furent repoussées bien vivement par vne furieuse descharge , qui fust faite sur elles par deux cens cinquante mousquetaires du Regiment de Lusignan qui gardoient ce poste , commandez par Grand-champ, Marechal de bataille , & nombre de Bourgeois qui auoient accouru à sa conseruation. Cette descharge fust si chaude que les ennemis reculerent , & allerent se disposer plus loing à vne seconde attaque , pendant que le grand Iules vomissoit feu & fer sur le bord , pour escarter les Parlementaires , qui attendoient pied ferme & avec gayeté leur ennemy. Ils ne firent pas plus heureux succez dans le second combat , & le succez du troisieme ne fut pas moins honteux que celuy des precedens , quand apres trois tétatiues ceux du Conte du Doignon se retirerent chargez de morts & de blesez , dont le nombre faisoit bien prez de quatre cens , sans que de la part des Bourdelois il y en eust pas vn de tué , & fort peu de blesez. Le Marquis de Saulvebeuf ne s'estoit point mesconté dans le choix qu'il auoit fait du sieur de Grand-champ pour la deffence de ce poste. Il s'en acquitta tres-dignement. Le Baron de Moucaut, le Cheualier Vauzele Capitaine dans vne Galere, la Plane, Galibert, Richon & beaucoup d'autres Officiers , donnerent des marques bien sensibles de leur generosité.

RETOVRNONS à ces braues , qui pendant toutes ces escarmouches qui se faisoient sur l'eau , contestoient bien asprement le terrain de la Bastide. Les troupes Espernonistes vouloient tout gagner ; les Bourdeloises vouloient tout recouurer. Chascun agissoit de son costé avec vigueur. Les Regimens de Guyenne & de la Meil-

leraye donnoient d'un costé, ceux de Picardie & de la Marine d'un autre, commandez par le Gouverneur de Cardonne nommé Exorman. Des Corps destachez des vns & des autres, conduits par le Cheualier de Monvieil, deuoient attaquer de front. Les Regimens de Lamote Hodancour, Piedmont & Vxel les soustenoient à tous. La reputation de ces vieilles troupes deuoit tout effrayer & tout vaincre. Ils trouverent neantmoins à qui parler. Les Compagnies Bourdeloises ne voulurét pas attendre qu'on les vint forcer dans leurs retranchemens. Le Marquis de Lusignan disposa les attaques. Le Marquis de Theobon alla d'un costé à la teste des siens, & apres vne descharge, mettant la main à l'espée poussa l'ennemy à trauers les vignes, & le mit en fuite. Ce Gouverneur de Cardonne y laissa la vie, tué d'un coup de pistolet par le sieur Pradau, Cornette de la Mestre de Camp du Regiment de Theobon. Le Marquis de Chambaret courant d'un autre costé les bras retroussez & l'espée en main, suiui de plusieurs Officiers volontaires, & quelque jeunesse de Bourdeaux, les chassa bien vigoureusement. En sorte que se voyans repoussez avec vn courage si aspre, & qu'ils ne pouvoient plus soustenir les retranchemens qu'ils auoient gagné, ils se jetterent dans quelques maisons qui estoient à droit & à gauche, où ils se rallierent, & firent vn grad feu, qui incommodoit bien fort les Bourdelois. Le sieur Archinac, Capitaine de Caualerie, apperceut le Regiment de Guyenne qui couroit à la faueur des vignes, pour gagner la droite du retranchement, il se mit à la teste de quelques Bourgeois, avec lesquels il s'opposa bien ge-

nerieusement à leur dessein. Il eust esté possible forcé, à cause que ce Regiment estoit soustenu d'autres, sans que la Clotte, Ayde de Camp, accourut au bruit avec d'autres Bourgeois; & s'estans ralliez ensemble, allerent l'espée à la main sur leurs ennemis, & leur firent quitter la place, avec perte de cinquante des plus braues qu'ils eussent. Les autres Compagnies qui soustenoient le Regiment de Guyenne furent contraintes d'en faire autant, pource que defilant par vne route entre les vignes & le bord de l'eau, elles estoient à descouvert d'une Fluste Holandoise, qui auoit mouillé proche du bord du costé de Traigey laquelle ne tiroit pas vne volée de ses pieces de fer, chargées de balles de mousquet, qu'elle n'esclaircist bien les rangs.

PENDANT ce grand feu & ces rudes escarmouches, le Duc d'Espernon qui regardoit du haut d'une eminence approcher sa confusion, ayant prins garde que le sieur de Marin, l'un des Mareschaux de Camp, se retiroit du combat, luy demanda, *Où est l'honneur?* pour blasmer sa retraite; mais il fust payé d'une repartie qui valoit bié la demande, quand il luy dit, *Monsieur, l'honneur est là bas, où les Generaux de Bourdeaux combattent en personne.* Cela estoit dit avec esprit, pour luy faire entendre combien l'exemple d'un General meslé dans le peril anime les soldats, & combien il luy estoit honteux de considerer en repos & sans esmotion, la deroute des meilleures troupes de France. Le Marquis de Chambaret ne perdoit point temps. Il ne pouoit souffrir que les ennemis fissent vn si grand feu du costé des maisons dans lesquelles ils s'estoient saüvez. Il sortit hors du retranchement,

accompagné du sieur de Taranque Conseiller, & de quelques Bourgeois, auxquels il fit border vne haye, & tirer incessamment pendant quatre heures, & jusques à ce que la nuit fermant le iour ferma les portes du combat. Le Marquis de Saulvebeuf estoit cependant occupé à visiter tous les postes qu'on croioit les plus aduantageux, & deuoir estre attaquez en mesme temps. Il auoit pourueu à celuy de Bacalan & des Chartreux, l'ayât laissé sous la conduite du sieur Grand-champ Marechal de bataille, qui le conserua tres-bien, comme vous auez veu. Celuy de S. Seurin, commandé par le Marquis d'Aubeterre, qui quelque temps auparauant auoit fait le serment de Lieutenant General, estoit fortifié de Caualerie & d'Infanterie. On craignoit le dedans de la Ville, par le nombre des partisans que le Duc d'Espernon y auoit encore, qui se preualans de la distribution des forces dans les postes du dehors, & le secours de la Bastide, pouvoient se cantonner, & arracher les couronnes de gloire de la main des vainqueurs. Si bien qu'il fust prié par les habitans de demeurer au dedans, pour arrester cette crainte, par la terreur que sa presence donnoit aux ennemis, & le cœur qu'elle inspiroit à ceux qui le voyoient prez d'eux.

ON assembla le soir bien tard le Conseil de Guerre dans la Ville. On craignoit pour le lendemain vne tres-rude attaque. On apprehendoit ne pouuoir soustenir vn reduit & des retranchemens ouverts de toutes parts. On auoit remarqué que la plus-part des soldoyez se battoient mollement. On ne vouloit pas exposer si souvent le Bourgeois au peril, à qui estoit deüe la plus grande

gloire d'avoir gagné ce qu'on avoit perdu. On soupçonnoit qu'il ne fust rebuté, pource que la plus-part d'entr'eux s'estoient retirez pour se delasser dans leur liét. Enfin on delibera de rappeler toutes les troupes de la Bastide, & abandonner ce poste, dont la conquête ne bailloit pas à l'ennemy de fort grands aduantages contre Bourdeaux, puis qu'il avoit à traverfer vne grande ruiere en veü de la Ville. Mais comme Dieu se moque du jugement des hommes, & qu'il prend plaisir de tirer la victoire du sein du desespoir, sur le point qu'on avoit resolu cet abandonnement, on rapporta au Conseil de Guerre, qu'on remarquoit au travers de quelques feux allumez sur des eminences, que l'ennemy defiloit & faisoit retraite. Ces braues troupes, capables de conquerir des Royaumes, eschoüerent au pied d'une motte de terre; & apres avoir conquis tant de lauriers dans les Nations estrangeres, virent mourir leur gloire au pied d'une montagne de cyprez, dans le vallon de laquelle ils laisserent sept à huit cens hommes morts, entre lesquels estoient quatre-vingts Officiers, sans cõprendre vn grand nombre de blesez, qui furent portez sur des charettes à Creon, où ils firent leur cimetiere; & de la part des Parlementaires trente à quarante furent blesez, & sept à huit tuez, entre lesquels Philippon le jeune Apoticaire, mourut aussi glorieusement comme il avoit soustenu avec courage l'hõneur de son pays. Il seroit mal aisé de remarquer tous ceux qui se signalerent dans cette occasion; mais il est vray de dire qu'il y en eust fort peu de ceux qui s'y trouverent, qui n'eussët bonne part à la gloire, de laquelle les Bourgeois auoiët

456 DES MOUVEMENTS,
la plus grande partie, entre lesquels la Crompe le jeune merite vn eloge particulier, qui fut assez hardy pour dans l'ardeur du choc trauerfer les rangs, & prendre au collet vn Lieutenant de la Meilleraye qu'il mena prisonnier. Il ne se vid iamais vn combat plus oppiniastré. On n'eust sceu remarquer depuis le matin iusques au soir vne partie du iour sans feu & sans attaque. On ne vid iamais rien de si agreable. On eust prins ces escarmouches qui se faisoient & sur terre & sur l'eau, pour des veritables carrossels. Les femmes, les vieillards, les enfans voyoient des remparts & des fenestres qui regardent sur l'eau, tous les combats en assurance. Et le Soleil ne parust jamais avec tant d'esclat qu'à ce iour, pour juger avec moins d'empeschement quel party il deuoit couronner.

C H A P I T R E V.



ETTE victoire fust vn coup de la vengeance du Ciel, qui voulut chastier visiblement la fierté du Duc d'Espéron, & l'infidelité de sa parole. Les Bourdelois auoient esté humiliez par la deroute de Libourne. Si le Duc d'Espéron se fust serui de l'occasion que Dieu luy offroit pour se remettre; & qu'abatant son humeur, relaschant de ses aduantages il les eust traittez en pere; si dés l'heure que par vn exprez il fust aduertí de la paix, il eust arresté ses actes d'hostilité, &

rendant obeyſſance à la volonté du Roy, il euſt taſché de vaincre la paſſion qu'il auoit à leur faire du mal, tout euſt eſté dans le calme. Les Bourdelois n'euffent point eſté portez dans le deſeſpoir ; tant d'ames guerrieres euſſent conſerué leur vie & leur ſang pour le ſeruice de l'Eſtat. Il n'eufſt pas attiré ſur luy le degouſt des ſiens, la haine des autres, & l'indignation de la juſtice de Dieu. Ce fut vne choſe bien honteuſe pour luy de voir que preſque ſur le temps qu'il depeſcha vn Courier au Mareſchal de Praslin, pour l'aſſeurer qu'il eſtoit maître de la Baſtide, & qu'il eſtoit aux portes de Bourdeaux, il ſe vid obligé de faire retraitte à la faueur de la nuit, qui couvroit vne partie de ſa honte, congédier ſes troupes qui le maudiſſoient, & chercher ſa conſolation dans les embrasſemens d'une amitié criminele.

IL ne ſe vid rien de plus abbatu que les Commiſſaires du Parlement, qui eſtoient à Blaye pour traiter la paix, rien de plus roide que le Mareſchal de Praslin ſur cette fauce nouvelle de la perte de la Baſtide. Ce fut pour lors qu'il dit bien hautement qu'il falloit recevoir le Duc d'Efpernon avec ſoumiſſion ; Et que tous les Corps ſe deuoient diſpoſer à luy faire réparation d'honneur & demander ſa grace, tant il eſt vray que ces gens de Cour ſont adoreurs de la fortune, & qu'ils ajuſtēt leurs negociations au ſuccez, non pas à la juſtice des cauſes. Cette conſternation ne dura pas long temps. On vid arriuer à Blaye nombre de morts & de bleſſez du Conte du Doignon & du Duc d'Efpernon, qui portoient avec eux les veritables marques de leur deſaite. ce qui abbatit le caquet à pluſieurs qui l'eſleuoient de-

tia bien haut. On apprint aussi presque en mesme temps
 que Monsieur le Prince de Condé, touché de compas-
 sion pour Bourdeaux, auoit obtenu par la presse de ses
 sollicitations de la bonté du Roy, la grace que tout le
 Ministère refusoit. Cette nouvelle fust receuë avec vn
 tres-grand applaudissement. Il est vray que les mieux
 sensez, qui portoient leur veuë au delà des choses pre-
 sentes, se deffioient bien fort de la seureté de cette paix,
 & jugeoient qu'elle ne pouvoit pas estre de durée,
 puis que le Duc d'Espéron n'y trouvoit pas sa satisfac-
 tion. Pensant donner par auance vne plus grande fer-
 meté à ce traitté de paix, on resolut de continuer la de-
 molition du Chasteau Trompette, qui estoit desia fort
 auancée, à laquelle le sieur de Massiot Conseiller, &
 Dufault Aduocat General, tousiours infatigable dans
 les actions de cœur, trauailloient incessamment par
 l'ordre du Parlement. On s'imaginoit que ce Chasteau
 ruyné, Puypaulin desmoli, comme il estoit dès le mois
 de Nouembre passé, les meubles de l'vne & de l'autre
 maison vendus publiquement, il n'auroit plus de pen-
 sée pour le retour de Bourdeaux, puis qu'il n'y deuoit
 auoir plus d'attache, n'ayant plus de couvert. Mais ce
 fut cela mesme qui le fit plus fortement opiniastrer à se
 maintenir dans le Gouvernement, pour auoir plus de
 moyen de se venger vn iour de ces outrages, ne consi-
 derant que ceux qu'il receuoit, non pas ceux qu'il auoit
 fait souffrir.

ENFIN cette paix tant attenduë fust portée à Bour-
 deaux par le sieur d'Aluimal, Mareschal de bataille des
 armées du Roy. Les Commissaires reuindrent de Blaye

avec

avec elle. Le Mareſchal de Praſlin y demeura avec confuſion, de voir qu'on auoit acheué ſans luy vne paix que ſa mauuiſe conduite n'auoit ſceu preſque commencer. Le Parlement ſ'afſembla pour receuoir les ordres du Roy, & cette fille du Ciel, dont le ſieur d'Aluimal auoit eſté fait le deſpositaire, en laquelle aſſemblée les Marquis de Saulvebeuf, General, Luſignan, Theobon & d'Aubeterre, Lieutenans Generaux, furent appelez, eſtant bien juſte qu'ils euſſent leur part de cette moiſſon, puis qu'ils y auoient ſi glorieuſement trauaillé. On y leut publiquement la Lettre du Roy, ſa Declaration & les articles accordez. On dreſſa les Arreſts d'en-regiſtrement. En voicy la teneur.

DE PAR LE ROY.

NOUS Amez & Feaux, deſirant faire ceſſer les preſens mouvemens, qui ſont en noſtre ville de Bourdeaux & aux enuirs, & reſtabliſſer le repos & la tranquillité en ces quartiers, pour nous donner d'autant plus moyen de paruenir à la paix g  n  rale que nous voul  s procurer    tout noſtre Royaume, Nous auons fait expedier la Declaration d'Amniſtie de toutes les choſes qui ſe ſont paſſ  es    l'occafion deſdits mouvemens, & arreſt  

les articles que nous auõs estimé à propos pour l'accommodement entier des affaires. Et enuoyant lesdites expéditions à nostre Cousin le Mareschal du Plessis Praslin, Gouverneur de nostre tres-cher & tres-ami frere unique le Duc d'Anjou, pour les faire ponctuellement executer, Nous vous faisons cette Lettre de l'aduis de la Reyne Regente, nostre tres-honorée Dame & Mere, pour vous mander & ordonner d'adjoûter creance à ce que nostredit Cousin vous fera entendre, & vous exhorter de contribuer tout ce qui dependra de vous pour l'execution de ce qui est porté par nostredite Declaration & articles, vous confirmant de plus les asseurances que nostre Oncle le Duc d'Orleans a données de nostre part à vos Deputez, & nos bonnes & sinceres intentions en vostre endroit. Donnée à Paris le 26. Decembre 1649.

Signé, LOUIS.

Et plus bas, Par le Roy, la Reyne Regente
la Mere presente,

PHELIPEAUX.

Et au dessus de ladite Lettre est escrit,

A nos amez & Feaux les Gens tenans la
Cour de Parlement de Bourdeaux.

DECLARATION DV ROY.

L OVIS parla la grace de Dieu Roy de France & de Navare, A tous ceux qui ces presentes Lettres verront, Salut. Apres avoir donné la paix & repos à nos Officiers & Sujets, parla Declaration du Mars de l'année presente, verifiée en nostre Cour de Parlement de Paris, Nous auions grande raison d'esperer que les mouvemens qui paroissent dans quelques Prouinces de nôtre Royaume, seroient terminez, & que nos Sujets, apres tant de bons traitemens que nous leur auons faits, rechercheroient tous les moyens de se remettre en nostre obeyssance, pour en executant nos volontez, si aduantageuses pour eux, jouyr du repos & de la tranquillité qui leur doit estre si precieuse. Mais au contraire nous auons veu avec un sensible desplaisir nos Sujets continuer de s'armer en nostre Prouince de Guyenne; Et par quelque malheur secret, dont nous ne connoissons pas entierement la cause, les diuisions se sont fortifiées, en sorte que nostre bonté & nostre authorité n'ont pas produit iusques icy les effets que nous nous en

pouvions promettre. Neantmoins comme l'amour que nous avons pour le bien de nos sujets, ne se lasse iamais de travailler pour les rendre heureux, Nous avons iugé à propos de tenter encore une fois les voyes de la douceur, pour leur donner la paix, en leur faisant connoistre que nous sommes prests de les recevoir en nostre grace, & d'oublier tout ce qui s'est passé iusques icy, pourveu qu'ils obeyssent à nos volontez si iustes, qu'ils posent les armes, & qu'ils cessent de continuer leurs divisions & partialitez, qui ne peuvent enfin produire que leur ruine, estant vray que tous les aduantages qu'ils se proposent de remporter par leurs armes, se termineront enfin à leur perte & à leur destruction, qu'ils reseruent leurs forces pour combattre nos ennemis, qui ne se porteront iamais à recevoir la paix que nous leur presentons, que lors qu'ils verront toutes nos Provinces calmes conspirer toutes ensemble avec un esprit vrayement François, à s'opposer à leurs injustes desseins. Alors nous sommes assurez que Dieu, benissant nos intentions si iustes, nous les obligerons à consentir à la paix, ou bien nous continuerons de remporter les victoires sur eux, que merite la iustice de nos armes. A CES CAV-

SES, de l'aduis de la Reyne Regente nostre tres-honorée Dame & Mere, de nostre tres-cher & tres-amé Oncle le Duc d'Orleans, de nostre tres-cher & tres amé Cousin le Prince de Condé, & de nostre certaine science, plaine puissance & authorité Royale, *NOUS* auons par ces presentes, signées de nostre main, dit & declaré, disons & declaron, voulons & nous plaist,

I

Que les habitans de nostre ville de Bourdeaux & autres Sujets, qui ont prins part dans les mouuemens presens, ayent à poser les armes; & ce faisant que la memoire de toutes les actions publiques ou particulieres, qui se sont passées à l'occasion des mouuemens suruenus en nostre Prouince de Guyenne, & ressort de nostre Cour de Parlement de Bourdeaux, depuis le mois de Mars dernier iusques au iour de la publication des presentes, demeurera entierement esteinte & assoupie, sans qu'aucuns de quelle qualité & condition qu'ils soient; nommément les sieurs de Saulvebeuf, Lusignan, Theobon, Aubeterre, Lamote Dautefort & autres leurs veufes & heritiers, puissent estre recherchez ny inquietez en leurs personnes, ou troublez en leurs biens, dignitez, fonctions, charges, offices & priuileges, sous pretexte de ligue, associations, leues de trouppes

ou de deniers, desordres de guerre & crimes commis à l'occasion desdits troubles, mesmes pour raison des attaques de nos Villes, places & Chasteaux, & demolition des maisons particulieres, en quelque façon & maniere qu'elles auroient esté entreprises, sans que ores n'y à l'aduenir les Jurats & habitans de nostredite ville de Bourdeaux & autres, puissent estre recherchez ciuilement ny criminelement à cause desdits troubles, ny mesmes obligez de reparer les ruynes, demolitions, pertes & dommages qui pourroient estre arriuez en nosdites Villes, places, Chasteaux & maisons particulieres, par le moyen desdites attaques, ou autres choses generalement quelconques concernant lesdits troubles; & ce non-obstant toutes Tettres de cachet, Commissions, Arrests & Lettres patentes, qui pourroient auoir esté sur ce expediees, qui demeureront comme non aduenues, exceptant du present article ceux qui pourroient estre partis de Paris depuis le vnziesme de ce mois, & qui se trouveront chargez d'auoir eu part en personne de cette Ville à la derniere conspiration.

2

Ordonnons que tous les prisonniers de guerre & autres, qui ont esté arrestez & emprisonnez depuis le commencement dudit mois de Mars dernier, à l'occasion desdits troubles & mouvemens, en quelque prison qu'ils puissent estre, seront mis en liberté

au iour de la publication desdites presentes.

3

Seront les Chasteaux & maisons , prinſes pendant leſdits mouvemens , rendus & reſtituez avec les meubles , & choſes qui ſe trouveront ennature , non vendus ou alienez , & remis de bonne foy en la poſſeſſion des proprietaires.

4.

Et conſiderant les foules & charges que nos Sujets du pays de Bourdelois & Bazadois ont ſouffertes , par le logement des troupes qui y ont eſté , nous pouruoirons au ſoulagement des contribuables aux Tailles deſdits pays , ſelon l'eſtat auquel ils ſe trouveront apres que les troupes en ſeront retirées , & ſe ſur les informatiōs qui en ſerōt faites pour cette fin ſans reietter le ſoulagement qu'on donnera ſur les autres lieux de la Generalité de Bourdeaux.

5

Ne ſeront logez aucuns gens de guerre dans les maiſons des Officiers de noſtre dite Cour de Parlement de Bourdeaux , ſoit dans les Villes ou à la Campagne , ſuiuant les priuileges qui leur ſont accordez par nos Ordonnances.

6

Ne ſera accordé aucune eſuoquation fondée ſur

415 D E S M O U V E M E N S ,
les mouvemens & troubles passez, depuis ledit mois
de Mars dernier.

7

Voulons aussi que les charges qui estoient sur le
Conuoy de Bourdeaux , pour l'entretienement des
murs de la Ville , gages des Regens du College de
Guyenne & Archers du Guet , soient establis au
mesme estat qu'elles estoient auparavant les retran-
chemens qui en ont esté faits.

8

Ne pourront les Jurats de nostredite Ville de
Bourdeaux , estre troublez en la jouyssance des cho-
pes qui sont contre les murs de la Ville au dehors, non-
obstant toutes Letres de don, qui pourroïent auoir esté
expediées , & Arrests sur ce interuenus. Et à cet ef-
fet nous faisons expedier toutes Lettres & Arrests
necessaires pour la reuocation desdits dons.

9

Et ayant esgard aux instances & supplications
qui nous ont esté faites pour l'extinction des deux es-
cus pour tonneau de vin qui se leuoit cy-deuant, nous
en auons deschargé & deschargeons l'estendue de
nostre pays Bourdelois seulement , & ordonnons que
le Bureau transferé à Blaye , sera restably en no-
stredite ville de Bourdeaux , ainsi qu'il estoit au-
parauant.

Voulons

Voulons pareillement que tous les Arrests qui ont esté donnez en nostre Cour de Parlement de Bourdeaux, ensemble toutes les procedures & executions faites en consequence, à l'occasion des mouvemens derniers, & toutes Ordonnances, demeurent renou- quées, comme nuls & de nul effet, & nommément les Arrests rendus contre la personne de nostre tres- cher & tres-amé Oncle le Duc d'Espéron & ses domestiques, & les Ordonnances par luy rendues contre nostredit Parlement, que nous ne voulons auoir aucun lieu. Si donnons en mandement à nos amez & feaux Conseillers, les Gens tenans nostre Cour de Parlement de Bourdeaux, que ces presen- tes ils ayent à faire lire, publier & enregistrer, & le contenu en icelles garder & observer sans y contre- venir: Car tel est nostre plaisir, en tesmoin de quoy nous auons fait mettre nostre seel à cesdites presen- tes. Donné à Paris le vingt-troisième iour de De- cembre, l'an de grace mil six cens quarante-neuf. Et de nostre regne, le septiesme.

Signé, LOVIS.

Et plus bas,

*Par le Roy, la Reine Regente
sa Mere presente,*

PHELIPEAUX.

ARTICLES ACCORDEZ PAR LE
Roy & la Reyne Regente sa Mere, sur les
presens mouvemens de la Ville de
Bordeaux.

I

LES fortifications faites en la Ville de Libourne, Villes, Chasteaux & autres lieux de la Prouince de Guyenne; depuis les mouvemens du mois de Mars dernier, seront desmolies.

2

La Jurisdiction contentieuse, mesmes à ce qui concerne la Police des Villes de ladite Prouince, demeurera aux Juges ordinaires, Baillifs, Senéchaux, Maires, Jurats & Consuls en premiere instance, & par appel à la Cour de Parlement de Bordeaux, sans que les Gouverneur & Lieutenans Generaux en ladite Prouince en puissent prendre connoissance, conformément aux Declarations & Ordonnances de ce Royaume.

3

L'eslection des Maire, Jurats & Consuls de ladite Prouince de Guyenne, se fera en toute liberté, conformément aux Statuts & Privileges des Villes,

avec deffences à toutes personnes de quelle qualité & condition qu'elles soient, d'empescher directement ou indirectement la liberté des suffrages, suivant les Declarations, Arrests & Reglemens du Conseil. Et si il interuient des appellations au fait desdites eslection, elles seront iugées par ladite Cour, suivant les Ordonnances & formes ordinaires.

4

Les gardes qui seruent preZ la personne du Gouverneur, & Lieutenant General en ladite Prouince de Guyenne, seront tenus de payer la despence qu'ils feront aux lieux où ils seront logez, à quoy faire, lesdits Gouverneur & Lieutenans Generaux tiendront la main, & pouruoiront à ce que pour le soulagement des Sujets de Sa Majesté, ils ne sejourneront long-temps en mesme lieu. Et pour cet effet seront expediez les ordres & depesches necessaires.

5

Les Iurats & habitans de la Ville de Bourdeaux représenteront les tiltres & priuileges qu'ils pretendent auoir pour l'exemption du logement des gens de guerre à dix lieües de la Ville, pour iceux veus, estre ordonné par Sa dite Maïesté que de raison.

6

Les Habitans des pays Bourdelois & Bazadois demeureront exemps & deschargez du logement des

420 DES MOUVEMENTS,
gens de guerre, & ne seront prins pour aydes de ceux
qui en seront chargez pendant un an.

7

La Maïesté trouve bon que sadite Cour de Parlement de Bourdeaux, & autres Corps d'Officiers estans en ladite Ville, ensemble les Jurats d'icelle, luy fassent telles remonstrances qu'ils aduïseront bon estre dans six sepmaines. Et pendant ledit temps, les Officiers de la Cour des Aydes de Guyenne, continueront la fonction de leurs Charges en la ville d'Agen, & pour cet effet toutes Lettres de translation seront expedïées.

8

Ladite Cour de Parlement pourra faire ses remonstrances à Sadite Maïesté, sur la diminution de l'évaluation de leurs Offices & droict annuel; Et cependant les Officiers d'icelle seront receus audit droict annuel, en payant le courant pour l'année 1650. & à cette fin toutes expéditions leur seront données.

9

Les milices qui se trouveront dans l'armée de Guyenne, commandées par M. d'Espèrnon seront licenciées, & pour les autres troupes, elles marcheront incessamment dans les lieux qui leur seront assignez pour garnison pendant l'hyuer par les ordres de Sadi-

te Maïesté, en sorte que celles qui ont seruy pendant cet Esté en lad. Prouince, fairõt leur quartier d'hyuer hors le ressort du Parlement de Bourdeaux; Et ce fait, les troupes leuées par ledit Parlement & la ville de Bourdeaux, seront licenciées; Et pour l'assurance dudit licenciement, sera donné des ostages de la part dudit Parlement & de ladite Ville à Mr. le Mareschal du Plessis Praslin à Blaye auant toutes choses.

IO

Sadite Maïesté accorde la descharge de l'imposition particuliere qui se faisoit sur ladite Prouince, pour la garnison du Chasteau Trompette, & ne sera ladite imposition comprinse dans les Commissions qui seront enuoyées pour la Taille.

II

Le Chasteau Trompette sera remis entre les mains de Sadite Maïesté en l'estat qu'il est à present, pour estre cy-apres gardé par un Exempt de ses gardes du Corps, sans aucuns soldats ny garnison.

12

Les canons qui estoient dans les Chasteaux Trompette & du Ha, seront remis ausdits Chasteaux, Et à l'égard de ceux qui appartiennent à la ville de Bourdeaux, l'intention de Sa Maïesté est qu'ils y

422 DES MOUVEMENS;
*soient laissez, & que les deux canons qui ont esté
pris à Libourne soient aussi rendus à ladite Ville.
Fait à Paris, le 26. iour de Decembre 1649.*

Signé, LOVIS.

Et plus bas,

*Par le Roy, la Reyne Regente
sa Mere presente,*

PHELIPEAUX.

Extraict des Registres de Parlement.

*SUR la lecture des Lettres patentes & articles
enuoyez par le Roy, pour la pacification des
presens mouvemens, en datte du vingt-troisies-
me Decembre dernier, a esté arresté qu'il sera te-
nu Vendredy prochain une audience extraordinai-
re pour la publication de la paix, & que la Cour
ira en robes rouges au TE DEUM qui sera
chanté en action de graces, auquel assisteront tous
les autres Corps de la Ville. Et que le Roy & la*

Reyne Regente sa Mere , seront tres-humblement
 remerciez de la paix qu'il leur a pleu donner à cet-
 te Prouince. Et à ces fins sera enuoyé ordre aux
 Deputez de la Cour , qui sont prez de leurs Ma-
 jestez , lesquels fairont aussi les tres-humbles re-
 monstrances portees par lesdites Lettres & articles,
 & instance particuliere pour les interests des Gene-
 raux. Et seront les Iurats & Corps de Ville ad-
 uertis de deputer de leur part vers leurs Maiestez,
 pour tesmoigner leurs respects & obeysances , &
 les remercier aussi tres-humblement des graces
 qu'il leur a pleu leur accorder.

Signé, DE PONTAC.

Extraict des Registres de Parlement.

APRES que lecture a esté iudicierement fai-
 te des Lettres patentes du Roy , en forme de
 Declaration , données à Paris , le vingt-troisies-
 me Decembre dernier , signées Louis , & plus
 bas , par le Roy , la Reyne Regente sa Mere pre-
 sente, Phelipeaux , seellées du grand Seel de

France en cire jaune ; Ensemble les articles accordez par sa Maiesté pour la pacification des troubles de Guyenne , aussi signez Louis, & plus bas, Phelipeaux, dattez du vingt-cinquième dudit mois, ouy sur ce Dufault pour le Procureur General du Roy, LA COVR a ordonné & ordonne que sur le reply des Lettres, dõt a esté fait presentement lecture, auxquelles les autres articles seront attachez, seront mis ces mots, Leües, publiées & registrées, ouy, & ce requerant le Procureur General du Roy, pour estre le tout obserué & executé selon la forme & teneur; Et que coppie tant de dites Lettres que articles, deuement collationnees aux originaux, seront enuoyees par le Procureur General, aux Sieges & Bailliages de ce ressort, pour y estre fait pareille lecture, publication & enregistrement, à la requisition & diligence des Substituts dudit Procureur general esdits Sieges, auxquels enioint de ce faire, & d'en certifier la Cour dans le mois. Fait à Bourdeaux en Parlement, en l'Audience de la grand Chambre, le septiesme Ianuier 1650.

Signé, DE PONTAC.

Cet

CET enregistrement & publication furent accompagnées d'un vigoureux discours du sieur Dufault, Avocat General, qui apres avoir rappellé le souvenir de toutes les souffrances, imprima vne forte reconnoissance pour la bonté du Roy, & vn desir tres ardent pour la fermeté de la paix. A cela succeda la ceremonie avec laquelle le Parlement, vestu en robes rouges, suivi de tous les Corps seculiers de la Ville, alla dans l'Eglise Metropolitaine S. André, ouyr le *Te Deum*, qui fust chanté ce matin avec vn parfaitement beau concert de Musique à deux Coeurs. Cette solemnité fust renduë plus celebre par la presence de l'Archevesque, qui estant allé à Blaye pour moyenner la paix, reuint de Blaye avec elle, pour presenter pour le peuple les actiōs de graces à Dieu, & luy offrir les acclamations publiques, comme des tesmoignages publics de la satisfaction que l'on auoit de posseder vn bien que l'on n'esperoit pas. Les ombres de la nuit furent dissipées, & son silence interrompu par les feux de joye qui furent faits au deuant de l'Hostel de Ville, & dans toutes les ruës, par les salues continuës des troupes Bourgeoises, qui furent mises sous les armes, & le bruit tonnante des canons qui tirerent à diuerses reprises. Ce fut alors que les esprits se delassans de la fatigue de la guerre, reprenant leur premiere vigueur, s'animerent à donner au public diuerses productions, entre lesquelles, *Le Remerciement des Bourdelois au Roy sur le sujet de la Paix*, peut, apres l'approbation de beaucoup de personnes intelligentes, trouver, sans reproche d'une redite, son lieu dans cette Histoire.

SIRE,

Il est des Sujets esloignez de leur Prince, comme des peuples que le Soleil n'éclaire que par des rayons réfléchis, qui souffrent de tres-longues rigueurs, comme autant de suplices, d'autant que ce pere commun ne peut voir qu'à demy l'estat de leurs disgraces. Vostre Trône est trop reculé pour voir la main soudain qu'elle nous frappe. Il est trop eslevé, pour sentir la douleur au momēt qu'on nous blesse. Et si quelquefois pendant nos mouvemens, l'image de nostre misere s'est presentee à vos yeux, on a terny sans doute le poly de la glace qui la representoit, pour la rēdre l'objet de la haine de V. M. puis que pendant le temps qu'il n'y eust point d'Echo qui redist fidèlement nos plaintes, on nous a fait languir comme des criminels pource qu'on nous a creu tout a fait miserables. Mais depuis que l'ainē des Parlemens (dans lequel la Justice & la Vertu ont estably leur Trône comme dedans un Ciel) s'est rendu sensible à nostre mal; Que des personnes illustres touchées de nos douleurs, ont demandé pour nous vostre compassion; Et que nos souffrances ont poussé des soupirs, qui vous ont fait entendre qu'il n'estoit pas juste que la querelle de

nostre ennemy passast pour celle de l'Estat, & qu'on nous traittast en rebelles pour n'estre pas ses adorateurs, la justice de V. M. leuant son bandeau pour regarder nostre innocence d'un aspect fauorable, nous a donné la vie, en nous donnant la paix.

Secourir l'affligé, est un chef-d'œuvre de la bonté de Dieu, dont vous estes l'image. Aimer le peuple, c'est auoir de l'amour pour le bien de l'Estat, car quoy qu'il n'en soit pas la plus noble partie par la bassesse de son employ, il fait la plus considerable par le secours qu'il donne en la necessité. Et pour dire le vray, les grands tiennent des petits tout ce qu'ils ont d'Illustre: demesme que les superbes edifices doiuent la gloire de leur éléuation aux pierres que la terre renferme, qui leur seruent de base. Il n'y a point de Roys s'il n'y a de sujets. Et pource que le peuple en fait la plus grande partie, il merite vne plus grande protection. Car si les grands composent les fleurons de leur Couronne, les petits forment le cercle qui enuelope & soustient tout le reste. C'est pour cela qu'on obligeoit les Dictateurs à Rome apres leurs électiōs, de visiter les oyes gardes du Capitole, & pouruoir à leurs necessitez, auant que saluer leurs Dieux, & brusler de l'encens au pied de leurs Autels.

Les Gouverneurs que V. M. commet dans les Prouinces à la conduite de ses Sujets, vnissant la prudence avec l'autorité, semblent à ces images que les Empereurs Romains enuoyoiēt dans les lieux

sousmis à leur Empire, qui donnant la terreur aux méchans, & servant d'asile aux misérables, appelloient à soy les adorations d'un chacun. Mais quand par contre sens, ils n'employent leur pouvoir que pour faire du mal, ils ressemblent la teste, qui pour s'estre grossie de mauvaises humeurs, se rend insupportable aux membres qui la portent. Si le Duc d'Espernon, que la justice du feu Roy esloigna de la France, & que la bonté de la Reyne a rappelé dans ce Gouvernement, eust pratiqué cette premiere Maxime, nous serions bien ensemble. Si nous eussions souffert qu'on transportast les bleds qu'il chargeoit pour l'Espagne, & qu'il nous eust osté le pain des enfans legitimes pour le donner aux chiens, nous eussions esté les fideles, non pas les reuoltez. Si nous eussions permis qu'il eust continué de faire de nostre Hostel de Ville une chorme d'esclaves, nostre reuolte eust passé pour vertu. Les deux escus par tonneau de vin, de lesquels il prenoit la moitié pour ses apointemens supprimés par Arrest, pour n'estre point verifié aux termes des dernieres Declarations de V. M. & pour n'auoir esté imposez que pour deux ans seulement, quoy qu'il y en ait dix que le terme est écheu, allumerent un brasier qu'il couvoit sous les cendres. La Citadelle qu'il fist bastir à Libourne, contre la foy du Traitté fait avec le Roy Louys le Juste, sur le rasement du Chasteau de Fronsac, pour lequel nous luy donnasmes trois cens mil liures, à condition qu'on ne feroit à

l'aduenir aucune Citadele dans le ressort de la Senéchaussée, nous inspira d'un mesme temps la desfiance de son procedé, & le dessein d'autoriser la parole d'un Roy. Les troupes qu'il enuoya rauager nos maisons aux portes de la Ville, contre l'autorité de nos Priuileges, qui nous exemptent du logement des gens de guerre à dix lieües de Bourdeaux, nous animèrent au combat pour nostre liberté. Les Temples prophanez, les Prestres asommez, nos canons enleuez, nostre Ville battue, nos femmes forcées, nos biens pilliez, nos champs desolez, la Paix violee, la Iustice interdite, nostre innocence adroittement contrainte sous l'appast d'une abolition à dresser son gibet & preparer son suplice, ont armé nos esprits à la deffence de la cause de Dieu, de vostre Maiesté & de nostre interest.

Dieu qui chérit son image a protégé la Iustice cõtre la honte de cette Interdiction, dont le Duc d'Espernon la vouloit diffamer, quand rehaussant l'esclat de Sa Maiesté, sur le temps que son ennemy la croyoit abbatue, elle a frappé son cœur d'une terreur estrange, qui l'agitant de conuulsions sensibles, a exprimé les remords de son ame; Et quand d'un même esprit qu'il arma le Berger pour abbatre l'orgueil de Goliath, il anima les frondes des enfans pour le mettre dehors. Il a beny nos armes, lors qu'unissant à nostre deffence deux Eleme ns contraires, l'Eau & le Feu, pour combattre Monstry, il nous rendit avec

vsure les canons qu'on nous auoit osté; Que ses troupes tousiours battues par les nostres, ont porté les Palmes qu'elles auoient cueilly dans les terres Estrangeres aux pieds de nos soldats; Que le Chasteau que les Gouverneurs nous auoient vsuré, a esté renuersé par la foudre dont il nous a frapé, ne luy restant du nom de Trompette qu'il portoit, que ce qu'il faut pour publier à la posterité la cause de sa ruyne, & la honte de ce persecuteur.

Vostre Maiesté de sa part ordonnant la demolition de la Citadele de Libourne, la descharge des deux escus par tonneau, l'esloignement des troupes ennemies, la liberté dans le choix de nos Magistrats, le reestablisement de la Iustice, l'Amnistie des desordres passez, prononce pour nos armes, absout nostre innocence, & condamne la calomnie. Quel Peuple plus glorieux d'estre justifié par la voix de son Prince! Quel Prince plus aymable, d'auoir tendu la main à son Peuple abbatu! Que ces actions s'accordent avec celles de Dieu, puis qu'en ce mesme temps qu'un Dieu enfant porte la Paix aux hommes, un Roy mineur la dōne à ses Suiets. Ce n'estoit pas assez, que Bourdeaux, tousiours soumis aux ordres de ses Roys, tousiours Zelé au salut de l'Estat, ait esté le Theatre sur lequel les Anges ont serré le sacré nœud qui vous a mis au monde, il falloit qu'il souffrist, pour estre fait le Temple de la felicité, ayās esté l'objet de vostre amour, soudain qu'il a esté le su-

jet de la grace. Heureuse guerre qui nous donna la Paix! Heureux mal-heur qui produit le bon-heur! Heureuse diuision qui enfante la grace! Les desordres que V. M. calme dans le Royaume, les conquêtes qu'elle fait au dehors, les cœurs qu'elle gagne par tout, vous font à meilleur tiltre qu'au Jupiter des Fables, le Tres-bon, aussi-bien que le Tres-grand. Nos reconnoissances sont trop foibles pour un bien si Auguste. Nos encens sont trop peu pour un si haut ouvrage. Nos cœurs sont trop chetifs pour un Prince si digne. Si bien que n'ayans pas de quoy nous acquiter, cherchons par nos vœux dans le Ciel, la recompense de l'image de DIEU.

CHAPITRE VI.



E fust en cette occasion que l'honneur & le respect balancerent l'esprit des Bourdelois. Le point d'honneur les inuitoit à ne quitter point les armes, puis qu'ils n'estoient que sur la deffensue, que le Duc d'Esperron n'eust plustost desarmé, & retiré ses troupes. Le respect qu'ils auoient pour les ordres du Roy, les arrachoit de leurs mains. Les Bourdelois enuoyèrent les sieurs Boucaut l'aîné, Dufault jeune, & Mosnier Conseillers, Frans Iurat, Lamezas Aduocat, &

Minuielle Marchand, ostages au Marechal de Praslin qui estoit encore à Blaye, pour assurance du dessein qu'ils auoient de ne rien esmouvoir, & d'exécuter tout. On licencia les troupes. On abbatit les fortifications. On abandonna la garde des portes. En vn mot on n'obmit rien de ce qui pouvoit iustifier vne sousmission absoluë aux volontez du Roy, & vne parfaite enuie de jouyr des graces de la Paix. Le Duc d'Espéron au contraire faisoit rouler ses armes aux enuirons de Bourdeaux, d'vn costé puis de l'autre avec plus de libertinage qu'auparauant. Les meurtres, les incendies, les pilleries, les violemens & les sacrileges estoient pratiqués avec plus de rage & de fureur. Le Conte du Doignon faisoit des incidens sur ces mesmes ordres, pour dans certe longuer auoir pretexte à rauager les costes de Montferran, d'Ambes & de Parampuires, dans lesquelles il enleua plus de quatre mil tonneaux de vin, qu'il fit porter dans Broüage ou à la Rochelle. Ce fut en ce coup d'arriere-main qu'il acheua le degast de la maison de Valliers, appartenante au sieur d'Alesme Conseiller. On pressoit le sieur d'Aluimal de faire exécuter les articles de Paix de la part des autres, puis qu'il ne restoit rien plus à faire du costé des Bourdelois. L'image de tous ces rauages qui se presentoit à toute heure au deuant de ses yeux, le sollicitoit à faire valoir l'autorité que le Roy luy auoit donné pour l'exécution du Traité. Mais il auoit de la peine à se mouvoir. Il donnoit des promesses, desquelles il n'en exécutoit pas vne, soit que le Ministère, dont il estoit esclau, luy eust donné des ordres contraires, soit qu'il traittast le Duc d'Espéron

pernon comme on traite des malades fascheux, pour lesquels on melle vn goust releué dans les potions ameres, pour flatter le degoust.

L'APPREHENSION que quelques-vns des Generaux auoient sur le bruit des approches de tant de troupes, que Bourdeaux ne se trouuaft foible, leur forma le deſſein de reclamer le ſecours de l'Eſpagne, qui d'abord eult les oreilles ouuertes à cette propoſition, & leur enuoya le Baron de Bateuille, perſonnage de grand ſens & de grande importance parmy les Eſpagnols. pour ſçauoir de viue voix en quoy conſiſtoit le ſecours qu'on vouloit, & en donner les aduis à ſon Maiftre, pendant qu'il demeureroit oſtage, & garand des paroles qu'il donneroit. Cette arriuée eult ſans doute bien châtouillé les eſprits, ſi elle eult deuançé de quelques iours la publication de la Paix; & volontiers que l'on eult accepté ſes offres, ſi elles euſſent eſté préſentées, dans l'eſfort de l'accez & des violences qui trauailloient les Bourdelois. Mais comme il eſtoit mal-aiſé de les ramener ſi ſoudainement de cet excez de joye, à des penſées des deſordres nouveaux, on en fit vn honneſte refus. Les aduis furent aſſez differens. Les vns le vouloient renuoyer ſans autre compliment. Les autres plus discrets, & plus reconnoiſſans pour des perſonnes qui ouuroient les bras à leurs miſeres, ne voulurent pas ſouffrir qu'il partiſt de la Ville, iuſques à ce que le Roy luy eult donné ſon paſſe-port, afin qu'il peult ſe retirer avec la meſme ſeureté qu'il eſtoit venu. Et pource que pendant ſon ſejour il pouoit débaucher des eſprits, & former des cabales contre le ſeruice de l'Eſtat, s'il auoit

une communication publique avec ceux de la Ville; on jugea à propos de le renfermer dans un Cloistre, où on le traitoit aux despens du public avec autant de splendeur que le lieu le permettoit. Cependant le sieur de Laue, Aduocat General, dépescha son homme en Cour, pour obtenir son passe-port. D'Aluimal courut en haste à Blaye en donner aduis au Marechal de Praslin, qui fust bien aise de trouver ce pretexte pour retarder le desarmement du Duc d'Espemon, & l'esloignement de ses troupes.

CETTE joye qui s'estoit faisie du cœur des Bourgeois, fust trauersée par des larmes que les honneurs funebres que la Ville rendit à la memoire du feu Marquis de Chambaret, arracherent des yeux de toutes les Compagnies, tant Ecclesiastiques que seculieres, qui y assisterent. Sa generosité & ses autres vertus eussent sans doute paru en Triomphe, si le sieur Archeuesque n'eust fermé la bouche, par des considerations d'Estat, à l'eloquence du Pere Bonnet, Curé de Ste. Eulalye, qui en auoit préparé le discours. Mais cela ne peust pas empescher que les vœux, les soupirs & les acclamations des assistans, n'en fissent publiquement la harangue. Le Marechal de Praslin, que le Roy auoit honoré du breuet de Conseiller honoraire dans le Parlement de Bourdeaux, vouloit bien se faire receuoir en sa Charge, & en prendre la possession; mais il craignoit de s'exposer à la mauuaise humeur d'un peuple, qui n'auoit pas de bonne volonté pour luy. Il demandoit qu'on congédiaist le Marquis de Saulvebeuf & les autres Generaux, estimant qu'un Peuple sans Chef & sans conduite n'o-

soit rien entreprendre. On luy fit entendre que c'estoit vne inciuité & vne ingratitude criminelle, de chasser hors la Ville ceux à qui la Ville deuoit son salut & sa gloire, desquels possible pouuoit-on auoir encore besoin, puis que le Duc d'Espéron auoit encore les armes à la main. Il se rendit à ces raisons, & volontiers qu'il n'agitoit ces questions que pour sonder le foible.

CEUX qui fauorisoient le party du Duc d'Espéron, & qui ne prenoient pas seulement part à ses interests; mais aussi au depit qu'il auoit contre vne paix si peu honorable pour luy, faisoient courir des bruits dans toute la Prouince qu'il n'y auoit point de Paix, qu'il ne la vouloit point accepter, & qu'il falloit se resoudre à vne nouvelle deffence. Le credit du Duc fust assez puissant pour empescher la publication & l'enregistrement en quelques Sieges du ressort du Parlement. Il tenoit toujours les passages fermez, & ne pouoit souffrir qu'on portast des prouisions à Bourdeaux: ce qui donna sujet au Parlement d'assembler les Chambres, & deliberer l'Arrest qui suit.

SVR ce qui a esté représenté à la Cour par le Procureur General du Roy, Qu'ayant pleu au Roy de redonner la Paix à cette Prouince, & d'enuoyer sa Declaration pour ce suiet, deüement registrée en sa Cour, avec les ordres necessaires pour la retraitte des trouppes, & l'ouverture des passages de cette

Ville tant par eau que par terre, certains esprits ennemis du repos public, font tous leurs efforts pour empêcher la publication de la Paix dans les Villes & autres lieux du ressort, & sement des faux bruits qu'il n'y a point de paix faite, & qu'il n'y aura aucune liberté à porter des bleds, farines & autres viures en la presente Ville, à quoy il est necessaire de pourvoir, en renouvelant les ordres donnez pour la publication de la paix, & faisant connoistre à tous les Suiets du Roy que le commerce est remis dans le premier estat où il estoit auparavant les derniers troubles, sans qu'ils ayent à craindre qu'il leur soit imposé aucune nouvelle charge, trouble & empêchement. Euë sur ce deliberation, LA COUR a Ordonné & Ordonne, conformément à l'Arrest de publication & enregistrement de la Declaration du Roy, & sous les peines y contenues, qu'à la diligence des Substituts du Procureur General du Roy, il sera procedé incessamment par toutes les Villes & lieux de ce ressort à la publication de ladite Declaration & articles. Fait expresse inhibitions & defences à toutes personnes de quelque qualité & condition qu'ils soient, de l'empêcher directement ou indirectement, à peine d'estre declarez perturbateurs du repos public. Ordonne qu'il sera informé des violences qui ont esté faites pour ce regard, & qui pourroient estre faites par cy-apres, pour, les informations ra-

portées, y estre pourueu ainsi qu'il appartiendra. Et en consequence de la volonte de Sa Maiesté, Enjoint à toutes personnes de porter des bleds, farines & autres viures en la presente Ville, comme ils auoient accoustumé auparauât les mouuemens derniers. Et fait tres-expresses inhibitions & deffences de leur porter ce faisant aucun trouble ou empeschement, & d'exiger sur eux pour les laisser passer de nouveaux droicts & subsides sous quelque cause que ce soit, à peine d'estre procedé contre les contreuens par la rigueur des Ordonnances. Et aux fins que la chose soit nottoire à tous, Ordonne que le present Arrest sera leu, publié & affiché par tous les lieux où besoin sera, & executé, & les informations faites en vertu du simple Dictum, ou copies deuement collationnées d'iceluy, sans autre Commission, attendu le fait dont s'agist. FAICT à Bourdeaux en Parlement, les Chambres assemblées, le quatorziesme Ianuier 1650.

Signé, DE PONTAC.

LE Mareschal de Praslin, qui se pressoit à faire reussir deux desseins qu'il auoit; l'vn à reünir le Parlement avec le Duc d'Espéron, & l'autre à se saisir du Baron de Bateuille, jugeant que sa presence estoit necessaire pour agir avec effer, surmontant les difficultez qu'il auoit desia fait, & prenant pretexte de se faire recevoir

dans la Charge de Conseiller honoraire, il alla à Bourdeaux, où à mesmes il fut visité par des principaux du Parlement, & par les Generaux. Et combien que la plus-part eust resolu de dilayer l'enregistrement de son breuet; que d'autres se voulussent contenter de l'obliger à rendre les visites que les Conseillers à recevoir ont accoustumé de faire, par le peu d'amitié qu'on auoit pour luy, & par ressentiment contre les souplesses de sa negociation, considerant neantmoins en sa personne le Roy qui l'auoit enuoyé, on le dispensa des visites, on fit son enregistrement, & on luy bailla sa seance. Dans les visites qui luy furent rendues, il touchoit souvent ce point de la reconciliation avec le Duc d'Espernon. Les plus mols y donnoient quelque consentement. Les plus genereux marquoient assez de cœur pour ne pouuoir souffrir ce langage. Les Bourgeois & le menu peuple, qui eurent aduis de certe pratique, gronderent hautement, attacherent des placards aux carrefours pour inuiter vn chascun à l'arrester: veu mesmement, que les Bourdelois ayans plainement executé les articles de leur part, on n'auoit plus droit de retenir leurs ostages à Blaye. Cette proposition fust animée par deux rencontres qui choquoient l'interest de Bourdeaux, dans l'une desquelles les Bourdelois, qui se sont toujours piquez d'une haute generosité, voyoient leur fidelité engagée, & le droit des gens violé, quand le Marechal de Praslin, assisté de l'aduis de quelques-vns du Parlement, resolut d'enleuer le Baron de Bateuille du Cloistre où il estoit: ce qu'il ne peust pas comploter avec tant de secret, que les Marquis de Saulvebeuf &

Lusignan n'en eussent aduis, qui à mesme temps l'allerent chercher dans vn carosse, pour l'emmener dans la maison du President Lalane, placée au cœur de la Ville, où logeoit le Marquis de Saulvebeuf, & où les Bourgeois accoururent en foule avec leurs armes, pour luy prester main forte contre l'enreprinse du Marechal de Praslin, qui n'osa la faire esclater la voyant decouverte, & jugeant bien que le succez tourneroit à sa honte. En l'autre, la nouvelle qui arriva de Paris, que les Princes de Condé & Conty, & le Duc de Longueville auoient esté arrestez prisonniers, & menez dās le bois de Vincennes par l'ordre du Roy, frappa d'un tel estonnement tous ceux de Bourdeaux, & leur imprima si auant dans l'esprit la deffiance de la fermeté de la paix, puis que le Prince de Condé, à qui Bourdeaux auoit l'obligation de cette grace, & qui s'en estoit publiquement rendu le garand, estoit dans les fers, sans action & sans pouvoir de la faire entretenir, qu'estant contre le Ministère, qu'on croyoit le seul auteur de cet emprisonnement, on témoigna hautement qu'on ne pouvoit point voir dans la Ville avec plaisir le Marechal de Praslin, qui estoit vne de ses images & de ses creatures.

IL creut calmer ces esprits esmeus rappelant les ostages. Il visita le Marquis de Saulvebeuf, & luy fit de grandes protestations d'amitié & de seruite. Il fut chez beaucoup de Messieurs du Parlement. Mais enfin reconnoissant dans les visages que les ciuilités qu'on luy rendoit estoient forcées, & que les complimens qu'il receuoit ne partoient pas du cœur, il se retira soudaine-

ment à Blaye, pour reprendre la route de la Cour. Cependant on porta le passe-port du Baron de Bateuille, qui ne fust pas receu que le sieur de Lauie Aduocat General, le voulut obliger à partir, & à se retirer en Espagne; & à peine peust-on auoir vn iour de delay pour ramasser ses hardes. Encore le traitta-il avec cette rigueur, de ne vouloir pas permettre qu'il se promenast sur le Port, pour satisfaire à la curiosité qu'il auoit, de voir vn Port des plus celebres de l'Europe; ce qui outragea si fort la plus-part des Bourgeois, qu'ils s'offrirent à l'escorter pour cette promenade. Il eust neantmoins cette deference pour les ordres d'un Officier du Roy, qu'il ayma mieux luy rendre obeyssance, que complaire à sa curiosité.

ON eust sans doute jouy d'un calme bien parfait, si le Duc d'Espernon eust esté aussi ponctuellement obeissant aux ordres du Roy comme les Bourdelois. La prison du Prince de Condé, protecteur de Bourdeaux, l'auoit tellement resiouy, qu'il se croyoit au haut de la rouë, & s'imaginoit que sans plus consulter, les Ministres qui le protegeoient luy bailleroient des nouvelles forces pour abbatre cette Ville, qui luy faisoit si genereusement teste. Il paroissoit bien qu'il n'estoit pas assez grand Politique, ne considerant pas que cet empiisonnement estoit vn accez qui surprenoit tout le Corps del'Estat, & qu'il falloit attendre, pour connoistre où deuoit aboutir la violence de ce mal; Qu'il estoit perilieux d'esmouvoir cette puissante Ville, qui pouoit seruir de retraitte aux mécontans; Et que demesme qu'en vn corps qui commence à se rauoir d'une longue mala-

die

die, la recheute est suivie de beaucoup de symptomes dangereux : aussi vne Prouince qui ne baïse pas presque l'image de la paix, s'engage à la moindre occasion à de plus grands desordres, qui jettent bien souvent l'Estat dans des convulsions sans remede. Le Parlement vouloit preuenir ces orages. Il auoit escrit au Roy & au Duc d'Orleans, la diligence avec laquelle ses ordres auoient esté executez ; le retardement que le Duc d'Espernon rapportoit de son costé ; les rauages que ses troupes faisoient ; la subsistance de la Citadelle de Libourne, qui estoit vn des principaux points de leurs contestations ; les voleries & les exactions que Martinet, qui commandoit ce reduit, pratiquoit impunément par tout. A suite desquelles remonstrances, il receut ces deux Lettres.

LETTRE DV ROY ESCRITE à la Cour de Parlement de Bourdeaux.

DE PAR LE ROY.

NOS AMEZ ET FEAVX,

*Quoy que nous ayons eu bien agreable de voir
par la Lettre que vous nous auex escripte du dixies-*

me de ce mois, que les graces que nous vous auons faites, & aux Habitans de nostre Ville de Bourdeaux, au sujet des mouvemens qui s'y sont passez & aux environs depuis le mois de Mars de l'année derniere 1649. iusques à present, ayent esté receues avec acclamation publique; & que vous ayez enregistré les articles que nous auons accordez en la Declaration d'Amnistie qui a esté expediee, Nous auons & au mesme temps beaucoup de desplaisir d'apprendre que les ordres que nous auons donnez pour faire iouyr nos Suiets d'une parfaite paix, n'ayent pas esté executez avec toute la diligence qui se pouvoit desirer. Ce qui nous auroit obligez d'en enuoyer d'autres, pour faire marcher incontinent les troupes que nous auons par delà dans les lieux que nous leur auons donnez pour quartier d'hyuer, de quoy nous vous auons voulu informer par cette Lettre que nous vous faisons de l'aduis de la Reyne Regente, nostre tres-honorée Dame & Mere, & vous asseurer que nos intentions sont de maintenir, conseruer & executer soigneusement lesdits articles & Declarations, ainsi que nous auons fait confirmer aux Deputez de vostre Compagnie, de laquelle nous prometant la continuation de ses bonnes volontez pour le bien & aduantage de nostre seruice, & pour la conseruation de nostre Prouince de Guyenne en nostre obeyssance, Nous ne vous faisons la presente plus

LIVRE QUATRIESME. 443
*longue. Donnè à Paris le vingt-uniesme Ianuier
mil six cens cinquante.*

Signé; LOVIS.

Et plus bas,

PHELIPEAUX.

Et au dessus est escrit,

A nos Amez & Feaux les Gens tenans nostre
Cour de Parlement de Bourdeaux.

LETTRE DE MONSIEVR LE
Duc d'Orleans, escrite à la Cour de
Parlement de Bourdeaux.

MESSIEURS,

*Si j'ay appris avec beaucoup de satisfaction que
les graces que leurs Maiestez vous ont accordées,
& aux habitans de la ville de Bourdeaux, ont esté
receües avec un applaudissement general; & que les
mouuemens qui y estoient suruenus, ont esté termi-
nez par une paix si necessaire pour le soulagement de
la Prouince, j'ay eu bien du regret d'apprendre que*

444 DES MOUVEMENTS,
les ordres de leurs Maïestez n'ayent pas esté execu-
tez, suivant leurs intentions & les miennes, & que
pour faire jouyr les peuples de la tranquillité qu'ils
s'estoient promis, j'ay esté obligé d'en faire expedier
d'autres, & d'ordonner que les troupes sortiront de
la Province en toute diligence, pour se rendre dans
les quartiers d'hyuer, qui leur sont destinez. Je me
suis d'autant plus volontiers employé pour vous en ce
rencontre, que ie ne doute point que vous ne vous
portiez à maintenir les esprits dans l'obeyssance
qu'ils doivent à leurs Maïestez. Aussi deuez-vous
croire que dans toutes celles qui se rencontreront de
vous donner des preuves de l'estime que ie fais de vo-
stre Compagnie, j'embrasseray tousiours ses interests
de si bonne sorte, que vous aurez tout sujet d'aduoir
que ie suis,

MESSIEURS,

Vostre affectionné amy

GASTON.

Et au dessus estoit escrit,

A M^{rs}, les Gens tenans la Cour de Parle-
ment du Roy, Monseigneur & Neveu.

A Bourdeaux.

CHAPITRE VII.



L falloit auoir veneration & creance pour ces paroles , puis qu'elles partoient de la main & de la bouche du Roy , & d'une personne qui tient le rang le plus illustre apres Sa Maiesté. Neantmoins les effets tous contraires persuadoient la desffiance , & faisoient croire à la plus-part des Bourdelois que ces promesses n'estoient que des amusemens , & la matiere à former vn orage , qui deuoit fondre sur leur teste avec plus d'impetuosité. Le Duc d'Espéron lassé des fatigues de la guerre , s'estoit retiré dans Agen , pour soulager sa peine par des tourmens plus doux qu'il cherchoit entre les bras d'une Agenoise qu'il courtisoit , dont l'humeur imperieuse attirant sur elle & sur ces comportemens la haine des Habitans , la faisoit reflexir sur les actions du Duc , qui se laissant emporter aux mouvemens de cette Damoiselle , qui ne faisoit que suivre le penchant des siens , remplissoient cette Ville & les maisons des principaux Officiers , de ses Gardes , qui les traittoient avec insolence , & les rendoient martyrs du temps de sa tyrannie. La Cour des Aydes , qui n'auoit pas son assiette bien ferme dans Bourdeaux , auoit esté transferée par ordre du Roy dans Agen. Elle y establíst sa seance. Et comme les Officiers de cette nouvelle Cour se sont tousiours flattez de cette imagination , de croire qu'ils de-

uoient estre les Souverains par tout où ils estoient, ils pretendirent auoir le rang par dessus le Seneschal & ses Presidiaux, qui sont d'ancien establissement dans la Ville, lesquels leur contesterent avec cœur cet aduantage. Ils furent neantmoins contraints d'abandonner cette place, à la force de la protection que le Duc d'Espèrnon donnoit à ceux des Aydes, pour payer les bassesses qu'ils faisoient tous les iours par des respects extraordinaires qu'ils luy rendoient, indignes de la qualité de ceux qui vouloient passer pour Souverains. Cette contestation toutefois n'en demeura pas là, car les Presidiaux deputerent en Cour, pour y porter leurs plaintes.

Le Duc d'Espèrnon, qui se dispoisoit à faire vne nouvelle guerre, sollicitoit la parole de la Noblesse, & dispoisoit leurs esprits pour le suiure à la prochaine campagne. Mais comme les Seigneurs & les Gentils-hommes voyoient esleuer de loing vn nuage que l'emprisonnement des Princes auoit formé, & qu'ils estoient tous attentifs à considerer en quelle part le vent se porteroit; Qu'on l'oyoit gronder tantost dans la Bourgogne, tantost dans la Normandie; Qu'on apprehendoit de grandes suites par la retraite du Duc de Bouillon; l'emprisonnement de Madame sa femme, les Damoiselles sa sœur & sa fille; l'enleuement du Duc d'Anguien fait par le Marquis de la Boulaye, affin de l'auoir en assurance; la fuite de Madame de Longueville hors le Royaume, & beaucoup d'autres remuemens estranges qui estoient dans l'Estat, pas vn ne s'engageoit à luy, ne sçachant encoré à quel party se résoudre. Il jugeoit bien neantmoins que si quelque partisan des Princes se declaroit,

que ses intereſts ſeroient les moins confiſderez. Il pratiqua ſa reconciliation avec le General de la Valette ſon frere naturel, qu'il n'auoit veu depuis beaucoup d'années, par le reſſentiment d'une diſgrace domeſtique que le temps n'auoit ſceu remettre; Et l'appellant à ſon ſecours, il le fit General de l'armée de Guyenne.

C E P E N D A N T pour conſeruer l'appuy dans la Province, dont il craignoit que le Roy ne le rappellaſt, il diſpoſoit des Charges des Conſuls dans les petites Villes qui redoutoient ſon autorité. Le Parlement oppoſoit ſes Arreſts à ſes pratiques, caſſoit les eſlections qui eſtoient faites par l'ordre du Duc, fondez ſur la Declaration du Roy, qui vouloit que la liberté des ſuffrages fuſt reſtablie dans les nominations des Iurats & Cōſuls, ſans que le Gouverneur en peuſt prendre aucune connoiſſance. Mais neantmoins ayant les forces de ſon coſté, il ſe maintenoit en cette uſurpation, & ne laiſſoit au Parlement que la voix de la plainte ſur l'infraction de la paix. C'eſtoit toujours vne nouvelle matiere pour charger les memoires des Deputez qui reſtoient à Paris, qui s'en pleignoient ſans pouuoir eſtre ouys. Ses troupes, qu'il logea à la fin dans des quartiers d'hyuer, debitoiēt le pillage qu'elles auoient fait dans les maiſōs qu'elles auoient rauagé depuis la paix aux enuirs de Bourdeaux. Les Habitans de cette Ville n'auoiēt point de retraite ny de chemin aſſeuré pour leur negoce. Leur naiſſance, ou le lieu de leur habitation ordinaire, les rendoit criminels quand ils eſtoient rencontrez à l'eſcart par des Eſperoniſtes. Martinet, qui commandoit le reduit de Libourne, voloit auſſi impunément que

s'il eust esté dans le plus fort de la guerre. Les Bourdelois qui auoient du bien dans le Benauges, S. Macaire, le Medoc ou ailleurs, où le Duc auoit encore reserué des gardes & des garnisons, estoient l'objet de leur persecution.

ENCORE que parla Declaration qui auoit esté enregistrée dans le Parlement, & publiée dans tout le ressort, le Bourdelois & le Bazadois deussent estre exépts du logement des gens de guerre; Et qu'en consideration des pertes que ces deux Seneschaussées auoient fait, & des rauages qu'elles auoient souffert, elles ne deussent point contribuer pendant vn an à la subsistance des troupes qui auoient ordre de se retirer; Que mesmes le Roy leur auoit fait esperer par les articles de les descharger de la Taille, c'estoit neantmoins la dessus que le Duc d'Espéron rejettoit toute la foule, qu'il faisoit imposer des sommes extraordinaires, qui alloient au dela de la Taille, & que rappelant l'exécution des premieres impositions qu'il auoit fait pour la construction de la Citadelle de Libourne, & la subsistance de la garnison qu'il auoit mis dedans, il enuoyoit des gens de guerre par tout, contraindre les Collecteurs, & à main armée faire vn Magasin des arrerages & de ces deniers, qui pour auoir demeuré en souffrance, & auoir esté imposés pendant les troubles, deuoient estre sans recherche à la faueur de la paix. Le Parlement croyant le calme troublé, l'autorité du Roy blessée, & ses finances amoindries par ce procedé, s'assembla pour chercher le remede à ce mal, qu'il creust trouver en l'Arrest qui suit.

SUR ce qui a esté représenté à la Cour, Que dans les sujets legitimes de plaintes qu'a toute la Province de l'inexecution des volontez du Roy, contenues en la Declaration & articles accordez par leurs MaïesteZ, pour nous redonner la paix, & des infractions qui ont esté faites jusques icy de leurs ordres, ès points les plus importants, il semble qu'on ayt voulu tenter la moderation de la Cour, & rejeter par cet artifice & par cette violence toutes choses dans le premier trouble; puis qu'après plus d'un mois escoulé depuis la publication de la paix, on voit encore la Citadelle de Libourne, qui a esté le principal sujet de nos malheurs, entiere, & mesmes augmentée, la garnison qui y estoit plus que doublee, & les violences & exactions de Martinet, prétendu Gouverneur, s'accroistre de iour en iour, le Bourdelois & Bazadois ravagez par des troupes, & par des ordres exprez, presque plus cruellement depuis la paix qu'auparavant, la garnison de Castelnau en Medoc, à quatre lieues de cette Ville, continuer ses courses & pilleries, les troupes qui ont servy cet Esté dernier sous le sieur Duc d'Espernon, & qui ont esté les principaux instrumens de ses vengeances passées, demeurer encor dans le ressort de la Cour, cõtre l'expresse volõté du Roy, où elles ne font qu'ex-citer de nouveaux desordres, les milices qui devoient

estre licenciées aux termes des mesmes articles, rouler encor dans la Prouince, & passer par le Bourdelois & Bazadois, entr'autres sous la conduite d'un nommé Aubarede, les particuliers de quelque grande ou petite consideration qu'ils soient, qui auoient suivy les interests de cette Ville, sans aucune seurte de se retirer dans leurs maisons & dans leurs biës, qu'on a continué de piller, brusler & desmolir, les meubles, fructs & autres choses qui estoient en nature, & qui denoient estre rendues, enleuees ouvertement par ceux qui les auoient volées, & retenues encore à la vëue des proprietaires, les gardes viure à discretion chez les priuilegiez & autres, & continuer dans les Villes & à la Campagne les exactions, pillages & demolitions; & enfin les Chasteaux qui denoient estre restituez, bruslez & demolis. Tous lesquels maux sont si extremes, qu'ils ne peuvent recevoir de remede que par l'autorité Souveraine du Prince, à laquelle il faut auoir recours, outre que les autres qu'on y pourroit employer, nous mettroient en danger de renouveler les troubles, & d'exciter dans l'esprit des peuples, qui n'ont pas tousiours la discretion necessaire, le desir de se faire justice par leurs mains. Mais d'autant que la plus-part des longueurs qu'on porte à executer les ordres de leurs Maiestez, procedent d'un principe d'auarice, & du desir qu'on a d'acheuer d'emporter tout ce qui reste dans la Prouince, & de donner le loisir aux Chefs des garnisons

& des troupes, de faire leur dernière main, c'est redre au Roy un service utile, que de remédier sans retardement, par les voyes de moderation & de justice à une des principales inexecutions de la paix, & qui est peut-estre la cause de toutes les autres; sçavoir la continuation des leuées de ces subsistances & contributions immenses, qui ont espuisé les facultez des Suiets de Sa Maiesté, & sont allées beaucoup au dela des Tailles & impositions Royales, l'execution desquelles on poursuit encore aujourd'huy vivement, soit dans le pays de Bourdelois & Bazadois qui par les articles sont exēpts pour un an, non seulement de logement actuel de gens de guerre, mais d'estre prins pour ayde, & de contribuer pour ce sujet, soit dans les autres lieux du ressort de la Cour, où le sieur Duc d'Espernon ordonne de son autorité des leuees, mesme pour la subsistance des troupes qui doivent sortir hors du ressort, & commet pour en faire les impositions, les Lieutenans Generaux, & autres Iuges qu'il choisit à sa deuotion; & employe pour la leuée des gens de guerre, l'un & l'autre contre les ordres & Declaration du Roy, à quoy s'il n'estoit remédié promptement, cette Prouince seroit ruinée à ce point, que d'une longue suite d'années Sa Maiesté n'en pourroit tirer aucunes Tailles & subuentions. Et ouy sur ce le Procureur General du Roy,

LA COVR, eüe deliberation, a ordonné & ordonne que par les Deputez d'icelle, il sera fait incess-

samment tres-humbles remonstrances à leurs Majestez sur l'inexecution de la Declaration & articles de paix, cy-deuant publiez & enregistrez; Ensemble sur les leuées immenses des deniers qui ont esté faits dās la Prouince. Enioint à ces fins à tous Lieutenans Generaux & autres Officiers, Collecteurs & Cottisateurs, qui ont trauaillé à faire lesdites leuées extraordinaires, d'en rapporter les rooles & estats au Greffe de la Cour dans le mois, à peine de demeurer responsables enuers les Parroisses en leur propre & priuè nom. Et en consequēce de la volonté expresse du Roy, fait inhibitions & deffences à toutes sortes de personnes de quelque qualité & cōdition qu'elles soient, de contraindre les habitans des Seneschaussées du Bourdelois & Bazadois à aucune contribution pour la subsistance des troupes & garnisons sous quelque occasion & pretexte que ce soit, à peine du quadruple, tant contre les Ordonnateurs que Cottisateurs, & d'estre procedé contr'eux extraordinairement, suiuant la rigueur des Ordonnances, & sous les mesmes peines, aux Lieutenans Generaux, Officiers & tous autres du reste des Seneschaussées & Bailliages du ressort, de faire aucunes leuées pour la subsistance des troupes; qu'en vertu des Commissions du Roy, & conformément à ses Ordonnances, Edicts & Declarations, à la charge neantmoins d'estre pourueu suiuant le contenu esdites Ordonnances, Edicts & Declarations, aux

estapes & logemens des mesmes gens de guerre, dans les routes & quartiers à eux destinez par les ordres de Sa Maïesté. A quoy la Cour enjoint aux Officiers, ausquels la connoissance en appartient, & aux Maire, Jurats & Consuls des lieux de tenir soigneusement la main, & de faire viure les troupes dans l'ordre & discipline portées par les mesmes Ordonnances. Et aux fins que l'Arrest soit nottoire à un chascun, ordonne qu'il sera enuoyé par le ministere, du Procureur General du Roy, dans tous les Bailiages & Seneschaussées du ressort, pour y estre publié & enregistré à la diligence de ses substitués, dont ils seront tenus de certifier la Cour au mois, à peine de suspension de leurs Charges. FAICT à Bourdeaux en Parlement les Chambres assemblées, le 4. iour de Fevrier 1650.

Signé, DE PONTAC.

Tous ces Arrests, semblables à ces feüilles sur lesquelles la Cassandre traçoit ses vers prophetiques, ne faisoient qu'arreter les yeux; mais non pas la creance de ceux qui les lisoient. Il falloit chercher vn remede plus fort pour vn mal si violent. Le Duc d'Espernon faisoit tout de hauteur contre la foy des articles, contre les promesses sacrées du Roy, & contre les paroles de Monsieur le Duc d'Orleans. Il falloit donc implorer ces autoritez souveraines, pour obliger le Duc d'Espernon à rendre l'obeyssance d'un Sujet. Le Roy auoit reserué

dans les articles d'escouter les remonstrances du Parlement & de la Ville, sur beaucoup de points qui n'auoiēt point esté resolu. S'estant assemblé, il deputa le sieur de Laue, Aduocat General, pour se joindre encoré aux autres Deputez, qui estoient à Paris. L'Hostel de Ville, & les cent & trente firent aussi leurs assemblées pour ce mesme sujet. Le sieur de Pontac Iurat, qui se presente avec resolution à toutes les actions d'honneur, s'offrit à celle-la. Le sieur de Constant son Colleague, ne vouloit pas la laisser eschapper. Il ne pouvoit pas la disputer à son ancien ; il ne vouloit pas non plus luy ceder l'honneur de la parole, ny perdre vne si belle occasion pour faire vn voyage en Cour. Plus il le demandoit avec ciuilité, plus le sieur de Pontac le contestoit avec fermeté. Enfin les amis l'emporterent sur luy, & firent relascher cet aduantage en faueur du sieur Constant, qu'il n'eust pas sans doute recherché avec tant de passion, s'il en eust preueu l'éuenement. Si bien que les sieurs Constant & Blanc, Procureur Syndic, furent les Deputez del'Hostel de Ville. Les cent & trente nommerent les sieurs de Lamezas Aduocat, & André Minuyelle, Bourgeois de robe courte. Comme le Parlement & la Ville estoient encore dans l'vnion, il fallut consulter les cayers de ces deputations, afin qu'agissant de concert, on peust agir plus efficacement. On nomma pour cet effet des Commissaires, qui se rendirent avec les lurats & autres Deputez chez le President Latrenne, où toutes les propositions furent resoluës par articles. Entre lesquelles la principale estoit, qu'on demanderoit incessamment au Roy qu'il luy pleust donner

à la Guyenne vn autre Gouverneur que le Duc d'Espernon. Cet article ne fut pas toutefois couché en cette sorte sur le cayer des Iurats. Il y auoit seulement qu'on poursuivroit la reparation des dommages contre celuy qui en estoit l'Autheur, & qu'on se joindroit aux Deputez du Parlement. On impute cette difference de paroles, quoy que la mesme dans son sens, à l'adresse du sieur Constant qui dressa les articles. Mais quoy qu'il en soit, il ne doit pas estre estimé le seul coupable, puis que tous ses Collegues signerent avec luy.

Ces assemblées frapperent l'esprit du Duc d'Espernon, qui apprehendant l'effet d'une si celebre deputation, ne manqua pas d'enuoyer à la Cour, pour preuenir le jugement des Ministres. Il n'y auoit point d'amis qu'il ne sollicitast par aduance, pour opposer à tous ces Deputez, & estouffer la voix de toute vne Prouince, qui crioit contre luy. Il y eust fort peu de ces petites Villes qui trembloient au bruit de son nom, qu'il ne fist assembler, pour exiger d'elles des Declarations qu'elles le desiroient auoir pour Gouverneur. Il taschoit à faire souleuer le haut pays, pour se plaindre par des actes publics des exactions desquelles il vouloit rendre le Parlement criminel. Il fit deputer pour cet effet Malaric, Consul d'Agen, & sa creature, par vne assemblée violente & desauoüée, pour en porter les plaintes. On connoissoit bien à la Cour tous ces artifices. Les amis qui le seruoient avec plus de cordialité, luy en decouvroient le foible, & le blasmoient de ce qu'il tenoit la Citadelle de Libourne en pied, contre les deffences du Roy. Si bien que defferant à ces aduis, il en rappella

456 DES MOUVEMENTS,
Martinet & la garnison. Et laissant ce réduit à la discre-
tion des Habitans & de leurs voisins, on le vid presque
aussi-tost demoly qu'abandonné. Mais on ne vid pas
le calme restably, comme vous apprendrez dans le
Second VOLUME.

FIN du Premier Volume.





T A B L E.

Sommaire des Chapitres du premier Liure.

Chapitre premier. De la Guyenne, de sa diuision & description. De sa conduite premiere. Libre & par elle-mesme, & puis par les Romains & autres jusques à present. page 1.

Chap. 2. De Bourdeaux, de son etymologie, de son assiette, de son Port de Lune, de ses bastimens, Eglises, Monasteres &c. De son ancienne gloire touchant les Lettres & les Sciences. De son Vniuersité, de son Parlement. pag. 16.

Chap. 3. La naissance & la suite des mouuemens, de la cargaison du bled, procurée par le Duc d'Espéron. L'esmotion du peuple craignant la famine. Arrest contre cette cargaison. Declaration du Roy confirmatiue de cet Arrest. Indignation du Duc d'Espéron, qui prend de nouveau la qualité de Prince & d'Altesse. pag. 28.

Chap. 4. Declarations du Roy sur les mouuemens de Paris, verifiées au Parlement de Bourdeaux. Le Duc d'Espéron appelle les Iurats au Chasteau Trompette, & fait fermer la porte de l'Hostel de Ville, faisant approcher de Bourdeaux les gens de guerre. Est prié d'assister au Parlement, sur la deliberation de l'esloignement des gens de guerre. Enleue les canons du Chasteau du Hà en plain minuit. Lettre du Parlement de Paris à celuy de Bourdeaux. Citadelle pratiquée à Libourne: Arrest contre l'établissement de cette Citadelle. Surprise du Moulin de Ciron. Vnion des Bourgeois en l'Hostel de Ville. pag. 37.

Chap. 5. Arrest portant deffences de sortir de la Ville sans congé. Gardes de la Ville ordonnées. Capitaines establis du Corps du Parlement. Lettre du Duc d'Espéron au Parlement, avec la réponse. pag. 48

Chap. 6. Arrest donné pour exhorter la Noblesse à la deffence de Bourdeaux. Le Duc arreste & fouille les Courriers qui vont & viennent de Paris. Fait cōtribuer les peuples voisins à main armée pour la construction de la Citadelle de Libourne. pag. 63

Chap. 7. Le Chasteau de Vaires est secouru par l'ordre du Parlement. Le sieur de Marin assiege ledit Chasteau & sa reddition. pag. 68.

Chap. 8. Arrest pour le Magazin des farines de Bourdeaux. Arriuée & reception du Marquis de Chambaret. pag. 76.

Chap. 9. Le Marquis de Chambaret va attaquer six vingts Maistres du Regiment de Crequy dans le Bourg de Cāblanes. Deputation proposée au Corps de Ville. Pillage & incendie de l'Eglise de Camblanes par les troupes du sr. de Marin. pag. 82

Chap. 10. L'argent du Greffe des consignations pris & employé pour subuenir aux frais de la deffence de la Ville. Arrest contre les violences du Duc d'Espéron, pour supplier le Roy de dōner vn autre Gouverneur à la

T A B L E.

Guyenne, Clergé exhorté par Arrest de proceder par censures Ecclesiastiques contre les Autheurs de tant de sacrileges commis à la campagne par les troupes du Duc d'Espèrnon. pag. 91.

Chap. 11. le fr. Argenson vient à Bourdeaux avec vne Lettre au Parlement, où il la porte, & y est leuë.

Chap. 12. Obeysance au eugle du Parlement aux ordres portez au nom du Roy par le fr. Argenson. Vnion reiterée des Bourgeois en l'Hostel de Ville. pag. 112.

Chap. 13. le fr. Argenson entre au Palais. Le Duc d'Espèrnon continuë ses rauages, nommément à Cayac. pag. 123.

LIVRE SECOND.

Chapitre premier. Chasteau Trompette raurailé. L'inexecution de la paix representée au sieur d'Argenson. Ses nouvelles demandes & tergiuersations touchant la Citadelle de Libourne. Querelle du sieur d'Argenson contre le sieur Dufault Aduocat General. pag. 132.

Chap. 2. Deliberation du Parl. sur les infractions de la paix.. Le sieur d'Argenson effrayé par le discours d'une personne zelée, se retire au Chasteau du Ha. Ordonnance du sieur d'Argenson pour la demolition de la Citadelle de Libourne, & Arrest du Parlement pour cette fin. pag. 142.

Chap. 3. Sortie du sieur d'Argenson du Chasteau du Ha. Arrest contre le Duc d'Espèrnon, portant deffences de prendre la qualité de Prince & d'Altesse. pag. 154.

Chap. 4. Les ruses du Sr. d'Argenson apres la sortie du Chast. du Ha. Description de Libourne, & de l'armée de terre & de mer allant pour desmoller la Citadelle. Attaque des Vaisseaux. Batterie. Attaque des gens de pied. Trahison de la Roque de S. Macaire. Mort du Marquis de Chambaret, & deroute de son armée. pag. 168.

Chap. 5. Consternation dans Bourdeaux. Le Marquis de Lusignan receu pour commander les armes. L'Archeuesque employé pour moyenner la paix. Le Duc d'Espèrnon est mal receu à Bourdeaux. pag. 182.

Chap. 6. Le Duc d'Espèrnon estant à Bourdeaux, tient des propos injurieux à la fidelité des Bourdelois. Se retire d' peur. Memoires & instructions baillées aux Deputez du Parlement allans vers le Roy. Autre Arrest contre la Cour des Aydes. pag. 193.

Chap. 7. Labarriere & Lestuille Iurats, se destachent de l'obeyssance du Parlement. Eludent l'assemblée generale ordonnée par la Cour. Ce qu'ils declarent sur le suiet de la deputation d'Ardent leur Colleague, & l'Arrest interuenu sur leur reprinsé. pag. 206.

Chap. 8. Arriuée du fr. de Commenges Cap. des Gardes de la Reyne, & des Huissiers à la Chaisne. Iurats font reuenir le Duc d'Espèrnon à Bourdeaux pour y faire receuoir l'abolition, contre laquelle le Parlement donne derechef Arrest. La froide reception du Duc d'Espèrnon en la Ville par le peuple. Va en l'Hostel de Ville, y est harangué, & y harangue p. 219.

LIVRE TROISIEME.

Chapitre premier. La Cour de Parlement delibere genereusement sur l'aduis qu'elle receut de l'arriuee des Huissiers à la Chaisne. Le Duc d'Espernon voulant faire recevoir l'abolition aux Bourgeois & Habitans de Bourdeaux, comme il est traité & chassé. Declaration sous le nom du Roy, portant Interdiction contre le Parlement de Bourdeaux p. 227.

Chap. 2. Opposition du Procureur General sur ladite Interdiction. Arrest sur ce interuenu. Le Duc d'Espernon frustré de ses attentes. Sa Cavalerie repoussée. Son issué. Les Srs. de Funel & de Bridoire surprins sur la ruiere. Declaration subsequente portant exception de l'Interd. pag. 246

Chap. 3. Le Duc d'Espernon ferme les passages pour assamer Bourdeaux. Labarriere Jurat tué. Election de trois nouveaux jurats. Arrest pour retenir la sortie des Habitans de Bourdeaux, & autre pour remedier aux desordres du sieur d'Espernon. pag. 258.

Chap. 4. Argent comment trouvé pour se deffendre. Bourdeaux en armes derechef forcé par le Duc d'Espernon. Les Galiottes armées vont faire des prises de quelques Espernonistes. Exploits du Marquis de Lusignan. Le Duc d'Espernon fait condamner le Marquis de Chambaret apres la mort par Arrest du Conseil. Arrest du Parlement. pag. 274.

Chap. 5. Le Marquis de Saulvebeuf escrit au Parlement. Monstri Garde-coste, pille les costes. Moyens fort prudemment inuêtez pour auoir de l'argent. pag. 285.

Chap. 6. Rauages des gens du Duc d'Espernon. Le Chasteau Trompette lasche ses foudres contre la Ville de Bourdeaux. Le Marquis de Saulvebeuf receu joyeusement à Bourdeaux. Sa harangue au Palais. Arrests touchant le Chasteau Trompette & le rabais des Tailles. p. 297.

Chap. 7. Le Cheualier Thibaut enuoyé contre Monstrie, dont le Vaisseau eschoüe. L'artillerie de ce Vaisseau prise & conduite à Bourdeaux. Tranchées ouvertes du Chasteau Trompette. Retour du sieur de Lauie, Aduocat General. Le Marquis de Saulvebeuf malade. Le sieur d'Espagnet blessé, duquel le Marquis de Theobon prend la place pag. 312.

Chap. 8. Lettre du Parlement de Paris à celuy de Bourdeaux. Arrest du Parlement de Bourdeaux pour instruire les Villes du ressort, & les desfabuser des faux bruits semez par le sieur d'Espernon. Arrest pour empêcher la demolitiõ des maisons, apres la demolitiõ de celle du fr. de Pontac d'Anglade Batteries dressées contre le Chasteau Trompette. Le Marechal du Pleffis Prassin arriue à Lormon. Le Chasteau Trompette demande à capituler auant que d'estre sommé. pag. 325.

LIVRE QUATRIEME.

Chap. premier. Irresolutions apres la reddition du Chasteau Trompette. Lettre du Parlement de Paris à celuy de Bourdeaux. Harangue du President Noujon à la Reyne au nom du Parlement de Paris. Responce de

T A B L E.

la Reyne par la bouche du Chancelier. Arrest contre les violences du Duc d'Espèrnon. pag. 344.

Chap. 2. Sortie du Marquis de Saulvebeuf avec son armée vers Pondenac, Barsac, Langon, S. Macaire. Capitulation du Chasteau de Langon. Conte du Doignô trompe le Parlement & les Bourdelois. Treillebois fourbeur & traistre. Armée Nauale dudit du Doignô contre Bourdeaux. Le Marquis de Saulvebeuf reuiet à Bourdeaux. pag. 362.

Chap. 3. Lamote Guyonnet & Richon Larodièrè commandant l'armée Nauale de Bourdeaux. Armée Nauale des ennemis. Les bruslors sans effet. Vaillance du Capitaine Gyraut, & sa mort glorieuse. Attaque à Lormô par le Marquis de Saulvebeuf. Attaque de S. Macaire par les Espèrnonistes. Perfidie & lascheté de Beaupuy. & Rions. pag. 376.

Chap. 4. Le Duc d'Espèrnon se joint avec le Conte du Doignon pour opprimer Bourdeaux. Deputation vers le Mareschal de Praslin à Blaye. Attaque de la Bastide & de Bacalan. Response du sr. Marin à la demande du Duc d'Espèrnon. pag. 394.

Chap. 5. Autre paix enuoyée au nom du Roy à Bourdeaux. Declaratiô du Roy pour cette paix, & discours pour remerciemêt d'icelle à S. M. 406


Chap. 6. Paix violée par le Duc d'Esp. Offre du secours de l'Espagnol par le Baron de Bateville. Honneurs funebres rendus à la memoire du feu Marquis de Chambaret. Dessein du Mareschal de Praslin d'enleuer le Baron de Bateville. Nouvelle de la detention des Princes. pag. 431.

Chap. 7. Paix decouverte trompeuse. Le Duc d'Esp. appelle le Cheualier de la Valette. Arrest sur l'infraction de la paix, mais sans effet. Autre deputation du Corps de Ville, où le sr. Côtans Jurat fust député. Cayer alteré pour la demande du changemêt de Gouv. Citad. de Libourne demolie p. 445.

FIN de la Table des Chapitres du premier Volume.

Fautes suruenues en l'Impression.

Page 14 ligne 5. *masquee*, lisez *musquee*. pag. 20. l. 24. *mouter*, lis. *monter*. pag. 25 l. 3. *Vinet*, lis. *Vinet*. pag. 31. l. 21. *nostre*, lis. *leur*. pag. 31. l. 22. *ses*, lis. *leurs*. pag. 51. l. 9. *l'innocence*. lis. *l'innocente*. pag. 148. l. 11 *Pechon*, lis. *Pichon*. pag. 170. l. 7. *nostre*, lis. *n'estre*. pag. 213. l. 16. *Clameau*, lis. *Claueau*. pag. 219 l. 16. *Rechon*, lis. *Bechon*. pag. 253. l. 6. *compliques*, lis. *compliquées*. pag. 261. l. 12. *lieu*, lis. *lieu*. pag. 276. l. 5. *neantmoins*, lis. *nonobstant*. pag. 296 l. 4. *contention*, lis. *capitation*. page 335. l. 2. *Romatt*, lis. *Romater*. pag. 385. l. 15. *brigue*, lis. *baigne*. pag. 432. l. 15. *longuer*, lis. *longueur*. pag. 442. l. 9. *cu*, lis. *cu*. pag. 446. l. 2. *ses*, lis. *les*.
Nota. Qu'à la premiere page de l'aduertissement au Lecteur, ligne 33. il y a *detache-*
re ne fait, ce mot de *fait* est superflus.



[illegible]

CALL NUMBER

Vol.

944.71

Date (for periodical)

F683H

Copy No.

944.71

F683H

627766

